

C A R M I N A  
S E L E C T A  
E X I L L U S T R I O R I B U S  
P O E T I S

SAECULI DECIMIQUINTI  
ET DECIMISEXTI


*Studiosis adolescentibus citra morum labem  
ad perlegendum proposita.*

P A R S S E C U N D A.



VERONAE MDCCXXXII.

Ex Typographia Petri Antonii Berni Bibliopolae.  
SUPERIORUM PERMISSU.



# E L E N C H U S P O E T A R U M,

Quorum opera in hac secunda parte continentur.

<b>J</b> O: <i>Antonii Vulpae.</i>	<u>Pag.</u> <b>1</b>
<i>Honorati Fasitelli.</i>	12
<i>Jo: Matthaei Toscani.</i>	26
<i>Pierii Valeriani.</i>	57
<i>Marcelli Vestrii.</i>	-0
<i>Pompeii Ugonii.</i>	73
<i>Bernardini Partbenii.</i>	80
<i>Octaviani Manini.</i>	92
<i>Jul. Caesaris Scaligeri.</i>	97
<i>M. Antonii Mureti.</i>	122
<i>Jo: Mutii Aurelii Mantuani.</i>	130
<i>Petri Criniti.</i>	138
<i>Belisarii Gadaldini.</i>	144
<i>Caroli Malatestae.</i>	148
<i>Joannis Thomae Musconii.</i>	152
<i>Incerti Auctoris.</i>	156
<i>Baptistae Guarini Filii.</i>	160
<i>Laurentii Gambarae.</i>	166
<i>Cynthii Jo: Baptistae Gyraldi.</i>	172
<i>Paulli Jovii Junioris.</i>	174
<i>Jo: Aurelii Augurelli.</i>	179
<i>Gabrielis Faerni.</i>	186
<i>Philippi Beroaldi.</i>	191
<i>Ludovici Bigi.</i>	192
<i>Joannis Tonsi.</i>	194
<i>Pompeii Ugonii.</i>	197
	Ba

<i>Basilii Zanchii.</i>	Pag. 199
<i>Jo. Antonii Taygeti.</i>	202
<i>Caelii Calcagnini.</i>	218
<i>M. Antonii Casanovae.</i>	221
<i>Hieronymi Salinae Caeci.</i>	224
<i>Michaelis Silvii.</i>	225
<i>Annibalis Cruceii.</i>	225
<i>Jul. Ascanii Tuccii.</i>	226
<i>Achillis Bocchii.</i>	229
<i>Antonii Marii.</i>	230
<i>Incertis Auctoris.</i>	233
<i>Hieronymi Aleandri.</i>	234
<i>Bernardi Naugerii.</i>	235
<i>Incerti Auctoris.</i>	235
<i>Hieronymi Balbi.</i>	241
<i>Guglielmi Modicii.</i>	244
<i>Partbenii Paravicini.</i>	246
<i>Fabii Vigilis.</i>	247
<i>Petri Gherardii.</i>	250
<i>Petri Gravinae.</i>	252
<i>Hieronymi Faleti.</i>	253
<i>Ant. Francisci Rainerii.</i>	255
<i>Aurelii Orsi.</i>	258
<i>Antonii Thylefii.</i>	260
<i>Baptistae Spagnoli.</i>	264
<i>Antonii Campani.</i>	268
<i>Jul. Roscii.</i>	269
<i>Thomae Corraeae.</i>	271
<i>Joannis Darchii.</i>	279
<i>Jacobi Rufini.</i>	288
<i>Ex Vetusis Lapidibus.</i>	297





I  
J O . A N T O N I I  
V U L P A E  
C A R M I N A  
D E B E M B O .



ANTABAM memini pulcer tibi  
carmen Alexi,  
Quum nova sese oculis obtullit ara  
meis.  
Obstupui, cecidere animi, stete-  
runtque capilli,  
Sanguis abit, quid agam (tunc ego)  
quove feror?

Protinus ecce vocor : rursusque, iterumque vocatus

Adspicio : ternas vidimus ire deas .

Altera tura manu gestabat , & altera pilum ,

Tegmine clara oleae tertia frondis erat .

Prima est Thusca mihi Romana est altera Pallas

Cognita ; quae comes his Attica virgo fuit .

Indicium Thuscae sacri pia turis acerra :

Martia Romanae pila dedere mihi :

Atticae oliviferi viridis frons baccaque rami ,

*Pars II.*

A

Per

Perquam Cecropio nomina parva solo  
 Dum sequor, in strato fulsit mihi purpura lecto,  
 Quem subjere novem, turba diserta, Deae.  
 Hunc circum aurato resonat dum pectine Phoebus  
 Prima pio querulos edidit ore modos.  
 Qualem fatali transfixo vertice penna  
 Deficiensque suo funere cantat olor.  
 Caepit. Quae fuseram cunctis praelata puellis  
 Dum tu vivus eras hei mihi, nunc jaceo,  
 Quae sermone feras, mulcebam, & carmine blando  
 Dum tu vivus eras, hei mihi, nunc taceo.  
 Fleximus, heu cantu Venerem, vix vulnera sensi  
 Dum tu vivus eras: hei mihi nunc pereor.  
 Ah mea quis misero miscet Deus ora fletu?  
 Proque jocis tristes has mihi dat lacrimas?  
 At dum plura cupit, siccis vox faucibus haesit,  
 Addidit his quaestus, virgo Latina suos.  
 Qualibus ambustum proles Clymeneia fratrem  
 Sole satum gelidi flebat ad amnis aquam.  
 Talibus illa modis lacrimisque cadentibus orsa est  
 Maesta os, scissa comas, lumina fixa solo  
 Stabam ego dum stares, & te regnante manebam:  
 Labere, sum tecum lapsa: cadis, cecidi.  
 Eheu quo cecinit quove hic est ore loquutus?  
 Illa mihi quis nunc aut canit aut loquitur?  
 Exciderat mihi priscus honos: tu reddere priscum.  
 Hei mihi, tu moreris, priscus honor moritur.  
 Eheu quod tecum calamis modulata placebam,  
 Eheu quod modulor te sine nec placeo.  
 Plura dolor vetuit. sed non minus aemula tandem  
 Graja suo querulum fudit ab ore melos.  
 Qualem quæsta sui casus memor Atica vocem  
 Vere novo Geticis dat Philomela jugis.

Taliserat Grajae, tristisque & blanda vicissim  
 Vox, linguae interitum dum flet & illa suae.  
 Quae simul acquestae, pronae incubuere jacenti:  
 Osculaque exanguis dat sua quaeque seni.  
 Et simul: ara tibi Romanae esto urna Minervae,  
 Haec tibi Palladio convenit urna viro.  
 Nec mora, sacrati ventum est ad limina templi:  
 Et data funereis turea dona focis.  
 Et dixere vale, & requiem optavere perennem.  
 Et tumulo carmen composuere suum.  
 Conditur hoc tumulo doctorum fama virorum,  
 Musarum nuper vita, modo interitus.  
 Assensere novem, Phoebus pater annuit illis:  
 Fregit & auratam, qua cecinere, fidem.  
 Intonuere poli: Tiberi vagus Adria fluctus  
 Miscuit, o mirum, fecit & ars idem.  
 Fecit idem Alphaeus, qua Graja prorsus ab ore  
 Lucidus in Siculas mergitur Arnus aquas.  
 Intonuit rursus laevum clamoribus aether  
 Insonuit patula est urna reperta senis.  
 Raptaque in aethereas auras fugit umbra: cadaver  
 Conditur: ut licuit visere, Bembus erat.

## DE MARCO ANTONIO FLAMINIO, QUI

PUTABATUR MORTUUS, AD FRANCISCUM

TAURELLUM.

**T**AURELLE optime mi patrone & idem  
 Olim in urbe sodalium meorum  
 Prime. Flaminius tuus metisque,  
 Quem cuncti modo mortuum putantes  
 Luxerunt juvenes bonum ut parentem,

4 JO. ANTONII VULPAE

Luxeruntque senes bonum ut sodalem,  
Vivit, atque valet Deo favente.

Quem sancte coluit, pieque semper.

Sic est. Flaminium meum tuumque

Viventem alloquor, audio loquentem

Illa nectare dulciora verba,

Dicentemque gravedini salutem,

Vitae dicere quam antea parabat.

Verum ne auxilio medentum & arte,

Aut labore putes eum retentum

In vita jam animus solutus arcto

Nexu corporis incolebat astra

Nil mortale videns, nihil caducum.

Sed nobis fuit ille restitutus

Votis, & precibus mei Priuli.

Nanque afferre solent Deo supremo

Vim vota, atque hominum preces piorum.

AD HIERONYMUM DANDINUM

EPISCOPUM FORO CORNELIENSEM.

QUOD te interpellem nugis, dum publica tractat  
Munera, & ingenti rerum molimine anhelas,  
Des veniam vel te culpes Dandine necesse est.

Qui mihi dum comis nimium, nimiumque benignus

Das faciles aditus, epulis, & divite mensa

Excipis, hos a me inverecundos elicis ausus.

Contra alii quidam, bifida qui tempora mitra

Cingunt, congressus fugiunt, turbamque precantem

Colloquiis arcent, centeno poste ministris

Et totidem appositis. Quod si, cum maxima rerum

Postulat hoc moles, precibus vel munete nonam

IN

Irrumpas, decimae truderis limine portae.  
Tu facile ingenium natura, mitius arte  
Efficis. hinc casu adverso tristaris amici  
Non secus atque tuo, curis & frangeris iisdem.  
Hoc tibi me cogit causas exponere, quare  
Sortiti dominum clarum natalibus, annis,  
Fortunis, animo illustrem, virtutis amicum,  
Post sextum mensem Roma discedimus hoc tu  
Forte malum ducis? nos contra si vacat, audi.  
Me pater haud vilis, susceptum conjuge honesta,  
Primum natorum sex, vix fantem, ac pede firmo  
Tentantem gressus, semotam ablegat in oram,  
Scilicet ut possem post prima elementa Latinum,  
Et Grajum pelagus certa fulcare carina.  
Eventus poterat voto arridere, quod essem  
Ingenio haud prorsus stupido: cum quatuor annos  
Atque decem nato rapuit libitina parentem.  
Inde domum rediens cesso, lustrumque supine  
Traduco. post, me patruus patria expulit, atque  
Ticinum misit, tabulisque incumbere bis sex  
Iussit, scita decem queis sunt inscripta virorum.  
Hic ego sub claris posui rudimenta magistris  
Militiae, implevique novem stipendia: post quae  
E meritis mittor donatus cum rude lauro.  
Post haec in patria, turba comitante clientum,  
Dum causas agito, & defendo, jura popello  
Tetrica responso, non parva pecunia, verum  
(Quod majus duco) mihi gratia quaeritur ingens.  
Hic legor, & populi, & sancti ex mente senatus,  
Qui lustrum condam, qui scribam civica jura,  
Judicio & praesim. post nostra missus ab urbe  
Legatus, faciles lassavi Caesaris aures.  
Quid quaeris, proprias tumido dum proiicis ore

Laudes? hac poteram fortuna vivere laetus,  
Ni mihi, ceu stipulis ignes injecta, fuisset  
Ambitio, nobis dum proponuntur honores,  
Atque aurum, dum tu occurris, pariterque Maphaeus,  
Atque alii pauci, qui orbis tractatis habenas,  
Nec merita expendo, curas, tantosque labores  
Infomnes quae vos cogunt traducere noctes,  
Captus opum tanto splendore & lumine claras,  
Ceu Satyrus quondam, flammis exurere sensi.  
Si mihi non stabat Pariis sustulta columnis  
Regia, nec sensus fallentia marmora: saltem  
Culta domus fuerat, tenuis sed munda supellex,  
Qua exciperem insignes homines ex classe secunda,  
Communis queis nostra fuit semper domus, & res,  
Et census, parvus certe, at sine crimine partus.  
Ire salutatum nos atria nulla potentum  
Cogebant, multa cum limina nostra salute  
Ferverent: fuit & comitum lectissima turba,  
Quos nobis mores, studium, & par junxerat aetas.  
His ego gaudebam: domini cum nomine Romam  
Evocor: haud credo: sed te vult me vocat ille?  
Sic est, at ludis: quid enim stupidi, atque pusilli  
Me ingenii capiat tantus rex? est ita: me, inquam,  
Tertia deinde venit, nuto: sed epistola quarta  
Expugnat: quis enim multis magnisque repugnet  
Promissisque? mitto quae fors sperare juberet.  
Ex illo & patria, & comites fordescere nobis  
Coepere, & fastu sensim turgescere pulmo.  
Hinc tumidis ducens ingentes foliis auras,  
Omnia magna sono, reges, diademata, mitras.  
Ante oculos stat Roma mihi noctesque diesque,  
Haeret Roma oculis: infomnes cernimus arcem,  
Rostra, Theatra, Forum, Saturni templa, Suburram.  
Flen-

Flentibus hinc fociis tandem discedimus : armos  
Argento grvida nobis lassante crumena .  
Omnia dum propero, retinent me: in limine primum  
Offendo : valvisque lacinia vestis adhaeret :  
Claudicat alter equus soleis offensus : ab alta  
Ilice parra canit laeva : occurrit lupus, anguis  
Rumpit iter : pluviae, altisque erumpentia ripis  
Flumina nos tardant : properavimus attamen, & diis  
Iratis magnae perveni ad mcenia Romae .  
Hic dominus, quod erat curarum turbine magno  
Oppressus, sero me admittit ad oscula dextrae,  
Excipit & paucis verbis, & fronte serena,  
Quae nutantem animum firmarent : inde suorum  
Scribimur in numero . Sed bina cubilia primum  
Conducenda mihi, stabulum post, deinde culina  
Quae quater undenas nos cogunt pendere drachmas  
In mense : at dominus promisit : ferre necesse est,  
(Unus ait) multo quod regia plena cliente est .  
Sidi dispensator jubet, hospitiique magister,  
Chironomo, scurrae, productori, aut citharoedo  
Adsurgas : quid enim? pereat ne sportula, quippe  
Tres nobis numerat nummos mercede diurna  
Cū pueris, & equo: hinc quaerēda caro, hinc olus, hinc  
Hinc oleum, scombri parvae, vilesque faselli : (sal,  
Odit enim lepores, turdos, conchilia, mullos  
Mensa mihi, & pueris communis : sportula quamvis  
Sit tenuis, nobis nunquam datur integra : avaro  
A quaestore aliquid semper corraditur : ultra  
In primo quod nulla mihi sit reddita mense  
Praepositus stabulo domini negat hordea, foenum,  
Et stramen : negat ille mihi? negat improbus : ardet  
Intus bile jecur : descendō ad jurgia : tandem  
Post quartum mensem vilem metitur avenam,

Et putidum culmum, pudeat quem sternere, & illa,  
 Quae in vacuas palcas, & purgamenta recedat,  
 Si cribro excutias: non assignantur equilis  
 Aut locus, aut statio. post tres cellarius horas  
 Dimittit puerum tandem redit ille lagaena  
 Dimidia. verum sic diluta, ut mihi Tibris  
 Fluctuet in stomacho, cum credo hausisse Falernum.  
 Hic ego, tot paream dominis? tot pessima liber  
 Facta feram? semper me impune poste repellat  
 Janitor implumis; rosea facie, cute levi,  
 Cirrataque coma? si non distringimus enses  
 Fulmineos, liceat genuinum frangere more  
 Lucili, generet rabies ne pressa venenum.  
 Mitto quanta tuli, patiarque incommoda, mane  
 Summo profilio stratis: & currimus usque  
 In Vaticanum pluviis, seu solibus aether  
 Saeviat hic stantes aliquot consumimus horas,  
 Ut dominum videam, quem claudunt ostia centum,  
 Atque aditus centum: populis ut praebeat aures,  
 Egreditur tandem, quem nos veneramur aperto  
 Et capite, & genibus flexis, dum quisque videndum  
 Praeponit sese, impellor, turbaeque procella  
 Jactor, postremus ne sim, sed viribus, ausu,  
 Et cubito aperienda via est. Si forte vehatur  
 Aut mulo, aut rheda, raptim sequor, ilia equorum  
 Tundens, post redeo perfusus pallia caeno.  
 Postea cum dominus discumbit: stans ego contra  
 Illi me oppono, ut si tollat lumina mensa,  
 Me videat, lustroque oculis, si forte beatum  
 Me obtutu faciat: si me servire parato  
 Utatur, si sponte aliquid mander, jubeatve.  
 Sed frustra ante oculos versamur: namque secundus,  
 Tertius, & quartus mihi mensis labitur, atque  
 Post



Post quintum sextus, cum nec mandata, nec ullum  
Accipio a domino verbum: comis tamen ille  
Omnibus arridere, joco perstringere, & ultro  
Compellare: tamen solus dimittor, ut ille,  
Quem vel relligio, aut morbus congressibus arcet.  
Hinc nos sollicitant curae: indignatio flammas  
Excitat, & rabies fundit nigrum ore venenum.  
Ergo ego, qui ut scribam, aut responsem civica jura  
Evocor hic tantum spectator Laocoonti  
Servio marmoreo? praeceptis Pythagoreis  
Vincior? Harpocratis factus sum ad templa sacerdos?  
Debebas illum tu compellare: egone illi,  
Quem tantae exagitant curae, quem tanta fatigat  
Congeries rerum, me ausim praebere molestum?  
Excivit, veni, sto coram, me videt omni  
Luce vel invitus: tu, Saulius, atque Maphaeus,  
Et Jovius profertis me: respondet at ille  
Comiter, est cordi: memini, cum tempus erit, tunc  
Accersam. at cesso: tentem Dandine quid ultra?  
Quid faciam? patere. hic nobis plus deperit uno  
Mense animi cultus, quam quod profecimus anno  
Evolat e loculis aes: curis urimur ultra  
Quod mihi relligio est domini consumere fruges  
Segniter, & lecto, atque epulis traducere luces.  
Rusticus Aufidius, conducti cultor agelli,  
Assuetus glebas curvo versare tridente,  
Et segetes farrire, boves & jungere, multo  
Cum frangi interdum sentiret membra labore,  
O fortunatum (dicebat) cui datur urbem  
Incolere, & duri vitare incommoda ruris:  
Sors favit: vocat hunc quidam heros magnus in urbē:  
Accurrit turgens spe, ac ambitione laborans:  
Deliciis urbis capitur: thermas, & compita lustrat,  
Atque

Atque forum. Sed dum dominus, nihil imperat illi,  
 Oscitat, & vacuus cessat, luditque canitque:  
 Multa dies tamen & superest: tunc otia damnans  
 Urbis, conqueritur tardos procedere soles,  
 Hinc se se incusans, quod vitam ferre priorem  
 Nescisset, dominum convenit, me mihi, dicens,  
 Me mihi redde precor, vita ne frangar inertī,  
 Et menti & nervis obducant otia callum:  
 Ne si forte tibi me invisum fecerit aetas,  
 Atque tuis domibus migrandum sit mihi: sero  
 Praeteriisse dies doleam: quod rustica nobis  
 Ars pereat, nequeantque assuescere membra labori.  
 Sic mihi, ne ingenium, assiduo quod vomere fessum  
 Vix ferat exiguas fruges, si cesset opella,  
 Ad steriles redeat stipulas, secedere praestat.  
 Num dominum culpas? me accuso, quod nimis audax  
 Huic tanto servire virō me posse putavi:  
 Fortunamque meam damno, quae nesciat uti  
 Re oblata. dominum culpem? quis mitior illo,  
 Munificus ve magis? cum fulgeat omnibus aequē  
 Sol, si durefcit coenum, si cera liquefcit,  
 Haec potius solis radios accuset, an ipsam,  
 Natura quae non valeat durefcere? comis strum  
 Omnibus est dominus. negat hoc quis? sed mihi (no-  
 Peccatum fateor) nimis est durus, gravis, asper.  
 Has Dandine putas causas quod linquimus urbis  
 Moenia, & armato stimulamur calce caballum?  
 Falleris ut mittam quod cura domestica dudum  
 Me vocat, & nisi crescat, saltem ne pereat res,  
 Urget me major ratio: nam cura salutis,  
 Et vitae nobis praeponitur ambitioni,  
 Atque opibus, licet illa aliis sit vilior alga.  
 Est mihi cara, ideo leti eripienda periclis,

Sive

Sive cibi vitio, seu caeli, five falerni  
Eveniat, seu forte animis illustribus aër  
Hic solitus, nutrire negat viles, & uti nos,  
Degeneres: ego semper torqueor, atque laboro  
Et stomacho, & capite: hoc semper verrigine circum  
Volvitur: at gravis hic hesternae pondere coenae  
Assiduo turget: jam septima praeterit hora,  
Quod marcescit adhuc: saltamus, currimus, at nil  
Proficimus. Si coenandum sit fercula sordent  
Languenti stomacho: haud obsonia lauta palato  
Respondent: digito in guttur; ceu pharmaca, coenā  
Farcio: vivendum quoniam est: & pondere pondus  
Trudimus hinc macies artus, hinc occupat ora  
Pallor: tabescunt sensus, & lumina foeda  
Caligant: crudosque cibos tussi excreo anghela.  
Sic ego qui vaccas avias, proavosque elephantos  
Possem concoquere, ossa nunc, medio & gravor ovo.  
Contempti augentur morbi, praesensque minantur  
Exitium, si nos paulum praecidere causas  
Differimus lenti, quas non lenire valent  
Pharmaca, vel succi, medicinaeve auctor Apollo.  
Vivere, commoditas magna est, summūq; bonū ergo  
Sedandae ingentes curae, quibus enecor: ipsi  
Quod sim despectus domino fugienda Quirini  
Infamis regio, & caelum grave: nostra petenda  
Est patria: haec quod nos dederit vitalibus auris  
Aut alet, aut saltem producet funera. Roma  
Discedo, mihi quod vitae, quod cura salutis  
Haud spernenda fuit, causam hanc adducimus unā.  
Quam si forte probas tu, Saulius, atque Maphaeus  
Quos veneror tanquam nostri tria numina saeculi,  
Non ego curarim quid latret cetera turba.  
Haec Dandine tibi Venusina scripta camoena

Car-

Carmina dictabant Senis, dum sedulus hospes  
 Curat equos, nobisque dapes apponit: ut istic  
 Siquis me accuset, domino purgare valeres.  
 Plura loquuturum me pagina deserit: hospes  
 Sollicitat: comites frigescere fercula clamant:  
 Ergo vale, inque tui me scribe volumine census.

# H O N O R A T I F A S I T E L L I C A R M I N A.

## AD SCIPIONEM CAPYCIUM.

**Q**UI s mihi nunc ruri non suadeat esse Capyci,  
 Et vetet agresti munera ferre Lari?  
 In patrios migravit agros, caeloque Caserta  
 Devocat aeternos ad sua rura Deos:  
 Et facit, ut magnum Campania terra Tryphonem  
 In parva jactet se quoque habere casa.  
 O ego quid cesso? populiue urbesque valete,  
 Et quaecunque levis compita vulgus amat:  
 Vulgus, in extremis quaesita Themistita terris  
 Cui placet, incertis & Calicuta viis.  
 Nescio quae Calicuta novo sub sole reposta,  
 Aeternum Hispanae munus avaritiae.  
 Nempe parum fuerat, nostris ditescere regnis,  
 • Et versare avida fasque nefasque manu:  
 Intactos nisi classe nova penetrasset ad Indos,  
 Intentata rudis Tethyos ad spatia.  
 Scilicet a curvo miles digressus aratro,

Prae-

Praeceptis trans terras , & maria alta ruit .  
Iamque super solis cursusque aestusque perennes  
Audet in ignotum tendere vela salum .  
Sic alius nobis alio micat orbe Bootes :  
Mersaque sub Stygio gurgite terra patet .  
Ille quidem victor terris advertere proram ,  
Et nova post tanto gestit adire sola .  
Ignari rerum populi , per littora fusi ,  
Mirantur liquidas currere monstra vias .  
Nunc alacres properant , trepida nunc mente resistunt :  
Attollunt caelo lumina cum manibus .  
Dumque nova passim tacti dulcedine torpent ,  
Et multa ancipites speque metuque fremunt ,  
Ecce tubae subitus magnum ferit aethera clangor :  
Et crebra resonant tympana pulsa manu .  
Illi Nereidas divina voce canentes ,  
Et sanctos rentur Doridos ire choros .  
Inter se miris obvertunt nutibus ora :  
Et plausum magnis vocibus ingeminant .  
Ast , ubi fulmineo caelum tremat omne fragore :  
Et late fumo stat graveolente fretum :  
Tum vero ingenti perculsi corda pavore ,  
Bacchari Eumenidas per vada falsa putant .  
Nec flammam jam ferre novas , ictusque minaces  
Permixtumque gravi sulfur odore queunt .  
Pars fugit , & silvis se se procul abdit opacis :  
Agmine pars denso regia iussa facit .  
Regem magna virum , proceraque colla duorum  
Sublimem junctis sustulerant manibus .  
Hi currus illis , hae sunt in honore quadrigae :  
Non aliis prisco more vehuntur equis .  
Sed quibus ille paret contra contendere telis ?  
Aurum habet : hoc plena porrigit usque manu .

Quid

Quid facis ah demens ? gemmas, aurumque reconde .  
Muneribus perdis teque, tuosque tuis.  
At felix quondam patriis Epicurus in hortis,  
Dum sibi & ipse ferit, quod sibi & ipse metit,  
Contentus modico vitam traduxit agello:  
Nec labes sanctum polluit ulla senem .  
Hei mihi, quid dixi ? caelestes parcite fasso:  
Contempsit magnos impius ille Deos.  
Securus leti, Stygiae securus & undae,  
Risit tergemini ferrea vincla canis.  
Non ego, qui soleam sacra menstrua (vos mihi testes)  
Excidit: & linguae, non mea culpa fuit.  
Sanctum ego iudicibus potuissem dicere vobis,  
Flagraret tanta ni scelus invidia.  
Infelix Epicure, nec hoc mihi nomine care,  
Numina tu ne ausus temnere magna Deum?  
Tu ne ausus Grajas convellere sacra per urbes,  
Et dulci mentes fasce levare pias?  
Stulte luis poenas: quam nunc Acheronte sub imo  
Velles accensis tura dedisse focus?  
I miser, Eumenidum pendentes fronte colubros,  
I nunc, & manes, & Phlegethonta nega:  
Persephonem, Ditemque nega. te Tartarus horrens  
Compescat: miris excrucietque modis.  
Sed mea quae pietas, unum hoc ignoscite Divi,  
Tuncque illum sanctum quis neget esse, rogem.  
Quis tunc oro, neget? primis cui semper ab annis,  
Ut sine cura esset, maxima cura fuit  
Non vasti tumidis pelagi se credidit undis:  
Flecteret ut dubiam per freta caeca ratem.  
Non litui strepitus arrectis auribus hausit:  
Nec stupuit media vellera tincta Tyro.  
Denique despexit curas: quaecunque sequaces

Pro-

Protinus a tristi pectore nos abigunt.  
 Quin rerum causas tantum libare latentes  
 Constituit primi liminis ante fores.  
 Ne curis animum torqueret inanibus aegrum,  
 Cerneret & medio somnia vana die.  
 Huic igitur meritam dubitem concedere laudem:  
 Et titulum nudi nominis invideam?  
 Quin senis exemplo jam stat quoque, pace Deorum,  
 Hoc reliquum vitae degere, quod superest.  
 Urbis delicias in caelum ferte sodales:  
 Urbs aliis placeat, sordida rura mihi.  
 Hic juvet infanos animi componere motus,  
 Et legere in tuto linthea laxa sinu,  
 Armaque pro templo non magnae figere villae,  
 Sospitis & cymbae texta soluta meae:  
 Tum longis dulces somnis adjungere somnos,  
 Et saepe ipsius non meminisse mei.  
 Dii facite, immites diserpant cetera venti:  
 Haec pars e votis sit rata sola meis.  
 Ut sit, qui possit de me quoque dicere, felix,  
 Urbe procul solis qui sibi vivit agris:  
 Vivit: & aeterno Christi dum flagrat amore,  
 Farre pius modico rustica sacra facit:

## A D D E O S.

**O** INTER veterem, & novam Theatrem  
 uime Dii statuistis immerentem,  
 Quid vobis voluistis? an poetam  
 Vestrum perdere per jocum, atque ludum?  
 Nam quid feci ego, quidve sum loquutus,  
 Cur vos tam male me, male atque acerbè  
 Haberetis, ineptiusque multo,

Quam

Quam Rheae deceat genus beatum?  
 Esto: enim mala nostra vos juvant.  
 Una non fatis, & super Charybdis  
 Erat? quorsum opus addidisse Scillam?  
 Sed freto bona ficus in Sicano  
 Duci Dulichio tulit salutem.  
 Nobis in Latio salus Latinis  
 Est a montibus expetenda summis:  
 Ut Phoebus cithara increpans sonora  
 Ter per somnia visus admonere.  
 Quare Tibridis ad fluentia Montes,  
 Qui gratissima regna Diis tenetis,  
 Caelo vertice proximi, & decorum  
 Incincti triplici caput tiara,  
 Summos vos adeo, rogoque supplex,  
 Ut monstro me ab utroque liberetis.  
 In sinu liceat latere vestro,  
 Et sacra recreare me sub umbra  
 Non fici Siculae, sed Innocentis  
 Floridae, peramabilisque olivae:  
 A cuius mihi ramulis in orbem  
 Plexis, Palladium petam coronam,  
 Et colam omnia vestra dicta, facta.  
 Sic post saecula longa & usque & usque  
 Vobis non modo collum superbas  
 Septem assurgere gratulemur arces,  
 Sed magnum Oromedonta, & ipsum Olympum.

### IN ASPASIUM MALUM POETAM.

**A**D me tam stupidi, & mali poetae  
 Aspasij maledicta numquid hilum  
 Pertinent, rogo? noti uterque nostrum  
 Bonis



Bonis omnibus, & malis ad unum,  
 Ego, atque ille fumus. suis uterque.  
 Solum me miseret dicacitatis,  
 Qua fertur stolidus, ruitque praeceps,  
 Caecus nequitia, in meos jambos.

## IN PAULLUM JOVIUM.

**N**AE debent Jovio viri elegantes,  
 Bonis artibus his, & his politi.  
 Nae debent Jovio elegantiarum  
 Parenti, artibus omnibus polito,  
 Quantum vix animus capeffat ullus,  
 Nec vivi modo, qui vident, amantque  
 Urbani senis & falem, & lepores,  
 Sed quos lumine adempto avarus Orcus  
 Quis scit quo cohibet loco misellos?  
 Nam facit Jovius fuistabellis,  
 Excultis lepidio suo labore,  
 Leti funera non timere vivos,  
 Vitam vivere mortuos perennem.

## AD ANTONIUM PERENOTUM

## C A R D I N A L E M.

**C**UM quisquam maris aestibus  
 Deprensus, truculenti, & rabie Noti,  
 Jactatus lacera trabe,  
 Certus naufragii, vota Deis facit,  
 Implerint subito leves  
 A puppi si animae lintea, & aestibus  
 Ereptus, rabie & Noti,

*Pars II.*

B

Ter.

Terras prospiciat, quas petit, & prope  
Accedat magis, ac magis

Cara ad littora, caram ad requiem, & lares,  
Non jam naufragium timens,

Attollit mediis laetus in aethera

Ex undis duplices manus,

Praesenteſque ſupinus celebrat Deos:

Quos ſperat fore perpetes.

Purgato rapidis caelo Aquilonibus,

Dum terras cupidus premat.

Sarcit carbaſa mox, & reficit ratem

Diris fluſtibus erutam:

Tranquillo det hians ne pelago prius,

Quam portum ſubeat, latus,

Et, qui nunc fuerat praefidio Dei

Servatus, ſua inertia

Magno cum opprobrio turpiter occidat.

Is, poſtquam incolumes tulit

Tandem in littus amicum madidus pedes,

Piſtis veſtibus, & trabe

Votivam ſuperis pariete de ſacro

Suspendit tabulam, memor

Quam vim ſuſpiciat numinis, & colat.

Ceſſet ſi auxilium Dei,

Nil noſtrum ingenium, nil valeant manus,

Sitque incognita caeliturum

Virtus, ſi nihil aequo ab Jove deſluat.

## AD NICOLAUM ARDINGHELLUM

## CARDINALEM.

**E**ST quidem hoc aliquid, fatemur omnes,  
 Non magnum modo in urbe te, sed inter  
 Patres posse videre purpuratos.  
 Est quidem hoc aliquid, fatemur omnes  
 Ardinghelle: fatemur, & frequentes;  
 Hinc, atque hinc tibi gratulari avemus.  
 Sed quod sit fatis, id negamus omnes,  
 Quantum, quod pote plurimum negari.  
 At, cum maximum in orbe viderimus,  
 Insignem triplici aurea tiara,  
 Quae virtus tua, nostraque omnium est spes,  
 Tum vero id poterit fatis videri.

## AD F. CORNELIUM.

**U**NUS qui reliquus mihi patronus  
 Corneli fueras, vetusque amicus:  
 Qui excelfo usque animo esse me jubebas  
 Firma in spe, eximiaque maximaque  
 Ut jam istos facerem pili beatos.  
 Nunc diversus abire, nunc videris  
 Idem non animo esse, non loquela.  
 Et quod me cruciat magis, magisque  
 Nullam ob causam aliam, nisi ob facetiarum  
 Unam, ridiculamque, futilemque  
 Quod Farnesius ad jocum libenter  
 Refert omnia, qui solet jocari  
 Tecum, & cui fuerit bono rogare.

Atque hic tu, mihi per jocum, atque lusum  
 Verbis illius (o novos lepores)

Quid non dicere, vel tacere pergis?

Commentum placet elegans, salisque

Plenum, sed mihi crede, vultu, ocellis;

Pallore, atque tremore, denique ipsa

Nae tu proderis oscitatione.

Tun me? tun mihi? qui tibi, sed ad rem.

Amabo, mihi desine ista post hac

Plane frigida. Sin, vide, palam, clam

Profecto ad Jovium elegantiarum

Appellabo parentem. habet paratas

Is chartas, calamosque sive Etruscos

Malis, sive etiam Latiniores:

Quales nunc Venetos tuos videmus;

Quibus cum historiam politiolem

Conscribillet ab orbe condito omnem,

Illustrans, celebransque & hos, & illos:

Jure amicitiae petemus, ut te

In hos inferat, & tuos lepores.

## IN GIBERTUM SUMMA INGENII

### INDOLE PUERUM.

**G**IBERTI ingenium bonas per artes

Excultum celebramus urbe tota,

Dignum Socratica institutione.

Hinc est gloria vera comparanda;

Hinc laus ipsa perennior petenda.

Hoc Gibertus amat puer disertus,

Contempta juvenum procacitate,

## DE ANNIA VILLA.

**A** N N I I nemoris sacra  
Citria , & liquido sacer  
Fons fluens pede per nemus,  
Quodque colle habet in sacro  
Mollis acta sacellum :  
Vosque agrestia numina  
Dii deaeque genus Jovis ,  
Frigidum quibus est nemus ,  
Fonsque jugis , & inclyta  
Ara rite dicata :  
Rite si nemore horrido  
Fontè seposito procul  
Imminens pelago capit  
Ulla vos super arduo  
Ara colle dicata :  
Quam relinquo dolens querens,  
Quam reviso volens lubens  
Vos ego ? & tenerum in sinum ,  
Dia ad otia , gaudeo  
Memet abdere vestrum .  
Sive sub nemoris nigri  
Delitere comis juvat  
Et fluente brevi in tuni-  
ca ad vagi Zephyri levem  
Frigerarier auram .  
Sive dulce loquaculi  
Fontis ad gelidos specus  
Sessitare , & aquam hac & hac  
Somnuli illecebram manu  
Usque pellere lenta .

B 3

Tum

Tum modo spatiarier  
Garrula cithara gravem :  
Collis e specula modo  
Mille cernere puppium  
Vela praetereuntum :  
Cum calore canis gravi  
Terra & aequore perfurit,  
Fervidoque Hyperione  
Arctos ista vacat gelu  
Tristibusque tenebris.  
At dies brevioribus  
Rapta cum spatiis ruit,  
Brumaeque extulit horridum  
Verticem gelidae nivis  
Imbriumque potentem,  
Tum foco silva integra  
Advoluta hilarat domum .  
Nos pigri utraque & utraque  
Cruraque & latera indidem  
Ustulamus ad ignem .  
Verna pingue mihi veru  
Versat , & pereat cavet  
Ne qua stilla beator :  
Ac premens fovet offulis  
Uncta crusta svillis .  
Promit hic sibi Caecuba ,  
Miscet ille Falerna , nec  
Hic nec ille spuit , negans  
Firma Massica lenibus  
Diluenda Calenis .  
Tum satur genium laris ,  
Tum larem genii canit :  
Stridulaque strepens cicu

ta hinc, & hinc male sobrio

Ter solum pede pulsat :

Usque dum veniens genis

Conniventibus, & pede

Debili sopor, unus ut

Quisque eat cubitum monet

Oscitante labello.

Qui novi tibi flosculos

Veris explicet, explicet

Is minore negotio

Quot nocte media micant

Clara sidera caelo.

Nec meum officium mihi

Excidit : facio Jovi

Maximo, reliquisque Diis

Semper : ut decet, & boni

Tradidere parentes:

Sive solis ad extimos

Cardines, citimove se

Vertat annus, amabile

Sive rideat ad pares

Mollis aetheris horas.

Illa nocte dieque me

Cura fervidior coquit

Sola, cetera liberum,

Ne sacri ulla operatio

Negligatur aviti.

Hic diu mihi vivere, &

Hic tandem liceat mori,

Semper & lateam immemor

Omnium, bene nec mihi

Saepe cognitus ipsi.

Quod meus Fabius suo

Cum Polo facit optimus  
Optimo, Capimontio  
Rure qui sibi candidum  
    Laetus exigit aevum.  
Quod Caserta facit meus,  
Pontietta facit meus,  
Ille moribus aureis  
Clarus, hic fidibus sacris,  
    Infulaque decorus.  
Quod Mappaheus ad uidi  
Rura frigida Tiburis  
Nuper ambitiosius  
Velle se quoque credulis  
    Jaſtitabat amicis.  
At Farnesius inclytus  
Vota diſſipat irrita:  
Et jubet medio in foro  
Scribat historias graves,  
    Ludicrumque poema.  
Sed Farnesius, omnia  
Qui poteſt, mihi tum meum  
Poſſet excutere Annium,  
Cum ſuum imperium ſibi  
    Poſcet urbis & orbis.  
Sic diu hic mihi vivere,  
Hic mori liceat mihi:  
Et Farnesius, ut lubet,  
Poſſit omnia maximo  
    Nil avo minor olim.  
Vosque agreſtia numina  
Dii deaeque genus Jovis.  
Eſte vos faciles mihi,  
Vos Lares, Genius, foci



Intonate sinistrum.

Sic laetum vireat nemus  
Semper, & vitreus fluat  
Fons perenne, recentibus  
Ara fumet odoribus:

Intonate sinistrum.

Ipse non Heliconio  
Collis invidet jugo:  
Ipsa non Aracynthios  
Optet acta sibi modos:

Intonate sinistrum.

Nullus huc aditum ferat,  
Nullus aut grege cum improbo  
Pastor impius, aut mala  
Ales, aut quadrupes fera:

Intonate sinistrum.

Nullus undisoni aequoris  
Fluctus auribus obstrepat.  
Nulla vos violentior

Tundat aura Favonio:

Intonate sinistrum.



# JO. MATTHAEI T O S C A N I C A R M I N A

## DESCRIPTIO SENILIS AETATIS.

**M**ORTIS propinquæ nuntia  
 Pulsat fenestra jam fores,  
 Canaque verticem nive  
 Conspergit : & frontis cutem  
 Crispat, profundos imprimens  
 Sulcos : & aridas genas  
 Pallore vestit buxco :  
 Usumque minuens aurium  
 Votis meatus obstruit :  
 Jugique luminum elicit  
 A fonte lippitudinem :  
 Unamque palpebram alteri  
 Jungit tenaci glutine :  
 Mucroque nares rancidas  
 Damnât perenni, & polypo  
 Affligit usque: dentium  
 Ex ore vallum decutit  
 Balbo : salivam profluam  
 Derivat in barbam cavo  
 Graveolentis animae de specu.  
 Jam consueto munere  
 Effoeta nostri corporis  
 Pars nulla fungitur satis.  
 Caecutiunt enim vitro

Nunc

Nunc destituta lumina.  
Vox rauca : nec gustus dapes  
Selectiores appetit.  
Omnesque concutit tremor  
Artus : gravedo longius,  
Nec tussis abscedit comes  
Molesta . anhelitus frequens  
Ab intimo haustus pectore  
Jamiam recessurum monet  
Aegre retentum spiritum .  
Quid ergo ? an idcirco , trahit  
Originem qui caelitus ,  
Divinus ille , ille igneus  
Vigor recessit , intimis  
Quem mi medullis inserit  
Caelestis aura spiritus ?  
Non illa non vis pectoris  
Languente languet corpore .  
At semi mortua erigit  
Haec membra mens haec vivida .  
En optimusque & maximus  
Rector rotundae machinae  
Dextram labanti porrigit ,  
Et occidentes corporis  
In mente vires suscitatur :  
Suique amoris fervidos  
In corde aculeos inserit .  
Clamore muto pectori  
Meo insufurrans ad suum  
Numen vocat , trahit , rapit .  
Adsum pater o , adsum tuo  
Sacro aestuans cupidine ,  
Mortalium rerum omnium , &

Ipfius

Ipsius immemor mei,  
 Solius at memor tui.  
 Tu dux, pater, rex, & Deus  
 Pronum, volentem, concito  
 Curfu ad volantem suscipe.  
 Jam corpus hoc sibi grave,  
 Primaque matri debitum,  
 Quam cernuum in dies magis  
 Curvo intuetur vertice  
 Suis refer primordiis.  
 At hunc vigentem spiritum  
 Divinitatis ad tuae  
 Typum creatum, & dextera  
 Fictum tua, necessitas  
 Quem nulla mortis opprimeret  
 Lustra benigno lumine.  
 Huic exeunti, terrea  
 Huic exuenti vincula  
 Alas volucres applica,  
 Ut praepetis aquilae modo  
 Suprema tranans nubila  
 Humo relicta sedibus  
 Tuis, pater, se immisceat,  
 Tui fruatur perpetue  
 Ut numinis praesentia.

## EPINICION CHRISTIANI ORBIS

TURCARUM CLASSE AD LEPANTUM

PROFLIGATA.

QUISQUIS adest, imbuta sacro cui pectora Christo,  
 Cordaque non ficta religione calent,  
 Quam-

Quamque tener lymphis tinctus lustralibus infans  
Induit, intrepidus pro pietate mori,  
Nunc effusa pio testetur gaudia plausu,  
Nunc laeta ter io voce triumphae canat.  
Nulla dies Christum veneranti laetior orbi  
Solis ab Eoo sustulit amne rotas:  
Nunc demum intrepido vitales ducimus auras  
Pectore: nunc demum libera turba sumus.  
Cantet io paeon merito laetissimus orbis  
Hesperia periit classis Eoa manu.  
Haecenus invicti celebratus nomine Turca  
Posse malo discis vincier ipse tuo.  
Praevalidoque caput mutilatus perfide cornu  
Sentis victrices in tua damna manus.  
Ergo miser tanto frontem spoliatus honore  
Attolles truncum qua ratione caput?  
Nos igitur spoliis populus cumulat opimis  
Pergamus summo solvere vota patri.  
Ante tamen castas purgent jejunia mentes:  
Labeque sint omni pectora nostra procul.  
Quin agendum Divum sacris advolvitur aris,  
Votivisque micant tura Sabea focis?  
Caelicolum imprimis grates persolvere regi  
Cura sit, & tali fundere voce preces.  
Omnipotens genitor, summi cui sidera Olympi,  
Humanumque genus, regiaque ima subest:  
Cui chorus aethereus servit, mentesque beatae:  
Qui populos placida justus ab arce regis.  
Tu gentis delicta tuae miseratus, iniquo  
Nostra iugo prohibes subdita colla premi.  
Tu tumidam Scythici rabiemque minasque tyranni  
Comprimis, atque avidam sanguinis usque sitim.  
Egerat extremi vites qui Orientis & Indos,

Gentis

Gentis in exitium corda parata tuae:  
 Cum conjuratae nostras rescindere classes  
 Caerula texerunt aequora mille rates.  
 Immensum ferus ille animis invaserat orbem,  
 Cui fuerat tellus nulla futura satis.  
 Cujus inexhausti fuerant pars ultima voti  
 Cypria crudeli regna subacta jugo.  
 Jam Vaticanani dementes corde ruinas,  
 Romanoque rogam struxerat imperio  
 Ebrius, & dulci fortuna quidlibet audax  
 Sperare & laetis casibus usque ferox.  
 Urbe triumphata captivum ducere Tibrim,  
 In sua purpureos addere vincla patres:  
 Cuique pater geminas rerum permittis habenas  
 Pontificem solio deposuisse parans.  
 At tu sancte parens sortem miseratus acerbam  
 Atque adversa tuo fata propinqua gregi,  
 Prospiciensque tuis tantam impendere ruina,  
 Nullus ut humana sistere posset ope:  
 Vesanum invicta minuis virtute furorem,  
 Assertorque tui strenuus orbis ades.  
 Nam te autore pii coeunt in foedera reges:  
 Pectoraque unanimi jungis amica fide:  
 Communem ut poscant sociatis viribus hostem,  
 Qui viguit nostra seditione diu.  
 Illinc emicuit nostrae spes prima salutis,  
 Sola haec vincendi certa reperta via est.  
 Non humana modo conspirant agmina, pennis  
 Vestra sed aetherea labitur arce cohors.  
 Haec cruce signatis animos viresque manipulis  
 Addidit: incussit sed tibi luna metum.  
 Luna Paretonii signis quae impressa Tyranni  
 Non duraturi roboris omen eras.

Namque

Namque Deo, ducibusque Dei, ventisque secundis  
Gens pia lunigerum subruit agmen aquis.  
Plebs igitur devota tibi, Rex, debita soluit  
Munera, quae meriti est pars quotacunque tui.  
Tu cape quos pietas aris tibi facrat honores,  
Et studiosa tui suscipe corda libens.  
Nos nomen laudesque tuas celebrabimus & cum  
Advehit Eoo Phoebus ab orbe diem:  
Et medii postquam spatium est emensus Olympi,  
Cum pars acta, manet pars obeunda viae.  
Nominis alma tui veniens praeconia vesper  
Audiet, & medio lucida signa polo.  
Tu modo sancte parens felicibus annue coeptis,  
Orsaque divino lumine nostra rege.  
Nunc age laeta Dei sacris operata juvenus  
Sumamus genio laetitiaeque dies.  
Nunc juvet Assyrio medicari rore capillos,  
Ferreque odoratae florea ferta comae.  
Laeta corymbifera frontem redimita corona  
Tota cohors docili ter pede pulset humum.  
Optima nunc tellus, nunc formosissimus annus,  
Pressa fluunt pleno pingua musta lacu.  
Dicite io paeon, & io ter dicite paeon  
Occidit Aegeis barbara classis aquis.  
Solenni lux ista sacro celebranda quotannis  
Nomen ab aeterna posteritate ferat.  
Cesset opus: tauri repetant praesepia fessi:  
Nec valido cultor pondere laedat humum.  
Bellator positus veniat mansuetior armis  
Funerae postquam conticuere tubae.  
Turba ministerio cesset feriata remisso:  
Et sileant rauco jurgia longa foro.  
Igibus in numeris densas arcete tenebras,

U:

## 32 JO. MATTHAEI TOSCANI

Ut niteat multa lampade clara dies.  
 Signaque laetitiae populis ar fura beatis  
 Expediit innumeras tollere ad astra pyras.  
 Jam tormenta gravi resonent displosa fragore :  
 Turribus ex altis aera repulsa sonent.  
 Vos pueri, innuptaeque choros agitate puellae :  
 Impediant nitidas florea ferta comas.  
 Plausibus & late vacuus circumsonet aër :  
 Concordi feriat fidera voce sonus.  
 Dicite io paeon, & io ter dicite paeon :  
 Occiduum subiit classis Eoa jugum.  
 Candida Religio praeclaris aucta triumphis  
 Erigit invicta partu trophaea manu.  
 Namque ea barbaricas violenta cuspide puppes  
 Perculit, & Scythicas ardua fregit opes.  
 Undique conspicuis volitat Victoria pennis,  
 Exultansque suo nomine cuncta replet.  
 Fama per immensum laudes disseminat orbem,  
 Nostrorumque canit fortia facta ducum.  
 Sed cui non tacitum pertentant gaudia pectus,  
 Adfuit ut tanti nuntia fama boni?  
 Excutit ex humeris glaciem pater Apenninus,  
 Hirsutumque novo vestit honore caput.  
 Formosae Dryadesque cavis & Oreades antris  
 Ancipites ducunt molliter arte choros.  
 Explicat Eridanus placidas mansuetior undas,  
 Cui premit humentes mollis arundo comas.  
 Turbaque natarum virides ornata capillos  
 Lascivum jactant per vada lenta genu.  
 Laetitia gestit Rhodanus : laetusque Garumna  
 Hesperium tumidas in mare voluit aquas.  
 Ipse magis solito fulva splendescit arena,  
 Conspicuoque fluit dives honore Tagus.

Quin



Quin etiam Aëtiaci stupuerunt littora ponti ,  
 Udifona & tanti conscia faxa boni .  
 Ipse pater pugnam sensit Neptunus ab antro  
 Aerea dum motas machina terret aquas :  
 Et migrasse suas tonitru miratus in oras  
 Uvida caeruleis extulit ora vadis .  
 Corpora ut aspexit vastas fluitare per undas  
 Milleque disiectas per sua regna rates ,  
 Sparsa natant summis dum fluctibus armamenta ,  
 Dum Scythicus pontum purpurat omne cruor :  
 Aëtiaci (dixit) cedant Auguste triumphi ,  
 Cumque suo mollis foemina pulsa proco .  
 Hellepontiacam cedat qui ratibus oram  
 Junxerat , exiguae praeda futura manus .  
 Prisca suas taceat laudes plebs Romula , quamvis  
 Bis Poeno Siculas sanguine tinxit aquas .  
 Omnia facta patrum sileat verbosa vetustas :  
 En premitur titulis gloria prisca novis .  
 Te quoque magne pater pudeat ne cedere nato  
 Carole , cui domino cessit uterque polus .  
 Gestave non pigeat nati majora fateri  
 In regnis quotquot gesseris ipse meis .  
 Pars licet illa tibi fuerit non ultima honorum ,  
 Venit ab immenso quae tibi parta mari .  
 Tuque age majorum juvenis memoranda tuorum  
 Vincere sic titulis nomina perge tuis .  
 Maeste nova virtute ducum generosa propago ,  
 Praesidium Austriacae dulce decusque domus .  
 Surgit ab Hesperio celebris tua fama cubili ,  
 Et superat rubri littora curva maris .  
 Te victor colit Hesperius : tibi decolor Indas  
 Praeparat imperiis colla domanda novis .  
 Vindice te famulas sperat captiva catenas

Pars II.

C

Hellas ,

Hellas, & infandum deposuisse jugum.  
 Sic fatus, valido mox aequora vasta tridente  
 Impulit : & raticis tempora merfit aquis.  
 Tum simul Austriacum Nereia turba Joannem  
 Ingeminat, Triton personat Austriacum.  
 Austriacum sinuosa sono collisa resultant  
 Littora, & Austriacum saxa repulsa fremunt.

## HYMNUS IN CHRISTI NATALEM DIEM.

**A** N N U A nascentis redeunt solennia Christi,  
 Dum sacra virgineo pondera ventre fluunt.  
 Cesset opus : sacrisque vacent exempta labori  
 Corpora : nam festa luce vacare decet.  
 Jam pectides, fessique petant stabula alta juvenci :  
 Nec valido cultor dente fatiget humum.  
 Mitescat positus miles mansuetior armis :  
 Nec raucae moveant aspera bella tubae.  
 Sacra coronatis celebrentur mystica templis :  
 Uranturque piis thura Sabaea focus.  
 Haec est alma dies nascentis conscia Christi  
 Sanguine tersuri crimina nostra suo.  
 Singula dum refero linguis, animisque favete,  
 Cur pius aetherea venerit arce Deus.  
 Qua Titan rutilo conscendit in aethera curru  
 Ridet inexhausto veris honore locus.  
 Plurimus hic vitreis trepidat pellucidus undis,  
 Blandaue nectareus murmura rivus habet.  
 Hic querulis vacuas mulcet concentibus auras  
 Inter odoratum turba canora nemus.  
 Per liquidum placidis volitat levis aera pennis,  
 Et florum aeternas excitat aura comas:  
 Educat illa rosas, immortalesque amaranthos:

Et

Et vario nitidum pingit honore solum .  
Lactea perpetuis labuntur flumina rivis ,  
Flavaque de viridi cortice mella fluunt .  
Sponte sua tellus maturis canet aristis :  
Atque arbos nullo poma iubente gerit :  
Nec tales olim felicia Gargara messes ,  
Nec fata Trinacrii culta tulere soli .  
Haec inter primi vernantia rura parentes  
Ducebant laetos tempus in omne dies .  
Nec tristes suberant morbi , nec lenta senectus  
Cogebat tremulo membra movere gradu .  
Ipse quoque , aetheream mundi qui temperat arcem ,  
Immunes dederat vivere posse necis :  
Tabificus tanto serpens invidi t honori :  
Et tacita struxit callidus arte dolos :  
Illius impulsu vetitum male credula pomum  
Obtulit ignaro foemina prima viro .  
Tum Pater imponens poenas pro crimine ; jura  
Vindicat imperii facta minora sui :  
Tunc fortunatis fontes exegit ab oris ,  
Et dedit irato talia dicta sono :  
Quae tibi , nostra nisi violasses jussa ; perennis  
Adfuerat placido vita teniore fluens ,  
Nunc brevis , & multo venit aerumnosa labore ,  
Aegraque per leti mille trahenda metus .  
Quasque benigna prius tibi terra ferebat inemptas  
Nunc dapibus pretium non leve sudor erit .  
At , quae prima meas temerasti perfida leges ,  
Haec te commissi poena luenda manet :  
Ne prius ex utero conceptus prodeat infans  
Quam decies curvum luna retexat iter .  
Mox paritura graves gemitu testere dolores :  
Ut jucunda minus sit tibi vita nece .

Dixerat haec Genitor iusta correptus ab ira :  
 Et iussit triplices scribere dicta deas .  
 Hinc labor, hinc lacrimae subeunt, hinc curva senectus,  
 Aegraque consumens corpora dira lues .  
 Semotique prius fati vis effera terris  
 Incubuit, lentum corripuitque gradum .  
 Tantum letiferae poterant contagia culpae,  
 Ut lueret patrum crimina posteritas :  
 Primaque postremos tangebatur culpa nepotes .  
 Proh quam laesa semel numina magna nocent !  
 At Deus hanc hominum sortem miseratus acerbam ,  
 Nosque ratus dura conditione premi ,  
 Collectasque videns vestari in Tartara praedas ,  
 Quos prius artifice finxerat ipse manu ,  
 Confortem statuit natum demittere Olympo ,  
 Certa salus terris quo veniente foret .  
 Mox simulans agili corpus juvenile figura  
 Ales ab aethera labitur arce poli .  
 Atque ubi virginei successit limine tecti  
 Nuntiat aeterni maxima iussa patris .  
 Hanc subita summis demissus spiritus astris :  
 Concipit & salva virginitate Deum .  
 Incorrupta pio complentur viscera foetu :  
 Foecundi verbum seminis instar habet .  
 Clara per obstantes sic se phoebaea fenestras  
 Fundunt illaeso lumina saepe vitro .  
 Contractam virgo sic crimine virginis iram  
 Expiat, humanum restituitque genus .  
 Cynthia jamque novem curru compleveret orbes ,  
 Ac prope nocturnos dena movebat equos :  
 Jamque dies aderat partus celeberrima sacri :  
 Castaque divinum membra gravabat onus .  
 Quem mare, quem tellus, quæ non capit arduus aethera,  
 Autorem

Autorem virgo protulit ipsa suum.  
Nec solitos sensit partu resoluta dolores:  
Sed facile aethereum, sponteque fluxit onus,  
Purpura non artus texit, non serica vestis,  
Sed nudam nudo corpore pressit humum:  
Haec gremio excepit gaudens caelestia membra,  
Atque novo fovit gramine molle latus.  
Ipsa etiam clari praesepia conscia partus  
Credibile est tantis laeta fuisse bonis.  
Quin & asellus iners, & pandi vector aratri  
Ante Deum curvo procubuere genu.  
Laeta haec prima dies fulsit mortalibus aegris:  
Certior hac mundo cepit adesse salus.  
Hac igitur meritos templis cumulemus honores:  
Nascentemque juvet concelebrare Deum.  
Christe dicata tuo natali sacra frequenta,  
Atque pias facili concipe mente preces.  
Dexter ades: populique tui pius annue votis,  
Cordaue caelesti lumine nostra reple.

AD HENRICUM III. GALLORUM REGEM,  
DUM EJUS E SARMATICA ADVENTUS  
EXPETERETUR.

PER bella dextrae mutua civicae  
Ruentis o spes unica patriae,  
Virtute defunctis create  
Regibus ac geniture reges,  
Henrice: moestae jam nimium diu  
Abes parenti, & concilio patrum,  
Illisque, quotquot nulla cives  
In proprios inimicat ira.  
Tuo cupitam dux populo bone

Lucem reporta , veris amabilem  
 Horam reducens ; nunc aquosa  
 Saevit hiems premimurque nube .  
 Audax , Iberi trans maris aequora  
 Visendus orbis quem studio novus  
 Allexit , auri vel talentis  
 Cura inhians , nimis & cupido  
 Avara gazae , navita Atlantico  
 Deprensus alto , cum rabies Noti  
 Luctatur in fratres , & imo  
 Astra furens pelago laceffit ,  
 Gemella vultu lumina pallido  
 Poscens , ut amplas ominibus preces  
 Admiscet , aeternos supinis  
 Dum manibus superos adorat :  
 Sic te requirit Gallia , Sarmatis  
 Quem terra dulci distinet a domo  
 Experta prudentis sagacem  
 Sensum animi , validumque robur ;  
 Simulque clavis orta parentibus ,  
 Et culta doctis artibus indoles  
 Quid posset : exemplisque facta  
 Ut veterum stimulent avorum .  
 Supremus at non arbiter annuit ,  
 Diu per arva ut perpetua nive  
 Damnata regnes , jura reddens  
 Danubium prope flumen ortis :  
 Supplex alumnum sed repetit suum  
 Soluta crines Gallia lugubres :  
 Tu supplicis votis iniquas  
 Rumpe moras reditu secundo  
 Ad regna pridem debita , Rex , tibi  
 Ades : furentes & populi impetus

Contunde, vesanumque Martem,  
Qui miseras furiavit urbes.  
Informe leges edomuit nefas;  
Dum poena vindex, & placidae silent  
Dum pacis artes: una mentes  
Atra ciet furiis Erinnyes.  
Hinc alma terras funera Galliae  
Exosa liquit cum socia Fide  
Astraea: pollutis nefanda,  
Religio, Pietasque, caede  
Concessit agris protinus, heu nefas,  
Audax Enyo, tum superum ferox  
Contemptus, & Cupido avara  
Sanguinis in scelus omne dextras  
Obarmat. Ecquid dura nefarium  
Refugit aetas? quid rabidus furor  
Reliquit intactum? unde dextras  
Continuit sitiens metalli  
Fulvi Cupido? quas fera non manus  
Evertit aras? quis solidas videns  
Arcesque labentes & urbes  
Temperet a lacrimis? Sed omnem  
In te reponit Gallia spem suae  
Salutis: aestu corda tumentia,  
Flustusque compones, & orbem  
Constitues vacuum duellis.  
Custode rerum te validis furor  
Audax habenis ora dabit: scelus,  
Et tristis armorum tumultus  
Terga dabunt inimica paci.

## AD REGINAM CHRISTIANISS. REGIS

MATRIS, GALLIAE PACATRICEM.

**R**EGINA, sacri non juvenis modo,  
Avita justis imperiis onet  
Qui regna maternis regenda  
Non sine consiliis : habenas  
Seu colligat seu laxet : ab ultima  
Sed quotquot ora Massilici freti  
Ad littoris fines Britanni  
Urbibus innumeris superbum  
Solum frequentant undique, gentium  
Benigna mater : exitialibus  
Quas invicem armis saevientes  
Foedere non semel impetratae  
Pacis ligasti : quae indomitis jugum  
Cervicibus mite excutientium  
Frenans furorem insanientes  
Imperiis populos coerces.  
Quae dona solvet, marmora quae tibi  
Pacata ponet Gallia? quos tuis  
Amica Musis consecrabit  
Turba pares meritis honores?  
Quae gens, quis ordo, quae plaga Galliae,  
Quis sexus, aetas quae tibi se neget  
Debere, quod spirant duelli  
Anxia corda metu soluta?  
Delubra, pridem quae posuit pia  
Caeli colonis relligio patrum,  
Exhaustit at nuper nepotum  
Acris opum sitis, & Deorum

Con-



Contemptus, eheu, dum stolidus furor  
In dedicatas saevit imagines,  
Germanicae nequid relinquat  
Perfidiae scelerisve inausum,  
Quod nunc ruinam non trepidant, preces  
Quod consuetas aethereo patri  
Fas est litari, quod Sabaeos  
Ara frequens adolet vapores,  
Regina totum muneris est tui.  
Tu nunc vetustis pectora ritibus  
Antistitum sacrata passim  
Ense fodis prohibes profano:  
Vitaeque census sufficis annuos,  
Quos ante dirus praeripuit latro,  
Mysteriis dum sacrosanctis  
Nec segetes neque vina linquit:  
Plusquam efferatae frena licentiae,  
Qua saevit hostis barbarus, iniicis.  
Sibique praedae destinantem  
Gallica templa ferum relegas  
Caeli perosum numina Teutonem,  
Miscere flammis omnia cui foret  
Lusus, nefanda quem cruentum  
Per scelus omne rapit libido.  
Tibi maritus debet, adulteri  
Erepta quando militis e manu  
Colit cubile nupta castum  
Jam sobolem paritura certam.  
Secura virgo consiliis tuis  
Intacta servat gaudia nunc suo  
Sponso : Deoque consecratum  
Sacra puella colit pudorem.  
Quae Martis inter bellica classica

Du-

Dudum filebant, cum potior foret  
 Injuria aequo, nunc coërcent  
 Jura nefas ope restituta  
 Tua, & sagaci mentis acumine,  
 Quod corpore est in foemineo tibi  
 Virile, condignam probatque  
 Progeniam MEDICUM te avorum.  
 Nam subditis quod tu populis paris  
 Secura totis viribus otia,  
 Exosa quod duella pacis  
 Artibus imperitas, avitum  
 Hoc ceteris prae laudibus obtines:  
 Hoc ipse Cosmus maximus, hoc sagax  
 Laurentius florentis urbis  
 Nomineque imperioque habenas  
 Rexit. quibus non inferior tua  
 Virtute, major sed titulis pie  
 Cognata decertare ferro  
 Signa vetas monitis amicis  
 Mulcens tumentes viribus, ebria  
 Placansque Martis corda cupidine:  
 Ut mollis imber praeliantes  
 Aeolios juvenes refringit.  
 Nam quid malorum te sine Gallia  
 Non pertulisset, cum segetes equus  
 (Ceum prata tonderet) novellas  
 Spem miseri meteret coloni,  
 Famemque nostris urbibus annuam  
 Indiceret? cum lanigerum pecus,  
 Matresque plus lupis timendus  
 Cum vitulis laniaret hostis?  
 Sol quis malorum mille nocentium  
 Narret figuras? quis lacrimas, graves

Et Galliae moestae ejulatus  
 Carminibus numeret trecentis?  
 Nunc ipsa grata quae in melius vice  
 Regina mutas, auspiciis tuis  
 Pro luctibus risum, serena  
 Gaudia pro gemitu reportans,  
 Agrosque reddens frugibus uberes,  
 Et sacra templis, jusque suum foro,  
 Et conjuges viris, colono  
 Spemque bonam pecudesque abactas.  
 Gymnasiorum, quae situs indecens  
 Jamiam occuparat, restituis decus:  
 Et nuper artes quae jacebant  
 Nunc docilis repetit juvena.  
 Tu nanque doctas insolito feri  
 Martis tumultu Sequanicis plagis  
 In Thespium montem fugatas  
 Cum Clario revocas sorores.  
 Non, fronde quanvis Mercurialibus  
 Viris dicata nomina duceret,  
 Parensque dici litterarum  
 Promeritus fuerit tuorum  
 Laurens avorum grande decus, sacra  
 Lauro revinctis frontibus adfuit  
 Praesentius numen, piorum  
 Te columen CATHARINA vatum.  
 Vates foventem praemia nec manent  
 Caduca : sed dum merget Iberico  
 Sol gurgite axem, dumque Eoo  
 Cardine iter releget diurnum,  
 Quacunque currus ille agitat, decus  
 Musis amici nominis, & tuos  
 Per ora diffundent honores

Dispositis fidibus Camoenae :  
 Dicentque clara te MEDICUM domo ,  
 Quae ab usque Athenis ducat originem -  
     Novae editam luci in virenti  
     Margine lene fluentis Arni ,  
 Urbem secantis gentis amabilem  
 Ethruscae ocellum , quae gremio tuam  
     Puertiam fovit , Minerva  
     Dum studio Charitesque alumnam  
 Formant pudico , & dant sapientiae  
 Caelestis oris par decus , & graves  
     Mores , vel invitus necesse  
     Quos habeat celebrare livor .  
 Formae quibus tot pectoris & bonis  
 Puer medullis regius intimis  
     Exarsit , & moerenti ab Arno  
     Vexit ovans patrias in oras .  
 Pulcræ parentem quem sobolis fera  
 Heu falce praeceps abstulit Atropos ,  
     Quot Galliae funesta bella ,  
     Quot miseras paritura clades !  
 At ille nulli flebilior licet  
 Abrupta sensit stamina quam tibi ,  
     Tuque aegra langueres acerbo  
     Parte tui viduata fato :  
 Tamen malorum fluctibus integrae  
 Non ille mentis succubuit vigor ,  
     Constantis aut infracta cessit  
     Vis animi , Medicum propago  
 Qua saevientis pertulit imperus  
 Et fortis omnes instabilis vices :  
     Sed ipsa pectus imminenti  
     Obiicis impavidum procellae ,

Quae

Quae fluctuantis dum freta Galliae  
 Multos per annos miscuit, omnibus  
 Ipsa artibus natis tueris  
 Sceptra tuis soliumque avitum:  
 Detrudere illos quo temeraria  
 Vi moliuntur ausibus aemulae  
 Gentes Gigantacis, parato  
 Ipsa animo nisi restitisses.  
 Non, Musa, non haec naenia gaudiis,  
 Obducta tractans ulcera, convenit.  
 Nunc conticesce, vel jocofo  
 Laetitiam modulare versu.

## AD GILBERTUM GENEBRARDUM

THEOLOGUM, ET LINGVAE SANCTAE

REGIUM PROFESSOREM.

**G**ENS prisca vatum, Cinthius annuit  
 Quibus Diones jugera libero  
 Gressu pererrare, haud caducos  
 Dum capiti legerent honores,  
 Seu forte digno pectine fortium  
 Pectus virorum non timidum mori  
 Cantabat, aut partos honores  
 Ancipitis mala per duelli:  
 Seu parva jungens carmina tibiae  
 Pugnata dixit praelia noctibus,  
 Formae decentis dum caducum  
 Laude decus celebrat perenni:  
 Quidquid canebat, Gratia dummodo  
 Cultis faveret carminibus, deum  
 Aequare sortem se, beatis

Carius hoc Arabumque gazis  
 Habebat unum : pauperiem malam  
 Ac dura vitae incommoda negligens,  
 Si fonte nunc artus salubri  
 Nunc gelido recrearet antro.  
 Hac ipse vana captus imagine  
 Eminentis nec soli boni  
 Per Thespias olim salebras,  
 Ardua vel juga per Palati  
 Musas sequebar, dum tenet Appulae  
 Stupor camoenae, nec juvenem satis  
 Firmum & sequacem grata haberet  
 Compede me Venus impeditum.  
 Donec Calypsus illecebris diu  
 Capto, marinaeque hospitio deae  
 Sic desidenti, ut mente prorsus  
 Immemori patria excidisset  
 (Non illa duris rupibus aspera  
 Domus, sagacis qualis Ulyssaei,  
 Felicitate sed perenni  
 Patria Christicolis fruenda)  
 Cyllenius ceu missus ab aethere  
 Turpem veternum sensibus excutis,  
 Viroque dignas Christiano  
 Mente jubes agitare curas.  
 Nam non caducae cum sapientiae  
 Captum viderem te studiis, tuae  
 Menti, pium quocunque possit  
 Artibus ingenium beari,  
 Absesse nullam, protinus intimis  
 Exarsit ingens visceribus pudor:  
 Horasque deflevi profanis  
 Tot studiis male collocatas.

Quid culta produnt carmina , pectoris  
Morbum furentis praeter ? & impia  
    Quid daemonum (haud enim deorum)  
    Nomina tot , nisi sentientem  
De trino & uno non bene numine ?  
Quid fabulae , & praeconia principum  
    Conficta , nonne mentiendi  
    Vatibus esse negant pudorem ?  
Ast o beatum caelitus insitam  
Quisquis superne partem animae erigens  
    Deum intruetur , eque sacris  
    Noscit hunc , Genebrarde , chartis ,  
Quaecunque Moses ore prius Dei  
Promptis notavit legibus , & lyrae  
    Davidicae , atque oraculorum ,  
    Enthea quae cecinere corda  
Vatum piorum , pervigil eruit  
Sensa e tenebris mystica : nec satis  
    Aut Graeca ducens aut Latina  
    Quod terat assiduo labore ,  
Ipsa Hebreorum sacra volumina  
Versare quaerit , fontibus hauriens ,  
    Haud e lacunis : quo recenti  
    Ipse opifex homini dedisset  
Sermone linguam solvere nil prius  
Voce eloquentam : particulam luti  
    Cum spiritus sui supremus  
    Ipse parens animavit aura .  
His omne , deinceps addere quod Deus  
Decrevit aevum , me studiis juvet  
    Dicare , virtuti tuae dum  
    Me similem , Genebrarde , fingo .

## AD LAURENTIUM TOSCANUM

PATRUELEM MEUM.

**N**E, Laurens, cupidum plus nimio tibi  
 Pectus sollicitent divitiae, tuis  
 Auri attentus acervos

Dum natis properas pater.

Quavis non Arabum gens opulentior

Te, baccas cumulet divitis Indiae:

Et differta laboret

Gazis arca tuis minor:

Non quales deceat post genitis opes

Dimittes, vacua cum steterit colo.

Olim Parca, premetque

Leti dira necessitas,

At mentes potius sunt studiis rudes

Formandae ingenuis, dogmataque auribus

Instillanda tenellis

Caelestis sapientiae.

Nam torno facili rasile cum recens

Vas prodit, nimium scilicet interest

Nardo hunc divite tingas,

Tetri faecibus an gari.

Hunc censum tenerae sedulus, hunc para

Thesaurum soboli, quem nequeat mala

Regum auferre libido,

Nec fortis rapiant vices.



## PROSOPOPOEJA ADRIANI TURNEBI

AD ACADEMIAM PARISIENSEM.

**Q**UID juvat infestis liventia tundere palmis  
Pectora? quid sparsas dilaniare comas?  
Tristia quid tremulas rumpunt suspiria voces,  
Imbre rigante genas, imbre rigante sinus?  
**Q**uo cultus abiere tui? cur squalida moeres?  
Fundis & in saevos irrita verba Deos?  
**O** mihi quae dulci fueras, Academia, vita  
Carior, atque animi sedula cura mei.  
**E**xcute sollicita conceptos mente dolores:  
Et nimium longis fletibus adde modum.  
**N**on semper moestas ducit Philomela querelas,  
Nec soror aeterno carmine luget Ityn.  
**M**emnona Thaumantis, nec caerulea mater Achillem,  
Orphea nec semper Calliopea gemit.  
**S**ic ubi densa diu texerunt nubila solem,  
Ille iterum puro lucidus orbe redit.  
**J**am nihil est tibi me cur lamento ademptum,  
Cui steterat vacua Parca severa colo.  
**F**ata manent omnes, & inevitabilis hora,  
Non exspectato quae venit atra pede.  
**N**am quae dispensant mortalia fila sorores  
Non exorato pollice pensa trahunt:  
**Q**uipe semel quae concordii cecinere tenore  
Haec stabilis rerum terminus usque probat.  
**N**on si natus erat Phoebus R. hodopejus Orpheus  
Reppulit auricomi fata parentis ope:  
**P**rona licet patrio cohiberet flumina cantu,  
Mulceret rigidis aspera corda feris:

*Pars II.*

D

Au-

Aufus & ire viam viventibus inconcessam  
Lurida Threiciis moverit antra modis.  
Sed quanvis tetigi vix limina prima senectae,  
Cum merfere meum tristitia fata caput:  
Attamen intrepida morientia lumina mente  
Fatiferae telum sustinere deae.  
Scilicet egelidos animus cum linqueret artus,  
Solamen menti dulce Camoena fuit:  
Ingeniique mei partus, quibus esse superstes  
Ipse mihi, & fama vincere fata qteo:  
Praeterea dulces, cum cara conjuge, nati,  
Ataque inoffenso vita serena gradu.  
Non ego Calvinii volvens monimenta nefandi  
Dispersi in populos dira venena rudes.  
Nec dulci patriae, nec templis impius hostis  
Armavi rigidas in sua fata manus.  
Sunt etiam nostrae non parva levamina menti,  
Quod mea non Stygias umbra subivit aquas,  
Lurida non errant nostri per littora manes:  
Nec sudata ferox exigit aera Charon.  
Nec me Cerbereus triplici latratus hiatu  
Tartarei regis terriat ante fores.  
Innumero ve trahens sinuosa volumine terga  
Hydra minax caecos arcet adire lares.  
Non ego Sisyphii summo de vertice montis  
Irritus in praeceps saxa voluta peto.  
Nec Phlegetontaeo ferventes gurgite lymphas  
In cava fallaci vasa labore fero.  
Non mihi Lethaeas fugientia poma per undas,  
In mediove fugax quaeritur amne liquor.  
Porrective novem campi per jugera lati  
Intima inexpletus viscera vultur edit.  
Nec patior diri saevos Ixionis orbes,

. Ver-

Versatus rapidae vinctus ab axe rotae .  
Aspera Typhonem brevibus torquata colubris  
Non quatit in nostrum torta flagella caput .  
Nec fera Titanum metuo discrimina , nec me  
Conclusum aeterno carcere Cottus habet .  
Virtutem non ille locus , mentesve beatas ,  
Nec capiunt manes impia regna pios .  
Ipsa mori immeritis virtus pia regna recludens  
Nobile semoto tramite tentat iter :  
Vulgares procul haec coetus fugientibus alis ;  
Lucidaque affectans sidera temnit humum .  
Huc rediit , fragiles ubi liber spiritus artus  
Exiit : hic solida prosperitate fruor .  
Hinc video sceptrum septenis orbibus orbem ;  
Astraque conspicuis lucida vesta rotis .  
Intueorque vago lustrantem signa meatu ;  
Sidera qui mundum per duodena regit .  
Et circumfusas densa caligine terras ,  
Et quanta exiguum nocte prematur opus .  
Denique cuncta latent vestros quae numina visus ,  
Illa patent oculis conspicienda meis .  
Ergo agite indignos de me compescite luctus :  
Ut mala constanti vestra leventur ope .  
Scilicet humanos mens est infusa per artus  
Ut fortis valido pectore tela ferat .  
Cordaue difficiles animis superantia casus  
Inclita perpetuae laudis honore vigent .  
Parva licet , longo crescit iactura dolore ,  
Ut male perpeßum fortius turget onus .  
Denique flere aliquid nullo reparabile luctus ,  
Est animi nimium desipientis opus .

## AD PAULLUM TOSCANUM.

**C**UM persaepe animo meo vultem  
 Quo te, Paulle meum decus, meorum  
 O autor, columnenque commodorum,  
 Donem munere: quid potissimum, ne  
 Ingrati videar notam subire,  
 Obtulisse queam: nihil pote unquam  
 Mi succurrere, quod tibi dicetur,  
 Observantiae ut id perenne nostrae  
 Esset mnemosynon. tibi' beato  
 Donem divitias? at ipse me ultro  
 Beastique opibus tuis beasque.  
 Mittam carmina? mittere haec poëtam  
 Fas est: saepius haec & ipse mihi:  
 Sed nonne haec tua sunt, tuo parata  
 Aere jam tibi sumptibusque largis,  
 Quibus me, teneris ab usque, claris  
 Curaisti studiis probe expoliri?  
 Restat solum animus: tibi at dicatus  
 Hic pridem fuerat, tuusque totus.  
 Quid ergo superest, nisi ut putemur  
 Ingrati? at nihil hoc mage indecorum,  
 Hanc ergo ut maculam vitemus, ipsa  
 Quanquam nunc tua sunt, fuere & olim,  
 Opes, musam, animum tibi dicamus.

## AD M. ANTONIUM MURETUM.

**C**ERTAMEN, Murete, novum: te Gallia civem  
 Afferit hinc, illinc terra Latina suum.  
 Quem nunc implentem Romana Palatia voce  
Eloquii

Eloquii priscum restituyente decus  
 Attonitus stupuit post ter sibi saecula quina  
 Tibris inauditos dum bibit aure sonos.  
 Te mea Roma suis dum nuper civibus ultro  
 Annumerat, gaudens talia verba dedit:  
 Terra mihi tales Lemovix dum mittat alumnos,  
 Nil moror Arpinum, municipesque suos.

## AD CAESAREM TOSCANUM.

C A E S A R nec studiis mihi, nec aevo  
 Dispar, sanguine juncte, juncte longo  
 Ufu, juncte animoque corculoque,  
 Et quidem teneris id usque ab annis:  
 Sub uno quibus & magistro uterque  
 Vitam duximus, & domo sub una,  
 Cum nos mensulaque una, lectulusque  
 Unus exciperet. Sed id deesse,  
 Id demum poterat satis videri  
 Dispar: quando sacrae mihi dicari  
 Vitae contigerat, tibi profanam  
 Sectari. ergo foret tibi una causa  
 Ne discriminis & mihi, ecce nostrum  
 Exemplum sequeris: Deo dicaris.  
 Ergo quid simile est magis, gemellum,  
 Coniunctumve magis, magis quid unum?  
 Cui fuit Pyladi, cuive Oresti  
 Quam nobis melius beatiusve?

54 JO. MATTHAEI TOSCANI  
DE HENRICO VALESIO GALLORUM  
REGIS TUNC FRATRE, ET JO. AUSTRIACO  
FRATRE REGIS HISPANIARUM.

SUNT gemini juvenes nostri laus unica saeculi,  
Qui pariter claro Martis honore vigent.  
Hic decus eximium Gallis, decus alter Iberis,  
Austriacae columnen, Valesiaeque domus.  
Regibus ambo sati, fratres sunt regibus ambo,  
Aptior hic terris vincere, at ille mari.  
Henricus populos domuit virtute rebelles,  
Dum stabilit fratris regia sceptris suo.  
Sed Janum extremi vires Orientis & Indos  
Adria mergentem vidit, & obstupuit.  
Qualia facta dabunt, aderit cum fortior aetas,  
Coeperunt quando talibus auspiciis?

A D C I N N A M.

O BVIUS est quoties aliquis tibi Cinna potentum,  
Cui struat oppiparas uncta culina dapes,  
Optatam ut captes per mille pericula coenam,  
Assiduus lateri jungeris usque comes.  
Ingeris inque aures fallax mendacia mille,  
Ut videre aliquid sic recitasse novi.  
Scisque quot Aegeum complerit navibus aequor  
Ut reparet lapsas hostis Eous opes.  
Et quantas contra vires ferat Italia virtus,  
Et socium jungens robur Ibera manus.  
Scis Gallus populos qua fregerit arte rebelles,  
Dum statuit firma sceptris gerenda manu.  
Cuncta licet noris diversum gesta per orbem,  
Coenandum noris dum tibi, Cinna, domi.

TU-

## TUMULUS ADOLESCENTIS ARMORUM

ET LITERARUM LAUDE INSIGNIS:

FRATRIS EST PROSOPOPOEJA.

**O** NOSTRAE spes fluxa domus, florentibus annis  
 Praecipiti Clothus frater adempte colo.  
 Quo decus abscellit formae, sperataque duplex  
 Gloria, belligeri Martis, & arte togae?  
 Outinam velut haec moeroris pignora nostri,  
 Sic scalpi possent in tumulo lacrimae.  
 Tectetur tamen hoc saeculis breve carmen, adempto  
 Te mihi, dimidium vix superesse mei.

## GENETHLIACON LUCIOLI TOSCANI.

**L**UCIS Luciolus recens in alma  
 Venit lumina, lucidumque solis  
 Jubar purpureo adspicit renidens  
 Ore, quo patriae decusque frontis,  
 Et matris facies nitet venusta.  
 Nunc partum aureolum, bonae Camoenae,  
 Vos vestro ambrosio sinu fovete:  
 Et Parnaside roscidum labellum  
 Irrorate lacu: tenella membra  
 Grato spargite Gratiae liquore,  
 Et vestris caput impedita fertis,  
 Putris quae caries, situsque priscus  
 Frustra moribus irritis laceffunt.  
 Paullus cernitis ut tener sereno  
 Spectat lumine, noscitatque fratrem?  
 Blanditurque suisque majus annis

Effert ingenium? Editi beato  
Nati fidere, patrui voluptas  
Magni, curaue dulcis, inclytaeque  
Spes haud fluxa domus, benigna vobis  
Fila lanificae neant sorores,  
Annos ut simul, arduamque avorum  
Virtutem superetis, atque honores.





# PIERII VALERIANI

## C A R M I N A.

DE DIVO JOANNE EVANGELISTA.

**T**E volucrum Regina canam, te sacra ferentem  
 Fulmina, te firmo adspicientem lumine Solem,  
 Solem admirandum; contra quem stare volantes  
 Non aliae potuere olim, piscesve, feraeve  
 Non hominū genus; atque etiam quae a lumine vitae  
 Progenitae lucem tenuere ab origine mundi.  
 Tete igitur, proles generosa, volumina dicam  
 Grandia gestantem insignem diademate, fulvis  
 Ornatam plumis, rostro aureo, & unguibus aureis.  
 Nempe Palestinis praevisam vatibus, alis  
 Ingentem, & caeli ante alios spatia alta secantem,  
 Non humili in campo, non inter lustra ferarum.  
 Sed vel caucasea nidum pro rupe superbum,  
 Culmine vel Tauri, vel summo in vertice Olympi,  
 Aërios supra tractus, nubesque madentes,  
 Scilicet humana procul à statione parantem.  
 Tu vero, tu magne Pater; de pectore cujus  
 Evolat haec Aquilae facies, quae praepete faustum  
 Auspiciū penna mortalibus afferat, unde  
 Pacatos Divorum animos, ipsumque Tonantem  
 Portendat posuisse minas, & debita nostris  
 Supplicia erratis, aeterna in saecula salve,  
 Aeternum felix. sed enim, o sanctissime Divum,  
 Caetera quis digne memoraverit? inclita facta,  
 Virtutem eximiam, & superatos mille labores  
 Vinculaque, exiliumque, olei & ferventis ahenum?  
 Et

Et quae pertuleris magno pietatis amore,  
Quo caecam e tenebris, & olenti e carcere gentem  
In puram assereres lucem, tu cura Deorum,  
Tu genus antiquum & soboles clarissima Regum.  
Tu fidus rerum domino comes, & comes alti  
Consilii, arcanumque Dei in penetrabile receptus  
Omnia vestigas sublimi ubi mente per omne  
Is caelum, & gremio recubas dilectus amato.  
Qualia veridico sapientique ore locutus,  
Venturasque vices canis, infandumque laborem,  
Aeternamque diem manifesto numine plenus.  
Haec canerem, magnoque libens haec ore sonarem:  
Sed dolor & patriae evertae lacrimabile fatum  
Sevocat, & clades miseris deflere querelis  
Cogit inauditas, quaeque ipse miserrima vidi  
Incensas urbes, populos, Regesque, Ducesque  
Finibus extorres, & iniqua sorte subactos,  
Ergo queri, extremisque jubemur poscere rebus  
Auxilium, placare Deos, arasque tenere.  
Audi igitur venerande senex. seu littora Pathmi  
Antiquae, Smyrnaeque colis, seu Lydia claudunt  
Oppida; seu fati legem evasurus acerbam  
Arbitrio jussuque Dei concedis in altum  
Elisium, extremumque viges mansurus in aevum;  
Sive tuo stillant rores & mella sepulcro:  
Te rogo, perpetuae si virginitatis honorem  
Servasti, tibi si pluvios in vina liquores  
Transformavit amor tuus, & tuus ardor Jesus,  
Si tibi rerum opifex carissima pignora matrem  
Credidit, idque pii semper meminere nepotes,  
Atque aras posuere, virosque & templa sacrarunt,  
Tum lucem instituire tuo de nomine, laeti  
Quam colimus, cui cura damus, cui vina quotannis;  
O tan-

O tandem Italiae duros miserate labores  
Adspice nos tantis bellorum casibus haustos .  
Sat ferro flammisque datum : sat luxerit omnis  
Euganea insanis longum objectata procellis .  
Sat Padus, atq; Athetis tumuerit sanguine, Anaxusq;  
Et Liris, nec non fatalibus Addua ripis:  
Totque hinc inde bonis viduatae civibus Urbes ,  
Hispanis tantum Italia de gente maniplis  
Et Celtis licet, Helvetiisque ferocibus, & jam  
Ultima ad haec fertur movisse Britannia bellum .  
Quando autem nobis potes implorare favorem ,  
O semper dilecte Deo divine sacerdos ,  
Pone modum exitiis; da certum denique finem  
Cladibus; Albertumque fove tibi tura ferentem  
Corde pio, de Gente pia, pro pace piorum .  
Caesaris haec sint vota sui. exorator Julum  
Mulceat, atque illi summo delapsus Olympo,  
Dum Veneti accedunt comites, dum Caesar adhaeret  
Pontifici paribusque animis in foedera tendunt,  
Da pater abjectis armis evincere tandem  
Indomitos bellorum animos, da corda furentum  
Lenire, & placidam pacata per oppida pacem  
Olim exspectatam pacem, tua munera pacem  
Spargere, spiciferisque Deam redimire coronis,  
Atque oleis umbrare vias, stipare penates .  
Da demum, ut repleta bono, contagia vitet  
Gens humana pium vivendi edocta tenorem,  
Erroresque omnes, commentaque vana repente  
Solvat, & ad verum vertant sese omnia sensum,  
Obtutu in solem firmo, & supera ardua caeli;  
Unaque sic unum sapientia lumen adoret .

## DECANTATUM COENIS CORITIANIS;

PETRO MELINO SERVATO. AD D. ANNAM.

**S**UNT Superi; est Pietas; & caelo Numen ab alto  
Respicit humanos casus, miserosque labores  
Pro meritisque Dei, precibusque in nostra feruntur  
Vota boni, gaudentque coli, gaudentque rogari.  
Et gaudent culti mox promeruisse rogantes.  
Anna viget. quid enim quorundam insania contra  
Obstrepat; atque Deum conetur numina pectus  
Vertisse, atque suos Superis avertere honores:  
Esse Annam, esse Deos, hodie manifesta patefcunt  
Exempla, esse locum precibus, nec inania ad atres  
Carmina deferri, quae vatum lingua piorum  
Saepe canit; meritisque Deam tot laudibus effert,  
Annua Coritius repetit dum sacra sacerdos,  
Exhilaratque diem; tristi quem fidere moestum  
Sirius instituit, quem Fors inimica parabat  
Ante alios atrum, & lugubrem reddere, ademto  
Romae oculo, Italiae totius flore Melino.  
Quē juvenem praestantē animis & pectore magnum,  
Ingenioque & dulcisoni modulamine plectri  
Egregium fors dita Orci devolvere ad umbras  
Credidit, ah tetrae confossum vulnere pestis,  
Surripere ex oculis quamprimum, & mergere iniquo  
Funere. Dii melius voluere, nec Anna suorum  
Immemor est vatum, nec virgo puerpera, nec qui  
Ambarum exceptus gremio puer, aethere ab alto  
Demisit sese nostrae ad commercia sortis.  
Audiit Anna preces vatum; neq; Nympha precantem  
Contempsit matrem, neque dilectae ille parenti  
Ab-

Abnuit. ille diem tam caecis optimus umbris  
Attulit; ille luem affectis decedere membris  
Jussit, & in fauces Erebiq; Orcique relabi.  
Ipsa etiam Dea magna poli de vertice, anili  
Visa gradum studio properare, & sedula rores  
Collectos supera caeli regione, subinde  
Fundere, & afflicto requietem inducere cordi;  
Atque ita, quod caeco latitabat corpore virus  
Indomitum mollire, & aquis, & gramine lecto  
Membra fovere, manuq; furem elidere morbum,  
Et tantum extemplo juveni exturbare dolorem;  
Vatibus atque suis servatum reddere vatem:  
Qui si forte atras iret nunc mersus in undas  
Non chorus hic lectus juvenumq; senumque referret  
Ante aras nunc, Anna, tuas sollennia sacra,  
Nec Capitolinos celebraret cantibus hortos,  
Hortos Anna tibi sacros, doctisque poetis:  
Sed bonus ipse, genas perfusus flumine largo,  
Coritius lacrimas in sacras spargeret aras,  
Anque ignes, fumoque diem obfuscaret ademptum.  
Romulidae Celsi renovarent vulnera fratris,  
Seque iterum offerret nobis Hieronis acerbum  
Funus, & in lacrimas triplicatis questibus omnes  
Diffluerent, moestis clamarent vocibus omnes.  
Invidiamque Deum quererentur, & omnia luctu  
Complerent; quae nunc laeto plena omnia risu,  
Laetitiaque jocique sonant, & cantibus Evoe  
Ingeminant; Evoe superavit fata Melinus.  
Fronde coronati, vates, sacrique ministri;  
Quos magno secum numero haec ad sacra coegit  
Hippolytus Musarum amor & spes unica vatum.  
Hippolytus; caro qui sospite laetus amico  
Te canit, Anna, tuum numen, numenque tuorum  
Con-

Concelebrat ; donisque omnes vocat usque poëtas .  
 Servato ut referant calathos & dona Melino .  
 Ergo omnes , tali succensi Principe , vates  
 In mensam laeti libant , & voce salutant  
 Aeterna numenque tuum , numenque tuorum ,  
 Servatoque ferunt calathos , & dona Melino ,  
 Damnati memores voto . tu , Diva , poëtas  
 Coritiumque senem , & summa virtute nitentem  
 Hippolytum , qua nunc servasti mente Melinum ,  
 Amplexare . senex meret hoc : meruere Poëtae ;  
 Hippolyti meret hoc pietas , & fervida virtus .

## A D L E O N E M X.

**I**LLA ergo nuper reddita lumini  
 Longa Aesculapii Navis , in insula  
 Quam vorticofus turbulenta  
 Mordet aqua Tyberintis amnis ,  
 Quae fato in alta delituit diu  
 Oppressa harena , & sentibus obsita  
 Nulli advenarum per tot annos  
 Nota , neque indigenis Quiritum .  
 Visa illa quondam Sarronico e sinu  
 Appulsa ; Romae quum veheret sacrum  
 Anguem laboranti salutem ,  
 Gaudiaque , & requiem daturum .  
 Quae firma nostra in ripa ubi constitit  
 Plaudente Roma , & remige per foros  
 Lasciviente , atram repente  
 Illa luem , illa famem hinc fugavit .  
 Mox quanta ponto poriger in latus  
 Proramque puppimque est solita , hic diu  
 Mansura , consensu Deorum

In

In lapidem obriguit sacratum ,  
Dum Roma summam rerum habuit potens ,  
Dumque Imperator jura dabat probus ,  
Aequata cunctis , in verendo  
Cultu habita , & celebrata Navis .

Postquam furore & Civium , & hostium  
In longa adaucto secula , funditus  
Everfa Roma est , & triremis  
Obruta in his latuit ruinis .

Effossa at imo non temere est solo  
Nunc demum , & undis eminet ardua ,  
Spondens salutem rebus aevi  
Pestiferis operosiore .

Praesente nam qui numine Pontifex  
Electus , ima in Tartara dat scelus  
Bellorum , & accersitam Olympo  
Huc placidam jubet ire pacem .

Hanc illa quondam Navicula in jugis  
Suspensa Romae fatidico omine ,  
Rectore Jano , olim affuturam  
Pollicita est miseris quietem .

Quae vel per omnis aequoris impetus  
Jactata , nunquam victa laboribus  
Emersit , en felix subit nunc  
Ostia tuta tenetque portum :

Nec viperini terga voluminis  
Nugasque , verum sed Medicum tibi  
Exponit advectum , petitamque  
Urbibus , & populis salutem ;

Qui signa passim tollere vulnorum  
Et fronti inustas appropere notas ;  
Quae decoloravere pulcram  
Italiae faciem venustae .

Jam criminosis Principibus modus,  
Tamque obstinatis seditionibus  
Ponenda finis; mens Leonis,  
Sanguineum prohibere bellum:  
Seu Gallia omnis, sive Britannia  
Tota, inquietus seu strepit Adria  
Fluctusve Iberus, seu superbit  
Sarmatiae imperiosus aestus.  
Exsurge Virtus inclita, & o pii  
Prodite mores, vos Leo, vos favor,  
Quem mente tota olim petistis  
Evocat, & precium laboris.  
In circo honesti ponit, ut omnium  
Mens excitetur; nemoque inaniter  
Sudabit hic; utcumque fessus  
Jamque animet sua quemque virtus.  
At literarum o praesidium, o virum  
Decus bonorum, si tibi maxima  
Rerum potestas; sique habenas  
Suppositi moderaris orbis;  
Si mille jam sunt nomina, milleque  
Artes juvandi, vive Pater diu.  
Hoc nos precari ex corde quimus;  
Tu facere, & superare vota.

## D. PETRI CATHEDRA.

**A**T surge tandem, surge age: nam satis  
Superque natis Antiochi datum.  
Hinc Christianum exstare nomen  
Sancte senex Galilaeae Simon.  
Quid hic moraris? quid teris otia  
Te jam Seleuci regia non capit  
Non Laodiceae feraces

Aut



Aut Asiae, Syriaeve campi  
Majora jam te tam celebrem vocant  
Momenta rerum : te Capitolium  
Arcesque septem, te universus  
Orbis ad imperium requirunt ,  
Cui nosse caeli Numina corpori  
Inserta nostro est ante alios datum ;  
Arcana qui Divum expedita  
Voce , palam , intrepide revelas :  
Qui nulli amando cedis ; & impiger  
Devota morti pectora liberae  
Offerre, tortorem cruentum  
Pro Domino impavidus subire .  
Ergo hic docebis, quae via , qui tenor  
Vitae supremos evehat ad Deos :  
Mortale nil cognosse ; amare  
Quae Superi docuere tantum .  
Insanientem sic sapientiam  
Demolieris, & scelera, & dolos ;  
Morumque , virtutisque verae  
Perpetuam hic statues cathedram  
Nos hanc Sabaeis undique odoribus  
Fusam quotannis devenerabimur  
Ad templa Vaticana , Romae  
Quae pietas tibi dedicavit .  
At tu , tuis pro supplicibus, Deum  
Cui semper adstas assiduus comes  
Pacem , salubremque aerem ora  
Auspiciis ineuntis anni :  
Ne verberentur grandine vineae ;  
Ne mentiatur fundus inaniter  
Cultus, nec arva , agrosve iniqua  
Sidera torruerint faveto .

*Pars II.*

E

AD

## AD PHIL. BEROALDUM JUNIOREM.

**A**T prodi e caveis Philippe prodi .  
Formica latebrosior fugaci ,  
Formica macilentior pusilla ,  
Formica improbiorque avariorque ,  
Qui nempe unus ab omnibus vocatus  
Quidquid Roma habeat boni, probique  
Id totum tibi vis, & aucuparis .  
Sed nihil haecenus esse te affecutum  
Prorsus credideris ; nisi Hadriani  
Quid in Mole sit optimum requiras .  
Nummos Julii , & aurea illa vasa ,  
Atque argentea, mittimus ; faceffant ,  
Argento tamen aureisque mensis ,  
Quas Mentor poliisset invidendis ,  
Quod ducas preciosius . quid ? inquis .  
Poscit te pater elegantiarum ,  
Et risus pater , & pater Leporum  
Antistes meus optimus sacerdos ,  
Princeps optimus , optime eruditus .  
Et hunc negligis & fugis miselle ,  
Sed nil proficies : fuge huc , & illuc ;  
Tanquam sepia falle & hunc, & illum,  
In cryptis lateas Sebastianis ,  
Aut in fornicibus sub urbe caecis ,  
In casses tamen incidere paratas .  
Quaqua , & undique namque , & hic , & illic  
Instar Pierius , pedumque signa  
Servat cuncta , oculatus ; atque odorem  
Sectatur canis optimus : trahet te ;  
Traxit qui similes tui , Camillum ,

Et

Et Phoedrum, & Petrosanctium, & Capellam;  
Quin Bembum, & Sadoletum. age ergo prodi.  
Ne, quem dicimus, & fatemur omnes  
Tam falsum, lepidumque, & elegantem,  
Tanquam debitor execratus, alto  
Portae in limine pendeas, lituris  
Uncialibus omnibus legendus  
Pro infulso, illepedo, atque inelegante.

## IN DIVI PETRI MARTYRIUM.

**T**ANDEM, sollicita quod prece poscere  
Assuetus fueras; gratus adest dies;  
Pro Christi liceat nomine ut emori  
Quibusvis cruciatibus.

Quem non proposita in morte ferocia  
Regum terruerint verba minacium;  
Quamvis Discipuli commoneant pii  
Declinare periculum.

Saevit vipereo corde ferus Nero,  
Virtutum hostis atrox, hostis atrox Dei,  
Et vel vincla parat, vel gladios truces  
Aut ignominiam crucis.

Tu Cletum, atque Linum moribus instruis  
Divinis: obeant munia, onus ferant  
Sacrorumque vices ordine, quem tibi  
Divum constituit pater:

Clementemque itidem Pontificem creas  
Qui pro te populum absolvat, & obliget;  
Qui pro supplicibus gentibus hostiam  
Laudis, sacra, preces, ferat.

Mox quod supplicii quaesieras genus  
Affixus crucibus vertice ad infera

Summisso, pedibus sidera ad aurea

Elati, moreris libens.

Sed quorsum Pater haec, tali animo, & fide

Tanta pertuleris; si genus impium

Divina imperium vocem datum tibi.

Qua qua est terra habitabilis,

Tam foede inficiantur? Capitolium

Intra te cohibent; in reliquos Patri

Jus nullum esse: sibi autem licita omnia,

Cera ut Cerite liberis.

Si mysteria libi, atque meri, piis

Confecrata labris, pignora Numinis

Aeterni abstulerunt, hem scelus, & negant

Verum induciet in Deum?

Si vitam scelus est ducere caelibem,

Et si qui egregio proposito probi

Duram praetulerint pauperiem bonis

Aut Croesi, aut Halyattici;

Contenti in tenui veste cupidinem

Contraxisse, procul luxu, & amabili

Convictu genitorum, atque sodalium;

Stultos inter habent locum?

Non jejunia, non parcere crapulae,

Non fraudare cibis luxuriantibus

Vitam; nequitiae quippe licentiam

Erenare, esse putant pium.

Virgo sepositis in penetralibus

Se si qua abdiderat; vincla jugalia

Aversata, Deo dedita, pectore

Sincero, atque animi integra.

Disfractis adytis in medium hanc forum

Abductam expoliant, velaque detrahunt

Sacrata & thalamos, flammeaque, & faces

Inceftas adigunt fequi.  
 Siquem pro meritis Concilio Deum  
 Et ftellis pietas prifca, vel inclytae  
 Virtutis precium, gloriave intulit  
 Afpernantur, & expuunt.  
 Non ullum tibi, non Paulo etiam decus  
 Decerni, aut aliis Martyribus finunt,  
 Vel dici Aonio carmine quempiam  
 Feftosve institui dies.  
 Non patrociniis horum adhibent fidem:  
 Sacra oblata, preces, votaue pernegant  
 His concepta; bonos ducere ad exitus;  
 Nullum hinc praefidium piis:  
 An his deterius quidquam & atrocius  
 Fecere indomiti Regum animi, furens,  
 Cum Dementia, tanti tibi Numinis  
 Cultum evertere finxerat?  
 Atqui haec tincta fagro flumine gens quidem  
 Et Chriftrum ore fatetur, fed opus tamen  
 Omnes Daemonii peffimi amant, nefas  
 Detestabile, & horridum.  
 Haec indigna precor refpicias, pater  
 Atque his pone modum feditionibus:  
 Illis vel redeat mens bona, vel lare  
 Sit noftro procul haec lues:  
 Nos fefta memores fronde domum facram  
 Delubrumque tuum; quantus erit dies,  
 Cingemus; tibi laudes, tibi carmina  
 Dicturi ad citharae modos.

# MARCELLI VESTRII

## DE FOEDERE IN TURCAS.

**H**ACTENUS aduerso crescentes Marte ruinas,  
 Civicaque ad moestos flevimus arma rogos.  
 Flevimus: at sanctis humiles quas fudimus aris,  
 Non sprevit surda Jupiter aure preces.  
 Nunc ineunt nostri socialia foedera Reges,  
 Nunc & in Aurora debita bella movent.  
 Ite procul curae tristes, procul ite querelae,  
 Ite per Agaeas, quas tenet hostis, aquas.  
 Ite : Pius pia Vota facit, prece numina flestit,  
 Et primas acies ab Jove primus habet.  
 Magnanimi Heroes Divum genus aethere missi,  
 Scilicet ut mundi sustineatis onus,  
 Nunc o nunc alacres fesso succurrite Saeclo,  
 Quo princeps hominum, quo Deus ipse vocat.  
 Quid non ungue ferit, rostroque insurgit acuto  
 Aligeras inter fulmine major Avis?  
 Cur non illa suis Jovis omine remigat alis?  
 Cur non illa solo caevit, hiatque mari?  
 Cernite ut indomita Leo Martius aestuat ira?  
 Ut ferus ore fremit, ut ferus ungue petit?  
 Ut tumet, ut magnis terret clamoribus indos?  
 Ut Numidae, ut Thraces, ut pavet omnis Arabs?  
 Quam bene uterq; potest communẽ insurgere in hostẽ?  
 Imperat illa avibus, imperat iste feris.  
 Illyricis sciet illa plagis avertere Turcas,  
 Hic rursus Cyprias scindere victor aquas.  
 Illa feras acies & fulmine perdere turmas,  
 Hic ponto Libycas pone fugare rates.

Nunc

Nunc etiam Adriaco Rex labitur aequore Iberus ,  
Surgit & in fortes for:ior ense Scythas .  
Magnis major avis hic sceptrata tyrannica vertet ,  
Evincet patrium restitu etque decus .  
It Solymae sedes , & divitis ostia Nili ,  
Servili eripiet sub pia signa jugo .  
At tu devictaque Asia , Libyaeque subacta ,  
Europae exitium , dire tyranne , paras ?  
Ausus & immensas obsidere milite terras ?  
Ausus es aequoreos classe ciere Duces ?  
I nunc Hesperiae vires & robor utrunque ,  
Inunc Austriacos experiare viros .  
His:tenim auspiciis terris te Jupiter arcet ;  
Infernique adiget guttura in ima canis .  
Desite lunatis ah demens fidere peltis ,  
Illa nec ostenta barbara sceptrata manu .  
Quid forti tibi milite opus , quid classe , quid auro ?  
Quid frustra in sanctos induis arma Deos ?  
Christe pater , Christique cohors , qui sanguine vestro ,  
Nos immortali restituistis hero ;  
Vosne pai , nostris nec pellere finibus hostem ?  
Et tolerare dolos nec prohibere nefas ?  
Non ego vos sarcire peto , quae crimina nobis  
Damna lerunt : culpam poena secuta luat .  
Vos pietas , vos sanctus amor , vos gratia , vos &  
Ah moveat spreti splendor honosque poli .  
Foedis fragos Stygio sub carcere poena tyrannos  
Non ullo maneat non lacrimanda die .  
Nec posthac malus ille fidem contemnat , ut hostem  
Aut perjurati rideat arma Dei .  
Adspicite , ut pergat regales caedibus urbes ,  
Et Cyprum extinctis expoliare viris .  
Et geminare neces , praedaeque augere triumphis ,

Et pia sacrilega templa abolere manu :  
Ut scelus intactum furor improbus iraque nullum,  
Liquerit, in vestras ut mala nulla domos.  
Ah dolor ! omnipotens rector vos deseret Orbis,  
Servitium nobis dum grave Turca parat ?  
Non ita : dat nobis in aperta pericula vires.  
Scilicet & vinci nescia corda Duces.  
Ergo vos animi reges armisque favete,  
Non sint in miserum foedera sancta jocum.  
Aeolus aspiret vobis, & fervet euntes.  
Victores patrio restituatque lari.  
Vos gravibus terras & pontum solvite curis :  
Solvite sollicito saucia corda metu.  
Nec vos horrifico turbent stridore catervae :  
Non multo classis milite & aere gravis.  
Auguror : arduos hostem Orcus tradet in amns :  
Haec erit irato praeda opulenta mari.  
Nil desperandum : quae jam cecidere resurgen,  
Et quae creduntur non peritura, cadent.  
Nuper fatales quis non deflexerat annos ?  
Quis non supremum viderat ire diem ?  
Hispanum in Regem Rhenus tulit arma rebellis,  
Discors se proprio sanguine tinxit Arabs.  
Insanis Galli deflagraverunt ruinas,  
In mare praefluxit sanguinolentus Arar.  
Caelo labentes flammās videre Suevi,  
Crevit tabificis turbidus Ister aquis.  
Edidit Eridanus vasto grave murmur hiatu,  
Et moto insonuit contremuitque solo.  
Flava Ceres stipula messes elusit inani,  
Et tellus gravidus clausit avara sinus.  
Haec sunt signa diem extremam minitancia : fient  
Nostra tamen positae aurea saecula malis.

Et



Et dives pleno veniet concordia cornu,  
 Laurigeraſque oleis pax redimita comas.  
 Tunc dape ſolemni, tunc carmine quiſque per aras,  
 Reddat odoratis vota preceſque locis.  
 Gratia tota Pio, per quem diſcordia cedit,  
 Per quem placato cedit & ira Deo.  
 Vive diu, mundumque diu, *Pie Quinte*, gubernas,  
 Serus & aeternis reſtituare choris.

## P O M P E I I U G O N I I

### DE VICTORIA NAUPACTIACA.

C A E S A R I S inviſti prolem, domitumq; canamus  
 Nerea; & addiſtum noſtra ſub arma fretum.  
 Martiſopus moveo: belli, tuba Martia, ſignum  
 Intonet; ex humili ſurge age Muſa ſono.  
 Quis ſcit an haec ſummi veniant in Principiſ ora,  
 Perque ducum volitet pagina noſtra manus?  
 Tale decet docto tenuari peſtine carmen,  
 Quale *Pius* nutu *Quintus* hianſe probet.  
 Quo procerum hybernis reſonent ſub pellibus aures  
 Sive tuae *Auſtriade*, ſive *Columna* tuae.  
 Majus onus certe, majoraque viribus auſa:  
 Sed fors audenti *Calliope*que favent.  
 Nec ſemper ſaxo fiunt delubra vetuſto,  
 Stant etiam magno parva ſacella Deo.  
 Et pauper cui nulla nitent aulae ſacerdoſ,  
 Feſta luce humili limina fronde tegit.  
 Sic ego viſtrices in praelia ducere turmas,  
 Ordias, & forti ſigna ciere tuba.  
 Ut ſi quis, nimium tantis es laudibus impar,

In-

Increpitet, possim dicere : pauper eram.  
Qualis erit sed cumque mihi sonus, annue Phoebe,  
Detque bonum coeptis dextera carmen avis.  
Quis veteres Argos, Menelaeasque Mycenae,  
Quis nescit portus alta Corinthe tuos?  
Hic angustus ubi geminum mare dividit Isthmus,  
Naupacti exceptit barbara vela sinus.  
Improbe, tunc sinus Diis es renuentibus, ausus  
Praebere infidis navibus hospitium.  
Nonne sub aequoreo tremuerunt marmore Nymphae?  
Nonne vagi fluctus tunc retulere pedem?  
Haud impune tibi tantum scelus improbe abibit;  
Vexabunt litus flabra sinistra tuum.  
Ceteque, & dirae pascent sub gurgite Phocae,  
Quotque natant vasto turpia monstra salo.  
Solvisti tamen hinc pleno ratis impia velo,  
Impia; sed fatum non erat unda tibi.  
Te fuga, te ferrum, te missa ex aere manebant  
Fulmina, & Austriaci vivida dextra ducis.  
Ille quidem remo classem propellit in altum,  
Et flatu adverso prona subit maria.  
Leucates cupido respectat lumine colles;  
Et merito: felix hic locus omen habet.  
Mox Ithacam, & celsam praetervehitur Cephalenem,  
Et quaedam angusti brachia curva freti.  
Hic primum pelago frondosa Zacynthus aperto  
Explicuit nautis Pontica lina piis.  
Nec mora; cum toto diffunditur utraque classis  
Aequore: remigio caerula pulsa sonant.  
Aequatis acies procedit Barbara velis,  
Et tercentena fertur in arma trabe.  
Parte alia obliquum se circumflectit in arcum  
Dispar, sed Christo vindice freta, ratis.

Lae-

Laeva tenent Veneti, dextrum rapit Auria cornu;  
Radebat medium Regia puppis iter.  
Impiger Auftriade, magni germane Philippi,  
Quis tibi tunc sensus, quantaque cura fuit?  
Eventus belli varios sub corde volutas,  
Plusque pio generi quam tibi ab hoste times.  
Stat conferre manum, stat credita signa tueri;  
Caelo animam, rapidis fluctibus ossa voves.  
Has pater, atque alias jactantem pectora curas  
Aetherea laetus Carolus arce videt.  
Nube super fulva, caeli glomerante corona  
Sedit, & Joniis lumina fixit aquis.  
Hinc oculis ardet proprios haurire triumphos,  
Et non tum primum gaudia visa sibi.  
Namque animae indigetes, aeterni in veste Tonantis,  
Quae sunt, quae fient, quaeque fuere legunt.  
Nequa tamen nati turbarent omina mentem,  
Conversos hosti jecit in ora Notos.  
Mox ait: o summo nimium dilecte parenti,  
O nimium faustis edite sideribus,  
Sanguis vince meus, Christo duce, & auspice Christo;  
Candida neverunt hunc tibi fata diem.  
Nec metam posuere tuis hic nate triumphis;  
Devicto tellus est peragranda mari.  
Nam fore te stabili cecinerunt carmine Parcae,  
Ultima cui vindictas porrigat ora manus.  
Te, Regum aeratis oneres qui colla catenis,  
Et figas Christi toto Oriente crucem.  
Tu modo fide Deo: rursus victricibus armis  
Jonii releges aequora nota salis.  
Hinc Rhodon, hinc Seston, mediaeq; Propontidis urbes  
Adiicies sacri finibus Imperii;  
Inter quas Selymi dices tibi procidet aula;

Sub

Subtrahat extremo se licet illa mari .  
Jamque age, pelle moras : spatia in sua quisque recedat ;  
Vertitur hoc uno publica Marte salus .  
Parce metu ; committe acies , tibi Nerea findit ,  
Praeda tua est , contra quae movet arma ratis .  
Vix ea , cum subito caelum ferit aerea moles ,  
Litoraue ingenti pulsa fragore tremunt .  
Ingeminant ictus , fumo subtexitur aër :  
Hei mihi quam crebris ignibus unda micat !  
Caesareus juvenis primis stat saevus in armis ,  
Totus & argento , totus & aere nitet .  
Qualis ad Aëtias felix Octavius undas  
Reppulit Aufonia barbara sinistra tuba .  
Obvius haud illi quisquam se impune ferebat ;  
Aut perit , aut supplex corruit ante pedes .  
Fulminat in mediis exerto Antonius ense ,  
Cernis ut Hectorum fundit ab ore jubar ?  
Quem primum , quem postremum , fortissime, letho  
Deicis ? ah nimio dextra cruore madet .  
Quocunque intorques oculos , huc protinus illuc  
Scinditur , & retro turba profana ruit .  
Te quoque permistum multa inter millia nosco  
Ghisleri tinctas sanguine ferre genas ,  
Quis juxta puer ille ? viden quam saevit , & instar ,  
Dura nec imbelles atterit hasta manus ?  
At membris animoque ingens ; abscedite , Paullus  
Inveniet ferrum densa per arma viam .  
Sic ait , oppositumque globum proterret in aequor ,  
Inferat ut Geticae Romula signa rati .  
Stat celsa in puppi , prohibetque Venerius hostem ;  
Plurimus irati Martis utrinque furor .  
Heu rapit , infelix te Barbadice sagitta ;  
Illa fuit Stygio tincta sagitta lacu .

Ter-

Ter gemini occumbunt fratres Cornelia proles,  
Tuque Maliperi, tuque Soranze cadis.  
Quid referam, ut medios sese moritura per enses  
Coniiciat niveae pulcra caterva crucis?  
Utque premat curvo palantes Auria gyro,  
Contenta jaculans flammea tela manu?  
Qualis & Ascanius stridum procurrat in agmen,  
Canum fulgenti conditus aere caput:  
Feltrius hinc heros, illinc Farnesius urget:  
Eheu sunt illis vulnus, & ictus idem.  
At tibi Barbaricae, Pompei, dant terga phalanges;  
Prosper in hostilem dirigit arma globum.  
Nec vos transierim generis decora alta Sabelli;  
Illa sago domus est nobilis, illa toga.  
Adspice uti patriis exultat Honorius armis,  
Telorum & spisso tutus ab imbre redit.  
Vincendi comites nimia dulcedine capti,  
Ex acie referunt vulnus uterque suum.  
Parma ubi nunc Juli? tua nunc ubi Troile parma?  
Strinxerunt vobis spicula dira latus.  
Ecce mihi Rhodia lucet crux aurea puppi;  
Puppis Honorati non tulit illa manus.  
Dux milesque simul disponit Gabrius agmen,  
Martis & infesti caeca pericla subit.  
Ardet Sfortiades, lucemque coruscat ahenam:  
Ejus ad obrutum Thrax, Numidaeque pavent.  
Quid comes Aeneas? quanta se caede cruentat?  
Barbara quot falsis corpora mergit aquis?  
O gemini Heroes, quam laeto curritis ambo  
Omne! quam fausta bella movetis avi!  
Marta te tellus, animosique ira Leonis  
Sfortia victrici mittit in arma manu.  
Herculei Aeneas jactat se Tiberis arce,

Quae

Quaeque gerit, patria pro Cruce bella gerit.  
 Instant Gonzagae, mediisque in millibus ardent;  
 Instant Euganei, Felsineique duces.  
 Ursini proceres, hac acer Horatius urget;  
 Hac ruit, heu laevo fidere, Virginius.  
 Te flos Hesperiae sequitur, ter maxime Ductor,  
 Flecentem externos sub iuga nostra duces.  
 Praedonum scelerata manus demittitur Orco:  
 Jonio Lunae cornua fracta natant.  
 Vix grege de tanto, paucos Mars liquit, ahenis  
 Quorum sub nodis brachia torta sonent.  
 Inter quos Regum pueros adstare superbos  
 Et video invitos aspera vincla pati.  
 At Calaber (neque enim superest spes ulla salutis,  
 Et pila vesanum torquet adaeta femur)  
 Vidit ut exutis aciem inclinare Carinis,  
 Vela dedit turpi protinus ipse fugae.  
 Non ego, non miror te si, Sultane, fefellit;  
 Prodiderat patrios perfidus ante focos.  
 Prodiderat Cristique Crucem, Christique cruorem,  
 Quique liquor veteris crimina tergit avi.  
 Illum debuerant fallaces prodere venti,  
 Sentiret fraudes auctor ut ipse suas.  
 Perfide non poteras avidas te mittere in undas,  
 Atque animam medio ponere in Oceano?  
 Non poteras aliquo sub noctem impingere Yaxo,  
 Sive ea sublustis, sive ea caeca fuit?  
 Tu saltem adducto profugum Neptune tridenti  
 Concuteres fractam dissiçeresque ratem.  
 Nunc tamen, ut celeri liceat fugisse biremi,  
 Illum etiam quondam poena luenda manet.  
 At tibi, magne Auttri, claro Victoria coelo  
 Lapsa, triumphali signat honore comas.

Vin-

Vincis, io, Christique fide, votisque Piorum.

Et niveis magni Caesaris alitibus.

Idalius caelo vix dum rubet Hesperus, & tu

Bis centum ad proras lintea capta trahis .

Extulit os undis Proteus : victricia Nymphæ

Gaudent apposita tangere rostra manu .

Quos plausus, quas o circum lufere choreas,

Quos tibi nocte illa concinuere modos?

Perge agedum, quo fata vocant, quo candidus aether :

Militat Oceanus, militat aura tibi .

Vere ineunte novo pennis, Zephyrisque secundis,

Laetus ad Ismarios carbasa tende sinus .

Auguror ; augurio laevum Deus intonet : en en ,

Signa dedit supera mitis ab arce Pater .

Nec tibi se adversis Pelopis domus offeret armis ,

Nec circum Aegæo moenia tacta salo .

Excudere invisas praegeffit Graecia Lunas ,

Totaque sub titulos sponte venire tuos .

Si cui violanda fides, violanda tyranno ;

Sed priscis cur est illa vocata fides ?

Nulla mora, hibernae capies Athamantidos arces,

Et Constantini protinus imperium .

Ante tuas Aquilas Reges volventur Eoi ;

Ante tuas Aquilas ultima Baëtra cadent .

Et qua lenta gelu tellus, & qua ufta calore,

Sustolles diæ signa colenda Crucis .

Illi longinquæ gentes ut thura vaporent,

Et flexo discant oscula ferre genu .

BERNARDINI  
 PARTHENII  
 SPILENBERGII  
 CARMINA.

AD PIUM V. PONT. MAX.

QUALIS rigenti cum Boreas plaga  
 Lapsus sonanti flamine trux gemit,  
 Silvae comantes cum laborant,  
 Et volitant segetes revulsae;  
 Terramque inertem atque alta Ceraunia  
 Dextra rubenti e nube Diespiter,  
 Molemque Olympi corruentis  
 Et rigidam Rhodopem fatigat:  
 Sternuntur altis sedibus oppida,  
 Turrestque pronae, moeniaque ardua,  
 Urbes superbae procidentes  
 Terrificis recubant ruinis:  
 Insurgit imo e gurgite, & igneis  
 Infertur astris indomitum mare;  
 Fervens procellis, hinc dehiscens  
 Terra labat, trepidantque manes:  
 Se tale, terras ah miseras parat  
 Efflans venenum vipereum, truces  
 Dentestque obarmans e latebris  
 Threiciis furiale monstrum.  
 Attollit iras, ob Meliten fremens  
 Siccis cruore faucibus; incubat  
 Germaniae amens, & patenti!

Di-



Diluvium meditatur orbi.  
Auditis auras horrifonas, cavas  
Vallesque equorum dira frementium  
Hinnitibus terreri acutis,  
Sub pedibus reboante terra?  
Portenta foeda haec barbaraque agmina,  
Molem hanc nefandam Caesaris in sacrum,  
Labi feremus proruentem  
Cum sonitu caput immerentis?  
Vos, quibus secundo numine rex poli  
Frenare bellacem Italiae dedit  
Gentem, nec unquam faevientis  
Turbinis imminuit procella;  
Quid tot, quid atro scabra latent situ  
Arma? indecori quid male conditi  
Enses? quid hastae, quid minaces  
Vulnificaeque jacent secures?  
Deses juvenus indocilis iugo  
Cessas? aviti nominis immemor  
Juventus, Auroram Occidentemque  
Hesperiiis opibus subactum?  
Iram cruenta progenitam Styge,  
Cognataque arma & sanguine civico  
Enses madentes irruentem  
Vertite funereum in tyrannum.  
Ductore rerum ac praefide Caesare  
Armata dextras, dum licet: ignum  
Regnis superbis imminuentum haud  
Degeneres prohibete flammam.  
Quis vel furentem Centimanum horreat,  
Lernaeve monstrum, principe Caesare  
Ducente fulgentes cohortes  
Auspiciis Superum secundis:

*Pars II.* F

Vultum aut supremi non timidus patris,  
Vultum tremendum ferre quis audeat?

Quem Styx, & ultricum profana  
Eumenidum stupuere corda?

Cum regna Ditis, cumque adamantina  
Perrupit atri limina Tartari,

Scyllasque terrens, Gorgonasque, &  
Foeda modis simulacra miris.

Eludet ausum is, ceu stipulam levem,  
Injuriosi quam per inania

Jactant fatigantes, sibi que  
Ludibrium posuere Cauri.

At te, corona cui triplici caput  
Late refulget, quem Superi novum

Ut sidus afflicto & labanti  
Praesidium posuere saeclo,

Te justa in hostes ira ferat truces;

Quando ad Deorum hos ambrosiam vocas,

Hos condis Orco, exaestuans qua  
Saxa ciet Phlegeton sonorus.

Exsurge, dextram tolle tuam *Pie*;

Reges sequentur numen, ut efferum

Monstrum reformidet, ruantque  
Praecipites Babylonis arces.

Nomen tyrannus tollere ferreus

Christi laborat, sacra recondita

Delere patrum, atque acta avorum

Perpetuis abolere fastis.

Invidete Caesar, semideum genus.

Spes orbis, unum quem dominum fremunt

Gentes, & Europe solutis

Crinibus illacrymans reposcit:

Aude tumentes auspicibus minas

Arcere Divis, maxime gentium  
 Custos; trabales & catenas  
 Excute terrificum minantis.  
 Votiva sanctus en socialia  
 Ad templa Divum sacra facit pater,  
 Restinguat ut virus nefandi  
 Mortiferum penitus colubri.  
 Passim canentes virginei chori  
 Laudem Tonantis, dum omnia odoribus  
 Halant Sabaeis, Regem Olympi  
 Sollicitis precibus fatigant.  
 Auctore tandem hoc consilio & pari  
 Juncto, timendum? dum excubias agit  
 Pastor, laborantique ovili  
 Conciliat superum parentem?  
 Vindex venenis spicula Colchicis  
 Armata franges, scutaque aeneae  
 Arcusque aduncos; dissipabis  
 Victor Amazonias pharetras:  
 Et mox optimis te spoliis ferox  
 Votis solutis flos Alemaniae,  
 Victrixque onustum te Vienna  
 Accipiet reducem triumphans.

## AD MAXIMILIANUM CAESAREM.

**I**NGENTI quamvis Regnorum mole labores,  
 Et premat Europae ditis, & Orbis amor;  
 Exundansque fremit circum Germania, Rhenus  
 Qua geminis findit cornibus arva minax;  
 Vistula quaque alto se tollit flumine, quaque  
 Extremis Aquilo fertur Hyperboreis:  
 Cum modo te auratis spectandum fortiter armis

Miratur belli Martia turba Deum;  
 Seu ducas aciem, & fortes in bella cohortes;  
 Cum trepidant gelido pectora pulsa metu;  
 Seu quatiens validas tormento, ac viribus urbes,  
 Omnia cum terra subsiliente tremunt:  
 Et modo circumstant populi, tibi publica vota  
 Dum solvunt urbes, & pia sacra canunt;  
 Ne tibi longinquis veniunt quae carmina terris  
 Garrulave imbellis despice fila lyrae;  
 Seu pacem mitis colis, & tibi tradita Jani  
 Aeterna claudis limina athena fera;  
 Sive juvat sacra redimitum tempora lauro  
 Musarum in dulci te requiesse finu:  
 Nam te quis positis armis & Gorgone, nescit  
 Fortia Pieriis corda levare modis?  
 Et gelidis gaudere umbris Heliconis amoeni,  
 Et canere ad sacrae grandia murmura aquae?  
 Felix, cui Mavors gentes frenare superbas,  
 Spernere & obstantum tela cruenta Ducum;  
 Cuique dedit cithara aurata formosus Apollo  
 Pieridum in dulci personuisse choro.  
 Infelix at qui Musarum & Apollinis artes  
 Oderit; invisum hic se sciat esse Jovi.  
 Trinacriae idcirco urgetur sub mole Typhoeus,  
 Dum gravis horrificis aestuat Aetna modis.  
 Gaudentem at blanda cithara, fidibusque canoris,  
 Elysiæ mulcent arva beata plagae  
 Musaeum, media in turba dum pectine eburno  
 Suspensa ex alta lumina turre canit,  
 Et medias puerum properantem currere in undas;  
 Hellepontiacis qua mare fertur aquis:  
 Prospiciens virgo specula ut suspiret ab alta,  
 Dum vigilans niveo pollice versat opus.

Immitis Borea, raptae immemor Orythiae;  
Dum properat, saltem parce puella rogat.  
Vana petit; surdis resonant vada salsa procellis,  
Palleat ut celfo Parrhasis urfa polo.  
Ille canit, pulsæ laetantur carmine valles,  
Sistitur Elysiûm quae colit aura nemus.  
Dulcia ter salвете sacrorum carmina vatum,  
Et mihi culta diu numina Pegasides,  
Lenta soporifero nescit vos flumine Lethe;  
Vos Divum caelique aurea templa juvant.  
Vos superos canitis: Stygias vos carmine nunquam  
Ulla exoratas frangitis arte fores.  
Tergemini Odrysiô canis ora inhiantia vati  
Clauditis, Ismariam dum ferit arte Iyram.  
Tartarae stupuere domus, rota constitit, angulum  
Illigat Eumenidum squamea membra sopor.  
Sistere Musa potest ventos dextraque potenti  
Excutere irato tela trifulca Jovi.  
Cecropio reges exornat Musa cothurno,  
Et tollit grandi fortia facta pede,  
Austriadum illa canit aeternae in saecula gentem,  
Heroas veteres, semideumque genus:  
Bellaque tot Divum auspiciis confecta secundis,  
Claraque tot forti parta trophaea manu.  
Illa canit victasque urbes, populosque superbos,  
Regnaque in ignotis subdita littoribus.  
Illa canit fulvo insignem diademate frontem,  
Plaudit ut Augusto maxima Roma suo.  
Pergite Pierides, nova carmina dicite Regi,  
Vidtricesque nova cingite fronde comas.  
Ille decus servat vestrum, profugasque potentum  
Limnibus largo vos fovet ille sinu.  
Ille dabit citharam collo suspendere eburnam,

Et canere Aeoliis orgia vestra modis.  
 Utque unus victor spolia illa Feretria tentet  
 Ad Capitolini tollere templa Jovis:  
 Atque hostem Europa arcere, exuviasque cruentas.  
 Raptaque de victo terga Dracone paret  
 Diripere. alipotens aderit Jovis armiger uncis  
 Unguibus, & Zephyris dissoluisse dabit;  
 Cum late Euphrates demissis cornibus ibit,  
 Et fremet iratis turbidus Indus aquis.  
 Aurorae illi cum Reges fulgentia cedent  
 Armaque cum gemmisque aurea sceptris suis.  
 Praeterea late devictis undique terris,  
 Serviet ut regi Tethyos unda suo:  
 Nilum ultra Gangemque Hypasique & littora rubra,  
 Quaque jugo Taurus Caspia regna premit.  
 Centum aras, centum fulgentes aere columnas  
 Constituet patriis grandia dona Deis.  
 Auspice te, memoranda canam: tu maxime Caesar,  
 Aurea ne spernas munera Pieridum.  
 Illa tibi sine fine parant producere vitam  
 Sedula, & aeternas vincere Olympiadas.  
 Illa tuam properant stellis inferre coronam.  
 Cui nitido invidet pulcra Ariadna polo.  
 Roma potens, magno jam nunc gratare nepoti,  
 Aurea qui pulso saecula adamante refert.  
 Exoptata redit libertas: omnia passim  
 Pax habet, & concors gratia, Amorque vigent.  
 Laeta Ceres flavis insignis tempora aristis,  
 Effundit pleno dona beata sinu.  
 Iccirco in teneris herbis operata juvenus,  
 Cantat ad agrestes, rustica turba, Deos:  
 Teque vocat mensisque adhibet te in vota secundis;  
 Incenditque tuis thurea dona focis.

Tuque parens Regum, populisque opibusque superba  
 Pacis amans, eadem Marte, Vienna, ferox,  
 Aeternum salve, imperii Regina potentis,  
 Quam Scythia, quâ dominam Bactria regna tremunt:  
 Quam tot commendant tituli, tot fortia facta,  
 Et decorant veterum tot monumenta Ducum:  
 Pax te alma, & populi foveat concordia: vobis  
 Devolvat rutilas aureus Ister aquas.  
 At tu, quem volitans tollit fulgentibus alis,  
 Ignotos ultra fama Borysthenidas.  
 Qui te Diis misces paullatim, atque inferis astris;  
 Pacis honos, duræ gloria militiæ,  
 Mactæ animo & virtute, diu Rex Maxime vive,  
 Principe quo mundus sospite sospes erit.

## AD EUNDEM. DE VICTORIA ADVERSUS

## T U R C A S P A R T A.

**N**ON fronde Phoebi, aut versicoloribus  
 Spectanda pennis; palma at Olympica  
 Insignis, auro, lucidisque  
 Calliope radiata gemmis,  
 Heroas inter semideos; nigras  
 Oblita silvas Phocidis, & leves  
 Pindi susurros, futesce Regum  
 Sedula liminibus potentum.  
 Tu vellis altis montibus erutas  
 Quercus canendo, tu rapides lyra  
 Ventos, & abruptas procellas,  
 Praecipites remoraris amnes.  
 Te horrent loquaces Pierides, novas  
 Plumas amictæ, teque Acheloidum

Proles reformidat volucrum.

Puniceo spoliata dorso.

Quod longe Iberus, quod Tiberis pater,

Atque alta lato cincta mari urbium

Regina miretur triumphans,

Perpetuum meditare carmen.

Montes nivesque transvolet, & sacra

Vox ad profundum Danubium omnibus

Centum sonantem, divitemque

Barbaricis properet triumphis.

Gratare Regi Caelitum, & aures

Incende templis pingua munera,

Thurisque Oronteosque odores,

Divitiasque Arabum beatas.

Admovit aurem rebus in asperis

Votis, nitenti ac lumine conditor

Caeli refulsit, protinusque

Exoriens pepulit tenebras:

Delevit ultor vindice dextera

Classem Tyranni funditus, & rates

Male ominatas belluoso

Subruit Jonii profundo:

Monstri furorem lufit, & impias

Portare ventos spes jubet irritas,

Tetro irruentis mox cruore

Caeruleas tepefecit undas.

Qualis leaena marmarico e specu

Obscaena caedis quam stipulat fames,

In nos ferebatur tremendo

Dente fremens periturus hostis;

Stridens Lybissam hunc sed veluti Notus

Difflat arenam, aut Africus impotens

Fronde caducas, laborantem

Tur-



Turbine diripuit tonanti .  
Ergo sonoris omnia plausibus ;  
Et laeto eburnae carmine tibiae ,  
Collesque , pulsataeque valles  
Laudibus aerae refultent .  
Lux e tenebris fulsit amabilis  
Soluta vinclis crura tenacibus :  
Natis parentes , rursus aegro  
Pignora restituis parenti .  
Terrae , polique ac rerum opifex sator  
Divum , procellis cui Boreas furens  
Nubesque patent , fulminantem  
Quem Stygiae trepidant sorores .  
Avertis altis culminibus faces .  
Bombos ahenos turribus arduis ;  
Raptus nefandos , ac profanis  
Reliquias manibus Deorum .  
Totum hoc supremi muneris est tui :  
Tu nos benigno numine protegis ;  
Tu perdis hostes , obrutosque  
Tartareis cohibes catenis .  
Laetatur aether ; terra parens novis  
Passim renidet picta coloribus ,  
Nectunt odoras Napeae  
Frigoribus mediis corollas .  
Mutatur aetas : ver hiemi vicem  
Cedit : tepentis rura Favonii  
Foecunda pubenti rosarum  
Prole levi recreantur aura .  
Frondosa tutae per juga deviae  
Errant capellae ; per freta navitae  
Pacata ; tutae per tumultus  
Carpathios volitant carinae .

At

At vos ; quibus jam vel tripodes sacri ,  
 Laurusque victrix , palmaque nobilis  
 Deventur Heroes , coronae ac  
 Gemmiferae radiantis auri ,  
 Poscente tanto cardine , pergite ;  
 Praesens secundis rite laboribus  
 Dextra rubenti Caelitum Rex  
 Dux aderit , animosus auspex .  
 Dirum patenti jam Antiphatem mari  
 Pulsam , cruento ac milite terras  
 Replere terras comminantem  
 Fertilibus prohibete campis .  
 At tu , tot urbes , regnaque ditia ,  
 Romana quem res postulat , annue ;  
 Succurre saeclo fluctuanti ,  
 Ambigui reparator aevi ;  
 Invicte Caesar , maxime Principum ;  
 Cui rerum habenas , atque adamantinis  
 Firmata clavis promerenti  
 Sceptra boni statuere Divi .  
 Ductore quis te , vel profugum Scythen ,  
 Medumque Dacumque , ac Macedum agmina ,  
 Quis vel Typhoeos jam , vel hirtos  
 Eumenidum metuat colubros ?  
 Reges sequentur . Te Solime , ac sacrum  
 Christi Sepulcrum flagitat ; hinc diu  
 Te Memphis , Euphratesque , lateque  
 Irrigui tremat unda Nili .  
 Nunc famam Olympo , ac fideribus licet  
 Proferre , terris Imperium ultimis ,  
 Quacunque fluctu inhospitalis  
 Murmurat Oceanus frementi .  
 Exsurge Caesar , sollicitis vigil

Curis : secundis vela tuis sonent  
Inflata ventis diffecantis  
Navifragum pelagus phaseli ,  
Votis paventis excubitor gregis  
Accurret ultro supplicibus *Pius* :  
Is te triumphali , novaque  
Accipiet reducem corona .  
Nos dehinc superbis molibus arduos  
Tollemus arcus , sideribus pares ,  
Stabuntque inauratae sub axem  
Purpureis maculis columnae .  
Hic gesta terra , atque undifono mari ,  
Caelata quondam fortia lubrice  
Labente saeculo obitupentes  
Magnanimi relegent nepotes .  
Suspensus alto e fornice acinacis  
Et tela ferro fulta Cydonio  
Arcusque pendebunt sonantes  
Exuviaeque Oriente raptae .  
Hinc rostro adunco , atq; unguibus aureis  
Ales Tonantis , fulmineo hinc Leo  
Et dente frendens , & minaci  
Ungue ferox , meditante pugnam ;  
Adstabit , aerisque increpitans sonum  
Bellona rauci impellet , & horrida  
Vultu timendo personabit  
Sanguineo minitans flagello .  
Tonabit aether plausibus . At miser  
Selimus atro pulvere sordidus ,  
Ad Baëtra moerens , Caspiofque  
Vipereo fremet ore demens .

# OCTAVIANI MANINIUTINENSIS

## G A R M I N A.

### AD PRINCIPES CHRISTIANOS,

UT OPEM FERANT EQUITIBUS DIVI  
JOANNIS CONTRA TURCAS.

**Q**UAE vos longa tenet mora Reges? barbarus hostis  
 Urget agens, equitesque premit terraque marique,  
 Qui pauci Melitae clauduntur finibus arctis:  
 Caedibus absumpti plures, dum fortia bello  
 Pectora barbarico opponunt, rutilantibus armis  
 Dum nullos ictus, & vulnera nulla feroces  
 Praemetuunt, non fatum ipsum, dum signa tuentur  
 Insignita crucis veneranda & imagine Christi.  
 Hostis habet primas arces, munitaque portus  
 Claustra suo victor numero: instantique tumultu  
 Invisi cecidere viri, noctesque diesque  
 Oppugnati usque ah miseri: cecidere frementes  
 Turcarum quoque jam ipsae acies, peditesque ducesque.  
 Quidnam vos tandem expectatis? tempora pugnae  
 Quae opportuna magis, quae nam momenta saluti  
 Sunt magis apta virum, qui templa, Deosque tuentur?  
 Si pereant ope nunc vestra, auxilioque carentes  
 Egregii bellatores, fortissima pubes  
 Undique collecta, heu quae vos infamia passim  
 Perstringet cunctos? quae vos maledicta sequentur?  
 Quas demum clades: quae damna extrema subire  
 Omnes inviti cogemur? protinus oras

In-

Invadet Siculas, parvo distantia tractu,  
 Littoraque, & mediis positas regionibus urbes.  
 Immanis victor Scythica feritate timendus  
 Sardiniam, Cynnumque petet. Campania quis te  
 Proxima defendet? Calabras quis proteget arces?  
 Daunia quanta tuis tempestas imminet agris,  
 Quanta tuis Latium? quanta heu tibi Tuscia? clare  
 Quanta Ligur tibi: ni larum jam classibus aequor  
 Cuncta tuens complex, & Turcas fluctibus imis  
 Obruis, hostiles demergens gurgite puppes.

Nec te perpetuo tutam Phaeacia tellus  
 (Perpetuo tutam cupio) Dominosque potentes  
 Crediderim: nec, quas longo sua brachia tractu  
 Adria porrectus tot claras subluit urbes.

Tot claras urbes fallens tentare timebit  
 Publicus ille hostis, nunquam pacatus, acerbis  
 Insectans odiis Turca: hanc Dii tollite pestem.  
 Quare agite unanimes Melitae succurrite cuncti.

Sancte pater, cui relligio nunc credita soli,  
 Cui pietas, & sacrarum custodia legum,  
 Tolle moras omnes, obsessosque eripe morti.  
 Et tu qui imperio flores, Germania summum  
 Quem colit insignem proavorum stemmate longo  
 Insignem, domitis tot gentibus, atque trophaeis,  
 Induperatorum prolesque, neposque piorum  
 Immitte infractas in castra inimica phalanges.

Hispani qui tot populos, tot regna, tot urbes  
 Imperio subiectis victricibus armis:

Qui non contenti patria, terraque fretoque  
 Ignotos fines, incognita littora longo  
 Aequore quaesistis, quaesitas legibus aquis  
 Formastis gentes Christi, & statuistis ad aras.  
 Effigies tu vera patris, suprema Philippe

Spes

Spes gentis Christi cultriciis, maxima regna  
 Qui sancta ditione tenes, patiere tuorum  
 Ulque dolos vitae meditari impune furentes  
 Immanes Aquilone Scytas, & rupibus ortos  
 Frigoribus duris incultos, moribus aspros?  
 Nec te immortalis nunc tanget gloria patris?  
 Quam non ulla dies Letheis obruet undis.  
 Magna patris magni soboles, jam classibus aequor,  
 Nec mora longa, novis jam comple, & finibus hostes  
 Sterne tuis: vel longinquas procul eice in oras  
 Attritos alte, & tua jam, quae nescia vinci,  
 Arma animis positis semper sine fine timentes?  
 Est Melitae patris munus: nam Carolus olim  
 Hanc dedit ejectis longo post tempore bello  
 Turcarum Rhodiis ducibus, magnoque magistro.  
 Nunc quoque sit Melite munus Rex magne Philippe  
 Sit munus, Rex magne, tuum, florentibus armis  
 Militibus nostris, tua quos nunc vivida virtus  
 Servat ab exitio minitantis dira Tyranni.

Gallorum princeps, Galli procereſque, duceſque,  
 Invidi Gallorum equites, peditumque manipuli:  
 Excidet exanimis vos Christi insignia primos  
 Defendiſſe acres ferro, Solymosque recessus  
 Infractos penetrare auſos, Sanctumque ſepulcrum,  
 Supremi Regis caeli cultoribus olim  
 Reſtituiſſe piis, ſpoliis orientis onuſtos  
 Non ſemel in patriam claros retuliſſe triumphos?  
 Publica res agitur: Chriſti eſt injuria veſtris  
 Ulciſcenda armis dubitabitis omnia adire,  
 Ut vetus egregiae renoveretur gloria gentis?

Aequoris Adriaci rectores, edita priſcis  
 Martigenis gens haud ulla meſſabilis unda,  
 Italiae ſpecimen, lux libertatis avitae,

Cujus gesta aevo nunquam obscuranda futuro,  
 Ni vos firma fides servandi foederis arctis  
 Nexibus obstringit, vestras nunc promite vires,  
 Quae toties Asiae vastarunt littora, & urbes,  
 Quae toties pressis satiarunt classibus aequor,  
 Quae toties sancta pro relligione micarunt.  
 Vester honos, vestri haec victoria muneris esto.  
 Quot quot nunc estis dia virtute colendi,  
 Seu noti ditione patrum, seu fortibus ausis  
 Seu prope, sive procul, mediis vel finibus orti,  
 Terrarum, Oceani vel fluctibus interluti,  
 Si vos relligio, si cultus numinis alti  
 Permovet, & claris quae debita praemia factis,  
 Obsessos equites nunc vestro robore fortes  
 Eripite instanti leto, Turcamque fugate:  
 Barbarus est fessus, facilis victoria Christo  
 Auspice, & aeternos victurum nomen in annos.

### AD EQUITES MELITENSES.

**C**AELO alto demissae animae, dignissima caelo  
 Lux invicta virum, lux nobilitatis, ab armis  
 Turcarum Meliten quae fortiter ausa tueri  
 Territa non acie horrenti, non mille carinis  
 Saevitia aut dira Scythicae impietatis: ab alto  
 Mirantur superi fortissima pectora, ab alto  
 Demittent (contemne minas, & barbara tela)  
 Speratum merito auxilium. victoria tandem  
 Excipiet fessos, claroque reponet Olympo  
 Heroas inter, melior quos protulit aetas.  
 Quod si fata velint patriae pro moenibus acres  
 Pugnando tantos denum finire labores,  
 Quid melius, quam pro patria procumbere fortes?  
Pro

Pro fanis, arisque sacris? cui gloria major  
 Contigit? aut ullo potis est contingere saeclo?  
 Victores, victi semper vivetis in omne  
 Temporis aeterni spatium: perque ora virorum  
 Semper honos, semper clarissima gesta sonabunt.

## PRECES PRO EQUITIBUS DIVI JO.

OBSESSIS A TURCIS IN INSULA MELITA.

**D**I Servatores hominum, qui dura pericla  
 Semper ab innocuis avertitis, illa supremo  
 Si pieras caelo quondam bene cognita vivit,  
 Si virtus, si cana fides, si cetera cordi  
 Sunt benefacta virum, Melitam spectate faventes  
 Obsessam innumeris Europae, Asiaeque manipulis.

Hic invicta manus delecta ex omnibus oris  
 Constitit, & sancta pro religione tuenda,  
 Pro templis, arisque Deum, pro luce piorum  
 Excubat & nullis cedit fortissima damnis.  
 Sed non densa choors ceciderunt fortibus ausis  
 Oppressi instantis Turcarum fraude Tyranni  
 Multi saepe viri, loca dum sibi credita servant.

Parva manus superest casura heu mole malorum,  
 Barbarus ah fessos dum nocte, dieque fatigat.  
 Ille Rhodo clara prius exuit omnia passos;  
 Ille etiam Melita coget migrare relicta,  
 Si modo qui migrent superabunt, numine dextro  
 Caelicolae adfatis restat spes una supremi  
 Auxilii caelo missi; quando omnia desunt.  
 Humana heu miseris frustra sperata, Deum Rex  
 Respice placatus summo de culmine caeli,  
 Hunc equitum florem, nostrae haec insignia gentis.

Ro-



Roboris antiqui neu nigras ire sub umbras  
 Reliquias patiare Pater, tua dextera fervet  
 Aeterna dignos vita, aeternisque triumphis.

# JUL. CAESARIS S C A L I G E R I

## C A R M I N A.

### I N D E U M P A T R E M.

**P**ERPETUAS rerum series, ascriptaque Mundo  
 Foedera, & aetheriis orientia signa manipulis  
 Aggredior. Quid Fata ferāt: quibus ignibus hausta  
 Concipiant humiles caelestia semina mentes:  
 Aeterni Genitoris opus. Juvat ire per omnem  
 Naturam, veteresque Dei recludere leges.

Vos me igitur: tuque ante alios, cui limina Divum  
 Celsa patent, celeresque vacant noto Aethere nimbi,  
 Sancte Puer: cui fulmineo cita nubila cursu  
 Parent & rapidis statuunt vestigia plantis:  
 Jam super aeriam cognati luminis oram  
 Constituas: totoque feras mea carmina Caelo.

Jamprimum validis suspensam hanc, aspice, claustris  
 Congeriem, pictamque oculis radiantibus Aethram,  
 Annique Oceanique vias, Terraeque labores  
 Perpetuo imperio nox intempesta premebat.  
 Nam neq; erāt Astrorum acies: neq; candida Nautis  
 Nocte sedens tacita pascebat lumina Vesper.  
 Necdum etiā excierāt Hyemes fera murmura: necdū  
 Diva Deum sanctae quae praesidet aurea Luci,

*Pars II.*

G

*Ocea.*

Oceani fluvio vigiles perfusa lacertos  
 Ibat in Hybernas referens juga fessa pruinas;  
 At Pater omnipotens aeterno accinctus amore  
 Multiplicem textum, superi spatia avia Mundi,  
 Sideraque adverfo subterlabentia Caelo,  
 Informemque globum condit Telluris: & alta  
 Aequora Phoebeis subsistere jussit habenis.  
 Hinc etiam immenso radiis excita profundo  
 Protinus alma Dies fugientibus incubat umbris  
 Auricomi imperio Phoebi comes. Ille dierum  
 Castigatque moras, brevia & compendia laxat.  
 Ille fovet validis subeuntia semina caussis  
 Largior, atque elementa modis in lentia miris,  
 Secum aevi momenta trahens, rerumque senectam.  
 Ac neque jam terrae Sortis caligine caeca  
 Delentur facies: neque turbida lucis imago est:  
 Alternoque meant cedentia tempora lapsu.  
 Volvitur oceano Caelum; blandisque tenebris  
 Defessi aspirant animi, solaque sub umbra  
 Mista latent laeta acta virum, tristesque dolores.  
 At sopor interea nutanti corpore pronus  
 Detergit gravibus mortalia pectora curis.  
 Tum dirum insani Martis populatus amorem  
 Afflat agens segnes animos, & inertia corda.  
 Illum invitantem ad miserandae obliviae vitae  
 Alituum tepidis haerentia corpora truncis,  
 Hesterni memores avido sub dente pavoris  
 Excepere ferae faciles, seseque dedere.  
 Nec minus inde abiens variis operosa periclis  
 Aequora conciliat Caelo. latet abdita turba  
 Squammigeri gregis, & fruitur felicibus horis.  
 Protinus aerias animas, atque alitis Aurae  
 Semina, terrificosque alto ciet axe tumultus

Roresque pluviasque nives , canasque pruinas :

Attonitasque cavo convulsas turbine nubes

Fulguribus crebris , & fulminis igne corusci

Diffulit : ac laceras Caelo disjecit aperto .

**T**um vero teneri tepor , & clementia Veris ,

Optatasque vices , ac limina fertilis Anni

Exerueri : Hyemisque furor vaesanus iniquae

Increpuit cladem agricolis . ruit horridus Imber :

Imber agens miseris gelidum Pastoribus annum .

Necnon & pecudes , necnon & turba volantum

Cautibus hybernant tepidis . silet obruta duro

Terra gelu : sудоque sonant Aquilone procellae .

Jam patris Oceani refluus maria incita metis

Composuit : guttisque undas insperfit amaris .

Illum exsultantem , ac sese in vada caeca trahentem ,

Rimantemque aditus , specubus compescuit imis ,

Telluris medio in gremio . Dum fervidus ira

Nititur egressus varios , terrasque fatigat :

Speluncas , vitreosque lacus , & rosida rivis

Rura quatit : liquidisque gemunt singultibus antra .

Saxa magis ; quia saxa cavo latebroso recessu

Urgentem invitant laticem : quem vis vaga ponti

Continuo premit accubitu , truditque ruentem .

Tres adeo ingentes diversis tractibus amnes

In devexa ruunt . tres alto margine ripa

Frenat aquas : stringitque citis vestigia lymphis .

**E**cce aestus domitor , terraeque feracis alumnus

Nilus adest : adque usta extremi limina mundi

Nostro admiranti Nereocanit altus . at illi

Adstunt pelagi Indigetes . stupeſcunt infcia turba

Avia disjunctis fulgentia sidera terris .

Interea domiti non secius aequore campi

Stagnantes deducit aquas : & limite glauco

Informemque animat limum, fingitque sequentem .  
 Parte alia gelidus flavae moderator arenae ,  
 Dissimulans Solisque obitum , lucemque cadentem ,  
 In latus Euxini furiosis cornibus Ister  
 Germanū evadit truculentum, Hunnumq; ferocem .  
 Nec minus aurifero sublustris pumice Ganges  
 Exit : ubi teretes caelesti e semine rores  
 Haurit agris Aurora . Et quo te carmine dicam  
 Tybri pater ? domito quem fama aequavit Olympo .  
 Est locus Hesperia in magna , qua flexibus ingens  
 Mille fluentifono fluvios Padus excipit alveo :  
 Vorticibusque cavis celeres citus explicat orbis .  
 Sollicita hinc , atque hinc incerto foedere moles  
 It Caelo , atque aegre violentibus imperat undis .  
 Quid referam infesto turbatos agmine vultus ?  
 Solvuntur tepidis canae cum flatibus Alpes ,  
 Imbrifer imbriferis cumque Alpibus Apenninus :  
 Quam pecoriq; satiq; luem, quantam ille Tyrannus  
 Det stragem ? fuge torva citus fuge flumina pastor ,  
 Tollentemque minas , & cornua dira tumentem  
 Aggeribus preme perpetuis : ac pondere ripae  
 Carpe vigil . Non ille cavis contentus avitis  
 Vicinas petet exuvias . stat Vesulus alte  
 Arduus : atque animos genitor despectat ovantis .  
 Solus , ab Arctoïis ubi Norica tunditur auris ,  
 Regnatae indignans servire licentius undae ,  
 Praecipites famulum latices defleat in aequor  
 Rex Athesis , rex olim Athesis fert clara secundo  
 Cornua suave jugum non detrectantia cursu .  
 Quid tumidi , & graviter spirantis copia , duri  
 Benaci ? ruet ille graves sub sidera fluctus ,  
 Ostentans scopulos , & tristibus igneus iris .  
 It vigil adspectans confusas moestus arenas

Pisca-

Piscator : rupique levem conterritus alnum  
 Credidit , aut sylvis tuto subduxit opacis .  
 At pater Adriaci scopulo Neptunus ab alto  
 Effrenes undarum acies miratur , & imbres  
 Fulmineos , actosque animis in praelia Cavros ,  
 Vastior : intumuitque novo praecordia Regno .  
 Qualis ab aetheria praepes Jovis armiger aula  
 Seu pavidum leporem , seu pronum in cornua cervum  
 Despiciens , specula celer infidiatus ab alta ,  
 Orbe datur brevior , trahitque in nubibus auras .  
 Ast illi caput , atque rotantia pectora circum  
 Funduntur picae ignavae , corvique sequaces ,  
 Solicitataque vulturii gens improba odore .  
 Sic liquidum molitur iter : junctisque quadrigis  
 Vadit : eo gradiente , metu maria alta tremiscunt :  
 Moeniaque stabiliue ingentes obice turres  
 Nutant : & pecori stragem juga celsa minantur .  
 Tum circum assultant informia corpora Cete .  
 Subsidunt acta in spumas , crispataque cedunt  
 Caerula : & obversis stridunt vaga marmora fulcis .  
 Purpureis pastos algis adjunxerat Andis ,  
 Benaci decus , Eridani flos , Mincias Andis ,  
 Ore patrem referens , Nereida pectore matrem ,  
 Glaucia oculos , Hyali succo fucata capillos ,  
 Laetmothosi , Rhothiumq ; Polyclystumq ; Haliumq ;  
 Quos deprensa cavis pelagi sub coribus imi  
 Cymothoe magno genitori effudit in auras .  
 Cum vultus , & colla jubeis mentitus equinis ,  
 Improbos hinnitu scopulos tentaret acuto .  
 Illi indignantes densos obsistere fluctus  
 Irarum tumidos proflabant naribus ignes .  
 Acriaque in numerum glomerata volumina crurum  
 Exinuant : caecaque cient aspergine Caelum ,

Infrenes . curvi absistunt a pectore montes,  
 Exsultantque vada : & latices miscentur amari .  
 Nec mora vocales cogit per caerula fratres  
 Vellivolae Tibicen aquae : cui flexa recurvo  
 Turbine concha patens rauco quatit Aethera cantu .  
 Ergo omnes vitreis virides Tritones ab antris  
 Alta secant . cedunt fluctus : undaeque dehiscunt .  
 Pars erexerunt pinnas , aurasque morantes  
 Captant : & votis aspirant flabra secundis .  
 Aut Solem glaucae densis contextibus algae  
 Defendunt : bifidis trepidant freta fervida caudis :  
 Convulsumque Feris fugit occurrentibus aequor .  
 At parte ex alia viridis chorus ordine longo  
 Nereidum comitatur iter : liquidisque sub undis  
 Lubrica pellucet labenti pectora fluctu .  
 Exercent humeros aliae , pars colla Ferarum :  
 Nant aliae . tremulis respondet plausibus Aether .  
 Impexi fluitant crines , & in aequore ludunt .  
 Ille etiam in latices proprium Telluris honorem ,  
 Qua furit Ionio metuendus Sidere Nereus :  
 Euxinoque truci , instansque truci Aegaeo  
 Obstrepit : Illyriosque sinus , Tyrrhenaque late  
 Litora , Sardois Zephyrus qua frangitur Euris ,  
 Accipit : & priscis nova constitit Insula Regnis .  
 Saevus enim rapida veniens vi pontus , ubi ingens  
 Irruit : utque fluor miscens proclivis arenas  
 Cunctantes impegit aquas : utque impulit aequor :  
 Oppugnata diu , magno molimine saxa  
 Rupit : & undisono disclusa interluit aestu .  
 Haud aliter memorant , olim subeuntibus undis ,  
 Trinacrium Ausonio disiectum limite montem .  
 Sic & inaequalem vario discrimine Macrin  
 Abscidit : & Tenedon Teucro de litore vellit .

In-

Interea magno terrae commota tridenti  
Fundamenta quatit : totumque a sedibus orbem  
Convellit . trepidi rupes e culmine saxi  
Diffiluere : fugit vastis sub molibus aequor .  
Intremittit ictus Athos , Lemnumque a vertice late  
Excudit . Illa diu Caeli per inane voluta  
Caeca refert longo flammarum semina tractu .  
Quinetiam horrifonae subter cava turbidus Aetnae  
Virtus inexhaustum spirantes dissipat ignes .  
Tum sparsae abstulerunt secum Meligunida flammae .  
Qua ferus Hipprotades vasti sub rupibus antri  
Ventorum imperia exercet : Nautaeque vaganti  
Acolios acies aperit Vulcania campos .  
Quid tibi commemorem congestas faucibus oras ,  
Quas Ligeris , quas Nilus agit , Gangesq; Padusq;  
Litoraue auriferis ditans anfractibus Indus ?  
Talía ab objectu terrae scinduntur inertis  
Cornua magnanimo stagnantia gurgite Reni .  
Vastus arundineo late qua cinctus amictu  
Perque truces populos , pacisque expertia Regna ,  
Fertur ovans , Divumque sibi deposcit honores .  
Quaquam autem Hesperisq; minis , & torvis Eois  
Per varias hominum clades , metuendaque Fata  
Finditur , & dubio sulcatur tramite pontus .  
Hinc montana levi consurgens vertice pinus ,  
Hinc malefana abies , & veligeræ antennae  
Irritant : tonsaeque cava luctantur in unda .  
Tiphys ubi edomito ridens ea Fata labore  
Fluctibus in mediis animi vestigia fixit :  
Ausus inhumano pelagus decurrere Caelo ,  
Audacesque aptare trabes , & fidere ventis .  
Inde etiam imperiis , atque artibus omnia miscent .  
Viscera scrutantur vasto telluris hiatus .

Vulni-

Vulnificusque Chalybs, Aurique infesta metalla  
 Pallentis patuere. Alius perterritus imbrī  
 Frondentes stringens sylvas, infensus iniquo  
 Molitur Boreae surgentia robore tecta.  
 Aut subit ancipiti pendentia culmina top̄ho.  
 Aggestum & vallum : summaque tuenda virum vi  
 Moenia succinctus populis descripsit Arator.  
 Ergo ut praecipites caecus dolor egit in iras,  
 Aut amor, & rapidis illudens flamma medullis  
 Persuasit telum omnigenum, rupesque revulsas,  
 Lignaue carnificesque manus, ignemque sequacem:  
 It pedes : & rudibus praefixum hastile manipulis  
 Ordinibus praelucet. At his nec densus acuti  
 Vultus inest cunei, aut consertae ex more Phalanges.  
 Pro se quisque graves animos, aut mollia corda  
 Aspirant : variasque acuunt in pectore flammās.  
 Post hinc sublimes in equis, & falsibus acres  
 Corripuere Aquilas in jura vocantia Martem.  
 Ac jam tu gladiis jam fustibus horrida pubes  
 Emicat : & justae glomerant certamina Turmae.  
 Jam lectae lucent acies : jam Marte calentes  
 Caedibus in mediis exsultavere cohortes.  
 Degeneres animos insano cornua cantu  
 Succedunt, repetuntque effoetos aera lacertos.  
 Haerent parietibus clypeis, postesque refixi,  
 Rostraque Barbaricis olim detracta carinis.  
 Ipse autem gelida pernix Venator in umbra,  
 Dum silet omnis ager placide, saltusque quiescunt,  
 Excubat, ingentes cingens indagine saltus.  
 Mentiturque solum fovea; strobibusque subactis  
 Pallentes sternit frondes, canamque palustrem.  
 Tum primum insomnis vitulus meditatus aratrum  
 Mugit : & ruptis fugit praesepia vinclis.

Atque



Atque vigil sub luce nova, Caeloque recenti  
Captavit pavidò fugientem e pectore somnum.  
Nanque ubi Terrigenae sperati foedera Regni  
Spiravit Pater : ut sacris consideret aruis :  
Vipereo antiqui commento proditus Hostis,  
Ah miser, immenso aeternum fraudatur Amore.  
Ergo aegre sulci manibus crispantur : & uncis  
Unguibus, aut sudibus glebae trudentur inertes.  
Dein rastro, stivaeque rudi proclivis aratri  
Exercet duram Matrem, collesque malignos.  
Ipsa etiam infelix infecta hoc crimine proles,  
Infandum, aetherio semper caritura recessu  
Morborum genus omne subit, turpemque senectam,  
Bellaque, pauperiemque gravem, lètique labores.  
Magne Pater, viden' ut tetro porrectus ab antro  
Sedibus ejectus placidis consortis Olympi,  
Invidus horrendo interitum minitetur hiatu?  
Hic te, ipsi quod tu dederas, detrudere Caelo  
Ausus, & indignans generis subeuntis honorem,  
Quod superest, opus ecce tuum tentabit? ut illi  
In te non licuit, saltem in tua facta licebit?  
Huc igitur quis me reditus manet? aut quis acerbo  
Eximet exilio? quae Victima sancta piabit?  
O pietas, vera o pietas. Tun' maxima vitae  
Munera qui dederas, Angui praerepta superbo  
Integra restitues? labi permittis, & hostem  
Me fieri : ut Nati redimat me sanguis amicum?  
Ergo ego, qui veteris necquiquam criminis haeres  
Mole nova repeto aeternum reparabilis aevum,  
Quem potius cecinisse velim? cui dicere laudes,  
Ignigeno lucis non notae incensus amore?  
Non mihi si aetheriae insinuet sese omnia mentis  
Semina : non si tota mihi sese ipsa recludent  
Mur-

Murmura linguarum : quaecunque liquentibus auris  
 Concipiunt variis faciles accentibus ortus :  
 Sim fatis. Arcta leves operum haec Elementa tuorum  
 Alludunt aditus. Te nec mortalis egestas,  
 Caelestisve capit felix opulentia Regni.  
 Me tamen, ut curru Titan orientis anhelò  
 Clivum habet : ut prono cedit devexus Olympo :  
 Ingens raptat amor : figitque in sidera vultus.  
 In te abeo : donec sacro sub sanguine Nati  
 Mole nova repetam aeternum reparabilis aevum.

## IN DEUM FILIUM JESUM CHRISTUM.

**Q**UI superas patrii mutasti luminis oras :  
 Sordibus ut miseri fieres obnoxius Orbis :  
 O rerum decus, o Mundi melioris origo,  
 Nate Patris summi, summi Nate unice Patris :  
 Illa actus pietate, & eodem incensus amore,  
 Quo pro me caram voluisti fundere vitam,  
 Huc iterum descende : aegraeque illabere menti  
 Consolator, & a vero me tramite lapsum,  
 Errantemque etiam mordacibus exue culpis,  
 Unde autem laeta intrepidae primordia mentis  
 Obrutus infami squalentia pectora luctu  
 Accipiam? O verum Lumen de Lumine, mortis  
 O Mors praeteritae, O vitae Spes sola futurae.  
 Unum ergo reliquum omnipotens oramus : & unum  
 Spiramus. Da magne Pater tibi posse placere.  
 Haud equidè hoc petere indigno scelere obrutus aus,  
 At scelus ablutum puro qui sanguine deles,  
 Dignaris venia. Hoc Patris est, hoc deniq; vestrum :  
 Quod nihil, aut pejus nihilo est scelus, addere vitae.  
 O flammae Vapor immensus sine fordibus, o Lux,  
 O Ignis :

O Ignis : non iste vorax : sed lumine Vitae  
Cuncta fovens . cui frigus iners , cui frigoris Autor  
Hostis atrox cessit fugiens malus . En ego purum  
Olim opus : at nunc jam sceleris sub pondere servum ,  
Heu hostemque etiam , ac contempta luce rebellem ,  
Invitum , ingratumque , & me mihi crimine raptum  
Restituis veterique viae , Regnisque futuris .  
Tu quod non fueras , placito tibi tempore , factus ,  
Ut fierem quod eram ? passus mea crimina , servus  
Ex Domino : ut servi excuteret fera vincula collo ?  
Non tibi jura loci gremio Telluris amatae ,  
Non tegmen qui cuncta tegis . Quem culmina Mundi  
Alta canunt , stabulo positus vagire juberis .  
Hoc te adeo magni soboles operosa Parentis  
Occupat : & mediis regnat Fors improba caussis .  
Sugiet pardus ovem : proles truculenta leonis  
Mugiet horrendum intrepidus adnixa juvencis .  
Sic tibi mole nova Caeli fulgentior axis  
Constitit , & magnis concors evolvitur astris .  
Sic placitum Genitori , imo qui protinus orbe  
Terrarum , sator alta sedens juga torquet Olympi ,  
Sancta etiam Eois surgens Aethraea manipulis  
Ostentat late populos , atque aurea Regna ,  
Aurea perpetuam rerum spirantia pacem .  
Reginamque Hecaten tenebrarum , auraeque silentis  
Conciliat . dabit ipsa novos ad sceptrum tumultus :  
Aeternaeque manu capies moderator habenas .  
Sed fuge crudeles animos : fuge torva minacis  
Monstra viri . petet ille tuos furor improbus annos :  
Spes Matrum , ac regni excindet simul ille Tyrannus :  
Impiaque innocuo foedabit sceptrum cruore .  
Quae te terra Puer profugum : quae tota , Parenti  
Parva manet : quae terra sinu officiosa recondet ?  
Jam

Jam quae fata poli Dominus sperare jubebas,  
 Vix audent tutum indomito bene credere saltu.  
 Te nitidae Caeli faculae, te rosidae Aether,  
 Te liquidi flevere Dies, & conscia Fati  
 Sidera quaeque vadis pinguescit putribus amnis,  
 Quaeque patens siccis animosi fluctibus Euri  
 Exinuat, torquetque leves Aegyptus arenas:  
 Et vos palmiferae saltus defleſtis Idumes.  
 Ipse etiam, qui nunc lacrimis rigat ora nitens Sol,  
 Morte tua infuetis moestum caput occulet umbris.  
 Quem ne gemam? quid collacrimem? te funera passum,  
 Ut vitam des? an meipsum: qui vincula mortis  
 Necto iterum: quae Sancte tuus dissolverit ortus?  
 Dulcis amor, dulcis pietas, dulcissima vita:  
 Qui mihi ad antiquum communis luminis haustum  
 Naturae stupidas solvisti funere leges.  
 Ah durum, ah rigidum protento stipite truncum.  
 Pandentemque sinus, orbemque in vota vocantem  
 Jam populo jam redde pio, jam redde precanti.  
 Aspice sanguineis rorantia pectora guttis:  
 Aspice humi stratum, celso te ut condant Olympo.  
 Inſectus manibus laqueus tua vincula rupit.  
 Ipſe reos qui solviſſet, reus actus iniquo  
 Iudice, & immeritas juſſus expendere poenas.  
 Me me. adſum genus infelix. in me impia tela  
 Coniicite. En ego, qui veteris ſum criminis heres.  
 Idem hereſque, idemque autor, idem omnia. fige:  
 En manus: ecce pedes: ſcleratum huc exige ferrum:  
 Hoc petite, hoc: veſtrū eſt veſtri hic ſtat ſūma Triū-  
 Eſt ſatis, eſt mihi nūc animi, per mille pericla, phi)  
 Mille neces, ac morte ipſa quod durius uſquam eſt,  
 Dulcia mi experere optatam per vulnera mortem:  
 Vulnera noſtra tuos diros imitantia caſus.

Aspice quo rerum traxit me dura juvenus  
Amentem, & stolidum ventosae Gloria laudis:  
Per validas acies, saevique incommoda Martis:  
(Heu vigilatae hyemes, noctesque sub Alpibus aetæ)  
Foedaruntque mihi faciem: hauseruntque cruorem,  
Qui tibi, quique tuas olim debetur ad Aras.  
Tu mihi, tu geminam duplici sub lumine vitam  
Insinuas. tu sub renovato foedere laetum  
Rursus fidereis facis aspirare manipulis.  
Hanc tibi ego infonti servatam sanguine vitam  
Hanc reddam Pater: illa tua est. te flumen amoris,  
Te fontem aeternaeque spei pelagusque salutis,  
Immensumq; Diem, atq; immensum Lumen anhelat  
Ah quoties animo subeunt tua vulnera sancto:  
Tu toties miseri scelera obliviscere monstri.  
Nempe his me maculis tanto de vulnere sanguis  
Proluat: aut fontem lacrimarum immitte precanti.  
Fac me unum e famulis: certum cui carpere pensum  
Constitues: coeptoque operi insudare jubebis.  
Fac me unum e catulis: tenuis quibus ubere largo  
De plenis epulis, miseros cibus educat annos.  
Si nova supplicii horrendi trepidum urget imago:  
Eheu quo te animo, quo vultu demoror? ergo  
Qui mortem attulerim, vitam peto? pignora laesa,  
Laesa fides: nec forma usquam super ulla pericli est.  
Quo fugiam? aut quibus in latebris mea tetra venena  
Abscondam miser? haud satis est terraeque, marisque,  
Quod capiat ve, lavet ve nefas. Quibus ignibus atris,  
Aut quali mea supplicio commissa luantur?  
Nate Deo, Deus ipse, prius quo nil fuit unquam,  
Nil est, nil erit: omnigenum meta ultima rerum:  
Quid mihi jam sine te vel dulce, vel utile? Quo te  
Quo sequar? aut quae nunc corpus, distentaq; membra,  
Et

Et vultum illufum regio capit? hoc mihi tandem,  
 Hoc reliquum eft? ut te doleam non poffe videre:  
 Atque frui dulci alloquio, & caeleftibus auris?  
 Qualis Threiciae effugiens fata atra fagittae,  
 Cui virides faltus, & rofida gramina rivis  
 Excuffitque animo catulum fuga dura: per altos  
 Illicet abripitur montes, per inhospita faxa:  
 Exfuperatque vias omnes. tum limite campi  
 Nequicquam laticis quaerit miferanda liquorem.  
 Ah mifera: ut femel expleris te munere lymphae:  
 At fities: ego non fitiam. mihi flumine vivo  
 Fons fcetet: aeternique fitim domat agmine rivi.  
 Ergo etiam pofuifti animam: quo tollere noftram  
 Velles depositam, deploratamque periclis?  
 Dic, ubi te pofuere: at ego hinc caeleftia tollam  
 Pectora, liquentique ungam liventia fucco.  
 Dic, ubi te pofuifti: at tu hinc mortalia tollas  
 Corpora, letiferisque laves fordentia culpis.  
 Dic, ubi fis: quo te fugiam: cui robora veri  
 Intemerata manent Recti: quem Tartara Regem,  
 Quem ventura tremunt fcelerati incendia Mundi.  
 Dic, ubi fis: ubi te quaeram: quem dulcis amor, quem  
 Suafit amor dulcis pro meipfo effundere vitam.  
 Tu ne etiam inferni fpoliafti lumina Regni:  
 Ac rediens iterum noftris jam vefceris auris?  
 Sifte Pater: fic ne ut feris accincta tenebris  
 Nox miferum, involvat caecis amplexibus Orbem?  
 Sifte gradum. te Luce nequit nox ulla morando  
 Officere: haud orbi, haud animis: quos lumine caffos  
 Illa ferox nequicquam operit fordentibus umbris.  
 Ah ne alibi ferum hospitium tibi quaere: fed intra,  
 Intra in nos Deus omnipotens. Nam fiqua recepti  
 Mens praefaga boni miferis Mortalibus ufquam eft:  
 Tu

Tu Deus es, tu, praesentem quem quaerimus, ipse es.  
 Quonam abeas? fracti agnosco rata pignora panis.  
 O panis : cui nulla fames, nulla obsita leto  
 Obsit repit extremis veniens in rebus egestas.  
 Ecce ego, nulla mora est : eadem mox nocte remensa  
 Ocyus ad fratres, & Vatis moenia Regis.  
 Vidi egomet Dominū; hisce oculis, hisce auribus hausi  
 Viventem. Num mors potis est in semina vitae?  
 Ille mihi, & Lucae, & Cleophae, per lumina rerum,  
 Per veteres verborum acies, quas Spiritus alto  
 Communi Patri atque ipsi, de fonte profudit,  
 Per se unum, ad seipsum, sese duce vectus, inanes  
 Excussit tenebras. Hic me Pater optime fessum  
 Deferis : & miserum medio in sermone relinquis?  
 Atqui olim mihi perpetuum comitantis honorem,  
 Aeternum latus, aeternae vestigia vitae  
 Pollicitus fore non ullo quem deferis aevo.  
 Ergo etiam integro generis mortalis amore  
 Hic aderis. vita extremis obsessa tenebris  
 Te metuet, te quaeret. Ego hic exuta periclis,  
 Erutaque infami laetabor saecula planctu.

## IN DEUM SPIRITUM.

**T**E quoque, nec geminum, nec ab uno ducte, sed  
 unum,  
 Alme Parens : ab utroque Deus, Deus unus, & unus  
 Spiritus, unigeno qui concelebraris amore,  
 Sancte cano. quanquam in Nato, Natique Parente  
 Semper eras, & semper eris. & utrunque canentum  
 Carmen obis : placidusque in pectore fusus anhelas.  
 Nam quid ego aut dixi, aut tacui, quod numine vestro  
 Jam vacet? aut quaenam laudum mihi contigit aura  
 Quam

Quam non aut animo, aut numeris tecū ante peregi ?  
 Sic etiam aeterni complens promissa Parentis,  
 Post geminae mortis devictum numen, & altis  
 Monstri Tartarei Regna exspoliata trophaeis,  
 Igneus auricommo committus turbine nimbus  
 Increpuit. Tum arrecti animi, & vox faucibus haesit.  
 Queis ego disiecto hic oculi mortalis amictu  
 Haurio flammiferis crepitantem molibus axem ?  
 Palantesque polo faculas, & splendida lucis  
 Agmina, fulguribus crebris, tonitruque corusco,  
 Adventante Deo ? jam jam ut sese arduus infert ?  
 Dum pacata cohors animis sibi gaudia miscet  
 Concilio in medio residens, certasque fovet spes:  
 Ignigenas linguarum acies, sonitusque canoros  
 Excepere animis: aliusque repente resedit  
 Ardor, agens magnae caelestia semina mentis.  
 Ergo ille imperii aeterni ventura profatur  
 Fata canens: aperitque aevum: veteresque recludit  
 Omnimodas rerum series. jam pontus, & ingens  
 Ante oculos terrae tractus, convexaque Caeli  
 Tempia patent: parietque novis mens incita Regnis.  
 Ille peregrinis haud unquam cognitus oris  
 Reddit habens varias omni discrimine voces.  
 Audiit & sero impositus Tagus aurifer orbi:  
 Et qui barbaricas medius secat Albis arenas,  
 Indigenae agnovit commercia diffita linguae.  
 Quem nuper, quem Volga rigant, & inhospita Ponti  
 Aequora, & egelidi stagnantia flumina Nili.  
 Quaque novi vastus refluit Senega incola Mundi.  
 Quare etiam quondam rudis ad primordia lucis  
 Alme Parens, quae tu dederas mihi munera, de me  
 Haec repetas: repetita feras: animumque labantem  
 Constitue: atque fove placidam sub pectore pacem.

Al-



Alme Parens fer opem : atque piis intende querelis.  
 Sive inimicus atrox, seu me mihi dira cupido  
 Abstulerit : si me abstulerit me dira cupido:  
 Affert opem pius : ac miseris intende querelis.

## IN SEMPER VIRGINEM DEI

## GENITRICEM MARIAM.

**T**E Superum Regina cano: tibi, debita Caelo  
 Carmina speratam rerum evolventia pacem  
 Servire, & sanctam trahere in mea vota Pyrenen  
 Incipiunt. mihi tu numeros, mentemque supremam  
 Inspira : atque animo fallaces elue curas.  
 Nam quis tantarum me immensa per avia rerum  
 Labentem, fractumque metu, pulsumque pudore  
 Restituat? quis nostra tuis favor oscula plantis  
 Admoveret : & superas securum sistit ad Aras?  
 Quid primum, quid postremum de te optima Virgo  
 Eloquar, aut sileam, sub iniquo ponderis aestu  
 Pressus, & aeternae ingenti cumulo obrutus aurae?  
 Verte omneis tete in facies mens ardua, mens o  
 Mens alto cognata Polo : totum indue Caelum:  
 Totum hauri variis diffusum inflexibus Orbem:  
 Nondum etiam laudum complexa es Virginis oras.  
 Virginea quae Diva Deum bona condidit alvo,  
 Quisnam humili trepidus Musarum carmine condet?  
 An genus humanum, totamque ab origine gentem  
 Tabifici afflatam vitiosis dentibus aevi  
 Expediam : & veteris renovabo exordia luctus?  
 Foeminae uti datus est comes, & pater: utq; malignis  
 Capra dolis, misera ah comitemq; patremq; fefellit?  
 Foemina uti genus humanum, generisque parentes

Pars II.

H

Dis

Disclusos nitida patria : atque illustribus aruis  
Integrat : & vitae reparabilis evocat annos ?

- O Nato fata Virgo , tui patris inclyta Mater :  
Cui radiis candens niveis argentea Phoebe ,  
Pulcher & auricomus collucens Phoebus amictu ,  
Stellarumque greges placito famulantur honore .  
O Virgo sine labe , sacra mihi purior unda ,  
Quae gelidis specubus , quae vivis excita saxis  
Temperat Erigonen , scatebrisque recentibus halat .  
Tu quoque Diva sitim vitae mortalibus aegris  
Alma levas , fontemque ferens , pelagusque salutis .

Una olim desperatae primordia Gentis  
Restituis : nunquamque gravi concussa tumultu  
Fundamenta jadis : veroque e Lumine Lucem  
Concipis ; & placidam componis pace quietem .  
Ergo inter merita praekoniam certa Coronae ,  
Quam tulit e patrio descendens victima Caelo ,  
Inter & excelsas numerofo carmine laudes ,  
Tu quoque Diva nites . in te concordibus orsis  
Et servus malus : & Dominus bonus , arma volentes  
Hostica deposuere : latet sub Virginis umbra  
Nox vetus , atque recens patriis Lux edita claustris .  
Quique necis miserae male sordibus obrutus atris  
Horrebat Caeli faciem , lucemque supremam ,  
Luce viget comite , & vitalibus emicat auris .  
Qualis ubi Eoa perfusus Lucifer unda ,  
Laxavit roseis spumantia frena quadrigis :  
Postquam nox Erebo , caecisque effulta tenebris  
Flammigerum nigrante manu distrinxerit Aethram  
Aeternas accincta faces , tacitoque renidens  
Aethere , frondentis obduxerit invida sylvas .  
Tum vegetus rediit rebus color : omnia rident  
Orbe novo ; tremulaque fuga freta lata relucet .

Sic

Sictibi post tenebras, ac taedia noctis opacae  
 Sole novo, Solis domino, lucisque parente,  
 Illustrare chaos, veniamque exposcere rebus  
 Omnipotens dedit: & veteres excludere luctus.  
 Ille etiam humani tandem post ultima fati  
 Foedera, perpetuam radianti fronde coronam  
 Divino imponit capiti, sceptrumque Piorum,  
 Votaque & aeternas tecum communicat Aras.  
 Quid memorem angusto disclusas limite fauces,  
 Quas rigido clausit saltu protenta Pyrene?  
 Caeteraque extremis miracula diffusa terris?  
 Vos Caelo ascitos tumulos, rupestque superbas  
 Alloquor, & placitis positas in collibus arces:  
 Quae tumidas Pelagique iras atque horrida Ponti  
 Murmura nequicquam validos spirantia ventos,  
 Jussa Deo, cursu moles superavit acuto.  
 Illa Palaestini testisque, & conscia Caeli,  
 Quo Pater omnipotens sortem miseratus iniquam,  
 Obtulit aeternam veteri pro crimine prolem,  
 Praepetibus tenerum subiecta per aera pennis,  
 Illyricis scopulis, saxisque informibus haesit.  
 Mox scelerum rabiem fugiens, gentemque profaniam  
 Adriacos alto despectans aere fluctus,  
 Recinjos saltus, & pascua Lauretana  
 Eligit: atque piae molitur commoda genti.  
 Hic tu me variis Fortunae ambagibus actum  
 Post tetricas Fati clades, Sortisque superba  
 Imperia, & mala bellorum quae turbidus hausi,  
 O mihi sola graves Virgo miserata labores,  
 Ejectum, extorrem, miserum, rerum omni egenum  
 Fovisti, & reducis reparasti exordia lucis.  
 Per te etiam nec opinanti dulcissima Virgo  
 Subventum est: nec spes unquam me longa fefellit:

# 116 JUL. CAESARIS SCALIGERI

Et nunc prospiciens extremos terminus annos  
 Visus adesse mihi, finemque adducere rerum,  
 Tristis ut antevolans dubiae confinia vitae,  
 Ignavam mihi caniciem, luceſque malignas,  
 Curasque tractusque animi, ſordeſque profundas  
 Attulit: & memorem iſtantis jubet eſſe ruinae.  
 Ergo etiam ignoto rapidi ſub carcere curſus  
 Sperantem pariter heu cuncta, & cuncta timentem,  
 Fidentemque tuo Virgo ſanctiſſima ductu,  
 Tolle manu, & Nati felicibus inferere turmis.

## JOANNI BAPTISTAE,

**M**A X I M E terrigenum, ac Regis praecurſor O-  
 lympi,  
 Sancta Anima, & tacitis Caelorum exercita fatiſ,  
 Ultima legiferae Naturae meta Joannes,  
 Cui fulvi claros humeros immane cameli  
 Tegmen obit: nudoque ſonant de vertice nimbi:  
 Te per inacceſſos tumulos, & inhospita ſaxa,  
 Nunc vero aetherias ſedes ſuper, & ſuper altos  
 Caeleſtumque choros, moderatorumque catervas  
 Sublimem veneror miſer: atque incondita porto haec  
 Dona prius. Satin' ut pleno te pectore perſans,  
 Hoc animo, hac mente gerens, hiſ ſenſibus haerens  
 Fumantes tibi nunc ſupplex advolvor ad Aras?  
 Principio teneri poſt incunabula Mundi,  
 Et labem fragilis thalami, primique Parentiſ  
 Crimina vivificae doniſ obnoxia lymphae:  
 Caetera, quae canerent primorum carmina Vatum,  
 Spiritus aetherio ignorus de fonte profudit.  
 At tua Sanctae Parens aequaevi luminis actas  
 Extulit in verae praefentem comoda lucis.

An-

Ante etiam immensi conspectum Regis, & ante  
Quam rudis haurires vitalia semina Caeli,  
O Amor, o pietas: materna conditus alvo  
Ignotum terris Dominum sine voce salutas,  
Debita divinis summittens genua latebris.  
Mox, ubi conceptas eduxit spiritus auras:  
Fervidus increpitans caeci scelera horrida mundi,  
Solorum nemorum laetus secreta petisti:  
Qua porrecta parum sinuosae cornua ripae  
Compositas bigenae flectunt Jordanis habenas.  
Inter desertum campi latus, inter & aestu  
Collectamque sitim, dirique incommoda Caeli,  
Nec domat extremo quaesitum munus in orbe  
Medorum liquidus succus, laticisque Lyaei:  
Arida nec domitis jejunia solvis aristis:  
Mella tibi patriis uni liquentia ramis.  
Daedala sudat apes: miserat tibi devia guttas  
Summittit tellus, ac vilia membra locustae.  
Inde frequens locus ille viris, montanaque passim  
Turba ruit: vidui campique, urbesque relictæ:  
Et libertatem populi spirantis imago.  
Tu, quis es? an ne aevo patribus promissa priore  
Vera rudimenta, & certae fomenta salutis  
Dexter habes? gentisque agitas arcana renatae?  
O gravis aeterni soboles sperata Parentis,  
Adsis perpetuo imperio, & sordentia puris  
Dilue concepti sceleris vestigia rivis.  
Sic populus, sic ille: Dei nec vera propago,  
Nec vates: sterili sed vox clamantis in ora.  
Vos, quibus a supera pax est promissa quiete,  
Perpetuo licet hanc lucem celebretis honore.  
Ecce diem, quæ perfudit vos Lumine, qualem  
Extremo veniens Sol nunquam aspexit Olympo.

# 118. JUL. CAESARIS SCALIGERI

Rex Regum, aeterni sceptri cui summa potestas,  
 Regna bonis, pacemque gerens, clademque profanis:  
 Qui fuit ante, ego quam fierem, meq; ipse sequutus,  
 Exoluet veteris sordentia crimina poenae.  
 Non ut ego abjectae fluviali munere lymphae,  
 Sed liquido afflatu, ac Caeli fulgentibus auris:  
 Et patrium infonti pacabit sanguine Regnum.  
 Sic ait: & populum nitidis lustrabat in undis,  
 Multa monens, multa ore pio mandata resolvens:  
 Ecce autem sacris sese referebat ab aruis  
 Vera Dei soboles, Mundi melioris origo.  
 Quem circū aetheriae jam numine percita flammae  
 Collecta exilio, veterique e crimine turba,  
 Matres, atque viri, pueri, innuptaeque puellae,  
 Ipsae urbes. ipsique agri, tota ipsa sequuntur  
 Agmina: deserto cessat jam taurus aratro:  
 Pendet & amissis pera interrupta juvencis.  
 Illius ut Vates fulgorem fervidus hausit  
 Fulmineum: perque ima pius calor ossa cucurrit:  
 En pacata, inquit, scelerati victima Mundi.  
 Sic ait: & sanctum posito velamine corpus  
 Tingit aqua, autoremque illius muneris ornat:  
 Tu ne Deum fontis dono mersare salubri?  
 Tu ne Deum? tibi qui tribuit sua munera, de te  
 Haec petit? & veteris cessit prudentia Fati?  
 Quem facit ille parem sibi, te mortalia temnunt?  
 His de te tantum licuit? te vera monentem  
 Invidit miseris terris fortuna? nec ipsum  
 Carceris infandum satiarunt vincla Tyrannum?  
 Ut sacrum aspiceret caput a cervice revulsum?  
 Ergo illum inferni subter fera limina Regni,  
 Et furvas desperata caligine sedes  
 Insomnem exercent Furiae. cui tristis Erinny's  
 In-

Infestum caput anguineis redimita capillis  
 Sanguineo assurgens facinus sonat ulta flagello.  
 Quae loca ne videam reus, o Pater optime, mortis,  
 Curriculo vitae, ac spatiis disclusus iniquis:  
 Sed lacerum sterili nostrum hunc in litore truncum,  
 Singultantem animam dulci pro nomine Christi:  
 Quam toties miser objeci mortalibus ausis:  
 Exora, meritisque tuis merita ardua captem.

## DONAT ATTICUM CHIROTHECIS.

**F**IDELISSIME Romuli nepotum,  
 Mellitum decus Attici leporis.  
 Que fide tegerem manum beatam:  
 Mitto Xenia parva chirothecas  
 Abunde Indico odore diffuenteis.  
 Quo linguam tegerem beatiorum,  
 Reginam veterum eloquutionum,  
 Arcem, ac praesidium elegantiarum,  
 Mundum mittere debui. sed ille  
 Vix, puto, capiat quod eloquere,  
 Facundissime Romuli nepotum.

## AD BURDEGALAM ATTICI PATRIAM.

**F**RENATRIX maris extimi superba,  
 Sinu praepete quae beata portus  
 Audis aurea maximum Senatum,  
 Nutrix nobilis incliti Lyaei.  
 O nec tam maris horridis habenis,  
 Nec miri sinubus beata portus,  
 Nec vena vitrei Thyoniaei,  
 Nec Sancto venerabilis Senatu,

120 JUL· CAESARIS SCALIGERI

Quam quod mater es Attici. quod isthic  
 Caeli femina primulum fereni  
 Divinum caput hausit. & tenello  
 Rifu diffulit incitas tenebras.  
 Felix terque, quaterque terra felix,  
 Grandi pignore, dotibus superba,  
 Aut jam jam accipe me in sinum beatum:  
 Aut meum bona mi Atticum remitte.

AD SYLVIVM FILIVM.

**S**ERAE Sylviole otium senectae:  
 Orbi relliquiae aureae parentis:  
 O fessi patris optimum levamen:  
 O vitae unicae despicatae ocellae:  
 Quid rerum geris? an meos labores  
 Tuis pulchra laboribus recudens  
 Deles? Perge puer disertiorum  
 Augere ingenuos choros virorum.  
 Et spes fulmine praeterire mentis:  
 Quae tam grandibus excitae periclis,  
 Subscribunt patris usque, & usque votis.

AD EUNDEM.

**S**YLVIVM, dispeream: nisi omne factum,  
 Atque idem inteream: nisi omne votum  
 Pro vobis fuit: ut bene, ac benigne  
 A me esset: fieretque diligenter  
 Sic, quamplurimum, & ut pote est, parenti.  
 Nam quid gratius esse quid parenti,  
 Cui cordi sit in ultimis periclis  
 Fatalem effugere esuritionem:

Quid?



Quid ? quam ut sit bene liberis suis ; quos  
Suae substituit perenne vitae :  
Queis vitam instituat nec obsoletam ,  
Nec vita tumidam Neroniana :  
Sed frugi mediocriter beatam .  
Verum Sors mala , fors maligna , Sors , quae  
Bonos ah male habet , malos beat : me  
Exemit numero valentiorum :  
Quem olim ( Dii ) decorare sic solebam .  
Mirum ni misero excidistis : ah quem  
Subducta ratione rem putantem ,  
Excurso spatio , imminente fato ,  
Dictum factum abeuntibus diebus ,  
Sui oblivio cepit , & suorum .

## AD THOMAM SEVINUM .

**S**EVINE optime , ab optimo parente ,  
Optimo parvo , aureis amicis ,  
Antiquae decus eruditionis ,  
Novarum pater elegantiarum ,  
Culto pectore , moribus vetustis ,  
Nae tu vel nimis , ac nimis venuste  
Egisti . qui etenim fores poeta  
Magnus , candidus , elegans , venustus ,  
Gravi Phoebigenum incitatus oestro ,  
Sanguine , ingenio , institutione :  
Ne nos desidia , & rudi veterno  
Marceremus : ut ii , quibus Camoenae  
Seram difficiles dedere Laurum :  
Invitis , facili manu , Camoenis  
Misti illico liberalis oestrum ,  
Divinum laticem inclyti liquoris :

Qui secum innumeros trahit poëtas.  
 Nolentes fugit, incitat volentes,  
 Torpentes acuit, necat veternum.  
 Qui Monembaticisque, Reticisque,  
 Corfisique, Trebiisque, Dalmaticisque,  
 Renanis, Siculis, Corinthiis, &  
 Ne longum faciam, omnibus superbe  
 Sibi assurgere jusserit : peribunt.  
 Quare ne mihi ne severa posthac  
 Juga ostendite tetricae Puellae,  
 Aut Ascræ, aut Heliconis, aut Olympi,  
 Celsa, Juppiter, & laboriosa,  
 Aegroto, vetulo, siticuloso.  
 Coronam facilem, parabilemque  
 Hic centum mihi Apollines pararunt.

# M. A N T O N I I

## M U R E T I

PRESBYTERI, ET CIVIS ROMANI.

### C A R M I N A.

**M**AGNE Ducum, setâ populis cni fortibus urbem  
 Pulcher olorifero Mincius amne lavat :  
 Sume datis a te scriptos mihi legibus hymnos,  
 Neve parum culti despice vatis opus.  
 Illi etiam quorum hic meriti celebrantur honores,  
 Lucida quos constans vexit ad astra fides,  
 Non indignantur parvo sibi ture litari :  
 Atque animum magni muneris instar habent.

For-

Forſitan his olim juvenis meliora dediſſem ,  
Et mulcere aures dulcius apta tuas .  
Sed veniens etiam ingenio eſt damnosa ſeneſtus :  
Nec tantum vires corporis imminuit .  
Cum mihi turgerent meliori ſanguine venae ,  
Nec curarum animum pondera deprimerent :  
Sponte ſua numeris carmen mihi mollibus ibat :  
Et ſubito verſus fundere ludus erat .  
Nunc & corpus hebet ſenio , & mens ipſa pigreſcit ,  
Quodque habuit ludo , nunc onus eſſe putat .  
Dulce onus hoc tamen eſt , quod te mandante ſubitur ;  
Et leviora facit juſſa jubentis amor .  
Atque utinam haec roſeo legat & V I N C E N T I U S ore  
Phoebi & Muſarum maxima cura puer :  
Qui floſcenti paullatim attollitur aevo ,  
Ut ſata ſe ad fluvii ſubiicit alnus aquas .  
Felix , cui teneris Helicon luſtratur ab annis ,  
Et bibitur volucris fons pede factus equi .  
Quem jam ipſa Uranie blandis complexa lacertis ,  
Stellatas Superum vexit ad uſque domos :  
Oſtenditque aſtrorum ignes , caelique meatus ,  
Queiſque ſuos peragant legibus illa choros .  
Quis ſcit , an & , coelo dum ſingula deſpicit , inter  
Caetera majores viderit aſtra ſuos :  
Et quos purpureo contextit Roma galero ,  
Et qui legali ſceptra tulere manu ?  
Fortunate puer , magnum patris incrementum ,  
Cui Lachæſis net plena aurea ſila colo ,  
Vive diu , utque dati poſcit tibi nominis omen ,  
Tende atavos omni vincere laude tuos .  
Neu grave ſit , dum dona tibi graviora parantur ,  
Interea partem carminis eſſe mei .

## AD BEATISSIMAM VIRGINEM

## D E I M A T R E M.

**U**NDE mihi insolitus praecordia concutit horror,  
 Et perfusa metu trepidat, velut ista Deo, mens?  
 Fallor? an hoc facit ipse locus, stimulosque paventi  
 Subiicit, atque animum praesentia numinis urget?

O caelo dilecta domus, postesque beati,  
 Quos ego jam pridem tota mihi mente cupitos,  
 Nunc primum, veteris voti reus, advena viso:  
 Salvete, adspexitque mihi feliciter este.

Vosne per aetherias Judaeae a finibus oras  
 Aligerum, mandante Deo, vexere manipuli?  
 Hic virgo genitura Deum, genitricis ab alvo  
 Prodiit, & blandis mulsit vagitibus auras?  
 Hic quoque, virginei servata laude pudoris,  
 Sancta salutifero tumuerunt viscera fetu?  
 Ille opifex cunctorum, illa aeterno unica proles  
 Aequa Patri, ille homini, primaeva ab origine lapsa  
 Spem caelo vitamque ferens, hac lusit in aula  
 Parvulus, & sanctae blanda obrulit oscula matri?

Quaenam igitur regum sedes, quae templa per orbem  
 Huic se ausint conferre loco? ter & amplius omnes  
 Ante alias felix Piceni littoris ora:

Cui Solymos spectare domi, cui munere divum  
 Fas calcare domi est pedibus vestigia Christi.

En ego jam supplex procumbam, atque oscula figam  
 Parietibus sanctis, spargamque hoc pulvere crines.

Adspice me superis e sedibus, adspice, virgo  
 Prostratum, atque imo gemitus ex corde cientem,  
 Et pectus tundentem, & fletibus ora rigantem:

Neu,

Neu, quanquam culpis adopertum turpibus, arce  
Adspēctū me diva tuo : si pectore toto  
Te veneror, si te, dubiis in rebus, ad unam  
Confugio, teque auxilium sanctissima posco.

Poenitet ex animo vitae me Diva prioris  
Poenitet, & meritas horret mens conscia poenas.  
Quod nisi tu casto pendentem ex ubere natum  
Conciliās, placāsque mihi, quo tendere cursum  
Quove malis fessam tentabo advertere puppim?

At tu namque soles, placida dignare querelas  
Aure meas, & ades lapsis mitissima rebus.  
Certe equidem tota pendentes aede tabellas  
Adspicio, quae te miseris praesto esse loquuntur.  
Hic, te animo spectans, torrentem viscera febrim  
Depulit, ille hyadas tristes, hoedumque cadentem  
Spectavit tutus, vertentibus aequora ventis,  
Et duce te patrias enavit salvus ad oras.  
Criminis ille reus falsi, sub iudice duro,  
Dum mortem exspectat, tenebroso carcere clausus,  
Munera Diva tuo detecta fraude, revisit  
Uxorem, & natos, exoptatumque parentem.

O ego nunc morbis multo gravioribus aeger,  
Naufragiumque timens longe exitiosius illo,  
Et jam pridem animum peccati compede victus,  
Si possim morbis liber, vinculisque solutus,  
Fluctibus & ventis laceram subducere puppim:  
Quas tibi laetus agam grates, dum vita manebit?  
Te, cum luce nova sparget sol aureus orbem,  
Te recinam, quoties abscondet opaca polum nox:  
Et tua precipuo venerabor numina cultu.

## T I B U R.

**Q**UICUNQUE Herculei spectabit Tiburis arces,  
 Qua pater Hippolytus, sacri pars magna senatus,  
 Cura Deum, loca perpetuo prius aspera saxo  
 Molliit, & leni iussit mitescere clivo,  
 Omnia deprenDET longe superantia famam.  
 Nec tam regifico constructa palatia sumtu,  
 Auroque illusas aedes, radiataque tecta,  
 Quam semper virides mecum admirabitur hortos,  
 Et gelidos fontes, & aquam in sublime volantem,  
 Seque in multiplices vertentem, ut Protea, formas.

Praecipue tamen illi animum novitate movebit  
 Excisus, res mira, silex, rupesque cavatae,  
 Et via facta manu longi per viscera montis:  
 Qua se Anio pater infueto pervolveret alveo.  
 Qui longum per iter tenebroso tramite lapsus,  
 Exit, & arboribus gelidae non invidet undae.

Stant habiles propter Nymphae, lymphasque paratis  
 Exceptas urnis in vasa capacia fundunt.  
 Parte alia ipse suis altricibus adstat Jacchus,  
 Maternique memor casus, flammaeque paternae  
 Gaudet aquis, illisque libens sua munera miscet.

Dum stupeo, tam multa videns miracula rerum:  
 Ecce novus procul alituum concentus ad aures  
 Fertur, & insolita mentem dulcedine tangit.  
 Adspicio: & gressum propius fero, corpora cerno  
 Parva ex aere avium, aeratis nitentia ramis,  
 Daedala quaeis variam tribuit sollertia vocem.  
 Quamcunque adspicias, delusus imagine, vera m  
 Esse putes volucrem: nisi quod non evolat usquam:  
 Sed ramis affixa, suis cantu aethera mulcet.

At

At verae mirantur aves : & , cedere dum se  
 Turpe putant , liquidis late omnia questibus implent .  
 Hic Lucae egregius labor est , quem Sequana partu  
 Ediderat , Siculi renovantem inventa magistri .

Quid ? quem non moveat cygnum mentitus adulter ,  
 Illudens simili spirantem e marmore Laedam ,  
 Deliciisque suis , & aquarum murmure laetus ?  
 Multaque praeterea veterum simulacra Deorum ,  
 Artis opus priscae , cunctos verum arduus inter  
 Eminent Alcides : qui spectans omnia circum ,  
 Hesperidum veteres hortos prae Tibure tenet .

Sed quid ego haec versu nequidquam includere tæto ?  
 Jam pridem exiguum praescripti carminis orbem  
 Excessi : & dictis semper majora supersunt .

## I D E M .

**D**ELICIAE veterum Tibur voluentibus annis  
 Conciderat , priscum perdideratque decus .

Et nusquam rivi , nusquam pomaria , nusquam

Ulla super tanti signa decoris erant .

Illa loca antiquis toties celebrata poëtis

Horrebant turpi squalida facta situ .

Moerebant erepta sibi sua gaudia Nymphae ,

Languentes Anio moestus agebat aquas .

Omnia tempus edax ita deformarat , ut hospes

Quaereret in medio Tibure , Tibur ubi est ?

Non tulit hanc speciem divini pectoris heros

Hippolytus , sacri gloria magna chori .

Ille loco senium abstersit , vultusque priores

Reddidit , & solito jussit honorè frui .

Illius imperio jussae revirescere silvae .

Caeperunt sparsis luxuriare comis .

Ille

Ille novos passim fontes emergere jussit.  
 Nec mora fit : fontes profiluere novi.  
 Quos circum statuit priscis egesta ruinis  
 Plurima Phidiaca signa polita manu.  
 Ipse Anio frontem pallenti incinctus oliva  
 Affuit, & proprias consociavit opes.  
 Jure igitur fontesque sacri, silvaeque virentes  
 Certatim Hippolyti nomen ad astra ferunt:  
 Et, quoties molli increpuit levis aura susurro,  
 Hippolytum alternis vocibus ingeminant.

## AD ANTONIUM MONTECATINUM.

**T**ANDEM querelis pone modum tuis,  
 Et fata moestis invida vocibus  
 Clamare, crudelisque Divos  
 Cum gemitu lacrimisque parce.  
 Nam, quid Lycei juverit avios  
 Lustrasse saltus, fontibus ac sitim  
 Ex vulgo inaccessis levasse,  
 Ingenioque adiisse Divos.  
 Si mentis istud praesidium tuae  
 Perrumpit, & sese intus agit dolor,  
 Imisque fervens in medullis,  
 Te quasi perdomito triumphat?  
 Magnam doloris fata quidem tibi  
 Causam obtulerunt, quae tibi cognitum,  
 Longoque carum usu sodalem  
 Hannibalem ante diem abstulerunt.  
 Qui quamquam avitis sat titulis domi  
 Forisque clarus, non tamen id sibi  
 Satis fore ornando putavit,  
 Ni proprios etiam ipse honores



Labore magno quaereret impiger,  
 Comamque lauro duplice necteret,  
 Et qua ferox Gradivus. & qua  
 Pulcher Apollo suos coronat.  
 Heu quis Deorum mentibus addidit  
 Famae illam honestis immodicam sitim?  
 Quam saepe multis illa tristem  
 Funeris acceleravit horam.  
 Sed, quorsum inanes jam querimoniae?  
 Ille ipse, quem urges questibus, Hannibal,  
 Felix, & insertus Deorum  
 Concilio, mala nostra ridet.

## P. FRANCISCO BENTIO.

**B**ENTI, nihil me, sicut antea, juvat  
 Pervigili studio nil profutura quaerere:  
 Nec quas per urbes cautus, exciso Ilio,  
 Saxa Ithacae repetens, Laërtis errarit puer:  
 Nec quot Ithacenses circa pharmacis potens.  
 Vultu hominū posito, grunire porcos jusserit  
 Curae magis mi est, lustra jam decem miser  
 Qualibus in vitiis defixus ipse erraverim:  
 Cum me, Dei vix jam manente imagine,  
 Mortifera induerat foedam voluptas in suam,  
 Quis me sequetur fructus, ubi pernovero,  
 Quot mala Grajugenis Achillis ira invexerit:  
 Si nesciam vesanus, in quae me mala  
 Praecipitem ira Dei, nisi resipiscam, actura sit?  
 Hei mi laboris, hei dierum ac noctium,  
 Quas memini in studiis me talibus consumere,  
 Male metuentem, ne quis usquam aequalium  
 Certius ac melius plures teneret fabulas.

Pers II.

I

Et

Et tamen ab aequis non gravate improvida  
 Judicibus veniam fortassis aetas impetret.  
 Sed nunc columbis concolor cum sim caput,  
 Et mihi farcinulas brevi legendas sentiam,  
 Nisi meliora mente tota cogitem:  
 Bis puerum merito, Francisce, me vocaveris.  
 Beatus ille, quem juventae in limine  
 Abstrahit a vitiis ipse & sibi adstringit Deus.  
 Nec tamen habendus ille in infelicibus,  
 Ad meliora, Deo vocante, qui venit senex.  
 Verum est poëtae nobilis verbum vetus:  
 Si bene quid facias, fero licet, prodest tamen.  
 Communi uterque gratias agat patri.  
 Sors tibi prima data est: mihi secunda contigit.

# JO. MUTII AURELII

## MANTUANI,

### CARMINA.

IN D. JOANNIS BAPTISTAE.

**N**ASCERE, quid cessas dudum? cunctisque pe-  
 titum  
 Votis redde diem veniens age Lucifer alium:  
 Dignum quo possit superum favor omnis in unum  
 Congessisse virum quodcunque est ulla potis vis,  
 Quoque olim non te pigeat vaturn optime nasci.  
 Quem caelo ex alto superum Rex tempore, quo se,  
 Venturus tandem populorum orbisque saluti,  
 Jam jam hominis faciem, & mortales induere artus  
 Certus erat, terris quondam praemisit habendum:  
 Dum

Dum nos interea solemnes dicere laudes  
Aggredimur, vatisque pii celebramus honores:  
Ille quidem in silvis, perque avia lustra ferarum,  
Propter aquam, & vario depictas gramine ripas,  
Pulcer ubi, fluvioque ingens Jordanis amoeno,  
Collibus e curvis per pinguja culta volutus,  
Exercet cursu latices, simul & secat arua,  
Florem aevi totum primis exegit ab annis.  
Divinis animum curis & pectora plenus,  
Magna Deo, populoque docens instantia fata.  
Non illum veneres, non illum pocula Bacchi,  
Non epulae flexere ullae, non purpura dives,  
Verum undas hausitq; manu, & quas plurima ubique  
Fundit humus, teneros decerpit graminis herbas,  
Horridus, hirsutoque humeros contextus amictu.  
Illuc, ut perhibent, diversae atque agmine lato  
Certatim coeunt gentes, atque inde revercae  
Haud dubia ex dubiis referunt oracula rebus:  
Deseritur Solyme, linquunt Hierumque, Thenaque,  
Arua Palaestinae, palmosaeque oppida Idumes.  
Undique conveniunt, & inhospita rura frequentant.  
Ille autem super his, ripas lucosque silentes  
Insuetum multo calefactus pectora Phoebō  
Personat, & vacuae resonant omnia valles:  
Nunc pater e summo claram demittit Olympo  
Progeniem, aetherei monumentum & pignus amoris.  
Jamque aderit Deus, ecce Deus. quae tanta moratur  
Segnities? quae tanta animos dementia fallit?  
Ite, agite, & superum venienti occurrere Regi:  
Quamque viam institerit, terras regna ultima visens  
Certa dei soboles, studiis ingentibus illam  
Sternite: nunc opus est animis, nunc mentibus aequis,  
O multum monitique mihi, multumque monendi,

Spernite opes, inquam, ac variarum nomina vana  
 Delicias rerum, & contagia divitis auri,  
 Versantisque orbem, & mortalia cuncta trahentis,  
 Otia, desidia, saevique Cupidinis arma.  
 Felix qui potuit Cereris contemnere dona,  
 Et latices Bacchi, morbos & bella ferentes,  
 Ac tolerare sitim, & jejunia longa suctus,  
 Corpoream imminui molem, & mortalia sensim  
 Membra tulit, gaudens vinclis & carcere caeco,  
 Exonerasse animum, ac volucrē super aethera ferre.  
 Huic saepe insomnis primum se se obtulit ultro  
 Ipse deum genitor, ultro docuitque futura,  
 Mox etiam atque etiam claro se lumine passus  
 Contingi, eloquio ardenti, aspectuque beato  
 Affulsit, sanctumque inspirans ossibus ignem,  
 Divina implevit penitus dulcedine mentem.  
 Usque adeo magni mentem facit aethere natam,  
 Ardua conantem sponte, & praeclara volentem.  
 Haec & plura heros memorans populumque patresque  
 Spargit rore levi, & felicibus abluit undis  
 Conceptas mundi labes ab origine prima.  
 Continuo mores suscepit, grataque servat  
 Posteritas, sacrumque pii coluere minores.  
 Ecce autem aetherei Regis certissima proles,  
 Pro mortali hominum genere & pro numine laeso:  
 Heu, fato indigno & crudelis vulnere dextrae  
 Projectura animam, & finem allatura malorum:  
 Dudum aderat, summique Patris praecepta docebat  
 Nota sibi, atque animos supera ad convexa vocabat.  
 Progeniem quoniam immeritam cunabula mundi  
 Postgeniti, ob noxam primique errata parentis,  
 Damnatam omnipotens poenas expendere jussit,  
 Terribilique hosti divum concessit in iras.

Hunc

Hunc simul aspexit juvenis, & fluminis alveo  
 Terque quaterque manu liquidas superintulit undas  
 Reddita vox ingens referato e vertice Olympi.  
 Testatusque sacra praesens pater alite Natum,  
 Intonuit late, tremefecitque aetheris arces.  
 Ex illo haud dubitas magnorum maxime vatum,  
 Solvere fatidicum os, & spem vulgare per agros  
 Advenisse hominum, certam requiemque laborum,  
 Pollicitique Dei toties mox testis adesse,  
 Unum prae cunctis, populis spectantibus ultro,  
 Et monstrare manu & verbis signare volentem,  
 Visa canens, monitusque datos pridē aethere summo:  
 Tu matri, tu vocis adhuc & luminis expers  
 Prima utero exultans foeto das signa supremi  
 Adventu super Herois, magnamque parentem  
 Pandere res altas, summique arcana Tonantis  
 Decreta, & volucrum supera de gente ministrum,  
 In medio visumque die auditumque fateri  
 Impellis. tua sidereus facta optima Natus  
 Mox probat, & cunctis praefert mortalibus unum  
 Te vatē. o longe melioribus opime saeculis  
 Nate Pater, meritoque ascripte uiribus olim  
 Caelicolis, suave o regi gratissime Divum,  
 Ac nos composito celebrantes carmine laudes  
 Rite tuas, pariterque preces ac tura ferentes,  
 Nunc vides quanto moveant fera bella tumultu  
 Crudeles animae? saeva illinc arma Britanni  
 Expediunt; solidas latis Hispania terris  
 Cum populis urbes effundit, & omnia versat:  
 Hinc Gallorum acies, & prodiga corpora vitae,  
 Caedis amor, ferrique armat scelerata cupido,  
 Inter utrosque facem intentans discordia saevit,  
 Impius armatos stimulat Mars, & furit ingens.

Ah, ne iterum tanto concurrant agmina motu :  
 Ah, ne iterum largo pinguescant sanguine campi .  
 Has tu iras, atque haec imperdita corpora bellis,  
 Quae dudum Aufoniae cierant in viscera reges,  
 Verte hostem in Turcā, superis det sanguine poenas  
 Cizicus, & populi quos dividit Hellespontus .  
 Aequius huic fuerat nostra arma opponere genti :  
 Hunc tu animis pater accensis immitte furorem .  
 Ecce tibi Decimus praeses simul & decus orbis,  
 Afflictis quem vos rebus saecloque ruenti,  
 Auxilium caelo properastis mittere ab alto,  
 Augusto ingentes voluit sub pectore curas :  
 Jamque Scythas vexat bello, atque amissa reposcit  
 Regna animo, mox excidiumque stragēque daturus,  
 Actutum valido complebit milite campos :  
 Olli igitur vires ultro se ad bella paranti,  
 Quo sine nulla super miseris mortalibus est spes,  
 Sufficite, ipse animosque sibi, mentemque ministret .  
 Nunc o quique Hebri, vitreas & Strymonis undas,  
 Quique bibunt Xanthum, & fluctifonum Simoënta .  
 Quosque aliis longe positos in partibus horrens  
 Caucasus hinc, illic prospectat maximus Atlas,  
 Agnoscant veri tandem praecepta Tonantis,  
 Et fluvio discant natos mersare salubri,  
 Teque adeo ante omnes unum, tuaq; arma tremiscāt  
 Nota nimis miseris ac caede inspersa suorum .  
 Testis clara Rhodos, facti non immemor unquam,  
 Cum late implerunt campos, passimque per herbas  
 Agmina multa virum jacuerunt aequore toto,  
 Carpathiūque maris foedarunt sanguine fluctus .

## AD LEONEM DECIMUM PONT. MAX.

**D**UM tu orbem immensum paribus compescis habenis

Atque animo terras prospicis, & maria,  
O Decime afflictis tandem pater optime rebus,  
Praesidium extremis reddite temporibus:  
Torque tuo ingentes concurrant pectore curae,  
Quot fluctus vasto gurgite pontus habet.  
Nos tibi sic inter tantarum culmina rerum,  
Actutum toto fluximus ex animo,  
Sicque leves jactant promissa tot irrita Cauri,  
Ut folia autumnì tempore ventus agit,  
Quae simul occurrant inter se, & praelia miscent,  
Post tandem ad terram ex aëre crebra cadunt:  
Atque haec praeteriens calcat neglecta viator,  
Non gregibus, non his parcere cura homini.  
Interea exercet me me, nec desinit unquam  
Pauperies omnes mi facere insidias.  
Cuncta minatur enim misero mala, Juppiter atrae  
Ut paupertatis omne genus pereat.  
Quae mihi nec suaves Musarum expromere cantus,  
Nec finita tanto mentem inhibere malo:  
Sed duras curarum inter stipata cohortes  
Urget, & hoc semper vexat acerba caput.  
Cujus dispeream, similis si pestis in orbe est,  
Tristius aut quicquam Tartara nigra pavent.  
Quinetiam Stygium hacce Jovem torquere nocentes  
Fama tulit, nudas cum jubet esse animas.  
Non gemmarum infra, non usus divitis auri,  
Nec quisquam nuda corpora veste tegit:  
Non ve dapes adhibet mensis, non dulcia vina,

Ast tenebras late, squalidaque arva situ  
 Gens colit : hanc durum quatiens insana flagellum  
 Inferna excruciat per loca pauperies.  
 Tartarei ex vultu pendet suspensa Tyranni  
 Pallida, & ad poenas, quos cupit ille legit.  
 Innumeras pestes atque agmina saeva fororum  
 Immittit miseris perpetuamque famem ;  
 Hanc trepidae aspicientes quantum horrēt animae, & quā  
 Optarent votis tunc quoque, posse mori.  
 Nusquam illic urbes, nusquam illic tecta, maligno  
 Sub Jove Regem etiam durum habitare ferunt.  
 Contra autem ex aura atq; ebore alti in vertice Olympi,  
 Summa nitent claris atria caelitibus.  
 Hic passim toto diffundit Copia cornu  
 Ambrosiasque dapes, nectareumque merum,  
 Plausibus ac caelum vario late undique cantu,  
 Perstrepat, & laetas numina agunt choreas.  
 Huc dii fulgentes magni cum vestibus aureis  
 Conveniunt, summo stat pater in folio  
 Juppiter, & superis edicit jura vocatis,  
 Divino mulcens sidera colloquio.  
 Dispositos sic in fra olim sede editus alta,  
 Conscriptos cernis, numina vestra patres,  
 Cum tu Oratores, per quos tibi supplicat orbis,  
 Atque tuo sese subiicit imperio,  
 Excipis, illi autem placidum sibi numen adorant  
 Prostrati, & sacris oscula dant pedibus:  
 Dein divina domum redeunt jussa reportant,  
 Quaeque alia externis regibus ac populis,  
 Pectoris e sancti penetralibus abdita profers,  
 Suspensis captant quae prius auriculis.  
 Quare quid mirum est, si aurum quoque iudicibus diis  
 Vulgus amat, largas divitiasque probat?

Ut



Ut quae unae valeant facere ac servare beatos,  
Et dare compositi laetities animi:  
Quaeque etiam veluti me invisum deseruere,  
Jactatumque maris fluctibus in mediis,  
Quod neque jam dignatur opem Ramnusia virgo  
Ferre, nec ulla hominum pectora consilium.  
Atqui olim non me haec miserum sperare jubebas,  
Degere sed discincta otia Pegasidum:  
Multaque quae vestro mihi nomine rettulit olim  
Hadriaci Bembus gloria magna soli,  
Bembus amor Musarum, & Palladis ultima cura,  
Castalio Bembus potus in amne pater,  
Omnibus his qui te, te unum jam praetulit, uni  
Dulcia Pieridum numina posthabuit,  
Quae nunc aerei sub verticibus Parnassi  
Te sibi flent tantum surripuisse decus.  
Da mi igitur dextram, meque hoc ex turbine mentis  
Totque aerumnosis eripe vorticibus.  
Hoc tibi restat opus, hoc est tibi perficiendum:  
In te uno est una, atque unica nostra salus:  
Quod si non aequa haec mea carmina respuis aure,  
Verbaque das rapidis irrita ferre notis,  
Me neque tantillum, quantum est servare deorum  
Jam poterit, non si mox velit ipsa salus:  
Quin totis penitus fortunae absorptus in undis,  
Protinus ingratos ore bibam latices.



# PETRI CRINITI

## C A R M I N A.

NAENIA DE OBITU LAUR. MEDICIS;  
AD JOAN. FIGUM MIRANDULAM.

**E**CQUIS perpetuis constituet malis  
Finem ullum; ut valeam reddere me mihi?  
Pridem sepofui dulci loquam chelym,  
Et blandos Charitum modos.

Accedunt miseris funera luctibus,  
Nec quicquam Superos flectere victimis  
Fas est, ut video: sic placitum Jovi,  
Qui nutu regit omnia.

Heu noster Medices, Italiae decus  
O Pice interiit: vae misero mihi.  
Lugete Aonidum qui colitis sacra,  
Et qui pro veteri fide

Virtutis pretium rite reposcimus.  
Nam quis tam rigido pectore barbarus;  
Immanique animo, quin videat statim  
Sublatum columen bonis?

Hic solus patriam consilio gravi  
Undantem variis fluctibus extulit:  
Nil diram veritus (discite posteri)  
Regum saevitiem & dolos.

Hic se pro pavidis civibus obtulit;  
Hostilemque aciem robore pectoris  
Perfringens, viridi tempora gramine  
Cinxit; dum sibi non putat

Parcendum, ut Latio praesidium ferat.

Heu

Heu heu quam volucris decipimur bono !  
Incassumque pii ; ut qui nimio ambitu  
Surdos distrahimus Deos.

At tu moesta novis, patria, lacrymis  
Indulge : nec enim cernere adhuc potes,  
Quantum mox miseris civibus imminet  
Fatorum gravis exitus.

Disiecta horrifono marmora fulmine  
Templorum, & nimium dira tonitrua  
Non frustra exitium terrificis minis  
Portendunt patris Deis.

O fallax utinam mentiar augur, &  
Non vero auspicium carmine proferam.  
Tu, Pice, interea desine conqueri ;  
Et parce imperio Jovis.

Quod si non alius mox aderit Deus.  
Extinctum Italiae qui reparet decus ;  
Et Phoebum cupiat sedibus Aonum  
Transferre in Latios lares :

Consiste in veteri praesidio tamen  
Virtutum ; & quod habes auspiciis tuis  
Jam partem, in tacito contineas sinu ;  
Felix sorte tua satis.

Nam mitto tot opes ingenii & sacrum  
Foecundi genium pectoris ; & simul  
Praeclaris animum dotibus arduum,  
Quo certum statues gradum.

Sed me sub tenerum tempus adhuc, velut  
Surgentem viridi robore palmitem,  
Caeli saevities invida perculit,  
Dejecitque bonam indolem.

Sic decussa jacent brachia viribus  
Allisis ; neque posthac animo pari

Au-

Audebo ingenium tollere ; nec licet  
Sperare ulterius mihi.

DE SUA QUIETE POST MULTAS  
CALAMITATES.

**S**I quis in tantis hominum procellis  
Inter & curas ; varioque casus  
Gaudet assertor fidei decoram  
Carpere vitam :

Hujus exemplum sequar expeditus ;  
Et meos vitae melioris annos  
Liber ad certam referam quietem  
Cultor honesti .

Cautius post hac mea cymba cursum ,  
Acta per Syrteis scopulosque duos  
Solvat , & nullos temere insequetur  
Aequoris aestus .

Profuit saevae rabiem Charybdis  
Atque vesanos adiisse fluctus ;  
Gratior tandem foret ut voluptas  
Visere portum .

Integram fessi melius quietem  
Sentiunt : blandus pluviis relictis  
Redditur Paeon ; nitidumque lumen  
Pandit Olympi .

Illud in primis Superos precamur ,  
Vita dum nostrum comitatur aevum ,  
In sacris totum ut liceat Camoenis  
Ponere tempus .

## AD AVITUM DE INNOCENTIA VAVUM.

**A**ETERN A vatum pectora mollibus  
 Mulcentur auris. nam cithara gravi  
 Phoebus decorem Castalium instruit.  
 Vates, verendo pectore nobilis,  
 Vel fata pandit, aut tripodes sacros  
 Grato ac perenni carmine concutit.

Non illum, Avite, plebis inertia,  
 Aut insolentes, heu, animi movent:  
 Sed ipse felix perpetuis bonis  
 Paret Camaenis, & placidam simul  
 Mentis quietem molliter occupat:  
 Virtuti amicus, nil reliqua aestimat.

Hunc saepe Pallas Gorgonis immemor  
 Secernit inter prata virentia;  
 Et fronte sacra tempora vinciens,  
 In alta passim sidera sublevat:  
 Qui mox receptus Pieridum choris  
 Depromit audax Palladium melos.

Sic aestuanti liber ab ambitu  
 Livoris atrī despicit impetum;  
 Vulgique luxum, & desidiā procul  
 Tutus relinquit. Namque Heliconidum  
 Carmen beatis concipit auribus,  
 Quo fata rerum perpetuo vigent.

## DE SUA AEGRITUDINE, ET IMMINENTI

## O B I T U.

**N**IL est quod ultra sit licitum mihi  
 Sperare tandem, nil medicae manus

Ex

Ex imminente me miserum rogo  
Referre incolumem queunt :  
Et jam medulis aestuat intimis  
Accensa billis, nec patitur meo  
Unquam dolori finem aliquem dari,  
Sed vexat magis in dies.  
Obducta frontis lumina, per genos  
Delapsa tetra cum macie cutis,  
Et destitutae mentis inertia,  
Instare exitium monent.  
O quantum inanes illecebrae anxia  
Passim virorum pectora distrahunt!  
Quantaque rerum mole peraequat  
Humani generis lues!  
Quam saepe dixi, Martia principum  
Cantabo gesta, & saeva per Aufones  
Gallorum ab altis Alpibus agmina  
Educta in Latios duces!  
At nunc parato funere frigidus  
Per Membra sudor labitur, & meum  
Flammis cadaver rite puer sacris  
Jam componere destinat.  
Et Cypri odores, thuraque mascula  
Inferre lectis ossibus, & levi  
Cum rore lymphas spargere, quo sua  
Reddatur cineri quies.  
Ergo sub annos praevirides mihi  
Solvetur atro sanguine spiritus?  
Nilest reluctandum Superis: libens  
Quod fata annuerint sequor.  
Non ille cuiquam flebilis occidit,  
Quem vitæ honestas, & fidei decor  
Inter sacrarunt numina Caelitum,

Expertem gravis ambitus.

Sed fessa tandem lumina mors tegit:

Tu me, Deorum summe parens, velis

Vatem beatis sistere sedibus,

Ut sacros referam choros.

## DE NATALI MUSARUM.

**F**AVE TE linguis, posteri,  
Non ance dictum vatibus

Cantare carmen molior,

Sacris receptus delubris.

Apollo nunc spirat Deus.

Procul profanos pellite

Arcana dum fiunt sacra.

Adeste vati coelites,

Debetur hic Musis honor,

Quem festa rettulit dies:

Pro quo tot annos pallui.

Lux haec decora claruit

Dicata priscis vatibus,

Qua molliter gratum melos

Aeterna protulit chelys.

Lucina ridens adfuit,

Et crine Phoebus aureo

Vocavit ad certos modos

Selecta caeli numina.

Tum laeta substitit Cypris,

Et candido vultu Charis

Induxit almis cantibus,

Ut vos sacraret aetheri.

Sed & Deorum maximus.

Et optimus rerum pater

Vos

Vos fovit ulnis mollibus,  
 Interque mille suavia  
 Leni decenter spiritu  
 Deduxit ad sacrum nemus  
 In quo volantis Pegasi  
 Liquor perennis effluens  
 Nitefcit undis gemmeis.

Hic collocatas primitus  
 Dulci replevit nectare:  
 Inque alta iussit fidera  
 Secum volare protinus:  
 Unde entheum fluxit melos,  
 Et grata Siren aurea  
 Refecit orbem naenia.

Vobis Camoenae viximus,  
 Vobis perennes gratias,  
 Sacrumque carmen reddimus,  
 Servate dum licet precor  
 Devota vobis pectora,  
 Seu grata Delos detinet,  
 Seu Cynthius pulcher vocat:

# BELISARI I

## GADALDINI

### CARMINA.

IN FOEDUS ICTUM INTER PRINCIPES  
 CHRISTIANOS.

**C**LARIOR en solito exurgens natalibus undis,  
 Cynthius afflicto passim nova gaudia mundo  
 Nuntiat,



Nuntiat, haud fortis, venturique infcius aevi:  
Scilicet ut Reges inter sancita fideles  
Foedera sint hodie Veneram vulganda per urbem .  
Surgite io juvenes, manibus date lilia plenis,  
Spargite humum foliis, Superumque altaria Divum  
Muneribus cumulate piis pro munere tanto.  
O quae fatidicae nobis felicia Parcae  
Tempora promittunt! o quae secla aurea surgent!  
Cum Libyae extremo devictus Marte Tyrannus  
Occidet, atque omnes una cum nomine Turcae.  
Cernite, ut ante alios firmati foederis auctor  
Ipse ingens pietate *Pius*, cui Rector Olympi  
Turbine in hoc tanto terrae commisit habenas,  
Florentes populos inimica in praelia mittat:  
Quot Rex Hispana gentes tellure Philippus  
Effundat bello assuetas, & fortibus ausis:  
Quot Veneti cogant acies peditumque equitumque:  
Italaeque ut pubes animis ardentibus arma  
Arma fremat; raucoque simul clangore tubarum  
Et nemora, & silvae reboënt, collesque supini.  
Parte alia, innumerae, leviter spirantibus Austris,  
Carbasa tendentes scindunt vada coerula, puppes,  
Barbaricamque petunt concordii foedere classem.  
Qui tibi nunc hostis cernenti talia sensus?  
Quove metu trepidas? cum litora fervere late  
Prospicias, totumque dehiscere classibus aequor?  
Siccine jactabas tete, dum foedere rupto  
Adriacis partem Cypri multo agmine nuper  
Cepisti? tumidusque novo praecordia regno  
Non hominum; non ulla Deum saeva arma timebas.  
Jam video Oceano in magno concurrere utrinque  
Arduentes in bella rates; classemque rebellem  
Funditus everti; vastumque tumescere pontum;  
*Pars II.* K *Dum*

Dum rapido fractas absorbet gurgite naves,  
Scuta virum, galeas, devotaque corpora morti:  
Inde Dei classem victricia signa movere,  
Pervidus angustis qua faucibus Hellespontus  
Aestuatur, & longo sulcat duo litora tractu:  
Hinc equitum turmas; peditumque hinc ire catervas  
Regnisque & populis stragem exitiumque minantes.  
Euphratem, Gangemque metu trepidare sub imis  
Fluctibus, & septemgeminum tremere ostia Nili.  
Jam video exanimem pulso cum milite terga  
Vertere, & ad Scythicos cursum contendere saltus  
Selimum, ac sese extremis abscondere silvis:  
Illum sectari Hesperios, animamque nefandam  
Eripere, & media resupinum linquere arena;  
Atque ita devictis divino nomine Turcis,  
Urbibus everfis, totoque Oriente subacto,  
Victores praeda immensa spoliisque potitos  
In patrias urbes magnis remeare triumphis.  
Tunc foliis redimita comas felicitis olivae  
Candida Pax late populos invisit ovantes,  
Quam pia Religio incessu comitabitur aequo.  
Tum fera bellandi rabies, & tristis Erinnyes,  
Tum Maomethaeae exitialia semina pestis.  
Tartareaeque domos, horrentiaque antra subibunt.  
Aureaque laeto nascentur saecula mundo,  
Saecula, quae ventura olim volventibus annis  
Veridici vates praesaga mente canebant.  
Surgite io juvenes, manibus date lilia plenis,  
Spargite humum foliis, Superumque altaria Divum  
Muneribus cumulate piis, pro munere tanto.

SUPER EXCIDJUM BARBARAE CLASSIS.  
TABELLA DEPICTUM.

**Q**UIS violare aufit irato foedere pacem :  
Regna aliena jugo premere, atq; excindere gentē  
Immeritā; patremque hominū, patremque Deorum  
Temnere, & immemorem sceleris putet esse nefandi?  
Ah te ne tanti rabies vesana furoris,  
Exagitet, quicumque pii moderaris habenas  
Imperii: tenet ipse pater memor omnia mente,  
Et meritas sumit maturo tempore poenas.  
En Asiae Venetis polluta pace Tyrannus,  
Urbibus everfis, ingenti caede peracta,  
Contemptis victor Superis, tumidusque secunda  
Sorte ruens, totumque fatigans classibus aequor,  
Ut cursu cadit in medio, victusque repente  
Sternitur, ac poenas auso pro crimine pendit.  
Non haec consilio humano, & mortalibus armis  
Proveniunt; Deus ipse, Deus post funera mille,  
Post mille exhaustos terraeque marisque labores,  
Nos tandem adspiciens, aeterno foedere pacis  
Ter geminos junxit Reges, tria fulmina belli,  
Armavitque pias caelesti robore mentes,  
Et dedit indomitas hostis contundere vires.  
Cernis ut Ionio concurrant aequore utrinque  
Frontibus adversis inimica in bella triremes,  
Ac vario ardentēs ineant certamine pugnas?  
Infraeti utque duces Orientis, & agmina late  
Hesperio sub Marte cadant? congestaque classis  
Centum annis, centum victrix successibus una  
Luce ruat? viden' infectas quam multa per undas  
Telaque Threicioſque arcus, Lyciasque pharetras  
K 2 Verſet,

Verfet, & hostili turgescat sanguine pontus?  
 Pasce oculos, animumque tuum, mirorque labore  
 Artificis fruiere; ac partis laetare triumphis,  
 Te tamen hoc unum semper praeque omnibus unū  
 Admoneant, miseris quantum mortalibus obsit,  
 Justitiam; & summi Regem contemnere Olympi.

## CAROLI MALATESTAE

## NEREIDUM CANTUS AD JOANNEM

## AUSTRIACUM.

**L**ITORE cum primum classem deduxit Ibero,  
 Et cursum Hesperiae magnae convertit ad urbes  
 Invidi soboles pulcherrima Caesaris Heros  
 Austriacus; mediis illi Nereides undis  
 Laetitia oblatae ingenti, plausuque fremebant.  
 Alma quibus myrrhae Tethys fragrantis odore  
 Sparserat effusos humeris a vertice crines;  
 Et studio incumbens cultuque ornaverat omni;  
 Muscosos subter thalamos, & murmure rauco  
 Assidue flantis Zephyri, fluctuque strepentes.  
 Quos intra aequoreae celebrant convivia Nymphae,  
 Oceanoque patri caelesti nectare libant;  
 Unde abeunt laetae; si quando e gurgite vasto  
 Prodire, egregiisque viris occurrere gaudent:  
 Ut perhibent culto divini carmine Vates  
 Argolicis illas Heroibus occurrisse,  
 Qui primi indomitos ausi transmittere fluctus,  
 Et tumidum curva pelagus fulcare carina,  
 Velleris aurati spoliū, laudemque petentes:  
 Utque ferunt multis manifesto in lumine visas;  
 Auditasque simul; Carolo trans aequora vecto  
 Dum

Dum comites irent, quascunque adverteret ille,  
Austriadum famam protendens victor, ad oras.  
Illae igitur magni memores Herois, ut ipsum  
Viderunt juvenem gemmis, ostroque decora  
Inductum chlamyde, atque auro fulgentibus armis;  
Quem proceres circumstabant, & lecta juvenus,  
Astutum agnovere; alacresque attollere voces  
Exorfae, has illi referebant ordine laudes,  
Aonio late mulcentes aequora cantu:  
Advenis opratus nobis *Dux* inclyte votis  
Omnibus, ac laetam venienti adfurgere jam nunc  
Italiam cernes, quo te laus excitat ingens  
Instructumque opibus summis, & classe potentem  
Auspicio Divum quo te Rex maximus Orbis  
Mittit, ut auxilio populis florentibus adsis,  
Praesidiis auctos, vestro pro foedere, qui se  
Cum videant tantis, jungant quas protinus omnes  
Expediunt nusquam dejecti in proelia vires.  
Tum qui muneribus, durisque laboribus actis  
Militiae praestant obeundis, undique claro  
Exciti sonitu, coeunt insignia laeti  
Sub tua, quae media praefers exstantia puppi.  
Hos animi praestans inter, pulcrisque sub armis  
Conspectus sese Farnesius inferet Heros,  
Romulidum commissa Duci de sanguine claro  
Quem soror in lucem simul edidit ac tua; partu  
Felici Aeneadamque Urbem, & Latium omne beavit.  
Hunc gladiis accincto phalanx comitatur acutis,  
Et juvenum magna primi cinxere caterva  
Bellandi studio quoscunque aut Martia Roma  
Instructos ferro primis eduxit ab annis.  
Assueti quicunque graves obiisse labores  
Venantum: rapidoque feras praevertere cursu

Eridani latis campis, seu rupibus altis  
Praecipiti fertur quas inter flumine Tarus.

Ipsa tibi auxilio transmittit & Umbria pubis  
Laeta Duce[m], floremque suae. quem laudis avitae  
Accendit stimulis haud mollibus aemula virtus.  
Ultro aderit magni monitis, opibusque parentis,  
Tum propria fidens virtute ac pectore forti.  
Tyrrheno exultans jam nunc & litore sistit  
Adve[ct]us celeri montana per oppida cursu.

Huic & amore pari, cognato & sanguine junctus  
It comes insigni forma, & florentibus annis  
Spectatus puer, Etrusci genus accola ponti.  
Quem studio observat multo, placidoque parentis  
Laeta sub imperio, nec segnes exigit annos.  
Gens dura, & manibus duros convellere montes  
Rupibus, immanesque excindere sueta columnas,  
Quae Parium vincant marmor candore nivali.

Quin Tiberis pulcra comitatus ad ostia classe,  
Caelatam clypeo fulgenti ex aere columnam  
Arduus attollens, sese foret obvi[us] Heros  
Inclytus. haudquaquam mentis confidere sanctae  
Consilium veritus Pater est, cui Maximus ille,  
Plurima quem sacri penes est custodia cultus.  
Nec non & praestantem animi dimittere ad urbem  
Egregiam, Adriaci egregiam decus aequoris Urbem,  
Nimirum invigilat sancto dum foedere Patris  
Provida mens Urbi Regem adjunxisse potentem.  
Nunc etiam voti compos, hunc omnibus auctum  
Auxiliis, ducis & defunctum munere summi,  
Victorem, bello toties, clarumque triumphis.  
Cominus auspiciis laetis immittit in hostem.

Quisque igitur quanto divinae laudis amore

Accensus

Accensus magis, hoc propius fortissime Ductor  
Ille tuis comitem properat se adungere signis:  
Seu pulcra Aufonia, regnisve oriundus Iberis.  
Quos tu consilio prudens moderabere multo.  
Et tua per benefacta oculos volventibus illis  
Ardua quaeque dabunt Divi superare ferendo.  
Sic tibi magnanimi fuerint monimenta parentis  
Obvia, flectenti quaecunque ad littora classem.  
Tum memori recolens animo sua fortia facta  
Invia nulla tuae virtuti erit aequoris unda:  
Obstabuntque tuis nullae conatibus urbes,  
Extremos donec protendas victor ad Indos  
Austriadum nomen terris fatale regendis.

Ite igitur summi ductu Ducis, ite frequentes  
Invicto Proceres spectati robore, & armis.  
Quaque viam virtus aperit, qua gloria vobis  
Monstrat iter, spondeat qua Jupiter ipse triumphum  
Hostibus insignem victis contendite cursu.

His dictis finem facerent cum deinde canendi  
Nereides, zephyrique implerent vela faventes;  
Continuo nova lux pelago, terraque refulsit;  
Heroumque Chorus candenti in limine caeli  
Adsticit, ac roseum demisit ab aethere nimbum.  
Felices animae mortalis tempora Lucis  
Defunctae, quae nunc vita meliore fruuntur.

Rodulfus generis clari, Regumque Ducumque  
Austriadum priscus pater: ac felicibus olim  
Romanum Imperium fati sortitus & alter,  
Quod toties pugna victor superaverit hostes,  
Jure Triumphator pulcro cognomine dictus.  
Proximus huic, verū spatio haud ita proximus aequo,  
Justitiae, pacisque ante omnia cultor, & aequi  
Longaevus Federicus, & hunc prope filius Orbis

Imperium aequae Justitia tutatus, & armis:  
 Connubio felix nati, felixque nepote  
 Post patrios Reges cui dives Iberia cessit  
 Austriaco commissa Deum haud sine numine, Regi.  
 Tu gemini fratres aevi duo lumina nostri  
 Palladis, & magni Carolus Mavortis alumnus,  
 Qui totum implevit factis illustribus orbem,  
 Augusta aequae recens sobolis decus, & pater, & Rex  
 Optimus, ac veterum nulli virtute secundus  
 Ferdinandus. ab aetheriis qui sedibus omnes  
 Pro regali ostro, gemmisque, aurique corona  
 Caesariem stellis redimiti, ac luce decori  
 Ostendunt sese interdum mortalibus: & nos,  
 Nostraque nunc etiam solita pietate tuentur.

## JOANNIS THOMAE

MUSCONII

CARMINA.

AD M. HIERON. VIDAM.

**E**CQUID erunt tanti divini carmina vatis,  
 Desueta ut tentem plestra movere manu?  
 Nam simul ac Divum monitu patrimonia liqui,  
 Et mea sunt sacro colla subacta iugo;  
 Nil mihi cum Phoebos, nil cum Permesside lympha,  
 Nec lauro placuit composuisse comas.  
 Nunc quid agam oppressus verbis, & pondere rerum?  
 Mene tuis sperem versibus esse parem?  
 Protinus ut fiant leviora gravissima quae sunt

Car-



Carminā, fitque minor copia, culta minus.  
 Hoc tamen ingenium, gravitasque leposque pusillum  
 Exsuperent; tantum hoc pectore noctis inest.  
 Si forte exspectas, tradam tibi chalcea tanquam  
 Titydes; tu dans chrysea Glaucus eris.

## AD HIERON. TRECCHUM.

**A**ERA mihi non sunt; & debeo plurima Treccho  
 Quid faciam, ingrati ne putet esse animi?  
 Sarcinulas vendam? Nihil est brevis auctio fiat  
 Ruris? erit nobis haec quoque summa levis.  
 Addicam libros, & quae mihi fidus Apollo  
 Dictavit quondam carmina. sed quis emet?  
 Quid faciam? certum est ingratum nolle videri;  
 Me dedam & certo foedere nexus ero.  
 Scilicet aeternam firmo ut devinctus amore,  
 Hic animus Domino serviat usque meo.

## AD GENTEM ITALAM.

**H**O s jacet Italiae virtus dispersa per agros,  
 Frigida quos Rheni fluminis unda lavat:  
 Quae nec aqua periit, nec ferro, aut concidit igne;  
 Sed confecta gelu torpuit atque fame.  
 Martia turba, jaces infelix hic ubi victor  
 Romanus posuit magna trophaea parens.  
 Quae tot barbaricis spoliis onerata triumphos  
 Duxisti, aërias nunc alis, heu, volucres.  
 Quin & tempus erit, curvo molitus aratro  
 Germanus terram cum ruet ossa tua.  
 Quae super es manus, Italiam tueare, tuoque  
 Victrix ossa virum barbara conde solo.

DE

## DE CAESARIS IN GALLIAM ADVENTU.

**O**FFENSO est ausus Caesar se credere Gallo:  
Fallere quam poterat, praestitit ille fidem.  
Sit licet exemplum magnae virtutis utrumque;  
At servasse fidem, plus, mihi crede, fuit.

## DE VENETORUM URBE.

**U**RBS Venetum, quis te posuit? posuere potentes  
Caelicolae. nomen quis dedit? alma Venus.  
Cur dedit alma Venus nomen? quia nata profundis  
Illa Cytheriacis edita fertur aquis.  
Quis tibi thesauros tot contulit? optima Juno.  
Imperium pelagi quis dedit? ipsa Thetis.  
Quid mirum, si tot, si tantis rebus abundes,  
Urbs Venetum? magni te posuere Dei.

## AD JO. BAPTISTAM PALLAVICINUM.

**N**ATURAE fuit egregium certamen, & Artis;  
Clarus ut orator, Pallavicine, fores.  
Utraque multa tibi, sed plus Natura leporis  
Contulit; unde novo membra decore moves.  
Verba fluunt, instar rapidi torrentis, ab ore;  
Quae pariter dulci voce manique regis:  
Adfiscis inde animos tanta dulcedine, risum  
Ut moveas populo cum libet & lacrimas.  
Quis neget & silvas & saxa sequuta moventem.  
Orphea Treiciae plestra canora lyrae?  
Creditor Amphion Thebas fide clarus, Apollo  
Pergama vocali constituisse lyra.

Quid

Quid mirum? cum tu vocis modulamine volvas  
Vulgus, & ad Superos saxea corda trahas?  
Quae multis partita fuit, tibi contulit uni  
Natura: Ars omni, qua potis, ornat ope.

## AD JO. MUSONIUM.

Q U O D mecum cupis esse, meosque subire penates,  
Quodve tibi ut pateat janua nostra petis:  
Quid tibi vis? Helicon doctis communis habetur  
Vatibus, & sacrae Phocydos umbra patet.  
Non Aganippaeo deterret ab amne poëtas  
Delius, & Cyrrham non vetat ire Deus:  
Tu tibi ne pateant non limina nostra vereris,  
Idem Musarum quem mihi junxit amor?  
Si sumus unanimes, studioque tenemur eodem,  
Cur eadem non sit quantulacumque domus?  
Si pater est Phoebus, si mater Pallas utrique;  
Frater es. an nescis? hospitiumque vocas?  
Fide, tibi de me promittens omnia; fratris;  
Candidaque aeternum pectora frater ama.

## EPIT. CAESARIS BARBOVIS.

C A E S A R E A Barbos Caesar virtute per hostes  
Dum ruit, & forti praelia miscet equo  
Concidit, & tutos cum posset habere receptus;  
Maluit egregie, quam dare terga, mori.  
Ergo avidum pugnae, properant dum perdere, vitam  
Invida perpetuam fata dedere viro.  
Inclytam spatium virtus si prorogat aevi,  
Vita potest nulli longior ulla dari.

PRO-

## PROSPERI COLUMNAE EPITAPH.

**A**RMORUM decus, & Latini nova gloria Martis,  
 Callidus in multos ducere bella dies, (pugnae.  
 Prosper humo hac tegitur; quem non manus hostica  
 In medio belli machina nulla tulit.  
 Paulatim morbo in plumis consumtus inertis,  
 Quem medicae Phoebus nesciit auctor opis  
 Non gemitus moriens, non edidit ore querelas;  
 Sed doluit, quod non contigit ense mori.

IN MORTEM BEMBI CARDINALIS  
 INCERTI AUCTORIS MOPSUS ET DORYLAS.

**J**AM rapidi medium caeli sol igneus orbem  
 Transierat, pronoque urebat lumine pontum:  
 Mopsus arenoso cum cedens littore moestus  
 Piscator, nullamque trahens ad littora praedam,  
 Despondere animum coepit, cymbamque reliquit:  
 Humidaque expandens per duras retia cautes,  
 Dum siccet cistasque leves, nodosaque lina  
 Sol ardens, vacuum iratus divertit in antrum,  
 Ingratos cupiens requie lenire labores.  
 Quo postquam ventum, rupes resonare querelas  
 Miratus, videt incurvo de littore tristes  
 Fundentem quaestus Dorylam, quo doctior alter  
 Non fuit, occulto deprendere gurgite pisces,  
 Et fundam jacere, & ponto trahere humida lina.  
 Accedensque inquit: MOP. Doryla, quem tristis  
 Ademptum  
 Sic gemis, ut flenti resonent tibi littora & antra?  
 DOR. Ne luctus, ne rumpe meos (respondit) &  
 cheu,

Tu-

Tu quoque communem mecum turbatus amicum  
Flere para, & nostri miserum morientis Jolæ  
Interitum: vitreis quem defluere sub undis  
Nereides: flevit vicina per aequora delphin,  
Assuetos de more choros duxisse per undas  
Non visus, tristisque horret ceu tabe peresus.  
In passim Halcyones moestae, per saxa, per antra  
Tristia, flebilibus complent maria alta querelis.  
Quare agedū moestos mecum Mopse incipe cantus,  
Incipe, quandoquidem lenescava littora fluctus  
Pulsant & saevi posuerunt murmura venti.

MOP. Quis mihi te rapuit, quis te dulcissime Jola?  
Nostrae olim requies, olim spes unica vitae:  
Nunc lacrimae, aeternusque mihi dolor & lamenta,  
Nec te praesidium, ac nostrae spes magna juventae  
Adspicere, & sacrae licuit ferre oscula dextrae  
Ultima, & oclusisse oculos in morte natantes.  
Nec tibi ego inferias duxi, nec iusta peregi.  
Quid primū querar? aut quo tristia pectora vertam?  
Proh dolor, ah comitem tibi me ne immitis Jola  
Sprevisti moriens? ambos eadem hora tulisset,  
Et dolor infernas idem misisset ad undas.

Nereides nostras, oro, ingeminate querelas.  
Quid juvat umbrosis vitam producere in antris  
Aequoris undisoni, quae rauca subederit unda,  
Si mihi delitiae sint & solatia adempta?  
Littoribus quin & scopulis, & luce relicta  
Malle meam aequoreis vitam deperdere in undis  
Certum est; ut monstribus fiam nova praeda marinis.

Nereides nostras, oro, ingeminate querelas.  
Tu vitrei Proteu pastor gregis, incolae ponti,  
Et tu qui magno moderaris saeva tridenti  
Aequora, nunc questus, oro, ingeminate recentes.

Ille

Ille etenim ante alios vestri reverentior omnes  
Qui fuit, & largos aris indicere honores  
Suerus erat, nunc exigua est tumulatus arena.

Nereides nostras, oro, ingeminate querelas.

Tu vero ante tuas ades o Galatea sorores,  
Et mecum desle casum infelicis Jolae.

Occidit heu procul a patria, notuque propinquis,  
Ille tibi ante omnes olim dilectus Jolas,

Qui nondum primae vestitus flore juventae,  
Sicanias rupes, praeruptaque saxa Pelori

Te mirante novo cantu complebat. at illi  
Mamertina modis resonabant littora miris.

Non ut amans olim Siculas Polyphemus ad undas  
Dum caneret blanda scopuli pendentis in umbra;

Candidior folio nivei Galatea ligustri:

Sed caussas rerum, & magni primordia mundi,

Igneus ut vario sol lustret lumine terras,

Ut mane Eois primum se tollat ab undis,

Rursus & Hesperio nitidum caput aequore mergat.

Cornibus in plenum ut redeat nova luna coactis,

Utque regat Graias Helice formosa carinas.

Cur ter in abruptum fluctus male sana Charybdis

Sorbeat, effractus revomens ad littora puppes,

Naufragaque angusto dispergens corpora ponto.

Cur ingens miris exaestu et ignibus Aetna,

Et procul ostendet Lipare fumantia saxa.

Ut Deus aeterno vigeat vivacior aevo.

Utque domum mundi, qua struxit, temperet arte.

Omnia quae senior puero monstravit Amyntas,

Et dixit, magnus fies olim ista canendo.

Nereides nostras, oro, ingeminate querelas.

At vos o mecum scopulis, mecumque recurva  
Littora, quae Adriacas objectis cautibus undas

Fran-

Frangitis, incurfus quories gravis excitat Auster,  
Littora Tyrrheni fluctu pulsata profundi,  
Occiduas Zephyrus tunc cum iactavit arenas,  
Plangite dilecti ca sumque & funus Jolae.  
Tu mecum Benace senex hunc plange marinis  
Fluctibus, & moestas resonet tibi Sirmio voces.  
Sistite Nereides, nostros jam sistite questus.

D O R. Dulce tui resonant numeri, tua carmina  
dulce,

Nec nivei voces cychni sentire canoras  
Malim, cum liquidi circum stagna ampla Caystri,  
Flebilibus numeris notas moriturus ad undas  
Conqueritur, retinetque novo vaga flumina cantu:  
Non quas Halcyones moestae fudere querelas,  
Cum tutos placido condunt super aequora nidos.  
Verum aedum Hesperias quando procul aspicit  
Sol, & adhuc fero non surgit vesper olympo, (undas  
Mopse tuos itera cantus, Mopse incipe rursus:  
Et scopuli questus iterent, & saxa querelas:  
Ut vernas inter frondes cum Daulias olim  
Deflet mater Itym, resonant arbusta, nemusque,  
Suavior & semper repetito carmine vox est:  
Sic tibi, seu tremula moderabere arundine linum,  
Sive per immensum deduces retia pontum,  
Sit mare compositum: vitrea sit piscis in unda  
Plurimus, & curvos imprudens appetat hamos:  
Sic tibi sufficiat squalles Adriæ conchas:  
Sic juvet has, aequor qui cuspide temperat, artes.

M O P. Ne nostros Doryla cogas renovare dolores:  
Ne ve iterum tristes effundere pectore voces:  
Dum refero, crescit dolor, & nova cura recurSAT,  
Nec potis est superas tristis vox ire sub auras.  
Quin potius nostros quoniam lenire dolores

Carmina

Carmina nulla queunt, pariter surgamus : &  
ante

Quam vesper feros ostendat noctifer ignes,  
Nassasque & tectos escis fallacibus hamos.  
Tendamus pariter, toto dum lumina caelo  
Paulatim effundit stellis circumdata Phoebe.  
Forſitan ingrati diſpendia longa diei  
Sarciet optatae referens nox commoda praedae.

# BAPTIST. GUARINI

## F I L I I

## C A R M I N A.

### AD JANUM PANNONIUM

### QUINQUECCLESIENSEM EPISCOPUM.

**N**ON ita muneribus, Praeful doctissime, laetor.  
Judicio ut clarum me juvat esse tuo,  
**J**ANE pater : cujus meritas percurrere laudes  
Non valet ingenii vena pusilla mei.  
Tu Latiae Graiaeque simul pars optima linguae;  
Te cuncti priscis dicimus esse parem.  
Pallada crediderim Phoebumque novemque sorores.  
Thraciaeque armifero qui terit arua pede.  
Ante lovem tales quondam fuisse precatus,  
Dum caneret vates bella futura Themis;  
Contra Turcarum populos regemque superbum  
Ut te Pontificem saecula nostra darent:  
Qui saevo regeres hosti contermina regna,  
Et forti premeres arma inimica manu :

Fa-



Facundos Latias posses legatus ad urbes,  
 Dicere pro Christi verba diserta grege.  
 Credibile est igitur Patrem mandasse supremum,  
 Ortus Gradivo Mercurioque tuos.  
 Nectare te parvum dulces aluere Camoenae,  
 Nutricesque tulit docta Minerva manus.  
 Firmior hinc aetas magno est commissa Guarino,  
 Ornandumque bonis moribus ingenium.  
 Quippe ubi terra ferax docto cultore movetur,  
 Exoritur cumulo fertilior feget.  
 Nec te pulcra minus Ferraria gaudet alumno,  
 Quam laeta est ortu Pannonis ora tuo.  
 Sic te nostra bonum viderunt tempora vatem,  
 Quales in caelum saecula futura ferunt.  
 Nam seu clarorum scribis connubia regum;  
 Funera seu ploras, seu fera bella canis;  
 Seu praeceptorem laudat tua Musa Guarinum;  
 Seu de maternis increpat astra rogis:  
 Seu queritur morbos, celebrat seu numina fontis;  
 Seu canit in medio sidera visa die.  
 Altisono quidquid memorandum carmine fumis;  
 Noscimus eloquii flumina larga tui.  
 Hinc rex MATTHIAS, Turcarum maximus horror  
 Pannoniae clarum Marte togaque decus,  
 Praefide te, regni non parva negotia tractat;  
 Sive domi fuerint, sive gerenda foris.  
 Hinc te Pannoniae plebs admiratur amatque;  
 Nobilium hinc Procerum turba verenda colit.  
 Hinc urbs Pontificem te Quinqueecclesia cepit;  
 Hinc gaudet rebus sacra caterva suis:  
 Cum te consilio magnis doctoribus aequas,  
 Et lingua promptus bella manuque juves.  
 Tales sancta duces votis ecclesia poscit,

*Pars II.*
*L*
*Pro-*

Protegat ut miseros debita cura greges.  
Is mihi bellorum damno fuit usus in isto,  
Quod vultus nostra conspicio urbe tuos.  
Namque ita gaudentes hilari te vidimus ore,  
Ut solet aethereo plaudere Creta Jovi.  
Ergo minus dono, quam doni auctore movemur:  
Dantis honos, precium munere majus habet.  
Cornipede in niveo cum me obvia turba videbit,  
Dicat delicias pectoris esse tui.  
Verū opis haud nostrae est dignas, pater optime, grates  
Solvere, nec meritis praemia iusta tuis.  
Mens tibi mercedem virtutis conscia reddat;  
Et quae respiciunt Numina sancta pios.  
Illa tibi ad patrios saluum remeare penates,  
Hos teque de tumida gaudia longa ferant.

## AD EUNDEM PANNONIUM.

**N**ON minus antiquis, Praesul venerande, poetis  
JANE, decus vitae praesidiumque meae,  
Qui patrium claris ornas virtutibus, Istrum,  
Doctrina, ingenio, viribus, eloquio:  
Quando erit illa dies, qua tecum visere possim  
Littora saxosae proxima Dalmatiae?  
Illyricumque latus, Dravus quas irrigat oras;  
Et glaciem gelidi cernere Danubii?  
Et castella jugis alte constructa nivosis,  
Martiaque argenti moenia Pannoniae?  
Dutū iter est, fateor, longos perferre labores  
Per pelagus, silvas, flumina, saxa, feras;  
Qua fera setosis incultisque horrida barbis,  
Vocibus occurrat dissona turba meis.  
Omnia sed tecum vivendi optata voluptas,

Atque

Atque incredibilis lenia reddet amor .  
Tecum ego non dubitem Syrtes intrare vadofas ,  
Et loca quae nimius torret adusta vapor .  
Tecum ausim pedibus mediam penetrare charybdim ,  
Cyaneasque vagas , navifragosque canes .  
O ego ter felix : si te monstrante videbo ,  
Qua patet adstrictis orbita fluminibus ,  
Quae conjuratus deduxerit agmina Dacus ,  
Quae Scythia non stabilis , quae colit arva *Getes* ,  
Per quos intonsus discurrit Sarmata campos ,  
Et quibus angusti sunt sua platistra lares .  
Quae via Rhiphaeos alto sub vertice montes  
Adspicit ; Euxini qua fluit unda maris :  
Atque Tomitanae qua sint confinia gentis ,  
Nafonis nostri cognita terra malis .  
Discam etiam Augustus quae vicerit oppida Caesar ;  
Quae fuerit Latiis sanguinolenta viris :  
Fervida Turcarum rabies quas vicerit urbes ;  
Quos dederit populos gens truculenta neci :  
Qui desolati saevis perculatibus agri ;  
Atque unde ingenti praeda sit acta manu .  
Si te forte pudor tua dicere gesta vetabit ;  
Non erit hic magnos noscere cuncta labor :  
Cum valeant claris dudum vulgata triumphis ,  
Illa vel ignavi facta referre senes :  
Quam longas hyemes , & quantos saepe calores  
Pertuleris durae tempore militiae .  
Quae vallata tuo fuerint , quae diruta ductu ;  
Quae defensa tuis oppida consiliis :  
Quam rapido cautum cursu praevenieris hostem ;  
Difficilesque nova feceris arte vias :  
Ut Mahometae dederint tibi terga cohortes ,  
Non ausae populi tela videre tui :

Agmina quae Stygio fugientia miseris Orco,  
Aut ferro, aut altis obruta gurgitibus.  
Haec pro virgineo gessisti praelia CH R I S T O;  
Hoc habuit sanctae religionis amor.  
Nec minus adspiciam quas praestant ocia sedes;  
Hic ubi stat docti sacra caterva chori:  
Hic ubi vel legitas priscorum carmina Vatum,  
Vel nova venturis scripta legenda canis:  
Tristitia Maeonio celebrans nunc praelia versu;  
Nunc referens claudio mitia facta pede.  
Hic ubi Smyrnaeas solitus percurrere chartas,  
Et gelidis quidquid vallibus Ascra canit:  
Lucida sidereo quae sint animalia caelo,  
Quae ventum aut pluvias praevia signa ferant.  
Quicquid Sicania pastor modulatur avena;  
Quicquid Aristophanes scribit & Euripides,  
Quid tumido fingit stultae reus ore senectae,  
Et quis Olympiacis scandit in astra rotis.  
Et quos errores, acies quas Mantua narrat,  
Et silvis pariter cognita & agricolis.  
In nova quae fuerint mutatae corpora formae,  
Quos notet in fastis Martia Roma dies.  
Postquam legisti quae dat praecepta Cupido,  
Discis quae tanti sit medicina mali.  
Gramina quae pandat Macer; & quid Musa Catulli,  
Quid genio Plautus nobilis & salibus.  
Qua Poenus foccos expresserit arte Menandri;  
Quid ludant Elegi turba faceta chori.  
Carmina quos celebrent fidibus Venusina canoris;  
Qui prima rapiant vellera fulva rate.  
Quo sonitu juvenis civilia bella tonarat,  
Laudanda iussus seditione mori.  
Corduba quid memoret, Grajos imitata cothurnos;  
Qua

Qua fera Papinius concinat arma tuba.  
 Mordacesque jocos & falsa Epigrammata Marci;  
 Quae canter Latius Punica bella senex.  
 Quicquid Pierides mollis sonuere Canopi:  
 Quos laniet Satyris Musa Latina suis.  
 Perspicias illustres vitas Regumque Ducumque;  
 Quas & Plutarchus tradit & Aemilius.  
 Nunc arguta gravis Tranquilli scripta revolvis;  
 Nunc avide primi Caesaris acta vides.  
 Lactea quam currant Patavinis flumina chartis;  
 Miranda Crispus quam brevitate juvet.  
 Justinus quanta dulcedine permeet orbem,  
 Librorum numero par, Trege magne, tuo.  
 Et quamcumque dedit linguis Latialibus artem  
 Arpinas cunctis altior ingeniiis.  
 Nec documenta latent quae rhetor Cantaber; aut quas  
 Dant Senecae morum scripta diserta vias.  
 Non te Divini fugiunt monumenta Platonis,  
 Aut docti largum flumen Aristotelis.  
 Non quicquid dictat perplexa Academia veri,  
 Porticus atque rigidum Stoica quicquid habet.  
 Non quisquis radio terras metitur & astra,  
 Aut rerum causas quaerit, & ingenia.  
 Non te Pontificum, non te civilia jura.  
 Scitaque divini non latuere fori,  
 Noscis & antiqui numerosa volumina Mosis;  
 Qui primi terras incoluere viri;  
 Qui sacri vates mundo cecinere futura,  
 Quique Palaestina regna habuere locis.  
 Terrea quae suetae venerari Numina gentes  
 Quos Deus imperiis egit in arma suis.  
 Perfida quam saevos passa est Judaea tyrannos,  
 Quam saepe est meritis obruta suppliciis,

Nec tantū haec legitas, verum hinc praecepta requiris,  
 Ut vitae constet formula certa tuae.  
 Fortunatus ero si quando ea venerit hora,  
 Qua fruor hospitibus, optime Jane, tuis;  
 Et tecum infomnes valeam perducere noctes,  
 Et tecum longos continuare dies.  
 Interea memori si te non pectore servem,  
 Idem etiam possim non memor esse mei.

### IN OBITUM JANI PANNONII.

PANNONIAE decus, & nostri lux maxima saeculi,  
 Hic situs es cunctis, JANE gemende bonis.  
 Te nemus Aonium, laceris te Musa capillis,  
 Te posita moestus flevit Apollo lyra.

## LAURENTII GAMBARAE

### PRO VICTORIA CHRISTIANAE

#### RELIGIONIS CONTRA TURCAS AD DEUM GRATIARUM ACTIO.

JAM tandem pater omnipotens dignatus ab alto  
 Et nostras audire preces, gemitusque tuorum;  
 In vinclis quos ille ferus nostrique tuique  
 Nominis hostis habet, vel carcere detinet atro;  
 Ferre & opem nobis, tantarum in turbine rerum,  
 Et post bellorum tam saeva incendia, totque  
 Excisas ferro gentes, amissaque regna.  
 Nam nec erat spes ulla fugae, furibundus & hostis  
 Terruerat pontum, & terras victricibus armis,  
 Et classe Adriacas valida penetraverat oras;

Op-

Oppidaque , & pelago , & terris invaserat urbes ;  
Atque inimicum ignem secum , caedesque ferebat .  
Induerat quos se in laqueos nec senferat : & non  
Quid posset , Rex o caeli , tua dextera norat .  
Unde agimus tibi nunc tanto pro munere grates ;  
Et templis pia thura damus ; per templa , viasque  
Debira sacra tibi canimus : nam dextera partim  
Threiciam classem tua merfit in aequore ; partim  
In nostras impulsa manus est te duce , & ingens  
Turcarum intepuit resperfus sanguine pontus :  
Nam nec habet certas tua magna potentia metas ,  
Nec praescripta tibi est , sed tu potes omnia solus ,  
Tellurem & pelagi liquidas convertere in undas ,  
Et mare tellurem in solidam . tibi paruit aequor ,  
Aequor Erythraeum ; Solymae dum robora gentis  
Transirent vasti sicco pede marmora ponti ,  
Atque minas fugerent duri Pharaonis , & arma .  
Namque tuo jussu discessit tunc maris unda ,  
Hinc atque hinc saxi in faciem durata repente ,  
Hebraeae inferrent gressus qua parte phalanges :  
Quae retro tunc deinde fluens conjunctaque currus  
Involvit pelago Mareotidaeque arma sequentum .  
Nunc vero non se pontus divisit ; at unda  
Strata , silensque ) tuo sed non sine numine ) ventus  
Auxilio nostris fuit , & tot clara per annos  
Praeteritos virtus , & formidabile nomen  
Turcarum in ventos abiit tunc gentis Iberae ,  
Atque Italiae ad caelum bellando gloria sese  
Extulit ; invictamque olim per caerulea classem ,  
Haud nostrae timuere artes ; non impetus illos  
Barbaricus juvit sparsusque per aequora clamor .  
Nam nostra haud lunae speciem vexilla ferebant ;  
Sed Cruce pendentem Christum palmasque pedesque ,

Trajectumque latus ferro, pariterque parentem  
Aspera dilecti lacrimantem funera nati.  
Gloria tota tua est, neque enim victoria nostro  
Consilio, aut armis parta est, aut viribus ullis.  
Et miles ferus ille suo sperabat in arcu,  
Et gladio, quo jam toties caeso hoste triumphos,  
Egerat, & victor praedas portarat ad oras,  
Insonat angusta qua Bosphorus horrifera unda.  
Quid dicam? o Asiae regnator saeve, Deus te,  
Quem colimus, meritoque sacras veneramus ad aras,  
Proteret, haud aliter quam laeti graminis herba  
Cornipedis pede pressa gregis: dicamque ego; vidi  
Regem Asiae florentem opibus, regnisque potentē,  
Elatumque animo, & tumidum praecordia fastu,  
Non secus ac cedri alta comas sublimibus arbor  
Nata in verticibus Libani, sed luce sequenti  
Dum redeo; Rex non usquam; sed nec levis umbra  
Corporis illius, nec gloria parta sub armis  
Ulla erat, aut rerum vestigia facta suarum.  
Et nunc tempus adest, quo te sulcasse pigebit  
Jonios fluctus, & classe intrasse profundum  
Adriacum, tuaque arma armis concurrere nostris  
Permisisse, Deus cum nos nunc protegat, & nunc  
Pro nobis (ut tu ipse vides) bella aspera pugnet.  
Tunc ego laetitia ingenti cum labor, & axes,  
Vertice contingam caeli, dehinc ora resolvam  
In laudes, o Christe, tuas, magnique parentis,  
Qui solus pontum, & tellurem condidit, & non  
Se folia ulla movent, tanti sine Numinis aura,  
Cessabo & nunquam tua facta intexere nostris  
Carminibus, pariterque tuos memorare triumphos,  
Nam victi cecidere hostes, paucique (cruore  
Aspersi tamen) ad sedes rediere paternas,

Et



Et sua viderunt versis vota irrita fatis.  
Te mare, te tellus, caeli te regia laudat,  
Caelestesque chori, laetaeque per oppida gentes  
Europae, quae te Dominum, Patremque fatentur,  
Insigni super astra ferunt te laude, tuumque  
Nomen, & annales condunt; quibus inclyta facta  
Describunt, quae dextra potens tua fecit in undis  
Jonis, nostri ut possint haec scire nepotes,  
Teque colant unsi, penes est quem quicquid ab alto  
Adspectat caeli cum Sol tenet arduus oras:  
Istiusque sacrae memores sint juris, & aras  
Ante tuas tibi digna canant praeconia laudis.  
Tuque illorum animas, fuso qui sanguine pro re  
Romana, sacrisque tuis, patriaue ruenti,  
Vulnera per, pulcramque necem cecidere sub armis,  
Sidereas supra sedes, qua fulget Olympi  
Regia duc tecum, & tuta statione repone.  
Et vos Aetherei fontes, quos non vagus imber  
Verberat, aut pedibus turbat fera, vel gravis aestus,  
Aut ramis folia arboreis delapsa; sed estis  
Perspicui, gelidique Deum laudate, manu qui  
Pro nobis valida nostros pugnavit in hostes:  
Tu quoque Sol, qui vidisti sublimis ab alto  
Aethere pugnantem pacata per aequora puppes,  
Et nunc tu canere, atque urbis per compita pompas  
Ducere solemnes laetus nos adspicis; heu quam  
Exiguæ sunt, & tenues, te iudice grates,  
In nos pro tantis meritis: qui contulit ille,  
Ille sator rerum, & tanti certaminis auctor!  
Jam circum septem colles, quos dividit unda  
Tibridis, & cursu praeclaram interluit Urbem,  
Laetitia magna exsultant, atque ardua voces  
Terrarum laetas ad sidera lucida jactant,

Atque

Atque novis resonant passim concentibus aerae:  
 Ipsa coronatis Tuscum mare cornibus intrant  
 Flumina, quae currunt de fontibus Apennini,  
 Certaue venturis declarant gaudia sacclis.  
 Tuque Pie ante alios laetare o Quinte, tenes qui  
 Pervigil in terris Christi sedemque locumque:  
 Nam longe es felix, sub quo Deus optimus hostem,  
 Hostem opibus, simul & terra. pelagoque potentem  
 Mersit in Joniis undis, qui foedere rupto  
 Impia in insontes Venetos jam verterat arma,  
 Et Cypri regno expulerat, victorque tenebat  
 Totius pelagi imperium; sed det tibi tantum  
 Omnipotens vitae spatium, quo cernere possis  
 Illum amittentem terras, amisit ut aequor,  
 Et dantem meritas effuso sanguine poenas,  
 Pacatum & videas laetis successibus orbem,  
 Errantesque greges Romana in septa reducas;  
 Qui vacuos tondent saltus, dumetaque silvae  
 Hercyniae, gelidique bibunt qui flumina Rheni,  
 Quosque ferus versat pastor per prata Britannus:  
 Nam tua barbaricae populantur ovilia gentes,  
 Quae rectas liquere vias, justumque piumque.  
 Tum juvenem Pater alme tua pietate; tuumque  
 Ob numen serva incolumem, quem bella gerentem  
 Indomitas contra gentes, populosque rebelles  
 Vidisti toties ad curvi flumina Baetis,  
 Germanique simul referentem in regna Philippi  
 Victrices aquilas, & caesis hostibus arma:  
 Atque ipsum hunc etiam voluisti ducere classem,  
 Atque illi summam voluisti credere rerum,  
 Effice, ut ipse etiam fasces in regna reducat  
 Aeneadam amissos olim, lauroque revincta  
 Roma comas, Macedum populis, Baetrisque subactis,  
 Qui-

Quique colunt Libyam, & Nilum, det jura, jugumq;  
Excudere impositum possit, violentaque fraena.  
Huic etiam pater omnipotens da, major ut ipso  
Sit patre, bellando quamvis tot vicerit urbes,  
Viderit & captos reges, fusasque phalanges.  
Et regno sumtis in regna reduxerit armis,  
Expulsum regem, qua Bagrada currit in aequor.  
Haec tibi Alexander cecini dum tu colis oras  
Umbrosis gelidus quas Farfarius irrigat undis,  
Commisissique tibi populis civilia reddis  
Jura tuis, ritusque sacros, & templa revisis,  
Criminaque & vitas discis. tu perlege quae jam  
Jam toties voris oprasti; & gaudia mecum  
Tu cape, & ante aras, pronus, supplexque age grates,  
Immensasque patri aeterno, qui merfit in undis  
Jonis Turcarum acies inimicaque vela;  
Atque alias magno grates persolve parenti,  
Qui cupidum belli in patriam sedesque reduxit  
Farnesium juvenem, qui nomine te quoque reddit;  
Duxerat ad bellum quem clarus avunculus armis:  
Illius virtutem animi, roburque juventae  
Admirans, puer adversos dum tendit in hostes.



## CYNTHII JO. BAPTIS.

## GYRALDI

## FERRARIENSIS

## CARMINA.

## AD HERCULEM ESTENSEM. FORTUNA.

**Q**UAE cuncta instabili verso mortalia motu,  
 Sors, praepes, cunctis & malefida viris,  
 Firma futura tibi semper; tibi fida, nec unquam  
 Mutatura vices mobilitate mea,  
 Has tibi do volucres, Dux invictissime, pennas;  
 Inque tuo implumis ludo benigna sinu.

## HERCULI ESTENSI.

**A**LGIDE, patriae rector, dominusque paterque,  
 Sub quo laeta quies, & bona cuncta vigent;  
 Cum tua sceptrum leges, tenui quae carmine dixi,  
 Conveniens Regni pone supercilium.  
 Nec licet aequa tuis referant mea carmina factis,  
 Tu tamen haec veri pignus amoris habe.  
 Mens mihi major erat: sed cum sim viribus impar,  
 Deficiantque humeri; sit voluisse fatis.

## D. HERCULI ESTENSI II.

**B**ALSAMA, thura, crocum, tradant & grandia dona  
 Quis nitet Attalica conditione domus

Do

Do tibi populeas frondes, silvasque virentes,  
 Alcide, inculti munera parva soli.  
 Parva tamen magni non spernunt munera Reges,  
 Parva etiam magno munera grata Jovi.  
 Tu cape dona libens, dantis simul accipe mentem,  
 Sic tibi erunt parva haec, balsama, thura, crocum.

## DE CAELII CALCAGNINI HYMNO.

**A**NNE tuo rupes etiam de carmine surgunt?  
 Promit & arenti de Nuce Musa nemus?  
 Aura Paraetonias colubris praemiscet arenas,  
 Marmaricusque leo servat herile latus.  
 Illyricus pater in media perlustrat heremo  
 Caelum, & caelicolas, tergeminumque Patrem.  
 Idem animo, idem oculis nostrae vexilla salutis  
 Spectet, & inclusum pectore numen alit.  
 Si Nux tantarum monstrat spectacula rerum;  
 De Nuce quis promptam perneget Iliada?

## BALTHASARIS BARDELLI TUMULUS.

**B**ALTHASAR hic jaceo, primo quem flore juventae  
 Decerpfit rapida Mors inimica matri.  
 Si spectes annos, juvenem me fata tulerunt,  
 Si ingenium, dices me periisse senem.

## AD D. HERCULEM ESTENS. II.

**M**AGNA canant quamvis de te, Dux inclite, vates,  
 Nemo tuis meritis versibus, aequa facit.  
 Et quamvis cupiant quam plurima fingere cantu,  
 Tu quoque, Dux, fictis maxime major eris.  
 Nam-

174 CYNTHII JO. BAPT. GYRALDI

Namque ut nulla valent lucem addere lumina Soli,  
Sic tua carminibus crescere fama nequit.  
Ergo licet crescant vates, & carmina, nullus  
De te unquam mendax esse poeta potest.

A D E U N D E M.

**N**ON quod me Phoebus super ardua culmina Cynthi  
Duxerit, ad sacras aut Heliconis aquas,  
Haec pango Alcide, tibi quae modo carmina mitto:  
Adflatu veniunt numinis ista tui.  
Namque ego te spectans, divinos protinus ignes  
Haurio, & invadit pectora nostra furor.  
Musae aliis adsint, adsitque vocatus Apollo,  
Mi faveas; solus tu mihi numen eris.

PAULLI JOVII  
JUNIORIS

SUB EFFIGIE NICOLAI PICININI.

C A R M I N A.

**H**AEC tibi mansuras aeterna in saecula laudes,  
Haec spolia, & victo celebres ex hoste triumphos,  
Robur, & astutae praestanti in corpore vires,  
Et populis defensae urbes, tuaque inclyta virtus  
Sanguinea peperere solo, fortissime ductor  
Ausonidum: quisquam an tanto tibi certet honore  
Armorum, ac titulis clari Mavortis, & almae  
Militiae? Nonne hos oculos atque ora ferebas?  
Nonne

Nonne sub hoc quondam gladio cecidere volantes  
 Turmae equitū, peditumque simul, pulsiq; tremore  
 OEnotrii obstupuere duces, atque Itala signa?  
 At nos exigui miramur corporis artus  
 Sufficere hoc onori, & tantos perferre labores?  
 Scimus, & Ismenias bello fregisse cohortes  
 Saepius, in parvis victorem Tydea membris.  
 Ipsa equidem, longe terris Atlante relicto,  
 Caucaſeisque jugis, & cincto nubibus Oſſa,  
 Laurigerum redimita caput, petit ardua caeli,  
 Inde alacris ſeſe tollit ſuper aethera Virtus.

IN IMAGINEM COSMI MEDICI  
 M A G N I F I C I.

Q U I D de Sidonio bis tinctam murice veſtem?  
 Quidve manus ſimilem doctas formare figuram?  
 Artiſciſque decus tantum admiramur, & artem?  
 Suſpice grandaevi caeleſtes oris honores,  
 Effigiem quicumque vides, & fixus in illis  
 Tranquillum Heroa, & mixta gravitate verendum  
 Sume oculis, dulcique nota pia lumina vultu.  
 Non hic inſigni gladio per tela, per hoſtes  
 Egit equum, aut largo foedavit ſanguine dextram.  
 Non illi Mars durus erat, non clafſica cordi,  
 Verum conſilii foecundum pectus, & alto  
 Ingenio virtus: qua toto cognitus orbe  
 Ipſe ſui columeſque fori, ſanctique ſenatus  
 Etrufcum decus & nomen ſuper aethera vixit.  
 Sed qui honor? aut ulli laus major contigit unquam?  
 Ingrata quam de patria duxiſſe triumphum,  
 Hadriacis exul veniens revocatus ab oris?  
 Quae poterant potiora peti? quam cum modo ſaevā  
 Mortem

Mortem exspectabat, diramque in colla securim  
 Audiret populi tollentem ad fidera vocem,  
 Exspectate veni patriae pater inclyte nostrae.

## IN CAITHBEJUM MAGNUM SULTANUM.

**S**I quondam Hesperio quos misit Baetis ab orbe  
 Dalmatave, aut Lybies Mauris circumsona tellus  
 Aeneadum fasces, Capitoliaque alta tenentes  
 Obstupuit populus Latialis, & inclyta Roma  
 (Externos quamvis dominos) aequavit Olympo,  
 Insueta admirans alienae nomina terrae,  
 Nonne erit hic etiam toto admirabilis orbe?  
 Qui genere ex humili Riphacis natus in oris  
 Adversis fines mundi, rigidamque relinquens  
 Arcton, Cimmerias ubi Bosphorus asperat undas,  
 Venerit ad magni septemflua flumina Nili?  
 Atque ibi serviles habitus exutus, & ora,  
 Consensuque ducum magno praelatus honore;  
 Tum demum Aegyptum, & Pharias compeecat habenas?  
 Et Syriam quacumque rapax procurrit Orontes  
 Sceptra tenens late magna ditione gubernet?  
 Scilicet haec & virtuti, ingenuoque labori  
 Conveniunt, namque ille diu in sua damna ruentes  
 Victor Erythraei depellit littora Ponti  
 Praedones Arabum; simul & felicibus ausis  
 Trans fluvium Euphratem, trans pictae Perfidis arva  
 Cogit Ithyræo gaudentes vulnere Parthos.  
 An memorem quod Coryciae prope moenia Tarfi  
 Rettulit infesto ex Turca sublime trophaeum?  
 An subito oppressa Aethiopum servilia bella?  
 Sed nec adhuc tanto famae contentus honore;  
 Muneribus placet Italiam penetrare, suaque  
 Laude



Laude frui: magno sic uesta per aequora sumptu  
Bellua, quam prisca conjuncta voce Camelo  
Pardalim appellant, geminum cui vertice cornu  
Fulget, & insigni distinctum tegmine corpus.  
Felix ille quidem cunctis qui cognitus oris  
Non vitam ferro amisit, sed morte quieta  
Et natus lacrimans posuit sua membra sepulcro,

## IN MATTHIAM CORVINUM, REGEM.

**V**O s o qui celeri gradu  
Lucum Castaliae rupis, & ardua  
Parnassi juga scandere  
Certatis viridem per nemorum comam,  
Qua rivo resonans sacro  
Leni lympa fugax perstrepat alveo;  
Auratae cytharae modos,  
Insignemque lyram ponite; ponite:  
Si quis posse putat suo  
Cantu, & grandiloqui carmine Pindari  
Regem Pannoniae decus  
Corvinum meritis tollere honoribus.  
Nam si Moeonii senis,  
Seu quae Virgilii Musa canit Deos  
Sese reddat ab inferis,  
Nec curet Siculae regna Proserpinae;  
Haud unquam valeat fatis  
Summis, ceu deceat, tollere versibus  
Corvinum egregium ducem;  
Quem nec Laurigeri pascet Apollinis  
Laus, nec Pierii Chori  
Princeps, dulce canens Calliope melos.

## IN BASILIUM MOSCOVIAE PRINCIPEM.

**E**T si te nullis insignem fama trophaeis  
Basili sine laude per orbem,  
At semper victum referat, semperque subactum  
Horribili in certamine Martis  
Sarmata quum toties te fuderit, atque Gelonus  
Obruerit tua castra sagittis;  
Et tua Regna ferox pubes populata Scytharum  
Te patria folioque fugarit:  
Non ingrata tamen tibi se debere fatetur  
Haud meriti immemor Italia tellus,  
Namque tuo nobis ignotos munere Moscos,  
Et Scythici Borealia caeli  
Regna aperis, Tanaimque Trucē, penitusque repostā  
Perpetuis sub nubibus Arcton.  
Sed quid Hyperboreos veterum mendacia jaecat  
Riphaeo sub cardine montes?  
Tu Basili nobis caecam tu discutis umbram.  
Nos ideo pro munere tanto,  
Rite tuam effigiem Lari veneramur ad undam;  
Nomenque immortale sacramus.



J O. A U R E L I I  
A U G U R E L L I  
C A R M I N A.

AD P. GLYCEREN. LAUS POETARUM.

**V**IR TUTE majus nil, Glycere, boni  
Dividerunt : ne stolidas opum  
Vires, & insanos honores  
Assiduo mediteris ore.  
Ast ipsa Vatum, ni celebris tamen  
Et clara cantu est ; sic latet abdita,  
Abstrusus olim ut fulgor haeret  
Gemmeus ; artificis quousque  
Detectus acri diradiet manu.  
Videre patres indigetem Deum  
Aeneam ; & iidem ipsi superbum  
Hectoreis spoliis Achillem.  
Sed Musa, longo ne pereant die,  
Nobisque noti tam bene sint, quam avis :  
Deduxit illos, nos ad usque  
Carmine perpetuo nepotes.  
Est & fides & gratia Vatribus ;  
Est dulcis oris spiritus ; est Amor,  
Qualem nec ullus praeslet ipsis  
Omnibus exanimis sagittis.  
Invisit Orpheus impia pallidi  
Ingressus Orci regna, inamabiles  
Manes, & horrendas tremendi

Eumenides famulas tyranni,  
 Illinc acerbo funere conjugem  
 Raptam reduxit pene, potentibus  
 Vocum Camoenis aequæ & omni  
 Threicia modulatus arte.  
 Quin ipse durat caede per aridos  
 Discerptus agros, Euridicen suam  
 Jam voce quaerens, nil suprema  
 Quam miseram Euridicen vocabat.  
 Et nos venustis moribus, & tua  
 Virtute capti, hac tenui lyra,  
 Primisque & extremis pudicam  
 Carminibus Glyceren canemus.

POETAS DIVINO FURORE EXCITARI,  
 ET PROPE FELICES ESSE.

CÆLESTIS intus excitat vates vigor:  
 Ultraque semper promover:  
 Illic ut illos sistat, unde moverant;  
 Caeloque cives asserat.  
 Donecque sedes incolunt mortalium  
 Hac obliti caligine;  
 Virtus tenebris una solos eximit  
 Ardente Sole purior:  
 Splendore cujus tutiores ambulent,  
 Ferantque lucem caeteris.  
 Hinc non honorum, non opum cordi faces  
 Volens edaces admovet,  
 Ad sacra certo qui semel ritu pedem  
 Musis dicata contulit:  
 Vitat sed aegrum vulgus, odit anxii  
 Curas inceptas ordinis.

Aequæ

Aequè dolori, gaudioque deditus;  
Neutro retentus laeditur.  
Optat frequenter, nec cupit: cavet, neque  
Pavet timore territus.  
Ergo aut patentes circuit Mundi plagas,  
Floremque rerum colligit;  
Dum multiformis interim coloribus  
Natura doctis pingitur:  
Aut quid decenter expetatur omnibus,  
Jugi labore quaeritat.  
Cultisque mores mentibus probos ferens,  
Inculta quaeque praeterit.  
Aut saepe laetos inter admissus choros  
Ludit latenter Virginum;  
Ad quos aperte progredi nullis datur;  
At ire clam, paucissimis.  
Illic, amoenae vallis in recessibus,  
Frondentis alte populi  
Aestum sub umbra vitat, aura leniter  
Remurmurante frondium.  
Illic virentis floridum campi solum  
Innoxius perambulat.  
Vel ad sonorum vitreae lymphae caput  
Curis solutus sternitur:  
Grato vel antro, jam Deo plenus, sedet;  
Lyraque Musam suscitatur:  
Antro, quod hederæ vestiunt circum sacrae,  
Laurusque obumbrat mystica:  
Heroas unde tum, virosque laudibus,  
Divosque dignis concinit.  
Quid hoc beatius? quis huic opes simul  
Omnes furori comparet?

## AD LODOVICUM MARCELLUM.

**M**ARCELLE, quo non alter est beator,  
 Si, quod beatum est, ipse tecum pensites:  
 Tibi frequenter, urbe vel ruri velis,  
 Ludunt decentes hinc & inde Gratiae.  
 Tuam frequentat optimus civis domum;  
 Peritus omnis arte quavis artifex;  
 Musis amicus omnis & vates pius.  
 Aedes honestis commodis pares tuis,  
 Lautis renident undecumque sumptibus.  
 Urbana profert haec tibi se gratia.  
 Ruralis aequae nec moratur altera:  
 Ubi virentis praedium collis petas  
 Utcumque amoenum, five rupis horridae  
 Antro, vel unda limpidi fontis juvat  
 Spectare Nymphas, vel sacro passim Deos  
 Luco vagantes, cum tibi purissimis  
 Pomona replet foetibus mitis sinum,  
 Cum Flora fertis floridis ambit caput.  
 Et laeta cornu prodit amplo copia.  
 Duabus ergo sic beatus Gratiis  
 Videre multis: at mihi dives, potens,  
 Benignus: ista sic fatemur singula:  
 Totum negamus illud, ut beaveris  
 His te: sed ampliore commodo, quod his  
 Contentus omni degis ambitu procul;  
 Nec plura quaeris liber, & vivens tibi:  
 Sororque inhaerens sic duabus tertia,  
 (Quae vera doctis creditur felicitas)  
 Haec una reddit te beatum gratia.

AD

## AD BERTUTIUM LAMBERTUM.

HOMINES NON EUM, QUEM DEBERENT,

FINEM QUAERERE.

S A E P E ego, Bertuti, compresso in pectore risu,  
Mortales mirer volvi per inania curas:  
Interdum, ne quis vitio mihi vertere possit,  
Haud veritus, si qua ingenio permittere curem,  
Illuc immisissis adeo de labor habenis,  
Vix ut surgentes valeam cohibere cachinnos.  
Nam quoties animo scrutor, quo tendere nostrum est,  
Peneque diversum video spectantia signum  
Omnia quae nobis aptantur spicula cornu;  
Apparet toties manifeste, qui stupor intus  
Humanas habeat mentes; quae tramite recto  
Propositum nequeuntque sequi, nec cernere finem:  
Principio in sevit nobis natura perennes  
Igniculos, quibus accensi conquirere rerum  
Semina possemus, nec non per lubrica firmos  
Ferre pedes, verique invento insistere calle.  
Hinc varie expulsis artes fulsere tenebris;  
Quae regerent certum per iter mortalia corda.  
Namque aliae quantum possit promittere sola  
Cognitio, tanto contentae lumine praebent  
Se nobis comites, seu per concreta perenni  
Materiae, motuque obnoxia, sive per illud  
Quod mens ex iis seducit, fingitque remotum:  
Seu per sensilibus vere semota tenendum  
Est iter, & pura caelestis mente petendum.  
At aliae his etiam cognatae, quid sumus ipsi,  
Et quod opus nobis proprium, & qui denique finis,

Expediunt, ducuntque pios, verosque per actus  
Humanum genus, ut semet virtutibus inde,  
Ingenuisque domos curis, & moribus urbes  
Expleat, ac justis mortalia legibus aequet;  
Unde scatet plene liquidi fons purus honesti:  
Ex quo quid nosse, & quantum decet, ac quibus uti  
Conveniat, quaeve elargiri, quidque periclis,  
Sive labori est praebendum, qua parte decori  
Danda opera, haurimus: nec non ut candida nobis  
Religio, & cultus divini Numinis insit:  
Qua sine nil horum; esse potest, nec profore quicquã.  
Quae cum sic habeant, quemnam de millibus unum  
Invenias, qui tanta, ac non contraria curet?  
Quem non praecipitem cunctarum inscitia rerum  
Sic agit, ut nusquam titubet, nulloque feratur  
Errore? at contra quis non ad parvula quaeque  
Haeret, & offendit minimis obstantia rimis?  
Quis non alterius quae sunt, iis certat abuti,  
Seu fas, sive nefas? Ergo quis honesta benignus  
Nunc opera inventus? quis inertis pectore tristem  
Segnitiam pellit? quis non vel turpia quaeque  
Et facere, & fari consuevit? denique cui non  
Vana superstitio mentem suspendit inanem?  
Quid? quod avarities, & honorum insana cupido  
Mortales adeo miseros exercet, agitque  
Per scelera, & fraudes, per vim quoque, perq; ferinos  
Et nocuos usus omnes, quo ducta furore  
Non sibi, non aliis ullo sub tempore parcit.  
O diras hominum pestes, & vulnera vitae!  
Nec me animus fallit, quam non haec posse probari  
In vulgus videantur: ita tamen ipse teneto,  
Nullam aequae ingeniis sublimibus esse fugandam  
Perniciem, quam quae misera sub pectoris ampli  
Am-



Ambitione latet, sensim namque illud edendo  
Deicit, atque animi cogit mox esse pusilli.  
Nec minus his fugiendus amor sceleratus habendi:  
Quo nil fordidius, nil & quod ad ima ruentes  
Nos adigat magis, ex altoque exturbet honesto.  
Felices nimium Mortales, cernere si se  
Interius possent! neque enim per devia quoquam  
Errarent, sed iter rectum, certosque regressus  
Instituant illuc, unde olim accedere terras  
Posse datum est illis, & eodem posse reverti  
Rursus pro meritis: ubi mens conversa superne  
Principio rerum summo, proprioque propinquans  
Insinuet prorsus solam sine corpore soli;  
Felicique illic vita, vacuaque laborum,  
Exemptaque libidinibus, curisque fruatur.  
Hic erat ille animi risus spernentis aperte  
Humana, & sese occulte tollentis in altam,  
Quam quaerit, speratque viam; qua semper anhelet  
Inventa, donec placidae per munera pacis  
Corporea exutus turbarum labe quiescat.  
Haec ego, non ut iter Bertuti notius exstet  
Id tibi cum tu eadem per te sapis omnia, sed quo  
Parvula significem vacuae conamina mentis,  
Utque mea si forte aliquid prodesse virili  
Jam valeo, tentem currenti subdere calcar.



# GABRIELIS FAERNI

## CREMONENSIS

### CARMINA.

#### OLLA AENEA ET FICTILIS.

**D**UAS trahebat amnis ollas, aeneam  
 Unam, alteram autem fictilem.  
 Sed athena, proprio praegravata pondere,  
 Sibique porro praecavens,  
 Suadere coepit antecunti fictili,  
 Conjungi uti veller sibi;  
 Quo rapidum aquarum sustinerent impetum,  
 Junctis utrimque viribus.  
 Cui fictilis; tua mihi, ait, vicinitas  
 Non admodum placet, soror:  
 Nam si ve te mihi unda, si ve me tibi  
 Prope adnatantem illiferit;  
 Ut sospitem te dura praestabit curis,  
 Fragilem meam sic conteret.

*Potentiorum semper est vicinitas  
 Vitanda tenuioribus.]*

#### JUPITER ET MINERVA.

**L**EGERE proprias Dii sibi quondam arbores,  
 Quam quisque vellet esse tutela in sua:  
 Quercum supremus Jupiter, myrtum Venus,  
 Pinum humidi tridentifer rector sali;  
 Apollo laurum, populum excelsam Hercules.

Mi-

Mirata enimvero est, Minerva, cur ita  
Infructuosas legere voluissent, quibus  
Tantum ad manum esset fructuosarum arborum.  
Cui Juppiter causam hanc roganti reddidit;  
Ne existimemur fructu honorem vendere.  
Tum Pallas: At vos facite quod vobis lubet:  
Ego, inquit, oleam fructuum causa lego.  
Exosculatus filiam tum Jupiter,  
O nata dixit, jure sapiens omnibus  
Dicere saeculis: jure tu capitis mei  
Propago. nam quod facimus, id nisi utile est,  
Stulta omnis atque inanis inde gloria est.

## ASINUS ET LUPUS.

**C**ALCATUS asino clavus, in pede haeserat:  
Quem lupo acuta fretus acie dentium,  
Medicum professus, atque pactus praemium,  
Extraxit: itaque exigere mercedem institit.  
Obversus asinus, graviter os improvidi  
Lupi, atque mediam calce frontem perculit.  
Ibi lupo: jure, inquit, hoc mihi accidit:  
Neque enim coquus qui sum, agere medicum debuî.  
*Quam quisque novit artem, in hac se exerceat.*

## CORVUS ET VULPES.

**I**NSEDIT altae corvus olim quercui,  
Rostrum rapaci casei frustum tenens:  
Quem vafra blando adgressa sic vulpes dolo est:  
Quam pulcrum avem, quam splendide cultam intuo  
Pennae decoris atque versicoloribus!  
Salve, inquit, o generosa: quod si praedita  
Cantu fuisses, summi eras aves Jovis.

His

His ille, magnae inductus in spem gloriae,  
Cantu indecoro rauca solvit guttura.

Tum versipellis decedente caeseo  
Vulpes potita, corve tu, inquit, omnia  
Habes abunde; mente duntaxat cares.

*Qui coram in os te laudat, insidias struit:  
Qui laude ficta ducitur, cor non habet.*

### CERVUS ET HINNULUS.

**C**ERVO hinnulus olim filius dixit patri;  
Et major es tu canibus & velocior,  
Et ardua alacri fronte gestas cornua;  
Cur ergo, quaeso, tam times eos pater?  
Cui cervus: haec quae de me, ait, fili refers,  
Sunt vera fateor: multa nobis contulit  
Natura, multis provida instruxit bonis:  
Sed ego latratum canis ubi primum audio;  
Tum, vi abdita quadam, in pavorem & in fugam  
Agor, inque pedibus omne praesidium est mihi.

*Timidi & fugacis ingenii qui sunt, eos  
Nulla arma, nulla texerint sat moenia.*

### CANIS, GALLUS, ET VULPES.

**C**ANIS atque gallus longum iter quondam simul  
Ingressi, opaco jam adpetente vespere,  
Nacti arborem, ubi quiescerent gallus quidem  
Fastigia alta frondeae adscendit domus:  
Canis excavatum in caudicem se condidit.  
Cum vero, ut adventante consuevit die,  
Cantum edidisset gallus, adcurrens eo  
Vulpes, eum rogabat enixissime,

De-

Descenderet suique faceret copiam ;  
 Gestire se , animal tam canorum & musicum  
 Amplecti & osculari , & os agnoscere .  
 Tum fraude gallus cognita ; cupio tibi  
 Quaecumque possum , commodare & obsequi ,  
 Et esse tecum : sed tu , ait , quaeso huc prius ,  
 Qui dormit infra , janitorem suscita ,  
 Fores mihi ut recludat , unde ad te exeam .  
 Vocante vulpe janitorem , prodiit  
 Canis , agnitamque adortus , adversariam  
 Nil tale veritam dente laniavit truci .

*Qui fraude agit , jure ipse fraude fallitur .*

## A S I N U S E T E Q U U S .

A S I N U S beatum existimaverat quondam  
 Equum , quod adfluenter hordeo pastus ,  
 Habitusque semper eleganter & laute ,  
 Cutis nitore , obesitate membrorum ,  
 Curam in se herilem , gratiamque praeferret :  
 Cum ipse interim ne vilibus quidem posset  
 Paleis famem & jejuna viscera implere ;  
 Praefercim iniqua sarcina fatigatus .  
 Sed enim coorto forte bellico motu ,  
 Cum armis opertum hero insidente vidisset  
 Equum apparari ad pugnam , & acriter saepe  
 Calcaribus vexatum in hostium turmas  
 Agi ; unde vulneratus & gravi casu  
 Collapsus , animam vix trahebat adflictam :  
 Sententiam mutavit ; & suam sortem  
 Prae ejus miseria rursus haud malam duxit .

*Periculosum divitum statum spectans ,  
 Pauperiem & arctam disce amare fortunam .*

LU-

## LUPUS ET GRUS.

**O**VEM Itipo voranti os in gula haeserat,  
 Medicum ut necesse fuerit accersit gruem.  
 Ea pacta pretium, penitus in gulam lupi  
 Collo suo immisso, os molestum sustulit.  
 De praemio adpellante tum lupum grave,  
 Abi, inquit ille, abi impudens: sat praemii est,  
 Collum e lupi quod faucibus saluum refers.

*Homines mali beneficium se existimant  
 Illis tribuere, in quos maleficio abstinant.*

## BUBULCUS ET HERCULES.

**V**IA in lutosa praegrave haeserat plaustrum  
 Mersis ad usque axem rotis.  
 Nihil hic bubulcus providere, nec sese  
 Opi ferendae accingere:  
 Tantum sedens, suamque conquerens sortem,  
 Magnum invocabat Herculem.  
 Cui nube fultus candida Deus, praesto  
 Fuit, & monere haec institit.  
 Age, inquit, & tu enitere ipse per tete,  
 Atque id, quod in te est, expedi:  
 Stimulo boves, humerisque promove plaustrum;  
 Tum demum agentem gnaviter  
 Vocatus adjuvabo, ubique caelesti  
 Humana vota prosequar.

*Vigilando, agendo, providendo quod possis,  
 Paratur e caelo favor.*

## PHILIPPI BEROALDI

## EPITAPHIUM ROBERTI

## SANCTOSEVERINATIS.

**N**IL queror o Superi lethū hoc. sic occidit Hector,  
Traiectus Pthia pectora saeva manu.  
Sic duo Scipiadae pereunt, quos hosticus ens  
In Tartessiaca dat regione neci.  
Sic & Marcellus cecidit, quem bella cientem  
Perforat hostili lancea torta manu.  
Haec sunt fata Ducum. pulcrum est cecidisse sub armis  
Mors bellatori convenit ista viro.  
Sic ego, sic cecidi, sed non inglorius. orbem  
Implet fama mei nominis, atque polum,  
Quantus erat dextra Pelides; Tullius ore;  
Phyllirides herbis; Phoebus Apollo lyra;  
Carmine Maconides; Ladas pede; lumine Lynceus;  
Viribus Alcides; religione Numa;  
Tantus ego in bello fueram. mihi tota sub armis  
Sub clypeo & galea vita peracta fuit.  
Me puerum Mavors, & me Bellona virago  
Omnia perdocuit munera militiae.  
Qualis Pellaeus ductor Libycusque fuerunt,  
Romulidaeque duces, talis & ipse fui.  
Dum vult supremo duri certamine Martis  
Sors dare me pectus, sustulit ad superos.

LUDOVICI BIGI  
PICTORII FERRARIENSIS  
CARMINA.  
AD STROZAM.

**C**UNCTA Cleoneo flagrant fidere, neque  
Urbe gravem ruris sollicitabat amor.  
Haud procul egressus Sole inclinante, sub ulmo  
Longo formicas agmine conspicio.  
E foveis pars haurit humum; pars claudit aquarum  
Ostia constructis firmiter aggeribus.  
Maltæ oris majora trahunt se forcipe grana;  
Aversæ multæ posteriore pede.  
Pars humeris molitur opus; pars educat aegras:  
Pars effert celebri corpora functa rogo.  
Pars hiemis memor instantis, ne rursus in herbam  
Humida succrescant semina, dente premit.  
Quodque magis mirum est; inter tot millia nunquam  
Impedit egrediens introeuntis iter:  
Quin potius, si quam videat sub pondere victam,  
Erigit elapsam, saepeque fasce levat.  
Cetera quid memorem? quæ concursatio? quanta  
Sedulitas? studium quale? quis ordo foret?  
Sic mecum: mene è somno miserabilis unquam  
Eruero? nunquam cura salutis erit?  
Tantillæ ut servant animantes frigore vitam,  
Unanimes agitat quam gravis ecce labor!  
Ast ego divinæ munitus acumine mentis  
Nesciero vitæ consuluisse meæ?  
Et, quod agunt pleriq; hominū, magis æquora & urbes  
Circuero, ut grandes accumulentur opes?

Aut



Aut ego maluero scrutari pectore, quantum  
 Distet ab humenti stellifer axis humo?  
 Undeque sanguineo minitetur crine cometes,  
 Unde pluant lapides, contremat unde solum?  
 Quid glomeret nubes? qua vi solvantur in imbres?  
 Cur medio lateant astra minora die?  
 Et quibus erumpant agitata tonitrua ventis?  
 Cur vaga transverso fulmina calle ruant?  
 Inque cavis voces quae caussa reciprocet antris?  
 Quid sit fulgetrum, grando, pruina, nives?  
 Qua virtute levet cautes Magnesia ferrum?  
 Extinguat tactas qua Salamandra faces?  
 Cur fluat & refluat, cur nunc sublime feratur,  
 Nunc humile, & falsa cur eat aequor aqua?  
 An queat Aeaea confurgere mortuus, arte?  
 An queat in terras carmine Luna trahi?  
 Cur alio lignum mergatur in amne, natentque  
 Aera alio? atque aliis sit calor intus aquis?  
 Scilicet his opus est venturae ad praemia vitae:  
 Scilicet ad superas hinc datur ire plagas.  
 Divitiae nec enim, nec multa peritia rerum;  
 Sed nos felices mens sine labe facit.  
 Ergo boni velut agricolae mala germina carpunt,  
 Plus ferat ut culmo liberiore seges:  
 Digna ita vindicibus ne nostra sit ignibus arbor,  
 Stroza, procuremus vellere; quicquid obest:  
 Ut cum vita breves toleraverit ista labores,  
 Aeterna requie detur utrisque frui.

## A D P I C U M .

**F**IRMIUS amor, studiosa fides nil ferre recusat:  
 Bigulus ecce tuus, Pice, vocatus adest.  
*Pars II.* N Non

Non hunc asperitas, non hunc ignota viarum  
 Semita, non patrii detinuere Lares.  
 Nec mirum. mens hujus enim sub pectore semper  
 Tecum habitat: corpus, quo lubet, illa trahit.

## AD PAMPHILUM. AMICITIA.

**S**I me per terras, si jusseris ire per aequor:  
 Scrutabor terras sedulus & maria.  
 Nullaque me poterunt loca detertere ferarum,  
 Nec furor undosi turbidus Oceani.  
 Contemnam glaciem, ignitosque Hyperionis aestus;  
 Contemnam ventos, faxa, nives, pluvias.  
 Forte loqui videor nimium ardua Pamphile? nullum  
 Difficile est verae pondus amicitiae.

## JOANNISTONSI

## AD VESPASIANUM GONZAGAM

## IN OBITU ANNAE UXORIS.

**D**UM Belga vires horret Ibericas,  
 Illata nondum signaque finibus  
 Formidat, & nomen Philippi  
 Jam positis veneratur armis:  
 Quae cura mentem nobilior tuam  
 Exercet? an tu quo superes modo  
 Vim barbaram, evitesque fraudes  
 Consilio meditaris alto?  
 Tu vero avitis quae imperiis tenes  
 Longeque lateque oppida, moenibus  
 Intentus es munire, firmam

Ut

Ut statuas populis quietem?  
 Quodcunque tractas, non nisi maximum  
 Dignumque virtute esse potest tua,  
 Quam luce pura clariorem,  
 Exitus efficiet secundus.  
 At me immerentem destituit levis,  
 Fortuna, postquam principio satis  
 Afflarat, & caelum fugatis  
 Reddiderat nebulis serenum.  
 Majori ut essem ludibrio, mea  
 Cum portu in ipso fluctibus obruta  
 Et littori collisa, saevo  
 Naufragio periit carina.  
 Nam non avaram quae dederat manum  
 Praeceptis in auras sustulit omnia,  
 Et terga vertit, se citato  
 Proripiens inimica gressu.  
 Infesta multis illa quidem, sacris  
 Infestior sed vatibus: optimum  
 Nam Julianum inclusit atro  
 Carcere delicias sororum,  
 Phoebique amores: hunc decuit gravi  
 Cura solutum fundere naenias,  
 Et conjugis deflare moesto  
 Fata tuae miseranda cantu.  
 Ah prima & ah vix exorientia  
 Felicitatis gaudia maxima!  
 Tecum fruentem falce pressit  
 Protinus invida mors rapaci.  
 Non illa dulcis mollia filiis  
 Adulta vidit membra, nec audiit  
 Jam lacte depulsum, tenello  
 Ore leves iterare nugas.

# POMPEII UGONII

## C A R M I N A.

### DE MARCI ANTONII COLUMNAE

#### IN URBEM INGRESSU.

**J**AM mihi praeteritos videor revolutus ad annos :  
 Et vitam antiquis ducere Consulibus.  
 Omnia tunc Latias metuebant Regna secures,  
 Litore ab Eoo litus ad Hesperium.  
 Aureaque immoto stabant Capitolia faxo :  
 O quae tunc species, qui decor urbis erat ?  
 Quippe novis semper gaudebat Roma triumphis,  
 Intexens ducibus laurea ferta suis.  
 Captivosque trahi Reges sub vincla videbat,  
 Per medium populi suspicientis iter.  
 Cernere erat raptis confertas arcubus hastas,  
 Et nitidis vestas curribus exuvias,  
 Qualia nunc multo vidit post tempore Roma,  
 Mox etiam in priscum restituenda decus.  
 Ludicra non ficti sunt haec simulacra triumphi,  
 Nec volucris casus gaudia tanta facit.  
 Nec retro aetherium Majae pater impulit axem ;  
 Ut quae olim fuerant, nunc quoque signa micent.  
 Gratia Marce tibi, quod se nunc aurea compsit,  
 Quodque ipsi facta est aemula Roma sibi.  
 Tela, manusque tuas silvis redimita Zacynthus  
 Sensit, & Jonii caerula turba freti.  
 Gurgite sub falso pisces fugere : repente

Implicitos Nymphae dissoluere choros.  
**A**t scelerata acies ferro demissa sub Orcum,  
 Purpureas tetro sanguine fecit aquas.  
**T**e modo defunctum navalis munere belli,  
 Victorem revelhit splendida palma domum.  
**A**dspice tam varia cives in veste decoros,  
 Et celsa in plausus testâ referta tuos,  
 Romanasque nurus stratis inhiare fenestris;  
 Et plenas pompa praetereunte vias.  
**S**entin', quo strepitu resonent turrata Deorum  
 Culmina? & excussae sulfuris igne pilae?  
**E**t bijuges thedas ultro citroque volantes?  
 Haereat utque oculis pendula turba tuis?  
**V**ive diu, patriamque novis invise triumphis  
 Gloria Tarpeii magne *Columna* jugi.  
**H**oc mihi sit curae noctesque diesque precari,  
 Seu via te terrae, seu vaga ducet aqua.

## I N T U R C A S.

**Q**UID jam, quid, Scythia, proderit  
 Crudelis, toties, ut dominam aequoris  
 Servili premere jugo,  
 Illevisse nigro spicula toxico?  
**Q**uid dura pice nauticas  
 Adstrinxisse trabes, velaque turgida  
 Solvisse Jonio mari?  
 Frustra jam Lelegas, & Nomadum genus,  
 Et turmas equitum Africae,  
 Frustra Massagetas, regnaque Caspia  
 Accerfes. miser o miser  
 Ictum non ne vides foedos in imperi  
 Summam perniciem tui?

Sentin' caeruleis ut fremit Hadria  
 Imo e gurgite fluctibus?  
 Non flavum Tiberim respicis, & Tagum?  
 O quantus ducibus tuis  
 Sudor, quantus equis instat anhelitus!  
 Quantus remigibus labor!  
 En nos: rumpe moras. exeat, exeat  
 Irrausa ratis alite.

Contra magnanimae robur Iberiae,  
 Contra nobilis Hadriae  
 Florem quid poterit? quid? si Italam manum  
 Agmen Marce per hosticum  
 Mittas? quid, si etiam Romulidas tuos?  
 Vertet Barbarus illico  
 Fracto terga'genu: te revehet domum  
 Curru gloria Martio  
 Ornatum foliis tempora Delphicis.

## BASILII ZANCHII

### HYMNUS PACIS AETERNAE.

O Quae Caelicolum sedes, quae lucida templa  
 Prima tenes, prima ante omnes fulgentia cernis  
 Ora Dei, totoque nites pulcerrima caelo,  
 Huc aditum, Pax alma, feras pede diva secundo;  
 Et tecum terras non dedignata labantes,  
 Devolet auratis splendens Concordia pennis,  
 Unaninis soror, & mistum cratera recenti  
 Nectare, & aeternum secum ferat aurea cornu  
 Puniceis plenum pomis & divite silva.  
 Te duce larga Ceres flaventibus adspicit arvis  
 Agricolas; vestitque suo jam palmita colles

Liber, & evinctae texunt umbracula vites,  
Vinitor & mites decerpit collibus uvas;  
Et foetus Pomona novos foecunda ministrat,  
Adventuque tuo laetanti daedala tellus  
E gremio jam fundit opes; jam caerula Tethys  
Mittit inexhaustas utroque a littore merces.  
Ingenuae florent artes, atque otia dia.  
Et divina pii meditantur carmina vates.  
Te Pietas, te cana Fides, Aestraeque virgo,  
Quacunque ingrederis, dominam comitantur euntē.  
Te regnante, novi quondam sub origine mundi,  
Et felix aetas, & libera saecula fuere.  
Largius & plenae spumarunt nectaris urnae.  
Ergo agedum o sincera quies, & casta voluptas,  
Praepectibus pennis, varioque insignis amictu,  
Labere Diva polo, mentique illabere nostrae:  
Qualis, ubi Eoo revocavit saecula busto,  
Laetus ad Aethiopas remeat, terrasque beatus  
Adspiciens laeto Phoenix clangore salutat.  
Infantes populi visa procul alite currunt,  
Allapsamque polo excipiunt, gaudentque tuentes,  
Ut quondam reduci laetantur vere volucres.  
Jam placidis Tiberinus ovans tibi surgit ab undis,  
Rorantes viridi praecinctus arundine crines;  
Urna humero in laevam, dextro subnixa fluentum  
Versa vomit, repletque undis spumantibus alveum,  
Hinc Anio, liquidisque fluens discursibus Almo,  
Et circum longo Laurentes agmine Nymphae  
Advexere tibi gemmantes littoris algas;  
Et quae rore graves Indae dant pignora conchae,  
Oceanique ad vada advexit Oreas.  
Te Romana nurus, teque inclita turba Quiritum,  
Implorat, serptoque comas viridantis oliuae,

Et

Et lauro, plexisque rosis tibi laeta coronat,  
Et Capitolinis visendam sedibus olim  
Marmoream parat effigiem; cui thurea dona  
Incendat, patrioque ferat solennia ritu,  
Sollennesque aras votivaque sacra frequenter;  
Teque tuumque canat ventura in saecula nomen.  
Tu tantum Ausoniam Romanaque moenia felix  
Invisas; Latiisque volens Victoria castris  
Advolet, & virides substernat Gloria lauros.  
Jam tandem imperii sedes Regina triumphis  
Quacunq; auricomū Phoebus jubar aethere pandit,  
Quacunq; Hesperio tellus protenditur axe,  
Qua calet, & glacie argenti riget obsitus orbis,  
Attollat caput, & priscis decora alta trophaeis  
Adiciat, nec dura pati pro laude recuset.  
Jam tandem dominā agnoscant Hebrusq; Tagusque,  
Sentiat & tumidi jam mollior accola Rheni,  
Et septem geminis responset collibus Echo,  
Victor, io, Romanus, io, nova signa reportat;  
Praecedantque duces onerati colla catenis.  
Sub te ferratos belli Concordia postes  
Effringet, caput infandum furialis Enyo  
Tartareis condet tenebris & nocte profunda.  
Ipsa sinu scissaque gemens Discordia palla  
Cocyti stagna alta petet; violentaque Bella  
Involverque chao atque Erebi pallentibus umbris;  
Et tandem fumante vado Phlegethontis avari  
Immerget pater omnipotens; qui sanguine gnati  
Unigenae Pacem terris caeloque reduxit.



J. O. A N T O N I I  
T A Y G E T I  
B R I X I A N I  
C A R M I N A.

ECLOGA NAUTICA: IDMON. SEU  
CHRISTIANORUM ET TURCARUM  
NAVALE CERTAMEN.

E U R I D A M A S. I D M O N.

**D**Ic age, Pieridū princeps, dic maxime Apollo,  
Proelia caeruleas Neptuni gesta per undas,  
Dū stimulis acti Eumenidū gens effera Thraces,  
Christicolumque acris pugnat manus. o bona Musae  
Progenies, primis colui quas semper ab annis,  
Ecquae erit e vobis, quae me graviora canentem  
Laurigeras inter silvas, Heliconis ad undas  
Sistat, & optata cingat mihi tempora fronde?  
At tu, quem dulces venientem in luminis oras  
Astraea, Autumni portas, chelasque relinquens,  
Ipsa suas docuit leges, cuique innuba Pallas  
Diversos caeli motus stellasque micantes,  
Et dedit occultas rerum cognoscere causas,  
Maeste tuis, Federice, actis, & sanguine avito,  
Huc ades, & nostris faveas precor optime votis.  
Non injusta peto; tu nam persaepe recessus  
Aonios lustras; & dum felicia condis,  
Ipse tua intentus miratur carmina Phoebus.

Gno.

Gnosius Euridamas, quo non praestantior alter  
Per vada falsa citam remis impellere puppin,  
Et regere; & soles tempestatetque futuras  
Praecinere, & variae faciem cognoscere Lunae,  
Instantes cupiens solers vitare procellas,  
In loca tuta ratem impulerat, portumque tenebat,  
Qua formosa situ, gemina formosior arce  
Corcyra, aequoreas late prospectat in undas;  
Dumque hic Fortunae ereptus, non horret aquarū  
Agmina; vicino venientem in litore vidit  
Idmona, remigio doctum, puppisque magistrum,  
Talibus atque illum compellat vocibus ultro.

*Eur.* Fallor? an ista mihi quae nunc occurrit imago.  
Est umbra? an potius, quod mallet, est Cyprius  
Idmon?

Idmon es, o dulci sospes quod vesceris aura,  
Quam laetor dilecte mihi! longaevus Amilcon  
Dixerat obsessae tendentem ad moenia Cypri,  
Atque arma, atque epulas, & Bacchi dona ferentem;  
Effugere armatas classes; atque agmina Thracum  
Non potuisse, imis quin te vel mergeret undis  
Dira manus nimium, vel adacto in pectora ferro  
Heu miserum, aeternis noctis demitteret umbris;  
Sed te, quae tantis Idmon fortuna periclis  
Eripuit? nostris & quis te reddidit oris?

*Idm.* Euridama, ut senior multis narravit Amilcon,  
Milite cum patriis cuperem succurrere terris,  
Et Cererem obsessis vectarem, & vina carinis  
Ismariis ego praeda fui; sed compede victus,  
Et iustus validos manibus propellere remos,  
Verbera & assiduae sensi fera vincla catenae,  
Optatam donec fesso Deus ipse salutem  
Attulit, & celfo in fontem miseratus Olympo est;  
Nam

Nam dum Threiciam telis & remige classem  
 Et ducibus penitus spoliat, primosque trucidat  
 Christicolum delecta cohors; mihi pristina tandem  
 Reddita libertas, spoliisque oneratus, & auro  
 En adsum, non umbra quidem, sed Cyprius Idmon.

*Eur.* Tune igitur praesens tanti certamina belli  
 Horrida vidisti, Ductorum & funera noscis?  
 Haec nobis avidis dum singula quaerimus, ante  
 Fama loquax obscura tamen, narrare solebat,  
 Non veris vera involvens; Tu protinus ista  
 Dic quaeso dilecte Idmon; pendebimus omnes  
 Ore tuo; en jam te nautarum turba coronat.

*Idm.* His oculis, his inquam oculis haec praelia vidi;  
 Dicam igitur, magna est etiam meminisse voluptas.  
 Threicius, miserae post diruta moenia Cypri,  
 Ereptis laetus spoliis, regnoque, Tyrannus,  
 Jam tercentenis fulcabat puppibus aequor,  
 Scilicet ut pelago, Venetoque Leone subacto,  
 Et frena, & magno leges imponeret orbi;  
 Demens, qui tantis contraria Numina votis,  
 Nec vidit capiti ultrices instare sorores;  
 Acer Halys, crudelis Halys, quem patre Doriclo  
 Conceptum, furti gelidas ad Strymonis undas  
 Edidit Alcimede, primis assuetus ab annis  
 Ferre arma, & celerem cornu torquere sagittam,  
 Atque pedum cursu ventos superare; & in orbem  
 Vertere cornipedem rapidum, cursuque citato  
 Comminus adversos hastas effrangere in hostes;  
 Frigora tum, solesque pati, Boreaque furente,  
 Huc illuc vastum ratibus lustrare profundum,  
 Primus erat classis ductor; quem proximus, armis  
 Consilioque valens sequitur Portunus; & audax  
 Sirrochus medias remis transire procellas;

Nec

Nec non & Libyae folio sceproque potitus  
Ruzzalis, Occhialiden populi cognomine dicunt.  
Ergo ubi fama Pii Pastoris nuntia ductu,  
Hispanas properare manus; Latiasque cohortes,  
Et cecinit lati magnas per marmora ponti  
Adventare rates, ultro quae bella laceffant  
Horrida, & Ismarias valeant excindere gentes;  
Armorum, classisque novae numerique potentis  
Non bene certus Halys, varias sub pectore curas  
Volvebat; tandemque animos sententia sedit,  
Certior armatos illi dum nuntius hostes  
Narraret, classemque mari decedere aperto,  
Naupactique sinus tutos, portumque tenere.  
Et jam Cimmeriis properans nox humida ab antris,  
Duxerat obscuras mundum complexa tenebras,  
Solaque candentes nobis Latonia vultus  
Ostendens, tremula vestibat caerulea luce;  
Cum solitus praedas vestare, & vivere raptis  
Carcozza, humentis per amica silentia noctis  
Mittitur, exploret nostrae qui robora gentis,  
Telaque & excubias classis, numerumque reportet.  
Nec longum in medio tempus, cum nare per aequor  
Christicolum pictas cernit Carcozza carinas:  
Dumque acie cunctas numerare & cernere acuta  
Nititur, eripiens misero mentemque aciemque  
Ipse Deus, nigra velavit lumina vitta.  
Nam classis numerosa, potens, magnumque futura  
Thracibus exitium, segnis, nec idonea bello,  
Nec posse Ismariae visa est concurrere classi.  
Vix Aurora polum roseo patefecerat ortu  
Lurea; cum fati ignarus, sortisque futurae,  
Ecce hilaris Carcozza redit, mox talia fatur;  
Christicolae pereant omnes: Victoria nostras

Laeta

Laeta super volitat puppes, optataque nobis  
 Jampridem, felix tandem fors obrulit ultro;  
 Hesperias nuper, lustro dum cuncta, triremes  
 Perspexi numero exiguas atque artis egentes,  
 Militis armorum atque ducum. qui bella moramur?  
 Linqute ductores portus, & aperta petamus.  
 Talia dum memorat, subito per inania magnus  
 Auditur multo mixtus stridore volatus;  
 Dumque oculos Thraces mirati ad fidera torquent,  
 Acriter ecce vident, multo cum vulture, magnum  
 Pugnantem Jovis armigerum: atque hostilia aduncis  
 Unguibus, & saevo rapientem viscera rostro;  
 Sanguinis unde ingens supra caput affluit imber,  
 Turbati stupuere omnes, quidque omina poscant,  
 Quidve ferant, tremula perquirunt voce. Ducumq;  
 Primus Halys dubias mentes & pectora firmat.  
 Auspicia e caelo nobis patefacta sereno  
 Christicolas horrenda petunt: gaudete potentis  
 Strymonii regis proceres; & bella parate;  
 Nam qui nos avium tinxit cruor, omnia nobis  
 Dat certa, Hesperio fluxurum sanguine pontum,  
 Dum nostrum illorum referabit pectora ferrum.  
 Sic fatus, socios ad pugnam hortatur ovides,  
 Et portum linquens, latum migravit in aequor.  
 Ipse audax primas acies Carcozza regebat;  
 Sirrochus dextras agit, Occhialidesque sinistras;  
 Piratum scelerata cohors postrema coerces.  
 Hos inter, spes magna suis Portunus, & ingens  
 Ibat Halys mediiq; ambo, media agmina ducunt.  
 Interea justus succensus Martis amore  
 Magnus Joannes, Augusti invicta propago,  
 Hesperiae cladis, & sparsi sanguinis ultor,  
 Ad bella hortatus socios, Superosque precatus,  
Agmen

Agmen agens aderat magnum; classemque pararat  
Quae posset densas Turcarum evertere turmas;  
Cui comes it Venetum spes magna Venerius heros,  
Et Latiae columen gentis lumenque Columna  
Magnus; & Urfini gemini duo fulmina Martis,  
Corneaeque Aescanius Ductor clarissimus armis;  
Atque simul medias ducunt miro ordine puppes.  
At Ligurum decus egregium Diis aemula pro es;  
Bella fremit forti praecinctus milite, Princeps  
Aurius, & dextrum ducit latus; inde sinistrum  
Barbadius agit fortis, cui cruda senectus  
Non minuit validae vires animumque juventae;  
Alvarus & rigidi priscus Mavortis alumnus  
Posteriora tenet, magnae anteriora triremes.  
Ut primum mira tot ductas arte carinas,  
Tot signa, & procures tantos, tot lintea vidit,  
Maestus Halys, multa pressus formidine pectus  
Obstupuit, siccisque diu vox faucibus haesit;  
Jam quid agat, nescit, placidos nunc denique vellet  
Naupaëti tenuisse sinus; tamen ipse timorem  
Diffimulat classemque truces convertit in hostes.  
Nec mora, Christicolae occurrunt; castusq; sacerdos  
Ostendens vexilla crucis sublimia, Turcas  
Territat, & magna clamans sic voce profatur.  
Aeternum celfo suspensus stipite Christus,  
Aeternum vivat, vivant quicunque sequuntur  
Dilectae vexilla Crucis; mittantur ad umbras  
Tartareas, Erebiq; domos, gens perfida Thraces.  
Sic erit: ecce tonat laevum Deus, ipsaque nobis  
Carbasa felici complet turgentia vento.  
Ergo utrinque pari concurrunt impete classes;  
Fit fragor, & clamore virum, clangore tubarum  
Aequora lata sonant magno, caelumque remugit;  
Aer-

Aerque & stridis collucent ensibus undae .  
Majores aliis Venetum , armataeque triremes  
Et sponte ante alias prima in certamina missae .  
Saepius aeratas valido conamine glandes  
Sulphureo jaciunt igni , quo murmure magnos  
Aequoreis credas scopulis concurrere montes .  
Tunc igitur laceraeque rates , caesaeque cohortes  
Turcarum ; falsis late labuntur in undis .  
Cum tot pestiferas caedes , tot damna fuorum  
Respiciens furibundus Halys , jubet ocyus omnes  
Ictibus ignitis auferri & credere puppes ;  
Sed nec jussa valent : densae nam grandinis instar  
Ferreus pila ruit , Geticas quae densa triremes  
Quo secumq ; ferant , lacerat , sternitque , premitque .  
Sic igitur coecas Orci demissus ad umbras  
Thrax perit , & subito lunatum solvitur agmen .  
Instaurant acies , adduntque minantia verba  
Pro se quisque Duces Getici , pugnamque capeffunt .  
Atque hic tormentis jaculisque & milite septus  
Sirrochus medias acies circundare tentat  
Christicolum , ancipiti qui tunc certamine nixi  
Comminus Ismarias contra pugnare catervas .  
Non tulit hoc solers , & nostrae causa salutis  
Magna , sed adversum tunc Barbadicus in hostem  
Agmen agit propere adveniens ; atque impedit orsa ,  
Nec cessat , donec telis , atque igne voraci ,  
Et glande , hostiles , capto Ductore , carinas  
Perdat , & innumeros mittat sub tartara Thracas .  
At Carcozza manu fidens levibusque sagittis ,  
Sirrocho amisso manet imperterritus atque  
Saevit , & Aufonium pharetram consumit in agmen ;  
Sternit Atyn , sternit Lalagem , sternitque Theronē ,  
Et Fabarim , & puerū Lausum , & spē patris Abantē  
Ha-

Hadriaci ; invito is genitore ad bella profectus ,  
Unica progenies , matris pulcherrima cura ,  
Aeternum miseros liquit sine prole parentes .  
Additur his juvenis Superantius ; hic prius acrem  
Senferat emissam corpus strinxisse sagittam ;  
Ergo dum manibus vulnus bis terque retractat ,  
Ecce illi Ismarium penitus cava tempora telum  
Traicit : ille dolens crudeli vulnere , letho  
Volvitur & Venetas moriens reminiscitur oras .  
Talla per nostram geminat dum funera classem  
Carcozza ; assuetus prima tormenta juvena  
Tractare , & celetes ex illis mittere glandes ;  
Cenomanum genus , illorum quos Tropica vallis  
Educat . hunc torvo jamdudum lumine Pentheus  
Adspicit , & motus gressusque observat ovantis ,  
Si quando valeat tantos abolere furores ,  
Classibus & veterem Latiis arcere ruinam .  
Vix apicem puppi extulerat , cum protinus illi  
Glans violenta cavo contorta ut fulmen ab aere  
Transadigit galeam , cerebrique in ventribus haesit .  
Interea mediis utrinque in classibus ardens  
Saevit Bellona , & resonat clamoribus aether .  
Nam cupiens Thracum miseras ulciscierum bras ,  
Et Regni magno sese jactare triumpho ,  
Clamat Halys : saevumque gemens , & fervidus ira ,  
Ipse suam furibundus ad horrida bella triremem  
Ducit , & instat agens nec mente minora volutat  
Augusti proles celeri sed puppe propinquat ;  
Utraque innectunt donec retinacula puppes  
Mutuo & alternis in pugnam viribus itur .  
Et sonus hic ingens , hic pugna asperissima surgit ,  
Quanta nec ipsa unquam vidit longaeva vetustas ,  
Nec nostra inspexit , nec cernet serior aetas .

*Paras II.*

O

Threicii



Threicii jaculis, & curvo fortiter ense,  
Glandibus Hispani, & rutilis mucronibus instant,  
Pix, & flamma manu ferrumque, & saxa, fudesque  
Sparguntur, coeunt mixti, pereuntque vicissim  
Hispani, Thracesque simul, mixtique Latini,  
Et pede pes, manibusque manus miscentur; euntque  
Quo vel pugna magis faevit, vel densius agmen.  
Hic videas passim remos, & trunca natare  
Corpora, & hinc illinc magnas ardere triremes,  
Sanguineisque ingens confurgere fluctibus aequor.  
Ipse suas medius lorica & casside fulgens  
Austriades, tali compellat voce cohortes;  
O pubes lecta, o magni genitoris alumni,  
O fortes pugnare viri, nunc denique tempus  
Eoas Christi vexilla extendere in oras.  
Sic fatus, magnum confestim fervidus ensē  
Vibrat utraque manu, & medios prorumpit in hostes.  
Quem primū, quem postremum; fortissime Princeps  
Sternis? & aequoreis miseros quot mergis in undis?  
Ipse tibi ante pedes ingentem stragis acervum  
Constituis te saevus Halys te Thracia classis  
Horret, & adversum, dum das tot corpora letho  
Advenisse putant Haemi de culmine Martem.  
Quae dum Threicius miratur funera Ductor,  
Nec videt Hispano jam posse ob stare furori,  
Seque suamque ratem, innumeras resonante carinas  
Voce vocat; vocat & Geticas clamore phalanges  
Ingenti, atque ducum tot millia cogit in unum.  
Scilicet ut laetam successu & Marte secundo,  
Hispanam expugnet geminato robore puppim.  
Primus, ut insidias solers cognoverat; ergo  
Nos erimus segnes ad bella? Venerius inquit;  
Et simul in Geticum jam puppes verterat agmen;  
Hunc

Hunc super accurrere equites, equitumque magister,  
Quos Melite insignis misit, venitque Columna  
Intrepidus magnae nitidissima gloria Romae,  
Corneaque, & ferro Urfini facibusque corusci.  
Non mihi centenas tribuant si numina linguas,  
Oraque Nestoreo sint nostra imbuta lepore,  
Tot pugnas, saevasque neces, tot vulnera possim.  
Dicere, tot valeam laceras numerare triremes.  
Viderat Ismarium de puppe Venerius Acin,  
Qui doctis carus Musis, falsique sacerdos  
Maumethis, magna Maumethen voce vocabat.  
Protinus ecce senex ardentem lampada torquet  
Incauti in faciem, illius diadema reluxit  
Linigerum; accurrunt focii, properantque voracem  
Undanti lymphæ, manibusque extinguere pestem,  
Non tamen haec profunt, miseri qui flamma rubentem  
Consumat vultum, & totos descendat in artus.  
Inde alias, aliasque faces jacet impiger: illae  
Consumunt tabulas; ratibusque hostilibus haerent.  
Dumque viri trepidant intus, Vulcaniaque omnes  
Militiae obliti certatim incendia vitant,  
Cum ratibus mediis subito exponuntur in undis;  
Extemplo his actis, aeratam corripit hastam,  
Datque neci hostiles turmas agitatque cadentes  
Per mare, & ingenti redeuntes cuspidē pellit.  
Parte alia clypeo fulgens atque ense Columna,  
Magnanimusque Urfinus adest, Thracique vicissim  
Innumera aeterno demittunt corpora somno.  
Portunique ratem, Getico qui milite, nuper  
Sperabat magnae properare ad moenia Romae.  
Cum domibusque Dei sacrata evertere templa,  
Invadunt; ille Ausoniae tot robora gentis  
Adspiciens, pugnae inceptae, oblitusque pudoris,  
Q 2 Dat

Dat terga, atque suam Ducibus dat habere carinans;  
Et jam Baeticolum valida comitante caterva  
Aufriades, Thracum primos, primamque triremem  
Atque ipsum superarat Halyn: furit impete vasto  
Hispanum generosa cohors; lacerantque, cremantq;  
Undique, & hostilis spoliatur remige puppis.  
Cum fractos cernens socios, ereptaque signa  
Moestus Halys, manibus fulgentia proiicit arma,  
Et tali Aufriadem compellat voce ruentem.  
Per fortunatas invicti Caesaris umbras,  
Per te, per magni felicia fata Philippi,  
Me saltem aetherea captivum vespier aura  
Magne sine: ingentes fulcant mihi caerula pappes,  
Est Thracum mihi magna phalanx, sunt divitis auri  
Pondera: tu spoliis tantis praedaque potitus  
Omnia solus habe. Aufriades cui talia reddit:  
Non auri me sacra fames, non denique praeda  
Impulit, ut Geticas delerem Marte catervas,  
Sed Christi me vera fides, quam perfide tantum  
Persequeris; morere infelix; & talia fatus,  
Cum galea infidum valido caput amputat ictu,  
Illud & arrecta gestandum fixit in hasta.  
Atque ea dum nostris felici Marte geruntur,  
Marte potens, pelago assuetus patiensque laborum  
Occhialides, flammis, ferroque, & glande ruenti  
Ausonidum armatas penitus, lectasque triremes  
Straverat, atque viros lucis spoliaverat aura;  
Et Liguris nisi dextra Ducis praeclaraque virtus  
Obstasset fortique viro, atque immania coepta  
Turbasset; nunc laeta minus, nobisque profecto  
Effet cum multo Victoria parta cruore.  
Hostibus ille igitur caedes ac damna rependit  
Glandibus, igne, manu, saxis, ferroque rigenti;

Occhialidisque ratem saltu petit, atque trucidat;  
Turcarum proceres multos, & turbinis instar  
Fulmineus, gladio nunc hos, nunc excipit illos;  
Atque metu trepido multos petere aequoris undas  
Cogit, & infirmis pontum tranare lacertis.  
Cum tandem Thracum media inter funera vidit  
Occhialides ardens, illumque affarier orsus.  
Non Ligurum calcas puppes, non Itala cernis  
Agmina, sed medium cingunt hostilia tela,  
Hostilesque Duces; ergo spolia ista relinques  
Atque animam, & nostris moriens addere triumphis.  
Dixerat, & celerem magno stridore sagittam,  
Curvato cornu subito contorquet; at aurae  
Excipiunt vulnus, ductor nulla Aurius olivæ  
Dicta refert; magnis sed vibrans protinus ensem  
Viribus adversum properat furibundus in hostem.  
Extemplo gladium praeceps fugit ille cruentum;  
Inque aliam ex alia sese jacet ipse triremem;  
Hortaturque suos; validos impellite remos  
O focii, properate fugam mihi terga flagello  
Mars quatit & nostris jam non favet amplius actis.  
Talia cui Ligurum Ductor responsa remittit.  
Quo fugis Occhialides? meritum ne linque triumphū,  
En adsum, spolia ista habeas nihil ille sed aequor  
Verrit, & abscuras quaeritque, optatque latebras;  
Et fugiens socios duro in certamine linquit,  
Et miseras audit voces, gemitusque cadentum.  
Sic Thracum classe absunta Ducibusque fugatis,  
Et caesis, nostris favit Victoria votis.  
Ductores spoliis, & praeda divite laeti  
Hesperii, multis complent clamoribus auras  
Certatim, & caris dum multum amplexibus haeret.  
Laetitiae dant signa novae, & dum singula lustrant,

Armaque, flexibilesque arcus, pictasque pharetras,  
 Tormenta, ereptas puppes, ereptaque signa,  
 Seminecesque Duces; & dum quamplurima Thracū  
 Corpora caesa vident, & millia captivorum  
 Innumera; expleri nequeunt, gratesque Tonanti  
 Et Superis reddunt, onerantque altaria donis.  
 At nobis, qui Turcarum fera vincula passi,  
 Christicolis, veteres solvunt, adimuntque catenas,  
 Quid dicam Euridama? cunctis quamplurima pectus  
 Gaudia pertentant, atque haec majora fuissent;  
 Ni Barbadicus longo descendus in aevo  
 Turbasset laetas inopino funere mentes.  
 Ille etenim hostiles superat dum Marte triremes,  
 Threicio periit lumen confossus ab arcu.  
 O decus eximium Patriae, lumenque tuorum,  
 Marte senex celebrer, celebrer praestantibus actis;  
 En te pro meritis alti plaga lucida caeli  
 Suscipit & variis cingunt tibi tempora fertis  
 Aetherei proceres. en nos lacrimas, gemitusque  
 Fundimus, atque tuo geminamus dona sepulcro.  
 Tempus & illud erit, Pario cum marmore, & auro  
 Excelsum simulacrum ingens, patria optima ponat,  
 Teque sui & Latii libertatisque parentem,  
 Dicat, & aeternis mandet tua nomina chartis.  
*Eurid.* Sic Thracū infaustas Idmon carissime pugnas,  
 Sic & Christicolum narras felicia facta;  
 Noctibus ut tecum totis, tecumque diebus  
 Esse velim, & tantos persaepe audire labores.  
 Sed vos o socii, postquam Deus ipse ferocem  
 Contudit, & nostris pepulit de finibus hostem;  
 Adfatis precor unanimes, & templa petamus,  
 Votaque thuricremas illi solvamus ad aras.

EJUS-

## EJUSDEM ELOGIUM.

**I**NTERMISSA diu curis, trepidoque pavore,  
Dum timet Iſmarias Itala terra manus;  
Hue ades, aspi raque mihi, Paeanaque laetum,  
Atque novum carmen nunc mea Musa cane:  
Sed ridens hilarisque veni: nunc indue pallam  
Candentem; auratam nunc age fume lyram.  
Vos quoque qui celso suspensum in stipite Regem,  
Atque unum colitis tergeminumque Deum,  
Ecquis erit sacras qui non procumbat ad aras,  
Ingerat & sacris thura cre manda focis?  
Spargite odoratos flores, atque urite messes,  
Quas Arabum e terra divite nauta vehit:  
Atque viri, atque senes, pueri, innuptaeque puellae,  
Fundite cum multa munera casta prece.  
Ille ferox, Getici nuper spes magna Tyranni,  
Ausoniae populis qui modo terror erat,  
Qui modo felices populatus moenia Cypri,  
Et rura, atque urbes divitis Illyriae,  
Exsul, inops, classe amissa, & rerum omnium egenus,  
En periit telis Barbarus, Hesperiiis.  
Captivos viditque suos, capti vaque tela;  
Suspensa & sacris parta trophaea tholis.  
Vos quorum nobis Victoria parta cruore est,  
Et simul est longo tempore parta quies:  
Seu vestra in gremio tellus complectitur ossa,  
Seu tumuli vice vos aequora lata tegunt;  
Panchaeos vobis tellus submittat odores,  
Floribus & semper pullulet urna novis:  
Et magni Nymphae proles pulcherrima Nerei  
Excipiant placido molliter ossa sinu.

Nos vacuum vobis tumulum, exequiasque paramus,  
Manibus & gratas solvimus inferias.  
Cernitis illustres animae solennia dona?  
Auditis querulis verba iterata modis?  
En vobis castus geminat pia verba Sacerdos,  
Spargit aquam, & tumulo thura Sabaea cremat:  
Eccerogat requiem: Manes salvere beati,  
Salve o Pieriis turba canenda choris.  
Vobis pro meritis animae, jam patria caelum est,  
Et vestro data sunt astra terenda pedi.  
At legio hostilis damnata in nocte profunda,  
Obscoena aeterno crimina in igne luit;  
Quam semper terno latratu territat ingens  
Cerberus, aeratas dum jacet ante fores.  
Atque feros diris crines foecunda colubris  
Tisiphone, assiduo verbere terga secat.  
Sed vobis, quos incolumes Victoria felix  
Servat, & illaefos vivere fata volunt;  
Quas agetum laudes, quos decernemus honores?  
Et quis laudato vos fatis ore canat?  
Magnificus vobis debetur jure triumphus:  
Nunc aperi pompae euge, triumphae, tuas.  
Auratum, Heroes magni, conscendite currum,  
Et victrix circum tempora Laurus eat.  
Quique vehunt ipsis efflantes naribus ignes,  
Compita per nivei conspiciantur equi:  
Et post devictae veniant longo ordine gentes,  
Vegetetur media Barbara praeda via;  
Armaque, flexibilesque arcus, pictaeque pharetrae,  
Telaque Threicia non jacienda manu.  
Inde etiam ereptas puppes, ereptaque signa,  
Et pugnam ostendat picta tabella novam.  
Nam Thrax; ut sensit Venerum adventare Leonem  
Vidit

Vidit & Hispani signa tremenda Ducis ;  
 Adventu infelix subito perterritus hostis ,  
 Optabat celeri terga dedisse fugae ,  
 Non tulit hoc Heros magni clarissima proles  
 Caesaris, Austriadum lumen, & Hesperiae:  
 Sed classem curvum subito lunavit in arcum ,  
 Barbaricasque adiit Marte favente rates.  
 Quis fragor auditus? quantos tormenta boæus  
 Aerea, quæque cavæ signa dedere tubæ?  
 Territus ipse pater fonitu Neptunus, aquarum  
 Ima adiit, clausis delituitque locis:  
 Et pressit Thethys pavidas ad pectora Nymphas,  
 Ipsaque monstra alti contremuere maris.  
 Et jam sanguineis emanat fontibus æquor ,  
 Turcarumque super corpora trunca natant ;  
 Cum laceras cernens puppes, fractasque cohortes ,  
 Dux Geticus merita dat sua colla neci:  
 Haec vos pompa manet ; quam vulgus pone sequetur ,  
 Et magna euge io voce triumphæ canet.  
 Parte alia egregii vates pia carmina condent ,  
 Pastorem tollent & super astra Pium ,  
 Pastor io, bene Pastor io: tu causa fugati  
 Hostis, & hostilis tu quoque causa necis.  
 Christicolæ tu pace ligas ; tu foedera jungis ,  
 Vertis & in saevos bella tremenda Getas.  
 Nec deerunt qui perpetuis mandare libellis  
 Incipiant Venetum nomina clara Patrem.  
 Tu bello insignis, tu florens pace senatus ;  
 Tu verum Ausoniae, Christicolumque decus .  
 Interea dum fata vocant, fortunaque vobis  
 Adspirat ; celeri bella novate manu.  
 Quæque mala immitis nostris ingesserat oris  
 Hostis, in illius sint graviora caput,



## CAELII CALCAGNINI

FERRARIENSIS

C A R M I N A.

AD HERCULEM II. FERRARIAE

DUCEM IV.

**C**ONSUESTI dare magna, teque digna:  
 Atque isthaec bonitas benignitasque  
 Te caelo evehit aureis quadrigis.  
 Nos damus tibi (forsan impudenter)  
 Et parva, & tenui cliente digna.  
 At tu, gloria saeculi recentis  
 Princeps optime, gloriose princeps,  
 Haec parva accipias lubente vultu;  
 Et mentem hanc animumque metiare  
 Tuo in saecula Nūmini dicatum.  
 Nam sic te facile probabis esse  
 Dando, & accipiendo liberalem.

I N L I N U M.

**N**ON est quod doleas, amice, non est,  
 Quod possis, Line, postulare mecum:  
 Nam laudes cupio tuas ad astra  
 Usque provehere; inque summo Olympo,  
 Inque ipsis genibus Jovis locare:  
 Sed tu materiam dato, indicaque  
 Quo laudes lateant tuae recessu.  
 Nam per me nequeo invenire. sed tu

Quod

Quod est turpius arrogantiusque  
 Admifces precibus minas, minisque  
 Vim juras comitem palam additurum:  
 Sed frustra, Line; quando nemo laudes  
 Extorquere potest; potest mereri.

## IN TITI STROZAE OBITUM.

**A**ONIDES maestae lauros & barbata Phoebus,  
 Maesta Venus myrtos, tristis Amor pharetram,  
 Mercurius virgam, Pallas congeffit olivam;  
 Atque Tito ex illis composuere rogum.  
 Tum Charites stravere rosas, quas Suada Leporque  
 Molliri fletu non finit irriguo.

## AD HERCULEM DUCEM.

**T**U mihi tu fateor tam magna & rara dedisti,  
 Quanta potest animus vix capere, aut capere.  
 Nam me tot cumulis tua gratia largiter auxit,  
 Herculis ut facile noscere dona queas.  
 Nam quae magnanimus dat Princeps munera, tantum  
 Excellunt, quanto grandior ipse aliis.  
 Quod si non ausim meritis tibi dicere grates,  
 Agnoscas molem muneris inde tui.  
 Nemo jure potest Princeps ingratus haberi,  
 Qui tacet immensis attonitus meritis.

## LUDOVICI AREOSTI EPITAPHIUM.

**T**U repetis caelum, & terras, Areoste, relinquis,  
 Et loca jam meritis inferiora tuis.  
 Nos miseri, & curis longe mortalibus acti,  
 Non

Non tibi, sed nobis fundimus has lacrimas,  
 Gloria te niveis subducit in aethera bigis:  
 Non sine te luctu perpetuo opprimimur.

### AMOR VICTO HERCULE CONQUIESCENS.

**H**IC amor Herculea sopitus pelle quiescit;  
 Pulvinum capiti subdita clava facit.  
 Has nunc exuvias praefert, magno Hercule victo:  
 Pro clava gestat sed Deus ille colum.  
 At puerum Veneris somno & sudore madentem,  
 Praxiteles Parium transtulit in lapidem.  
 Tu vero, hospes, abi, aut leni fac verba susurro,  
 Ne somnum excussum forte queratur Amor.  
 Ille quidem abjecitque facem, abjecitque pharetram:  
 Pro face, pro pharetra clava timenda tibi est.

### DE ANTONIO CONSTABILI.

**A**D tumultum stat Fama, tubaque hinc personat, atq;  
 Antoni, in laudes innumera ora movet.  
 Constabile inde genus (virtutem hic audit Eous)  
 Hinc large impensas Hesperus audit opes.  
 Hinc sancti benefacta animi procul excipit Auster;  
 Hinc longe Boreas fortiter acta notat.  
 Antonii late reboant praeconia: at ipse,  
 Ipse ingens orbis non tamen illa capit.  
 Fama tubam in laudes, in laudes ora fatigat:  
 Tot tamen in laudes se negat esse parem.

## M. A N T O N I I

## C A S A N O V A E

## C A R M I N A.

## DE ALEXANDRO MAGNO.

**T**ESTATUR se uno rerum natura minorem,  
 Nam, quod plus posset vincere, non habuit.  
 Parvus Alexandro fuit orbis: sed fuit orbi  
 Magnus Alexander, ipse sibi exiguus.  
 Questus; quod citius, quam miles, terra deesset,  
 Quodque suum Oceanus clauderet imperium.  
 Omnia vicisset: sed non tamen omnia vicit  
 Ille, ubi se solum vincere non potuit.

## A N N I B A L.

**P**RIMUS in Ausonios objectas isse per alpes  
 Dicor, & aetherias non timuisse minas.  
 Ante ego quam Italiam, Romanaeque signa viderem,  
 Cum duris scopulis, & Jove bella gero.  
 Cui non obstiterint alpes, non Juppiter hostis  
 Vicerit, Ausonii perdomuere duces.

## D E P O R T I A.

**P**ORTIA magnanimi poteram post fata Catonis  
 Vivere, debueram non superesse patri.  
 Sed me fata tuo servabant, Brute, dolori:

An

An dux ad mortem non satis unus erat?  
 Dumque sibi ferrum queritur moritura negari:  
 Hanc, ait, explorant numina & igne domum.

DE ANNIBALE DUM A SCIPIONE  
 SUPERARETUR.

**H**ERCULEI focius decoris, quo rupit in ima  
 Altius Aufoniae viscera nulla manus,  
 Per caelum Libycis referat qui gentibus orbem,  
 Exsuperans uni vix iuga visa deo,  
 Dum caderet pubes Italica spectata ruinis,  
 Talem indignanti protulit ore sonum.  
 Quis neget armatum me maiestate perenni?  
 Eripere arma potest haec mihi nulla dies,  
 Annibali sat nomen erit, quo terreat hostes:  
 Et dum me noris vivere, Roma time.

HORATIUS COCLES.

**S**OLUS ad augusti Cocles discrimina pontis,  
 Cum daret ingentem grata ruina sonum,  
 Non gravis unus, ait, patria e iactura, reliqui  
 Non reditum ipse mihi, nec tibi Etruscae viam.  
 Et se dum jaceret rapidas animosus in undas,  
 Per medias victor navit onustus aquas.  
 Non undae, hostesve obstiterunt, quin arma referret,  
 Arma quibus servat se patriae, & patriam.  
 Quid contemptorem ferri miraris, & undae?  
 Maiores animas hac tibi, Roma, dabo.

## Q. CINCINNATUS.

**Q**UINCTIUS adspiceret si tam diffusa sepulcra,  
 Diceret, ipse minor noster agelluserat.  
 Uxorem tamen ille, & dulcia pignora alebat:  
 At moles unum vix tegit ista hominem.  
 Respondere meo certabunt rura labori:  
 Ista tamen secum mortua terra jacet.  
 Quantum, dum vixit, patriae nocuisse putatis  
 Istum, quando etiam post sua fata nocet?

## L U C U L L U S.

**U**T se barbaricis revocari sensit ab armis  
 Lucullus, tales solvit ab ore sonos.  
 Nil superest, quod agas: quid enim tibi Magne reli-  
 ctum est?  
 Crede tibi hoc Pontum dicere, & Armeniam.  
 Quos titulos mihi, Roma, tuus dare debuit hostis,  
 Ipsa negas: quod non vis dare, fama dabit.

## DE M. BRUTO ET C. CAESARE.

**C**AESARIS, & Bruti sacratum sanguine ferrum  
 Officium patriae praestitit, & domino.  
 Una pium caedes ostendit, & altera fortem:  
 Non alio Caesar debuit ense mori.



# HIERON. SALINAE

C A E C I.

C A R M I N A.

A D P O E T A S.

**C**HAONIAM canitis natam Jovis arbore glandem,  
 Legiferae segetes munera grata Deae:  
 Vos ulmos, & opes complentes nectare cellas,  
 Et tardos canitis laeta per arua boves:  
 Vos & equum canitis, qui frena sonantia mandit,  
 Atque arva, & multo graminæ pingue pecus.  
 Sed mihi quid prodest audire haec? si mihi defunt  
 Glans, seges, ulmus, apes, bos, equus, arva, pecus.

IN JOANNAM ARAGONIAM.

**A**SPICIS heu, properat quae nunc elata quadrigis,  
 Cujus forma Deae: num Cynosura venit?  
 Non, quia curvati squamosis flexibus anguis  
 Membra ligarentur. num Jove nata Venus?  
 Duceret ante jugum niveas Cytherea columbas.  
 An Charis est? duplici juncta sorore foret.  
 Num Juno? traherent pavones eseda picti.  
 An luna? accensas ferret opaca faces.  
 Est ne Aurora? rosis ornasset tempora pictis,  
 An Diana? ab sunt tela, pharetra, fides.  
 Num Pallas? regeret juvenilibus aegida palmis.  
 An Musa? incuteret plectra, lyramque manu.  
 Quam

Quam tandem ipse vocem? regum de stirpe Joannam,  
 Divarum partes quae regit una novem.  
 Qua ratione dedit nitidum Cynosura nitorem,  
 Et venus ora, Charis lumina, Juno pedes,  
 Luna genas, Aurora manus, humerosque Diana,  
 Virtutis Pallas munera, Musa sonum.

## M I C H A E L I S S I L V I I

### A D T I T I A N U M P I C T O R E M .

A Te uno pingi voluit Titiane Diegus,  
 Pictores unum quem probat ante alios.  
 Qui sibi tam similem facis hunc, ut dimidiatum  
 Se credat: magnum hoc: efficis arte tamen.  
 At contra suaves mores, & pectus, & illud  
 Tam cultum ingenuis artibus ingenium  
 Formari a se uno voluit Titiane Diegus:  
 Quanto est hoc quam illud rectius & melius?  
 Qui pingenda tibi quae sunt moritura reliquit,  
 Formanda assumit non moritura sibi.

## A N N I B A L I S

### C R U C E I I

#### I N O B I T U M G A B R I E L I S F A E R N I .

DUM veterū autorū instaurat monimenta Faërnus,  
 Et reddit vitae scripta Latina suae.  
 Invidit fera Parca, virumque ad Tartara trusit:  
 Quodque aliis adimis hoc tibi, dixit, habe.  
*Pars II.* *P* *I N*



IN OBITU JO. JACOBI MEDICES  
MARCHIONIS MEREGNANI.

**I**NTREPIDUM quid cor, vigilantia summa, laborque  
Indomitus possint, bella mihi acta docent.  
Larius, ut, magno & testis cum Saxone Turca est,  
Senaque, & Hetruscis Strozza fugatus agris.  
Restabat patriae tantum succurrere: sed mors  
Pulvere spes tantas obruit exiguo.

JULII ASCANII TUCCII

C R E M E N S I S

DUELLUM SCACCHORUM.

**T**E cum militibus gestio buxeis,  
Jam conferre manum Praetor amabilis,  
Quaquam Regibus Indicis  
Contendas melius, seu  
Tu ducas pedites, sive equites trahas:  
Sint omnes nivei, sintque licet nigri,  
Prosternam tabulis tamen  
Instruſtas acies, vel  
Confundam cuneos agminaque omnia.  
Quis tandem validis turribus obviam  
Accedet sine sanguine,  
Quin saltem capiatur?  
Rex laetus veniet praelia in ardua  
Et tuto intrepidam tramite conjugem  
Ducet non metuens minas,  
Ipsos forte nec ictus.

Sic

Sic freti domini milite non pigro  
Armorum subeunt magna pericula:  
Imbellesque cadunt viri,  
Et dant fortibus arma.  
Si Regina suis septa cohortibus  
In densas acies ipsa superbiens  
Hostes per medios viam  
Prorumpens faciet, tum  
Quid dices? minimum signifer albicans  
Conversis pedibus subsidium feret:  
Cernes nanque meos duces  
Punctim tela movere:  
Non tantam in Phrygios Aecides ferus  
Patravit rutilans arma micantia  
Cladem, quando neci dedit  
Districto Hectora ferro,  
Quantam per niveas gens mea copias  
Ingenti strepitu conficiet, nigra  
Dum matrona potens suo  
Irrumpet peditatu.  
Ergo, quando mihi congregier voles,  
Jam cautus pedites, expedites tuos,  
Impelle celeres Equos,  
Turritas quoque moles.  
Bis fusci pedites quattuor impetu  
Binis signiferis, atque Elephantibus  
Binis, indomitis Equis  
Nec non cum duce fusco,  
Invadent alacres castra tua, & viros,  
Telluremque regent militibus tuis:  
Et Regia decus feret  
Nobis saepe triumphans.  
Tum, Carnite, tuus Rex stupidus fuga

Conversa veniam forte meo Duci  
 Deflexis genibus petet,  
 Se victum quoque dicet;  
 Quid rides ne? putas haec fore somnia?  
 Plus centum procures, credere mihi graves  
 Nobis exuvias suas  
 Victi deferuere.  
 Hispanus veniat miles & Aethiops,  
 Ipsi terribiles vel cuneos ferent  
 Immitis Darii, abs Jove  
 Artem qui didicerunt.  
 Vis promptum manibus forte Vicarium?  
 Aut tecum validum ducere judicem?  
 Quid tu? nostra manus premet  
 Certe albentia castra,  
 Nam fossi pedites vulneribus fugam  
 Quaerent, si poterunt: Jussus eques meus  
 Hos mucrones petet, vel hos  
 Hasta denique cedit.  
 Haud credas, oculis ni videas tuis  
 Cunctis quam valeat gens mea praeliis,  
 Dum palmam referunt domum,  
 Nec non multa trophaea.  
 Nam campi in medio saepe capit ducem  
 Album noster Eques, ponit & exitum  
 Magnis litibus hostium  
 Tedens ad nova bella.  
 Thraso ne videar, qui sibi gloriam  
 Ascribit nimiam, jam veniant cito  
 Ad certamen atrox tui:  
 Nam res verba sequetur.

## ACHILLIS BOCCHII

BONONIENSIS  
CARMINA.

## TUMULUS CLEOMBROTI.

**A**MBRACIOTA mari situs ille Cleombrotus alto  
est,

Alto qui potuit temnere mortem animo.

Namque ubi melliflui legit divina Platonis

Scripta, etsi adversi tum nihil acciderat,

Praecipitem e muro dedit huc se, ut fluctibus istis

Curarum fluctus obrueret varios.

Felix o pelagus titulo hoc: felicia & ossa,

Quo tumulo poterant nobiliore regi?

## FRANCISCO I. GALLIARUM REGI.

**D**UM tua Fortunae cedit, Rex inclite, Virtus;  
Vidtricem subigit cedere victa sibi.

Quid duce te faciet vidtrix, si victa triumphat?

Non hominis virtus, sed magis ista Dei est.

Ergo divinus cum sis, o maxime Regum,

Quis jam mortalis fingere te potuit?

Ipsa tamen talem potuit te fingere Virtus,

Qualem animus possit cernere, non oculi.

## PHILIPPO.

**I**DEM sis licet omnibus superbus,

Et magna tamen esse comitate

Interdum cupias mihi videri.

Si cur defugiam tuum frequentem  
Congressum rogitas, Philippe, dicam.  
Suspecta est mihi comitas superbi.

### PRO MAXIMO FARNESIO.

**M**ONSTRORUM Alcides domitor, Jovis inclita pro-  
les.

Circinum agens, Orbem perficit eximium,  
Magnus Atlas librum retinens circumspicit astra  
Quae quondam Alcidae fulserat auxilio.

Divini heroes ambo, caelestibus ambo  
Imperitant astris. hic videt, alter agit.

Quaeris uter potior? potuit qui vincere monstra;  
Et se qui potuit vincere, monstra potest.

Verus hic Alcides solida est qui mente, animoque  
Impavido, justus, proposque tenax.

### DE POEMATIS JANI PANNONII.

**P**ANNONIUS dulci Janus dum carmine nuper  
Saxa, feras, volucres, & nemora alta trahit:  
Miratus Titan ait; aut non occidit unquam,  
Orpheus, aut alium Calliopea tulit.

### A N T O N I I M A R I I

#### AD HIERONYMUM FRACASTORIUM.

**F**RACASTORI venerande, anima mihi carior ipsa,  
Ut valeas, quid nam juncto pede, quidve soluto  
Scribas, scire velim, dum te Marpesia celfo  
Colle tenet, placidi sectantem commoda ruris.

An

An medicas herbas Phoebō monstrante per agros  
Colligis, ut caroscives a funere serves?  
An Dryadum mistus choreis, Faunisque jocosis  
Agresti ludis calamo: quae Tityrus olim  
Cantet, & umbroso miretur Nais ab antro?  
An potius volucris raptus super aethera mente,  
Colloquio frueris Turri, secumque vagaris,  
Ignotasque vias stellarum, orbisque tueris  
Ignotos, veterumque palam commenta refutas?  
Felix, quem populi de tempestatibus atris  
Ereptum, claro sistit Sapiētia caelo.  
At nos indoctae sequimur vestigia turbae,  
Parvaeque miramur, quia nunquam cernere magna  
Contigit hinc vana deludit imagine mentem  
Aut spes, aut metus: invadit nunc falsa voluptas,  
Nunc falsus dolor. in primis me torva feroci  
Pauperies vultu terret, ceu tristis Erinnyis  
Cum pavidum flammis ultricibus urget Orestem.  
Saepe loquor mecum, tacitusque haec corde voluto.  
Incipe sorte tua contentus vivere, teque  
Liber, & impavidus fortunae oppone superbae.  
Nemo pauperie miser est, aurove beatus.  
Oppressum morbo Chromilum de paupere lecto  
Transfer in auratos thalamos, & stragula picta,  
Non tamen aegroto decedet corpore febris.  
Impatiens, aestuque amens vigilabit. at idem,  
Cum validus silvis apros venatur, in alta  
Hibernas noctes nive dormit suaviter. aegrum  
Sic animum nec divitiae sanare valebunt,  
Nec mentem sanam vel magna offendere egestas.  
Quare age, si carus Superis, si carus amicis  
Esse velis, animum semper cole: cetera mitte.  
Cuncta potest sprevisse aliquis, nemo omnia habere.

Ille opibus vincet Croesos, illi fluet Hermus,  
 Cui licuit contemnere opes: sunt denique certae  
 Divitiae, Virtus, Sapientia: quas neque bellum,  
 Nec mors suprema potis est rapuisse favilla.  
 Haec mecum. Sed cuncta fluunt animo simulatque  
 Tabentes artus, & commoda multa volentem,  
 Adspicio miseram juvenili in flore senectam.  
 Crudeles Parcae, dulcis nec dona juventae  
 Carpere, nec lentos finitis finire dolores.  
 Non mea vos pietas, tremuli non vota parentis,  
 Non lacrimae vestras potuerunt flectere mentes,  
 At tu, quem Phoebus lethales pellere morbos  
 Edocuit, citharaque amnes cantuque morari,  
 Huc ades o Frastori, aversaque numina flecte  
 Carminibus, tabemque meo de corpore pelle.

## AD ALOISIUM AVILAM.

**A** MICE magni Caesaris *Avila*,  
 Comes fidelis militiae, & togae,  
 Germanico insignis trophaeo,  
 Gloria prima equitum, decusque.  
 De bello anhelum seu reparas latus,  
 Ut alma terris incubuit quies,  
 Seu cuncta Caesar bellicosus  
 Fulminibus quatiat tremendis,  
 Summos honores percipis undique.  
 Saevos in hostes intrepide arripit  
 Se prima virtus, cum recessit  
 Victa procul rabies furoris.  
 Superba divi praelia Caroli  
 Mox expeditis historiis refers,  
 Ducumque fortium labores

Muneribus decoras supremis.  
 Ut incruento Marte rebellium  
 Iras minaces contudit hostium :  
 Ut vicit excelsæ Suevas  
 Pectore, Vindelicasque gentes,  
 Describis æquus. te neque laus tua  
 Amorse gentis flectit Ibericæ,  
 Sed impetu quanto, fidesque  
 Bella geris fera, gesta dicis.  
 Dicis vadofas Albis aquas, manum  
 Dicis fugacem Saxonis impii,  
 Dicis potentiam tyranni  
 Cæsarea domitam catena.  
 Scriptor probatus, miles ut inclitus,  
 Esto superstes, tristitia nec meo  
 Te fata plectro, neu superbis  
 Cæsaris invideant triumphis.

## I N C E R T I A U C T O R I S

### D E S E N E C T U T E.

**J**AM multis pallet facies mea languida rugis,  
 Et riget incomitis hispida barba comis.  
 Caligant oculi, manat pituita molesta  
 Naribus, aegro vox gutture rauca tremit.  
 Egelidus jam sanguis hebet minuenta senecta,  
 Vitalis corpus deseruitque vigor.  
 Nil tamen hæc obsunt puræ contraria menti,  
 Quam sancto omnipotens excitat igne Deus.  
 Nam quamquam frigent vires, moribundaque membra;  
 Et tollit sensus curva senecta meos:  
 Vidua flamma tamen divini me ardet amoris,  
Ardet,



Ardet, & absumtis pectora visceribus.  
 Ut cum supremo me lumine vita relinquet,  
 Terrenosque artus spiritus, & cineres:  
 Purgatus maculis, & faeculi fordibus hujus,  
 Depositisque atri carceris exuviis,  
 Elyfias adeat sedes, & regna beata  
 Laetus ubi aeterno serviat usque patri.

## HIERONYMI ALEANDRI AD JULIUM, ET NEAERAM.

**H**AEC specula, hoc ebur, haec auratis retia nodis,  
 Caste tibi Juli, casta Neaera tibi,  
 Ille patris vestri quondam fidissimus hospes  
 Mitto Paraetoniis munus ab usque plagis.  
 His primum strophæis, quando ruet Oceano nox,  
 Conde puer roseas, conde puella comas.  
 Verum his pectinibus, cum sol caput exerit undis,  
 Pecte puer roseas, pecte puella comas.  
 At duplex speculorum usus, nam siquid in illis  
 Apparet vestri corporis egregium,  
 Reddere dignam animam forma hac contendite contra:  
 Turpe quid in facie est? corrigat hoc anima.  
 Non opus heu monitis foret his si viveret ille,  
 Quicum spes vestra est, spesque sepulta mea.  
 Fata mihi geminos rapuerunt saeva parentes:  
 Addita mors vestri est, tertia tela, patris,  
 Qui quoniam periit, vos nunc mihi situs uterque,  
 Illi quod donec viveret ipse fui.  
 Nunc ego retribuam natis, quod jure parenti  
 Debueram: vellem redere posse tribus.  
 At precor hoc saltem mihi dent pia numina, gratum  
 Officium vestri manibus esse patris.

## BERNARDI NAUGERII.

## V E N E T I.

**H**A S Neptune tibi conchas dat Battus, honores  
 Aequoris, Haec Lycidas ostrea Glauce tibi.  
 Vos facite irati deponant murmura fluctus,  
 Dum medio jactant humida lina mari.  
 Hoc dulces natique rogant, parvique nepotes,  
 Ludere quae vestro littore turba solet.  
 Nunc voces parvus tantum, mox munera grati  
 Ipsi etiam vobis, numina magna, dabunt.

## INCERTI AUCTORIS

## C A R M I N A.

## DE VICTORIA NAVALI AD LEPANTUM

## PARTA CONTRA TURCAS.

**A**USA dei classem, sociasque laceffere puppes  
 Impia gens, Euris sinuosa in vela vocatis,  
 Horruit adversas acies; fractasque superbae  
 Vidit opes Asiae, raptis spoliata trophaeis.  
 Illa per Jonios centeno remige fluctus  
 Ibat ovans, tristesque minas & bella ferebat:  
 Impuleratque duces Cretaea a strage recentes  
 Rursus in arma vehi, & duro discrimine rursus  
 Hostiles petere exuvias, & Martia signa:  
 Obvia cum triplici se se tulit ordine classis  
 Auspicio jam freta Dei caeloque secundo;

Ever-

Evertitque truce[m] validis incurfibus hoſtem.  
 Tum ſuperum delapſa cohors plaudentibus aliſ  
 Irruere, & vacuas viſa eſt rutilare per auras :  
 Et nunc barbaricâ pelago ſubmergere puppes :  
 Nunc inviſam aciem rapidis incendere flammis,  
 Aut pugnare manu, mediisqu[e] inſidere tranſtris  
 Aeneadum, & Venetae defendere robora pubis.  
 Pars autem clypeis venientes excipit iſtus,  
 Aut ſtipata levi circumvolat agmina gyro :  
 Non ſecus ac rigui ſi quando ad ſtagna Cayſtri,  
 Candentes liquido glomerantur in aethere cygni,  
 Imbellesque agitant volucres, & inertia caedunt  
 Agmina : ſanguineas Zephyrus rotat aere plumas.  
 Cinge triumphali viſtricia tempora lauro  
 Dux Venetum, cui clara ſuae cognomina gentis  
 Dat Venus, & ſpolia ampla tuo cape debita Marti,  
 Servatae columen patriae. Tu maximus ille es,  
 Aequoreae qui primus inis certamina pugnae,  
 Cladem Aſiae intentans. Divi comitantur euntem,  
 Et curae vigiles, & ovanti gloria plauſu :  
 Ultricesque rates, & ahenea mittis in hoſtem  
 Fulmina, ſuſcepto igne cavis impulſa metallis.  
 Quo ſonitu tremuere undae, percuſſaque longe  
 Ambracia, & pavidæ latuere ſub aequore nymphae,  
 Et reſſuo trepidans Achelous inhorruit amne.  
 Nec te ullæ belli facies, amiſſaque terrent  
 Regna, nec aveſtæ diverſo ab littore prædæ :  
 Nec te animi vigor, & ſævis grave robur in armis  
 Deſerit, & fracto exuvias ex hoſte reportas,  
 Eque tua prior emicuit Viſtoria puppi.

Tum juvenem Imperio inſignem, quem Caefare  
 magno  
 Progenitum virtus per grandia facta parentis

Eve-

Evehit, & caelum promissaque sidera monstrat,  
Attonitae videre acies in praelia versum  
Quo pietas, quo laudis amor, quo gloria traxit,  
Et belli molem regere, & virtute tueri:  
Qualis Atlas humero stellantem sustinet axem.  
His quoque ab auspiciis tantae pars maxima pugnae,  
Curarumque comes sacris Antonius armis  
Turbabat cuneos, inimicaque signa premebat,  
Vi superans, quantus crebris maria alta procellis  
Secum hiemes, Eurosque trahens, & nubila proflans  
Verberat Orion, fluctusque illidit arenis.  
Quem duo sectati valida in certamina fratres,  
Iuncti animis ambo, cognato sanguine iuncti,  
Romulidae proceres, per barbara tela, per ignes  
Irrumpunt, Martemque acuunt, spoliisque superbis  
Saepe suam decorant ingenti mole columnam.  
Ceu quondam Oebalias soliti ducere cohortes,  
Tyndaridae adverso spoliabant milite castra,  
Insignes paribus clypeis, quibus aureus ensis,  
Et jam tum gemino radiabat sidere cassis  
Aurea, puniceae volitabant vertice cristae.  
Nunc pharetras, Lyciosque arcus, perfractaque tela  
Fluctus agit, laceraeque natant in gurgite pinus.  
Et jam turma virum, discerptaque corpora passim  
Littoreae sectantur aves, projectaque pascunt  
Viscera, & effuso late rubet unda cruore.  
Atque aliquis, Naupacte, tuas dum tendit ad oras  
Et pugnata refert sanctis nova bella sub armis,  
Dumque peregrina legit Aetia littora pinu,  
Ecce, ait, hinc pugnas iterum prospexit Apollo,  
Bisque triumphatis Aegyptia signa carinis:  
Sic ait, & celeri percurrit Echinnadas aura.

Defer ad externas victricia nomina gentes,

Fama,

Fama, novas memorans pugnas, partosque triumphos:  
Quae vetera Heroum obscuris monimenta sepulcris  
Subtrahis, aeternisque duces interferis astris:  
Dic actos in bella viros, socia arma ferentes  
Hispanos, Venetosque, intermistosque Quirites  
Nunc primum Jonio in magno junxisse carinas.  
At contra Euboicas summa in certamina classes,  
Mentitosque Deos, viresque orientis agentem  
Regē Asiae domitum, tremefactaque saxa Capharei,  
Scilicet haec dudum precibus, votisque petisti  
Sancte Heros, qui sceptrā Dei, sedemque tueris,  
Dum tu neglecta pro religione laboras,  
Et Vaticanas toties prostratus ad aras  
Sacra facis sanctasque vocas in foedera gentes:  
Jordanumque jubes, Solymasque reposcere sedes,  
Atque implacatae superare Propontidis oras.  
Salve operum tantorum auctor, qui numina nobis  
Conciliās, & diva tuis parīs otia terris.  
At tibi dux Venetum, nunc alter ab Hercule magnō,  
Qui gravidam colubris Hydrā, qui Thracia monstra  
Esxuperas, iterumque Acheloja cornua frangis:  
Quando etiā majora manent, superanda Propontis,  
Rhetacique sinus, proavitaque regna petenda:  
Jamque tuis Rhodos, & Salamis, Naxosque receptae  
Accedent titulis, & jam concussa tumultu  
Migdonia, & tristes expavit Achaja pugnas.  
Te celsi juga Taygeti te frigida Tempe,  
Aoniumque vocat nemus, & Permessides undae,  
Et tua Pieriae responsant nomina silvae.  
Tempus erit, cum rapta sacris solatia Musis  
Restitues, fontesque suos, suasque antra recludēs,  
Nunc dira illuvie, & silvestribus obsita dumis,  
Et sua jam profugi recinent ad flumina cygni.

Hinc

Hinc & ad aequoream victor provectus Joppen,  
 Antiquas Solymorum arces & scepra repositas,  
 Aufoniae imperio, ac Romanis debita regnis  
 Et tibi carmeli rupes, tibi plaudit Idume:  
 Et tibi crescentes surgent ad sidera palmae.  
 O sacrae Libani valles, o palmifer Hermon,  
 En erit ut vestros liceat penetrare recessus,  
 En erit ut Syrias lustrans pius hospes arenas,  
 Caelicolum signata legam vestigia plantis?  
 Bethlemaeque domus supplex sacraria visam?  
 Et propiora Dei cunabula pronus adorem?

Felices properate citis decursibus anni,  
 Concordeoque iterum fatalibus aurea pensis  
 Saecula neant Parcae, meque haec ad vota reservent.  
 Aspice, dum properant alios tibi fata triumphos,  
 Ut maria, ut tellus nobis, ut largior aether  
 Rideat & nitido ostendet nova sidera caelo,  
 Illustres animas, quae prodiga pectora vitae  
 Ausae omnes, dum fata dabant, hostilibus armis  
 Obiicere, & letum pro religione pacisci:  
 Has sedes peperere sibi, qua lactea fulget  
 Orbita, & aeterni candent fastigia mundi,  
 Et modo pacatis diffundunt gaudia terris.

## A D P A U L L U M.

A E Q U A S quotannis cum prece plurima  
 O P a u l l e, summo, quidquid erit, Deo,  
 Seu tradidit, quod postulasti,  
 Sive quid exiguis ademit,  
 Grates memento reddere: cum tibi  
 Almos odores Ver parit aureum,  
 Cum spiceos de falce curva

Flava

Flava Ceres geminat maniplos.  
 Malo e tenella cum legis, aut pyro  
 Fructus rubentes: palmite de gravi  
 Vannos Lyaeus cum capaes  
 Turgidulis onerat racemis.  
 Grates memento reddere, grandius  
 Petulca mul&rum cum replet ubere  
 Capella distento, atque liquit  
 Rupe sub aeria gemellos,  
 Et cum beatae vitis Jacchicum  
 Vel grando honorem, vel gravis Africus,  
 Sidusve foedavit leonis,  
 Cum segetem sterilis momordit  
 Rubigo, rarum bruma vel acrior  
 Ovile fecit: reddere tunc quoque  
 Laeta memento fronte grates.  
 Praeteritus melior recessit  
 Autumnus, alter deinde benignior  
 Forſan ſequetur, plenaque Copia  
 Cornu refundet, tres in annos  
 Quod tibi ſat fuerit, ſuperque

## A D D I A N A M.

**T**U decus aſtrorum, & ſilvarum Cynthia cultrix,  
 Docta ſeras pedibus, miſſilibuſque ſequi,  
 Tu Dea, tu noſtris praefens venatibus eſto,  
 Et niveis faveas irrequieta rotis.  
 Ipſa comes noſtri, duxque eſto Diva laboris,  
 Ipſa mone audaces per nemora alta canes.  
 Ipſa vagam in ſaltu cupidis praedam obiice: & ipſa  
 Qua captura fugam ſit cita, tende plagam.  
 Sic puerum teneas, per Latmia ſaxa petitem,  
 Nove

Neve tuo trux se subtrahat ille sinu.  
 Nec gelidi riguis defint in vallibus amnes,  
 Nec spissae nemorum per juga summa comae.  
 Tu quoque Faune, precor; juvenilibus annue votis:  
 Qui colis umbrosi devia lustra soli.  
 Sic tibi sint faciles tenerae, tua cura, Napaeae,  
 Et capiti accedant cornua bina tuo.

## TUMULUS GREGORII INFANTIS.

**B**LANDIDULUS, nitidus, pulcer, dulcissimus infans,  
 Matris delitiae, deliciaeque patris  
 Hic situs est teneris raptus Gregorius annis,  
 Ut rosa quae subitis imbribus ista cadit.

## H I E R O N Y M I

## B A L B I

## G U R C E N S I S

## C A R M I N A.

## IN PAULLUM ASTROLOGUM.

**N**OSCIT Ephemeridas, Circeaque carmina Paul-  
 lus.  
 Stelligeræ noscit sidera clara domus.  
 Tympana quid Gybeles; numen quid portet Anubis;  
 Linigeræque tenet candida sacra Bovis,  
 Pullorum quid fibra velit, quae monstret Osiris  
 Somnia; quid volucrum turba canora ferat.

Pars II.

Q

Si-



Sidera cum teneat; secretaque noscat Olympi!  
Ante pedes quod habet, non tamen iste videt.

### AD FRANCISCUM CICONIAM.

**C**ANDIDA sublimi crepitare Ciconia nido  
Sueta, mihi quales nunc dedit ore sonos!  
Illa sitim siccis haerentem faucibus ire  
Jussit; & e nostro depulit ore famem.  
Judice me nusquam cantator funeris atri  
Dulcius effeudit gutture carmen Olor:  
Orphea jam Thraces; fileantque Amphiona Thebae;  
Nobile si carmen garrula dicat avis.

### EPITAPHIUM ARDOLAPHI PINI.

**Q**UOD sua cuique dies maneat; quod fama superfit;  
Ardolaphi monstrat fama decusque ducis.  
Quem non mille manus poterant, nec mille phalanges;  
Abstulit hunc cunctis mors adeunda viris.  
Casside Mars posita, posita luge aegide Pallas.  
Quis credat? Pinum tam brevis urna tegit.

### AD LUCAM SEXTUM.

**S**EXTE Camaenarum celeberrime Castaliarum,  
Candida qui clarae nomina lucis habes;  
Aurea forma tibi, tibi contigit inclita virtus,  
Et facilis roseo qui micat ore nitor.  
Est pudor, est tenero gravitas maturior aevo.  
Ingenium pueri nil puerile sapit.  
Cresce igitur: crescet virtus crescentibus annis  
Non moritura: vorat caetera tempus edax.

AD

## AD PAULLUM.

C A R M I N A nostra probas? solvam te legibus aequis.  
Nil nisi verba refers : nil nisi verba dabo.  
Me donis donas : contra quae munera mittam?  
Heu, fortuna meas nubila pressit opes.  
Carmina quid reddam, Musarum & Apollinis expers?  
Non bene pro magno munere verba damus.  
Ergo animum dono gemmas qui vincit & aurum :  
Semina sic duplici fenore reddet ager.  
Nam fors regna potest, fulvique auferre metalli  
Pondera : fors animum, Paulle, movere nequit.

## AD LUCAM RIPAM.

D E S I N E divitias natis cumulare superbas :  
Divitiae parvo tempore namque fluunt.  
Non ita praecipites alterno vortice cymbas  
Versat arenoso Scylla proterva mari :  
Nec sic incertis agitantur fluctibus undae,  
Ut fors instabiles impia versat opes.  
Munera nulla valent natis majora parentes  
Linquere, quam laudis nomina clara suae.

## AD PYTHAGORAM.

P Y T H A G O R A, alterno reparas qui semina lapsi,  
Corporibusque novis das reduces animas.  
Dic quid erit Marcus, Stygiis cum dirus in undis  
Corpora Syfiphio pondere saeva premet?  
Quis Marcus? Marcus rabido livore refertus,  
Qui Fabii damnat qui Ciceronis opus;

Omnia qui rodit, genuinum frangit in omnes,  
 Et cui Gorgoneo viscera felle madent.  
 Non erit ille caper; non vasti bellua ponti;  
 Non leo; nec taurus quidnam erit ergo? canis.


# GULIELMI MODICII

MONTEFERRATENSIS

C A R M I N A.

IN P. CLODIUM; ET TYRANNOS  
 ALIQUOT

**P**ELLE domo, patria, Ciceronē trans mare Clodi:  
 Hunc Milo qui revocet lege Tribunus erit.  
 Urbe furens media Ciceronem concute Clodi;  
 Ultor in Albano te Milo rure manet.  
 Te Cato, te Cicero patriae celebramus amantes:  
 Omnia posteritas vos amat atque probat.  
 Sunt odio gener; atque focer fera bella gerentes.  
 Neuter amat patriam; sed sibi quaerit opes.  
 Ultiores patriae, duraeque tyrannidis hostes  
 Cassius, & Brutus sunt in amore mihi.  
 Antoni, Lepide, Octavi; moestissima Roma  
 Vos non tres homines, sed tria monstra tulit,



PAULO III. PONT. MAX. ET CAROLO V.  
IMP. IN REBELLES.

**A**CCOLA gens Rheni, furiis agitantibus ausa  
Spernere jura hominum, spernere jura Deum;  
Jam satis illustit. summi nam Praefulis arma  
Hinc properant; illinc Caesaris arma ruunt.  
Gens scelerata cadet; cum junctis fortibus armis  
Vindictet hic homines; vindictet ille Deos.

## AD HORATIUM GUALTERUCIUM.

**M**ERCIBUS Eois reditum si civis onusti  
Gratulor; & cordis gaudia fronte gero:  
Cum redeas mercis pretiosae dives Horati;  
Cur tibi non multo gratuler ista magis?  
Urbe redis Patavi, referens Mavortis in urbem.  
Exculi raras cordis, & oris opes.  
Interpres legum, jubeant quid jura, docebis:  
Sanctaeque quid statuatur aeterna; quidque forum.  
Civis amans patriae communia commoda quaeres:  
Atque tua miseros saepe levabis ope.  
Carus eris patribus: populus tibi laetus honores  
Deferet: & plausum plebs tibi laeta dabit.  
Idcirco reditum tibi gratulor, artibus istis  
Indorum semper post habiturus opes.  
Dii tua fortunent bona; dent & utrique parenti  
His tecum longo tempore posse frui.

## IN TEMPLUM MONTIS REGALIS

## RENOVATUM.

**H**ANC superis celsam Gulielmus condidit aedem,  
 Qui tenuit Siculi sceptrum superba soli.  
 Abstulerat faciem rebus spatiosa vetustas.  
 Collapsum fuerat jam decus omne loci.  
 Restituit, regni titulum Farnesius; aras  
 Caelicolis; templo, quod fuit ante, decus.

## TUMULUS COSMI ETRURIAE

## DUCIS.

**H**IC situs est Cosmus gentis dux magnus Etruscae,  
 Qui decus Italiae, gloria, lumen, erat.  
 Scilicet hoc major toto rex nullus in orbe  
 Consilio, meritis, aut pietate fuit.  
 Non obiit, cuius terras diffusa per omnes,  
 Inter & Antipodas, fama perennis erit.

## PARTHENII PARAVICINI

## NOVOCOMENSIS.

## ALFONSO DAVALO VASTIO.

**S**I STE gradum sacrique hospes decora alta sepulchri  
 Et molem ingentem, spoliisque insigne trophaeum  
 Haud mortale opus, & manes venerare beatos,  
 Ipse olim celebres Vasti dum solveret umbris

In-

Inferias, meritoque Ducem decoraret honore  
 Armipotens, Lybico, Galloque ex hoste recepta  
 Haec spolia, hanc magnis sacrauit manibus aram.  
 Tunc etiam percussa gravi Bellona dolore  
 Turbataeque effusa comas Tritonia virgo  
 Funebrem ad pompam exequiasque ingentis alumni  
 Conveniunt, & Martis opus dignumque laborem  
 Concelebrant, lustrantque rogum, donisque parentant.  
 Tum lectos urna cineres jam rite peractis  
 Exequiis, pariter suprema voce salutant.  
 Invidi, o cineres, queis haec hactenus inclita virtus  
 Ausoniae enituit, longe victura superbas  
 Pyramidas fama, haec vobis monumenta dicamus;  
 Aeternamque aram, vobis decora omnia belli  
 Cedimus, & nostros jam nunc largimur honores.  
 Hinc igitur caeco bellorum urgente tumultu  
 Ductores responsa petant, huc hoste fugato  
 Sacra ferant, praedas, atque arma hostilia figant,  
 Vestraque votivis placent sibi numina donis.  
 Hic pulchrae virtutis honos, haec praeimia sunt.  
 Haec Mavors, comitesque duae, pullatus Appollo  
 Excipit, & moesta Aonidum cingente corona  
 Flebilibus repetit numeris: mox numine dextro  
 Ferrea concordēs volverunt flamina Parcae.

## F A B I I V I G I L I S .

**A** R M A ferox Princeps Venetas meditatur ad oras,  
 Et parat ingenti subdere classe fratrum.  
 Quin etiam victor, domitoque Oriente superbus,  
 Ausonias iterum deprimit hostis opes.  
 Quis ferat? Austriaci generis lux inclita, tuque  
 Et spes, & patriae certa Columna tuae:

Vosque adeo quos mille urbes, quos oppida mille  
Insignes bellis & pietate colunt:  
Victrici capite arma manu, gentemque nefandam  
Sternite, & adversos Marte juvante duces.  
Omnia fausta cano: niveis Victoria pennis  
Laeta super vestras labitur ecce rates.  
Ite agite, incertumque alacres properate per aequor:  
Saepe dabunt istas fata iterare vias.  
Ite agite, & meritas tellus jam Barbara poenas  
Sentiat, & nostros procidat ante pedes.  
Et discat quid sit superum irritare furorem,  
Saevaue supremo bella movere Deo.  
Nec vos quae nimium fudit male cauta carinis  
Terreat, adverso gens ruit illa mari.  
Quin quae centenis pontum nunc verberat alis,  
Decidet in vestras post modo capta manus.  
Vincent Christigenae, sumet gens improba poenas,  
Fracta per Aeolias Luna vehetur aquas.  
Jam tandem scelerata cohors, caeloque rebellis  
Supponet Christi colla superba iugo.  
Jamque novas experta superni numinis iras  
Sentiet aeternum non procul esse Deum.  
O quot sternet aquis Mavors, quot funere acerbo  
Invisos superis obruet una dies.  
Quot pater Oceanus perfusus sanguine tetro  
Impia maerenti corpora volvet aqua.  
Parce metu Ausonia: ornatos jam desine crines  
Solvere, & immeritas dilacerare genas.  
En tibi qui longo mansuras tempore sedes  
Spondent, & populis Regna beata tuis.  
Quin alios inter, magnae spes altera Romae  
Mox reperet patrios victor ab hoste lares.  
Disiectasque acies, secumque immitia tela,

Si-

Signaque deducibus mille recepta feret.  
Gratia magna Deo: praerupta Ceraunia tandem  
Buthrotique arces sub sacra jura cadent.  
Evenere: novos cernis quos Roma triumphos  
Largitur reduci post nova bella duci.  
Aspicias, ut celebri invehitur comitante caterva  
Excelsa Marcus conspiciendus equo.  
Quem circum agglomerant cari longo ordine cives.  
Et praeunt capti turba inimica duces.  
Laetitiae dant signa tubae, lituique minaces,  
Terribilique tonant fulmina ubique sono.  
Miles, io, magna praecclusus casside frontem  
Per fora, perque vias voce triumphae canit.  
Aspicias aurato circum velatus amictu  
Quam bene spumanti fraena relaxet equo.  
Ut niveae assurgunt cristae, dextraque tumentem  
Invicta clypeum Gorgonis ore gerat?  
Heus quo nunc, o Turca, minae cessere dolique?  
Quo tandem evasit spiritus ille tuus?  
Qui tibi fingebas fastu tumefactus inani  
Imperia, en longe gloria fortis abest.  
Scilicet incepti parta haec sunt praemia belli,  
Heu pudor, heu veteris gloria militiae.  
At tua cura Deum, claris assuete triumphis  
Italiae qui Sol, qui pater unus ades:  
Increpuere tubae, mediae te confere pugnae  
Dum tibi victori Diva superba favet.  
En majora manent: caelo proh Juppiter alto  
Fataque venturi nuntia quanta parant?  
Jam video pictas Indo qui litore conchas  
Colligit, & rubri demetit arva croci.  
Quos vagus Euphrates, quos devius ambit Araxes,  
Et quos admotis Phoebus adurit equis.

Et



Et quos Maeandrus toties ludente recurſu  
 Turbidus intortis perfluit amnis aquis.  
 Et ſi qua extremas orbis gens accolitur oras  
 Proicere ad noſtros arma ſuperba pedes.  
 Magne Pater ſummo caelum qui numine torques,  
 Qui terrae tractus & maria alta regis,  
 Ante meos obitus illam Tithonia conjux  
 Purpureis lucem ſplendida portet equis,  
 Qua videam rurfus devicto ex hoſte Columnam  
 Sacrare ante aras parta trophaea tuas:  
 Qua rurfus ſpoliis plenos hoſtilibus axes,  
 Et videam ferro brachia vineta ducum.  
 O quibus aggrediar numeris tunc facta referre  
 Marce tua, & grandi bella ſonare tuba,  
 Tunc ego Caſtalios auſim perrumpere fontes,  
 Et diro Aonium cingere Marte nemus.  
 Annue Magne pater (ſi non indebita poſco.)  
 Neu rapiant fuſas irrita ſlabra preces.

## P E T R I   G H E R A R D I I

### IN AUGUSTINUM BARBADICUM.

**U**T ſalvum novit clypeum, de pectore duxit  
 Thebanus jaculum dux, obiitque libens.  
 Ut bene rem pelago ſenſit ſuccedere, traxit  
 Dux Venetum ex oculo miſſile, obire volens.  
 Laetus uterque perit pro libertate tuenda,  
 Laetus & hoſtiles fregit uterque minas.  
 O rari virtute duces, & carmine digni  
 Perpetuo! o felix patria, quae genuit!  
 O priſcis potius ſaeclis oriunde beatis  
 Dux Venetum, ut ſapiens Graecia te caneret!  
IN

## I N E U N D E M.

**V**ICTORI lumen tibi Barbarus hostis ademit,  
Ultima ne caperes gaudia Barbarice.

## I N E U N D E M.

**N**ON licuit spectare oculis quaesita trophoea  
De Turcis pelago dux tibi clare feris.  
Nam tibi quae eripuit jucundum lumen arundo,  
Illa eadem vitam (proh dolor) eripuit.

## I N E U N D E M.

**L**ITORA pro tumulo ponas, victasque carinas  
Desuper, ut forti sint pia busta duci.  
Ismariumque nota Mavortem in fronte sepulchri  
Et Selymum: hoc tumulo contege Barbaricum.  
Vociferansque Leo super adsit, qui mea dicat  
Gesta. brevi magnum quid tumulatis humo?

## D E T R I U M V I R A T U.

**Q**UAE victrix fuerat potensque Roma,  
Paulatim cecidit Triumviratu  
Antoni, Lepidique Caesarisque:  
Clades inde quot Aetium sequutae?  
Quot Mundi caput urbs tulit ruinas?  
At victrix iterum potensque Roma  
Se mox restituit Triumviratu.  
Nam Pii, Venetum, Austriique vires  
Hostem non procul Aetio superbum

# HIERONYMI FALETI

## AD GALEATIUM TASSONUM.

**V**ER A tribunicii, Tassoni, juris imago,  
Floruit antiqui qualis in urbe Remi;  
Commendant sua Pierides tibi sacra puella,  
Sacra tuo quae sunt digna favore coli.  
Illa diu neglecta, tuas volvuntur ad aras,  
Utque velis meritam ferre precantur opem.  
Certa manet merces: doctis celebrabere chartis.  
Doctus, & aeternum Fama loquetur anus.  
Haftenus egregiis vixisti clarus in armis,  
Nunc placidae libeat munera obire togae.

## AD GALEATIUM GONZAGAM.

**E**ST qui praelongo deducat origine nomen,  
Et referat veteris nobilitatis avos.  
Est qui divitiis generosaque stemmata jungat,  
Et se felicem laude ab utraque ferat.  
At cui si virtus; virtuti copulet uni  
Et sua cum summis stemmata divitiis:  
Et numeros condant, vel docto pectore, & ore  
Multiplici surgat magnus in eloquio;  
Sit patriae gratum exemplar speculumque, quod Ocni  
Antiqui referat lumina imaginibus;  
Nullus erit, nisi tu, Galeax celeberrime, cui tot  
Virtutes & tot dona dedere Dei.

## DE LIBELLO JO. ROGII PRINCIPIS

DE POZA FILII.

**P**HIDIA magnanimi conjecit ab ungue Leonis,  
 Quanta ferent vastae cetera membra ferae:  
 Fixaque dux vidit Samius vestigia plantae  
 Herculeae, moles cognita tota fuit.  
 Sic etiam Rogii pedibus dum scripta solutis,  
 Et quamvis tenui cortice cernis opus:  
 Pars quotacumque tamen dotes tibi monstrat & artem,  
 Monstrat & ingenii cetera dona boni.  
 Monstrat & Hispanis quantum jubar exit ab oris,  
 Qualis & occiduo fulgeat orbe jubar.  
 Nectar & ambrosiam posthac effundet Iberus:  
 Jam Tarteysi Sol orietur aquis.

## DE SPINULAE LIBELLO.

**M**IRARI Hesperidum jam desine roscida, lector,  
 Poma, vel Alcinoi rura beata senis;  
 Vel Tagus auriferis locuples quod volvit in undis,  
 Vel quo purpureis Hermus abundat aquis.  
 Quid Dodona tuam jactas, quid Media silvam?  
 Massice quid vites, quidve Falerne tuas?  
 Spinula, dulce melos fert, cinnama, nectar, amomum,  
 Chrysolitos, aurum, balsama, thura, Deos.



ANT. FRANCISCI  
RAINERII  
CARMINA.  
DE NUMA.

**V**IDERAT armato Tiberis sub rege, Quirites  
Jura dare edomitis Martia finitimis:  
Viderat & Superis populum pia thura ferentem,  
Sacraque sub sancto surgere Pompilio:  
Cum laetus, resonans haec effudit flumine: nostra o  
Quam bene Roma colit, quam bene bella gerit!

DE ALEXANDRO MAGNO.

**Q**UID tua te, Macedo, juvit lato aucta per orbem  
Gloria, Hyperboreo qua riget aura gelu?  
Quaque pharetratae surgunt juga Persidis, & qua  
Ebabit Eoas decolor Indus aquas?  
Victorem cum te populorum vicerit ira;  
Noxiaque undanti pocula sumpta mero;  
Et tumidi fastus, Divum queis poscis honores,  
Cogis & ingenuos flectere colla viros?  
Haec procerum impulerunt fida olim pectora, regi  
Miscere e saeva toxica Thessalia.  
Fortunam reverere nova, o, qui sceptrum capeffis:  
Nam Dea regna agili datque adimitque manu.

GOTHO-

## DE ODETTO LOTRECHIO.

**D**ICITE qui Tusci colitis prope Tibridis undam  
 Tempia Deum, & magnis thura datis Superis;  
 Dicite, cur Galli manes animamque superbam,  
 Lugubri celebrant carmina vestra sono?  
 Haec meruit rabidam inluviem qui perpulit, unde  
 Barbarico excussa est Urbs labefacta iugo.  
 Quare ingentem umbrâ Lotrechi, animamque potentē  
 Inferimus claris carmine coelitibus.  
 Pergite Romulidum proles, neu dicere laudes,  
 Neu pigeat manes excoluisse pios.  
 At tu sperne virum excisa alto e marmore facta,  
 Summe Ducum, auratisve addita imaginibus.  
 Sic melius; tua sic se tollit ad aethera virtus,  
 Vincat ut aerias culmine Pyramidas.

## IN COSMUM MEDICEN.

**T**E duce, mortales quae dedignata scelestos,  
 Extulerat niveos aurea ad astra pedes,  
 Aurea nunc Astrea redit: Venus ante recessit  
 Sacrilega, Etruscae, Cosine, decus patriae  
 Per quem parta quies, & pax, & copia rerum est;  
 Et Sophiae, Aonidumque artibus ortus honos.  
 In falcem duce te galeae conflantur & enses,  
 Nec lethale sonant classica, nec litui.  
 Marte satus, Janum claudis, quis claudere Janum  
 Mavortis prolem te posuisse putet?

# A U R E L I I O R S I

## IN M. ANTONII COLUMNAE TRIUMPHUM.

**J**AM tange plectrum, dic age jam melos  
 Thalia gratum, seu viridi libet  
 Sub colle, sive ad lene sacrae  
 Murmur aquae, strepitumque silvae.  
 Namque ille Princeps; cui galeam dedit  
 Pallas, Camoenae cui, Themis, & bona  
 Lucina nascenti benignis  
 Luminibus, placidoque vultu  
 Risere; turmae cum grege Turcicae,  
 Lauro decorus nunc Capitolium  
 Scandit, triumphalique curru  
 Signa domum retulit, Scytharum  
 Erepta rostris. o quis honoribus  
 Aeternae almis Romulidum tuas  
 Columna, virtutes, Latinae  
 Gentis honos, columenque Romae!  
 Funesta tandem robore nam tuo  
 Classis Scytharum concidit aequore;  
 Sensitque quid virtus, & acre  
 Consilium, ingeniumque possit  
 Gentis, secundo quae tulit exitu  
 Urbes per omnes militiam, & Getas  
 Indosque subjecitque Persas  
 Viribus, imperioque Romae.  
 Antiqua nondum proruit incluta  
 Virtus: triumpho vivit adhuc amor:  
 Romana jam magnos Quirinos

Terra

Terra feret Curiosque fortes.  
Jam nec Camilli, nec Marii invides  
Partiitriumphis, dum minitantium  
Compressa deducens catenis  
Colla ducum, veheris triumpho.  
Ut Vaticani vocibus insonant  
Montes, ut uda Tibris arundine  
Velatus, & colles propinqui  
Plausibus exiliere laetis!  
Ut vestis, aurum, fulget & Indicum  
Ebur! decentes ut juvenum chori,  
Ut fulgor armorum coruscus  
Sollicitas pepulere curas!  
Laetare victor, more patrum, tuis  
Gestis triumphis. scilicet ultimo  
Spectator huc venit Britannus,  
Oceano, Rhodanique potor.  
Non, Roma, talem palma Numantiae.  
Curru superbo restituit ducem  
Tibi neque immensi labores  
Amphitrioniadem Pelasgis  
Non Caesares, non Scipiadas parem  
Tarpeja rupes vidit, & Itala  
Tellus; nec invictos Neronēs  
In patriam reditum parantes.  
Io triumphhe! en victor equo super  
Nunc huc habenas, nunc animi notas  
Illuc reflectit; nunc beatae  
Cernit opes, fremitumque Romae.  
Huc Musa frondes, huc breve lilium  
Permisce gratis floribus, & comas,  
Thalja, victori Columnae  
Cinge rosa, viridique myrto.



# ANTONII THYLESII COSENTINI.

AENEAS, PARATIS NAVIBUS,  
ALLOQUITUR PATRIAM.

**J**AM nova coeruleas deducta est classis in undas,  
Caesa sub Idaeis pinea verticibus.  
Impelluntque leves suspensa rudentibus aurae  
Lintea dilapsis undique sideribus.  
Linquendum est jam dulce solum, fuit inclyta quondam  
Troja ubi, sive armis inclita, sive opibus.  
Opatria, o manibus tumultata hostilibus, omnis  
Collapsa in cineres uno eodemque rogo.  
Tanta fuit nunquam e florentibus urbibus ulla,  
Tam subito & casu diruta praecipiti.  
Si qua salus superest post fata novissima, salve,  
Atque vale; extremum hoc, quod datur, aspicere est.  
Non licuit saevis, aut te hostibus eripere, aut me  
Te prius optato concidere interitu?  
Flavus ubi toties atratus caede refluxit  
Xanthus, ubi & Simois decolor auxit aquas.  
Quave manus Danaum pavitans per littora in altum  
Profugit, ratibus delituitque cavis.  
Ant latebrosa gravis tenebras cum enixa per atras  
Exitum peperit bellua Dardaniae.  
Cum, cives rapite arma, urbs tota fremebat in auras  
Vocibus, hostis adest, ferte, agite, arma viri.  
Ilion aeternis deplorandum lamentis,  
Quis tua tot potis est, quin mala tanta queri?  
Saevitiam hostilis ferri subiisse, per aedes

Civili undantes sanguine, perque vias.  
Ignibus heu devota furentibus omnia. si quid  
Restitit, Argolicae sensit aratra manus.  
Tunc potui superesse armisque dolisque Pelasgum  
Numine sublatu matris Acidalia.  
Cum vetus armipotentibus a Priameja Graiis  
Capta, malum, auratis ardua culminibus  
Corruit, & flammis superantibus omnia diris  
Exsultabat atrox caede Neoptolemus.  
Quem furere, & geminis immistum vidi ego Atridis  
Terribilem abjectis stare cadaveribus,  
Hercaeumque Jovem Regis foedare senili  
Sanguine: quam indigna est hostia caesa Jovi!  
Funera post nati crudelia raptus ibidem,  
Ilicet aeternum tuque puerque vale.  
Et soboles germana, perit quae, excelsa viretis  
Silva velut telis faucia nubigenis.  
Perdedit unius furor omnes semper aquosa  
Malvisses Ida pascere lanigeras,  
Agresti contentus amore; fuisset Oreas  
Sive tibi cordi, candida sive Dryas:  
Innuptis quam sic alienam abducere nuptiis,  
Damnofo insignis factus adulterio.  
Tempore quo virgo doctissima Priamidarum,  
Sparsa coma, & niveas fletibus uda genas,  
Affatur mare prospectans e turribus altis  
Infortunatos Laomedontiadas:  
En iterum Graiis cadit Ilion, Ilion, armis:  
Pergama collucent ignibus Inachiis.  
O tantum prohibete nefas, miserescite venti,  
Vos saltem venti pellite, ferte ratem,  
Redditodesertis, fugit unde, penatibus, actam  
Turbine, vel rapidis mergite vorticibus.

Quid soror insanam retines? ad busta jacebis  
Tu quoque amatoris vindicis ulta prius.  
Sed melius, mihi quam quod Fata inimica reservant;  
Impie dira dabis jam mihi supplicia.  
Verte Dea ingentes fluctus, e nubibus atris  
Nata patris casta coniice tela manu.  
Ultima sed superant immania: maxima Phoebe  
Nulla forent utinam, vel rata dona forent.  
Sed tantae reus es seu caedis, sive Deorum  
In mala devotus numina, tuque vale,  
Eminus Herculei trajetus acumine teli,  
Sparsus & intonsam pulvere caesariem:  
Et, patriae ante omnes quondam tutela, peremptus  
Magnus Achillaea cuspide Priamides,  
Felix Priamides, cui sic occumbere, mortem  
Et licuit campis oppetere in patriis.  
Excidio superare tibi non contigit urbis.  
O Neptune perit, Phoebe opus atque tuum.  
Nec stupefacta repentinis ululatibus auris  
Horruit, & rebus tot doluere oculi.  
Infandis rebus, quas nox congefferat una,  
Una omne extinxit nox decus Illiacum.  
Ah facinus! celfo dejectus culmine quis non  
Resperfit lacrimis hostibus ora puer?  
Sacrilegas miser ille manus tremefactus, & iras  
Sensit Ulyssaeas regius Aethyanax.  
Imperiis quoque paret herilibus Hectoris uxor,  
Tradita victoris serva ministerio.  
Hic quoque praemoriens vitasti munere Divum:  
Mors data, non vitae lux tibi demta fuit.  
Sed neque regalesque nurus, matrumque catervas  
Contigit addictas cernere servitio.  
Perque salum rapere insuetum, insultantibus essent  
Tam

Tam procul Argivis matribus ut famulae.  
Trojugenum regina parens longaeva, triumphis  
Passa nefas o quantum acta Agamemnoniis.  
Et soror Aeacidae laetalis cura sepulti,  
Altera quaeque tuum movit, Apollo, animum.  
Tertia, quam flammis nequicquam atque hoste recepti,  
Rapta iterum est conjux regia caeliticibus:  
Qui mihi fatalis sociam invidere laboris,  
Jucundam longe qui comitemque vitae.  
Illa per umbrosas, docuere oracula, silvas  
Sacra facit Matri maxima turrigeræ.  
Quanta tamen cunque est, mihi verte nulla relicta est:  
Praesidet alma aliis, sed perit illa suis.  
Care puer, jubeam cur ora madentia fletu  
Tergere, & curas pellere, Jule, animo.  
En ego, solator tot luctibus indefessus  
Frangor, & huic uni mens mihi pressa malo est.  
Vive tamen nostri non immemor, o ubicunque  
Es nemorum, fluvios seu colis undifonos;  
Atque vale: feror exsul aquae super aequora vasta,  
Fata jubent quo me tendere Caelicolum.  
Et pater ipse comes grandaevus non timet ire,  
Servatus patriae bis pater exitio.  
Nec communis amor natus, tua dulcis imago.  
Parvus idem profugus denegat exilium.  
Cum sociis, mecum simul omnia ferre paratis,  
Aspera quae terrae, quaeque ferunt maria.  
Jamque rates evaserunt; quos igne Penates  
Eripui, velis flamina carbasseis.  
Servate o semper felicia, vosque Latinis  
Templa manent meritos maxima littoribus.

## BAPTISTAE SPAGNOLI

MANTUANI.

AD COMITEM FREGOSIUM

COMPEFREGOSUM.

**D**ULCE Musarum decus, & voluptas,  
 Patriae splendor Ligurumque princeps,  
 Quem fovet dulci gremio receptum  
 Hospita Manto;  
 Impio postquam Genuae tumultu,  
 Missus ex alto Phlegethontis amne  
 Jura subvertit placidamque pacem  
 Nuntius Orci,  
 Te decet magnos animi dolores  
 Atque Neptuni salientis aestum  
 Ferre, & accenso Jove fulgurantem  
 Fortiter iram.  
 Rebus adversis agitata virtus  
 Crescit, & robur cruciata longo  
 Sumit attritu, meliusque terfo  
 Candicat ore.  
 Ocium clari fugiunt honores;  
 Nobiles ducit labor ad triumphos;  
 Sudor insignes iter ad coronas  
 Monstrat apertum.  
 Unico vitrum superatur ictu;  
 Spernit incudes adamas, & omnem  
 Malleum: virtus animosa casum  
 Sustinet omnem.  
 Debiles nautas humilemque cymbam

Afri-

Africus pulsus violenter undis  
Jactat, & vasto fragilem carinam  
Vortice sorbet.

Fronte sublimi ratis alta proram  
Tollit, & Caurum Boreamque ridet  
Atque prosternit valido sonantem  
Pectore Pontum.

Blanda fortunae levitas in altum  
Volvit; & facti cito poenitentem  
Dexteram versans male fida curvum  
Deprimit orbem.

Fortium gaudens hominum ruinis,  
Regna longinqui penetrare mundi  
Cogit Heroas, patrioque pulsos  
Jactat ab Orbe.

Egit Aeneam pelago vagantem  
Flante per nigros Aquilone fluctus  
Atque nimbofo reboante caelo  
Littus ad Afrum.

Pulsus antiquam Salamina Teucer  
Liquit: Alciden odium novercae  
Misit ad Gades, ubi cernit altam  
Julia Calpen.

Faucis angustae mare vorticosum  
Exfules quondam soror atque frater,  
Heu nimis tristi secuere cursu,  
Phryxus & Helle.

Velleris fulvi spolio superbus  
Aequor Euxinum, gelidamque Tethym  
Thessala primus rate navigavit  
Fortis Jason.

Magna, non una regione virtus  
Clauditur, toto spatatur Orbe.

Sicut

Sicut immensum radians Olympum  
 Clarus Apollo.

Perfidam fortem generosa virtus  
 Spernit, & plausum popularis aurae  
 Aestimans ludi puerilis instar  
 Libera regnat.

Vate Dircaeo generata Manto  
 Unde gens urbis fata Mantuanae  
 Juncta Tyrrheno Siculam Charybdim  
 Vidit & Eetnam.

Vidit & ripam resonantis Arni,  
 Qui per Hetruscos sinuosus agros  
 Serpit, & cultis inimica campis  
 Flumina volvit.

Inde per montis jura saltuosi  
 Venit errantes ubi major undas  
 Mintius spargit, bifidoque terram  
 Circuit amne:

Tum solo nomen dedit occupato,  
 Atque Thebanos imitata muros  
 Cum sua celsam genitrice proles  
 Condidit arcem.

Nave Phoenices Tyria colonos  
 Regnaque fratris fugiens avari  
 Nobilem Dido patriam Colossi  
 Vidit in undis:

Vidit & Cyprum, Paphiamque gentem,  
 Transiit Syrtes, Lilyboea lustrans  
 Aequora, & tandem Libycae subivit  
 Littora Byrsae.

Spernit imbellem populum libido.  
 Dira fortunae, tumidoque plebem  
 Corde fastidit; sua tela frontes

Mittit

Mittit in altas.

Ergo priscorum memorata Virtus

Excitet fortes animi lacertos;

Et tuae fiant tibi clara gentis

Stemmata calcar.

Namque te magno genitore natum,

Atque Virtutis gremio educatum

Ad decus summum vocat, & supremam

Gloria laudem.

Ergo visurus Pyliam senectam

Vive, nec tantum Genuae potentis,

Regna, sed pinguem teneas Hetrusci

Littoris oram.

Africae latis dominare campis

Atque Sardoï spatiosa ponti

Doris, & bello superata Cirne

Porrigeat arma.

Dum venit fati melioris aetas,

Liberum curis animum solutis

Transfer ad Musas, viridique lauro

Tempora cinge.

Et per horbosos spatia tractus,

Qua Padus ripas onerosus altas

Complet, & mites falicum per umbras

Serpit in aequor.

Laeta Regali Sabiola testō

Villa felici redimita cultu,

Te sua tutum statione longos

Servet in annos.

Servet & prolem Deus, atque clarae

Conjugis sanctum caput, & nepotes,

Vosque caelestem ferat in senatum

Longa senectus.



# ANTONII CAMPANI

## AD DIANAM.

**P**ELIACAS primum mirata est Troja carinas,  
 Aemonias spectans per freta vasta manus:  
 Undique discurrunt, Sigaeaeque littora complent,  
 It Priamusque puer, Laomedonque senex;  
 Inde alii: atque novas mirantur Jasonis artes,  
 Aequoreumque putant littore adesse Deum.  
 Cum diri saevos Martis furor ivit in enses,  
 Praebuerat nostris non leve numen avis.  
 Primus opes alius fulvo cum vidit in atro  
 Quam cupidas censes hunc habuisse manus?  
 Et nova delectant animos; capiuntque tenentque  
 Inde etiam factos creditur esse Deos.  
 Juppiter unus erat latis Cydonius oris;  
 Et Venus in Paphis una reperta jugis.  
 Mars unus Geticis, Liber pater unus in Indis;  
 Ingenio, forma, non habuere pares.  
 Hinc rudis & facilis mirari cuncta vetustas,  
 Quos raros vidit, credidit esse Deos.  
 Ergo jam rara facie, vultuque *DIANA*,  
 Exspectes nostra thura Sabaea manu.  
 Id tibi non desit, proprium indulgere Deorum est;  
 Si capies nostras, es Dea magna, preces.

## AD BLONDUM.

**B**LONDE, Pio vive moreris: nil morte dolendum est,  
 Tu famae et domui consulit ille tuae.  
 Astra tibi, natisque patris concessit honores.  
 Qua tu alia optasses conditione mori?

EJUS.

## EJUSDEM EPITAPHIUM.

**H**IC situs est Blondus, Priami, cui forma; Catonis  
Vita; Titi Livii fama decusque fuit.  
Conjuncta est sancto, conjux pia, Paula marito;  
Feminei sexus gloria, ut ille virum.

**JULII ROSCII HORTINI**  
**IN POEMATA LAELII CAPILUPI.**

**L**AELIUS hac celebri redivivus conditur urna;  
Fama volat cujus docta per ora virum.  
Vivere si Musae sacris dant vatibus; huic bis  
Musarum raro munere vita datur.  
Hoc bona posteritas grato debebit Julo,  
Per quem Phoenicis more revixit avus.

**AD SCIP. GONZAGAM S. R. E. CARD.**  
**DE JULIO CAPILUPO.**

**J**ULIUS ingressus Pindi per amoena vireta  
More patrum, patrias colligit inde rosas:  
Et quas per varias Maro texuit ante corollas,  
Inferit in varios florida dicta modos.  
Tu Gonzaga tuis quas Patria mittis ab hortis  
Inferum lectas sume Maronis opes:  
Et tibi frons quanquam Romano fulgeat ostro;  
Non minore patria est qui tibi venit honos.

AD

## AD PROSPERUM CAPILUPUM.

**U**T te, Castalio cupidum succedere clivo,  
 Adspexit duram Delius ire viam,  
 Extulit os, placidaque nitens in fronte reluxit,  
 Jussit & hos Musas edere voce sonos:  
**A**ude animo Capilupe: riget via tramite longo  
 Invia; sed summo vertice laeta quies.  
**V**ix haec, cum sacrae frondes venere per auras,  
 Et cinxere tuas laurea ferta comas,

## PROSPERO A BAUMA.

**A**ONIOS inter, Prosper, clarissime vates,  
 Dum feris argutae dulcia fila lyrae:  
 Hos, etsi ruris cantus, ne despice. Apollo  
 Laeta per Admeti pascua duxit oves.



THO.

# THOMAE CORREAE

## C A R M I N A.

AD PIUM V. PONT. MAX. IN VICTORIAM

PARTAM DE CLASSE TURCICA.

**S**ANGTE senex, cujus monitis, qui temperat orbem.  
 Temperat imperii sceptrā priora fui.  
 Insignis pietate Heros, qui primus ab illo es,  
 Qui magnum hoc mundi Rex moderatur opus.  
 En tibi post domitas hostili ab litore gentes,  
 Salva redit Scythicis classis onusta opibus.  
 Quae, duce te sancto cojerunt foedere puppes,  
 Exuvias referunt, & spolia ampla Getae;  
 Et majora parant faciles tibi gaudia Divi:  
 Gaudia non priscis cognita temporibus.  
 Assueta Hadriacas pinus Getula per undas  
 Vincere jam victas subiicit illa manus.  
 Experta est justos gens pertruculenta furores,  
 Et cecidit forti Thrax, Numidaeque manu.  
 Amissas lugeat praedatrix Africa puppes,  
 Et Rhodos, & ditis qui colit arva Phari.  
 Qui Hellepontico clauduntur gurgite, caede  
 Audita, triplicis classis, ad arma pavent.  
 Missaeque ab Hispanis puppis, Venetaeque carinae,  
 Et quas auxilio das Pie Quinte rates;  
 Ut primum Jonias victricia signa per undas  
 Explicuere, Getas diripere trabes.  
 Quidquid id est, per te partum est, ea gloria palmae  
 Tota tua est; per te tot cojere duces.

Cor-

Corripiant ut tela mones, contraria signis  
 Signa ferant suades, pandere vela jubes.  
 Opponent ratibusque rates; atque ensibus enses  
 Distringant, jacent aere tonante faces.  
 Arma omnes uno ore fremunt; arma, arma juvenus  
 Respondet; bellum suadet inire Pius.  
 Ergo ades, atque initum foedus firma; impiger aude  
 Pro sancta reges sollicitare fide.  
 Et quos concordi junxisti nuper amore  
 Fac durent; suade foedus inire alios.  
 Per te incant acies, per te victricia figant  
 Signa per extremos, qua patet unda, sinus.  
 Perge ingens pietate Heros, Diis aemule, justum  
 In bellum reges sollicitare alios.  
 Te duce cana Fides vastum diffusa per orbem  
 Conterat invicta castra inimica manu.  
 Jam video Libyae compleri milite campos  
 Aufonio, & cymbris aequora tota regi.  
 Jam video oblitis trepidos dare terga pharetris  
 Sauromatas, contra dum tua castra ruunt.  
 Praedatorem Asiae victum video ante triumphos  
 Flectentem victas ad sua terga manus:  
 Urbibus Eois, totoque Oriente subacto  
 Victores repetant ut sua tecta duces.  
 Adspicio gemiano cretos sub cardine reges  
 Aut cadere ante aras, aut fera vincla pati.  
 O quae magne Heros, o quae felicia surgunt  
 Tempora Christiadis te duce, te comite!  
 Non ego vana cano, sed mens praefaga futuri  
 Indiciis certis fata retrusa aperit.  
 O lux laeta, o lux jucunda, o gaudia certa,  
 Cum quacunque novae tempora Pacis erunt.  
 Nam qui te tenuem elegit, penitusque jacentem,

In

In partem imperii, sceptraque prima soli;  
Excitat ille humiles, elatos deprimit; idem  
Illis imperium sufficit, hisque adimit.  
Is tibi sceptrum dedit, sceptris quoscunque subegit,  
Qui merito observant semper honore Deum.  
Cum peteret Regemque suum, Christumque negaret  
Gallia, & eriperet jusque piis;  
Pelleret a patria Pietatem, & jura sacrorum,  
Et fureret Stygiis saeva Megaera dolis;  
Tu custos, regumque Pater Pie, qui pia semper  
Bella geris; nigris jurgia mergis aquis.  
Contra acies mittis, fulgentiaque instruis arma,  
Viribus opprimitur perfida turba tuis.  
Atque ubi supplicii subeunt genus omne nocentes,  
Fit Phlegetonte praeda, cibusque cani.  
Truduntur rabidi sub Tartara caeca rebelles  
Belgae; mox sub te victa Granata fuit;  
Vera tot exuvias sub te Pietasque, Fidesque  
Tot spolia, & palmas, hoste cadente, refert:  
Et Divum effigies proprias statuuntur ad aras,  
Et templis sacrae restituuntur opes.  
Et juris, legumque redit veneranda potestas,  
Moreoque in melius vertere quemque juvat.  
Atque tuum Pie munus id est, quod quisque per orbem  
Inferat inferno bella inimica gregi.  
Vive igitur, Pie magne Heros, visure triumphos  
Finibus extremis quos tua castra ferent.  
Tu tamen ardentis stimulis in proelia reges  
Incita, & arma manu tu quoque sume senex;  
Arma preces, & vota quibus Deus annuat, arces  
Aethereas pulsant; haec cape tela manu.  
Te duce sit fociis mens omnibus una, sit idem  
Semper amor, coepta foederis exstet honos.

*Pars II.**S**Uno*

Uno omnes animo in pugnam si signa sequantur,  
Starequis hos contra, quis super esse queat?

AD D. JOAN. AUSTRIACUM DE CLASSE  
TURCICA VICTORIA PARTA.

**C**AESARIS invicti proles, quo principe subdet  
Thrax ferus Austriaco colle superba jugo;  
Tende ultra, & patrios aequent tua facta triumphos;  
Tende ultra, ulterius te tua Fata vocant.  
Tende agetum ulterius, quo se tua gloria monstret:  
Principium hoc certum jam tibi monstrat iter.  
Perge bonis avibus rutilum Sol alter in orbem  
Prome caput; radiis splendeat aethra tuis.

E I D E M

**M**A G N E animo, Austriacae magnum decus addi-  
te genus  
Insequere, & factis insere facta tuis.  
Caesaris ad fastos titulos adijunge triumphos,  
Adde triumphato Victor ab orbe tuos,  
Hellespontiacus subdet tibi sceptrum Tyrannus,  
Regna Asiae, & Libyae Thrax, Numidaeq; dabunt,  
Tu ne fige pedem, sed contra ardentior ultra,  
Perge Heros; gaudet te minor esse pater.

A D E U N D E M.

**S**I primo ingressu decies quater amplius Orco  
Mille Getas tridis; carbasa mille capis;  
Quid facies, ubi vela Heros sinuantibus Euris  
Verteris in Libyci regna opulenta soli?

AD

# AD SELINUM SULTANUM TURCARUM. R E G E M .

**I**N te dum Sultane ferox Aquila explicat alas,  
Et Pius, & Venetus comparat arma Leo;  
Intonuit laevum rerum ter maximus ille,  
Ille hominum rector maximus, ille Deum:  
Et foedus gratum esse sibi hoc ostendit apertis  
Indiciis, palmae pignora certa dedit.  
Principio hoc, alios promittit mille triumphos,  
Mille notat palmas, mille trophaea parat.  
Si sapis, ergo tuis, dum fors fert, consule rebus,  
Et Christi suavi subiice colla iugo.

## IN EANDEM VICTORIAM.

**V**ICIMUS ocives, nostra est victoria: dicat  
Omnis, io, laeto turba triumpho sono.  
Perque vias, & testa canat gens laeta triumphos,  
Victori statuant mille trophaea patres.  
Religiosa cohors laetis indulgeat hymnis,  
Et quis quis sancta pro Pietate dolet.  
Sarmaticae periere acies, periere carinae,  
Missaque ab Ismario gurgite capta manus?  
Et quae multiplici violenti cuspidis arcu  
Thracia fidebat, turbine mersa ruit.  
Vista Tomitano, quae solvit ab aequore, classis,  
Vista Boristhenio missa carina sinu;  
Et quaecumque Rhodo, quaecumque profecto Canopo,  
Et quaecumque freto venit ab Herculeo.  
Thrax sceleratam animam mediis effudit in undis,  
Grexxque Hellesponto lectus in arma jacet.



Quod si quis iusto potuit superesse furori  
 Remigium ratibus per data transtra sedet.  
 Sauromataeque Scythaeque feri, Getulus, & Afer  
 Purpureas Nerei sanguine fecit aquas.  
 Sanguine pinguescunt pisces, depascitur artus  
 Morsibus assiduis hispida turba maris.  
 Joniisque natant inhumata cadavera campis,  
 Plurima squammigero praeda, cibisque gregi.  
 Miratur rex ipse maris Neptunus ab imis  
 Sedibus, & Thetys Nereidumque chorus.  
 Certatimque udum caput in sublime ferentes  
 Tot strages Nomadum, funera tanta stupent,  
 Caeruleus Triton, Phorcique exercitus omnis  
 Circum viatrices itque, reditque rates.  
 Tranquillamque viam classi, cedentibus undis,  
 Ante vagus Glaucus per vada falsa aperit.  
 Atque aliqua ex Nymphis, vastū quas continet aequor,  
 Seu formosa Eryphe, seu Galatea fuit;  
 Litora ad Hesperiae juvenem dum spectat onustum  
 Tendentem exuviis Thrax furibunde tuis:  
 Dignus hic est dixit, quo nato Carolus ultra  
 Inviatas Aquilas mittat ad imperium.  
 Caesare magnanimo dignissima patre propago,  
 Caesaribusque atavis, & proavis, & avis.  
 Maximus ille armis Mayortia in arma paternas  
 Ultra Aquilas victor; qua patet unda, feret,  
 Ille foros animos iustis compescet habenis,  
 Quicquid ad Auroram sol ab Atlante videt.  
 Et quicquid longe medium procurrat in Austrum,  
 Quaque axi Arcto o frigida terra jacet.  
 Namque hoc principium, quae par fortuna sequetur?  
 Qua tegit, & qua sol exerit ora, patet.  
 Cum regat immensum pondus, quod maximus Atlas  
 Si

Si subeat, dispar viribus ibit Atlas.  
Quem fore crediderim, postquam maturior aetas  
Crescet, & imperii sarcina major erit?  
Principio hoc longos reparat sibi nomen in annos,  
Atque auget titulos, & decus omne domus.  
Hoc juvat aeternos victorem emisse triumphos,  
Hoc famam stellis inseruisse juvat.  
Nam, quae per terras, perque ultima regna vagatur  
Fama volans, partum narrat ab hoste decus;  
Nunciat, & belli palmas, & mille trophaea,  
Trusaeque ad Eumenidum millia multa domos:  
Exuviis ornasse rates, cepisse triremes  
Sauromatum, multos eripuisse jugo,  
Et plures Numidasque Getasque Daasque carinis  
Remigio in nostris substituuisse docet:  
Ut palmis assueta olim, contraria votis  
Agmina senserunt, ut subiere jugum.  
Audiit hoc Europa decus, contendit ad Indos  
Haec fama, & pondus qua subit orbis Atlas:  
Venit & ad Tanain, quaque arida culta Canopi  
Ditat inundanti qui tegit ora luto.  
Tenit & ad Gangem, gemmisque auroque beatum,  
Pactolum, & gelidis qua riget Albis aquis.  
Venit in adversum latus orbis, & ultima regna  
Terruit: haec loquitur proelia dives Arabs:  
Ignivomosque arcus, tormentiferasque pharetras  
Torserit in Libycas stirps generosa rates.  
Sulfureosque globos, & tela armata rotarit  
Aere cavo contra perfida castra Scythae;  
Ut late belli fragor audiretur, & acer  
Frangeret infolitus litus utrinque furor.  
Auditamque ululare imis e cautibus Echo,  
Et duplicare iterum classica pulsa sonos,

Ceu quale exitium jaculato e nubibus igne  
 Inducit terris cum furit ira Jovis.  
 Ceu quali furibunde trahis nemora alta fragore  
 Saepe ab Hyperboreis cum ruis Eure jugis.  
 Ceu cum praecipites agitas stridore procellas,  
 Cum fremis Icariis Caure proterve vadis.  
 Felices sancto concordēs foedere puppes!  
 Foedere Barbaricae quo minuuntur opes.  
 Quo Libyaeque ferus populator, avitis  
 Pulsus agris, discet vincla aliena pati.  
 Tempus erit cum digna fide, cum vera poëtae  
 Posteritas olim carmina certa leget:  
 Cum domitum audierit leges mutasse Niphatem,  
 Et dare jam victas ultima Baëtra manus,  
 Cedentemque Tibri Nilum, Gangemque & Hidaspē,  
 Et Tanaim, & quisquis sceptrā aliena colit:  
 Indomitofque Daas, Morinos, pictosque Gelonos  
 Viderit imperium, Roma, subire tuum.  
 Tunc ego mille canam palmas, & mille triumphos,  
 Partaque Christiadum mille trophaea manu.  
 Teque adeo o Pie Quinte canam, quo vindice durat  
 Hispanos inter foedus, & Euganeos:  
 Ut sub Romanas veniat te principe leges,  
 Quae colit ignotos gens malefana Deos.  
 Et te maxime Rex, bene cui qui temperat orbem,  
 Subdidit Europae sceptrā priora canam.  
 Vosque etiam o Venetae pulcherrima gloria gentis  
 Inferam, & a Veneto nomine surget opus.  
 Auratis circum puppes Victoria pennis  
 Adstat, & in vestris puppibus alta sedet.  
 Crux, Aquila, atque Leo bellantum pectora firmant.  
 Impia quis contra tres ferat arma Deos?  
 Vos quis stare queat contra? quis fervida contra

Au-

Austriaci juvenis spicula torta manu?  
 At tu, quem propter classem regit ille, cruenta  
 Bellaque quem solum propter, & arma gerit:  
 Da pater, ut frenet populos, gentemque rebellem,  
 Et subdat suavi regna inimica iugo:  
 Et ferat exuvias Capitoli ad culmina, debet  
 Quas Tiberi infidi litrus utrumque maris.

JOANNIS DARCHII,  
 VENUSINI,  
 CANES.

QUAE generosa canum soboles, quis cultus alendo  
 Sit catulo; unde suos Epirus clara Molossos,  
 Audacesque sibi commendet Sparta Lacones,  
 Diva refer. tu venatrix Dictynna ferarum,  
 Quae jaculo celeres nemorosa per avia cervos  
 Traicere, & timidos gaudes praevertere damas,  
 Huc ades, & nostro adspira Dea casta labori:  
 Tu nemorum regina potens, tibi devia lustra,  
 Et vastos canibus studium est circumdare saltus.  
 Namque tibi in vallesque cavas, montesque supinos  
 Antiquos Divum lucos, silvasque sonantes  
 Imperium est: saliens tecum decurrit Oreas  
 Montibus, & spoliis & caede superba recenti:  
 Ergo ades, & nostris adsis Latonia votis.  
 Principio catulus facie spectabilis alta  
 Hirsutis rigeat spatioso pectore villis:  
 Membra toris surgant latos animosa per armos.  
 Rectaque se crudo distendant robore crura.  
 Colla brevi tumeant spatium, glomarataque cervix

Disiectas ferat auriculas, radientque coruscum  
Ravi oculi glaucive, & magno immitis hiatu  
Ingentem fundat vasto clamore latratum:  
Sic trepidum stabulis furem, tacitasque luporum  
Insidias, illo nunquam custode timebis.  
Postquam etenim pingui rediere e gramine fera  
Nocte greges, tremulisque vocant balatibus agnos  
Lanigeræ matres, explorat ovilia circum  
Ipse vigil, dominoque timens, vestigat ubique,  
Ne fur vel stabulo repat, vel clausa fatiget  
Septa lupus, sensimque velit se immittere tecto.  
Nec soli invigilat pecori generosa propago:  
Namque alius (comperta loquor) levissomnus heriles  
Excubat ante fores, abigitque latratibus hostem.  
Vix audita alius domini mandata capeffit  
Sedulus, & nutum observat, vocemque loquentis.  
Ille sagax leporem scrutari; hic utilis undis,  
Sollicitat medio revolantes flumine mergos:  
Ille feras vastis turbare cubilibus; ille  
Fulmineos agitare sues bonus; ille fugaces  
Persequier capreas; celeres his gloria cervos  
Sistere, & immani concurrere cominus ursæ,  
Aut gravia Eoi prosternere pondera Barrhi.  
Hic alius celsa pascentes rupe juvencos,  
Hircososque greges comitatur, & ardua praeceps  
Saxa per & scopulos montana armenta tuetur,  
Praedones aut dente premens, aut ipse vicissim  
Occumbens, animoque ruens in vulnera forti.  
Est etiam ex illis gens Martia, quæque feroci  
In medias ausit concurrere fronte cohortes.  
Haec si terrifico Mavortia classica cantu  
Sanguineum accendat opus, & clangore tremendo  
Pugnaces acuant in tristia funera turmas,

In-

Inspirentque animis rabiem, caecumque furorem ;  
Castra viris differta petit, custodia fidos  
Certa capit vigiles, alternaque munia tractat :  
Inde alias aliasque acies per cornua versa  
Fronte locant pugnasque ineunt, & bella laceffunt  
Acrius, insultantque hosti, morfuque fatigant.  
Non strepitu horrifono, aut ullo terrore moventur.  
Nec celeres horrent Medo jaculante sagittas,  
Pilave, & Haemonio missas tyrone farissas,  
Liventisque globos plumbi, pandasque catejas,  
Aut teretes rapido vibratos turbine contos,  
Haec Marti devotus amor, divaeque furenti  
Negligit, & plagis gaudens, & strage cruenta.  
Nec quenquam videas qui terga fugacia vertat :  
Declinetque ictus duros, gladiove, sed omnes  
Aut fundunt hostem, aut communi clade feruntur.  
His Colophoniacae (si vera est fama) phalanges  
Auxiliis hostem valido fregere duello :  
Infaustoque olim cecidissent Caspia Marte  
Agmina, ni tali defensa cohorte fuissent.  
Quae functis patribus (meritis ut digna rependant  
Officia) canibus curant communia busta,  
Exequiasque pares, & easdem in funere pomas.  
Iflis rex Garamas, folio dejectus avito,  
Militibus regnum, sedesque recepit ademptas.  
Quin etiam Cymbrum juvere ad bella ferocem,  
Sanguineoque leves tenere in pulvere Carros.  
Hos Maurusiacus sibi Massinissa paravit  
Custodes, hominum fidei diffusus, & isto  
Non sibi conducto sua sceptrata satellite cinxit.  
Talis & antiquis custos nutritus Athenis;  
Phoebigenae quoniam modico sacra vesta Epidauro  
Sacrilego vigili servasset ab hoste latratu.

Quid

Quid referam quos auratis Minoja templis,  
Creta refert positos vigiles? quosque insula solis  
Carpathii celebrat servantis littora ponti?  
Adde etiam, quod nulla homini mage prodiga grati  
Officii quadrupes, dominisque fidelior ipsis:  
Nam movet ad numeros se se; & quo jusseris ibit  
Ocyus, ad nutus iterumque iterumque recurrens:  
Frigoribus vinci, aut rabioso nescius astro.  
Et licet Herculeis fugias a Gadibus usque  
Ad Tanaim, aut Abras, rutilique volumina Gangis,  
Usque sequetur ovans, tua nec vestigia quoquam  
Deferet, ac lateri semper comes ibit herili.  
Sistis iter? sistit. properas? velocius Euro  
Scindit in obliquum campos, cursuque laceffit  
Aërias volucres. quod si post terga relinquas,  
(Nam dominum crebro adspiciens observat euntem)  
Ille moram cursu pensat. viden ecce repente  
A tergo ut vultuque hilaris blanditur amico,  
Aut velut explorans prior in deflexa viarum  
Exit, & insidias animo praesentit acuto?  
Nec minus officil memor est quum pocula sumit  
Tota domus, dulcique madent convivia Baccho,  
Concrepuere fores? volat explorator; amicum  
Si norit, blande admittit, pedibusque volutus  
Haeret, & applaudit palpo, supplexque precatur  
Effusi veniam temere latratus: at hostem  
Aedibus exturbat, laniatuque urget, & ipsi  
Limine, vestibulo corte interdicit herili.  
Quod si vim faciet grassator, & obvia forte  
Arma ferat; jugulo intendans, in vulnera primus  
Defilit, incursatque ferox, fremituque superbo  
Objectuque sui dominum tegit, & fera tentat  
Praelia, nec fuscum exhorret mucrone cruorem.  
Testis

Testis erit dulci remeans Volcatius agro,  
Sera tenebrosam traherent cum tempora noctem,  
Quique olim Tusca defensus in urbe Senator  
Nulla, nisi primum caeso cane, vulnera cepit.  
Te quoque Paellaeo, Dari, quondam a rege fugati  
Ingentique manu spoliatum, solus Hylactor  
Belli inter casus Martisque pericula nunquam  
Deseruit, fortisque comes permansit iniquae.  
Quid quod & in flammis dominorū ignesq; rogorū  
Insiliunt alii? & cineres comitantur heriles?  
Quid quod & ad bustum (tantus post funera bruto  
Durat amor, tristisque nequit consistere mente.)  
In multos mansere dies? gemuloque latratu  
Impia fleverunt dominorum fata suorum?  
Nulla fames, nullaeque animos flexere ciborum  
Illecebrae, sed enim magis ac magis insidet alto  
Corde dolor, dominoque piget superesse sepulto:  
Quod reliquū est vitae nocet, insomnesque ministrat  
Nocte dieque animo curas; nova vulnera pascit  
Irrequietus amor, tristesque exasperat iras:  
Exangues donec vigor omnis deferat artus,  
Defessoque super sua fata cadavere claudant.  
Adde quod, infixos memori sub pectore vultus  
Conspectosque semel, nullo obliviscitur aevo.  
Jam duodena suo percurrentes astra rotatu  
Bis denos radiis Titan lustraverat annos;  
Ex quo Dulichios fines, Laertia regna,  
Liquerat, & bello, & fluctu, jactatus Ulysses:  
Quum tandem post multa trucidis discrimina ponti  
Contigit optatos portus, placidaque quiete  
Fata dedere viro, atque Ithaca tellure potiri:  
Jam neque Penelopae, fractoque aetate parenti,  
Non Eumo, non Telemacho, sed cognitus Agro  
Tan-



Tantum erat, effoetis languenti viribus Agro.  
Non tibi pulchra Tyros tantum tua purpura deber,  
(Quamvis ardenti saturatas murice vestes  
Laeta geras) quantum canibus: nec Sydonis esset  
Lana percussis vibrans fulgoribus ignes,  
Ni canis Alcidae scopuloso in littore reptans,  
Puniceo primum tinxisset labra veneno.  
Nunc age, quis villae melior, gregibusque tuendis,  
Quae volucris foboles cursu, nasove sagaci  
Sit potior (nec enim solers dedit omnibus unum  
Natura ingenium) quae sit ratio optima prolis  
Formandae, quo Musa mihi dabit ordine dicam.  
Ille igitur cui differtae custodia villae  
Creditor, & vigili tristes in limine dantur  
Excubiae, durum condiscat ferre laborem  
A teneris, pinguique fero gliscentia pascat  
Corpora sub gelido recubans sine stramine dio:  
Tum furvum villo fallat nigrante colorem  
Noctis, ut excubias obscuro celet amictu.  
Sed qui sub vigili firmas pastore capellas,  
Balantumque greges sequitur, candore per agros  
Molle pecus referat, mentitaque vellera tergo  
Assimulet, subitoque lupum improvisus hiantem  
Terreat assultu, & trepidis depellat ab hoedis.  
Quod si te montes venabula ferre per altos  
Aetolosque juvat per saltum tendere casses,  
Ipse tibi audaces Spartanae gentis alumnos,  
(Nam stabulis villae melior, gregibusque molossus)  
Elige, robusta quibus a cervice rejectae  
Ad terram veniant aures, hirsutaque denso  
Colla pilo latos fundant cum clunibus armos.  
Adde etiam Albanos, qui quantum viribus apris  
Occursare valent, fuluosque aequare leones,

Et

Et vasto indomitos certamine frangere tauros:  
 Aligeras tantum cursu praevertere damas.  
 Sunt & Locrenses catuli, sunt Arcades, atque  
 Cypria quos Salamis, quos dives Iberia pascit.  
 Sunt & odorifera celebres indagine solis  
 Naribus insuetos investigare recessus,  
 Secretosque ferae docti deprendere calles.  
 Hos, simul ac foetae liquere cubilia matris,  
 Notaque despiciunt jam faucibus ubera duris.  
 Mollibus assuescas epulis, pinguique ferina  
 Saepe avidos acuas dentes; cervique cruentum  
 Ad spoliū latrare doce. exuviasque recentes.  
 Inde tibi in vacuos educere proderit agros,  
 Umbrosas nemorum valles, & inhospita tesqua.  
 Ora tamen loro forti clamosa tenebis,  
 Nec nisi firmatos unquam patiere furenti  
 Setigero, aut sese venienti opponere cervo.  
 Acrius in vetitum tendent, invitaque habenis  
 Colla reluctantum cupient exire ministri.  
 Interea si forte gravi spiramine raucum  
 Increpuit cornu, toto jam pectore praedam  
 Concipiunt, queruloque replent late arva boatu.  
 Inde suos etenim Lacedaemon Achaica laudat,  
 Assueri quoniam silvis, cupidique ferarum  
 Praecipiti fervore ruunt. perque invia lustra,  
 Convallesque cavas, & sentibus horrida duris  
 Arva, & vulnificis dumeta rigentia spinis  
 Dente rotant praedas, indefessique sequuntur  
 Quod semel emissum est, illos non obviis amnis  
 Vicinos dirimens sinuoso gurgite colles,  
 Sistit, nec rapidos lato tenet obice cursus.  
 Et licet assiduo frangantur anhela boatu  
 Ora, trahantque aegros afflictis viribus artus,  
 Affe-

Assequier tamen est animus: concussa fragorem  
Silva dat, alta sonant late loca, curva resultant  
Littora, miscentur totis fera murmura campis.  
Diversa veniunt praestantes dote Molossi  
Diversi ingeniis, non omnibus omnia praestat  
Natura, at vario ludit discrimine morum.  
Nam cum sint volucris non ultima gloria cursus,  
Nec saepe audaci formident impete fulvos  
Frangere apros, cervosque fuga versare paventes,  
Uberior tamen est illis, & fortior inde  
Laudis causa venit, molli quod tempora somno  
Pauca terunt, seu flammigero det lumina curru  
Phoebus, seu niveas agit Latonia bigas,  
Somnifero obliquum volvens jubar axe per orbem.  
Sed vigil domino cura, raroque cadente  
Lumine prospiciunt, & herilia murmure circum  
Claustra fremunt, ne sint nocturno pervia furi,  
Neve lupo, tutaque greges statione quiescant.  
Sin autem vacui spatiosa per aequora campi  
Aurium tepido leporem exturbare cubili,  
Accipitremque juvat volucris praetendere apricae,  
Hic tibi sunt humiles villo brevior legendi,  
Indidit ipsa suum quibus olim Hispania nomen,  
Hi si forte levis toto lepus errat in arvo,  
Pone legent rostro vestigia nota sagaci:  
Et modo transverso, modo recto jugera sulco  
Scrutantur, validis iterum sudata juvencis:  
Nec prius absissent putres percurrere glebas,  
Et studium tremulo caudae ostentare flabello,  
Quam vestigati subito lepus aequoris ampla  
Corripiat spatia, & campo se credat aperto.  
Ocyus insequitur Pterelas, cursuque citato  
Intervalla facit lati decrescere campi.

Jam

Jam proprior propriorque micat, jam captat hianti  
Summa pedum rostro jam terga fugacia stringit.  
Ille pavet, flexoque obliquat tramite cursus,  
Et dubia trepidans formidine, jamque teneri  
Se putat, & rursus tangentis ab ore recedit;  
Fataque momento sibi prorogat, aemula donec  
Rostra levis mergat miserando in corpore victor,  
Fulmineus victor, gemino cui tramite lumbos  
Spina subit graciles, & castigata coercet  
Ilia substrictus venter: stant crura volentem  
Praeteritura Notum, longo internodia ductu  
Pes gerit, in caelum tolluntur acumine bino  
Auriculae, flexoque in laevia tergora gyro  
Erectae redeunt falcata volumine caudae.  
Sunt humiles etiam Melitaea ex gente catelli,  
Quos gremio gestare solent Heroides, hique  
Nec cursu celerem sectantur praepete cervum,  
Nec lato pavidum leporem scrutantur in arvo:  
Veste sedent fluxa, & pedibus Milesia calcant  
Serica, sub Tyrioque recumbunt molliter ostro:  
Nunc caput exertant gremio, saliuntque decorum  
Nobilis in vultum dominae, lusuque fatigant  
Labra corallino modicum suffusa rubore,  
Vernantesque genas, & ebur superantia colla,  
Smaragdoque graves digitos, & Perside gaza:  
Nunc tenui latrare sono, pictoque videbis  
Lascivire toro, aut nitida juveniliter aula.  
Hoc mihi, Caelicolae, tristes lenimine curas,  
Taediaque humanae concedite pellere vitae!  
Hac, utinam mea vota tenus sint improba, nunquam  
Divitias Arabum ingentes, opulentaque Croesi  
Regna petam, nunquam ut vanos mihi purpura fasces  
Ostentet, populi applausu plebisque favore

Sol-

Sollicitis precibus Superos ambire juvabit.

At silvae, gelidique specus, cava lustra ferarum,

Ruraque & arcana labentia flumina valle

Sunt animo: hic reliquum vitae, atque extrema fororum

Pensa mihi rumpi exoptem, securus ab omni

Invidia, & misera procul ambitione, beatus

Sorte humili, & tristi curarum liber ab aestu.

Talia condebam Venusino lentus in agro:

Dum pueri (quorum ratio mihi carior omni

Laude fuit) reditum ad Musas, recidivaque fesso

Indulgent studia, & ferulae sceptraproba cessant.

## J A C O B I R U F I N I

### HYMNUS IN D. LUCAM EVANGELIS.

**D**UM refero te, sancte, tuas dum pectus amore  
 Accensus cupio laudes memorare canendo,  
 Optarim mihi caelesti de vertice numen,  
 Flagrantemque auram, qua te regnator olympi  
 Afflavit dum facta refers, quae maxima natus,  
 Quaeque omnes egerunt comites postquam invia rerum  
 Adspexere Ducem penetrare, & relinquere ventos,  
 Nubilaque & radiis cinctum petere ardua caeli.  
 Unde igitur prius incipiam? priscae ne parentes,  
 Aut antiqua tuae repetam primordia gentis?  
 Aut urbem, quae prima tibi cunabula & ortus  
 Clara tulit, liquidis qua praeterlabitur undis,  
 Regiaque arva secans placidus petit aequor Orontes?  
 Dives ubi varios tellus diffundit odores,  
 Balsamaque indigenae, myrrhamq; & thurea passim  
 Dona legunt? dicamne exculti pectoris artes,

Et

Et clara ingenii monumenta? unde aetheris alti  
Immenso tibi per campos, tractusque profundos  
Ire olim licuit, rerumque agnoscere causas,  
Occultas rerum causas; & cernere vastum  
Alma parens natura regat quo foedere mundum?  
Quid caelum assiduis spatiis, atque orbibus erret;  
Cur tellus stet mole sua, cur undique cinctam  
Fluctibus aequor agens haud ullis obruat undis,  
Littora cum ferit, & ventis maria alta tumescunt.  
Cur non Luna suo splendet lumine, & horis  
Ocyus hibernis properet Sol gurgite Hiberno  
Tingere equos: glomerent largi cur aethere nimbi,  
Eoae quoties Atlantides absconduntur:  
At quum Tyndaridae felicia sydera fratres  
Apparent, toto decedant nubila caelo;  
Navitaque ire paret tutus tranquilla per alta,  
Non tibi praeterea ignotum quid fidera Martis  
Saturnique simul graviter coeuntia terris  
Portentent: cur laetitiae certissima signa  
Stella Jovis ferat, & Veneris pulcherrimus ignis.  
Nec te etiam latuere hominum praecordia, quales  
Inficiunt morbi, quoties ferus ingruit aer,  
Mutavitque vices alternis passibus annus.  
Tum tibi cura luis fomenta exquirere, & artus  
Languentes, sensusque aegros, moribundaq; mēbra  
Arte Machaonia, & sanare salubribus herbis,  
Ac famam procul egregiis extendere factis:  
Usque adeo crevit medicis solertia rebus;  
Et tibi profuerunt dona elargita Deorum.  
Magna quidē, magna haec fuerūt licet, & tibi magnus  
Hinc sit honos auctus, nomenque Orientis in omnes  
Fama tuum late volitans evexerit oras;  
Carminibus non propterea laudabere nostris,

Pars II.

T

Nec

Nec tibi concessos Superum dicemus honores.  
 Quin ego te magnum, & vestum super aethera dicā,  
 Quod te humilē, exigūq; animo, quodq; ima secutū  
 Harum nullus honor tetigit nec gloria rerum;  
 Neu mentem flexere tuam, quae plurima vulgo  
 Mirantur spectantque alii testā alta domorum  
 Velata auleis mira testudine pictis;  
 Et nemora, & quae centenis vertantur aratris  
 Praedia fertilibus sulcis, atque ubere laeta,  
 Tercentum nivei carpant ubi gramina tauri,  
 Et totidem pascantur equi, foetaeque juvencae.  
 Te nec opes Syriae, aut blandi tenuere recessus  
 Formosae Daphnes, & prata recentia rivis.  
 Quippe olim caeli audieras e sede profectum  
 Advenisse ducem fama & praestantibus ausis  
 Egregium, Solymos inter lateque fluentem  
 Jordanem, qui mortales contemnere honores,  
 Et vanas contemnere opes praeceperat orbis,  
 Quique homines fastu, & misera ambitione carere  
 Jusserat, & procul humanas expellere curas:  
 Quando his nequicquam speratur posse moveri  
 Rex Superum aut flecti favor omnipotentis Olympi.  
 Verum si qua piaē menti stat cura salutis  
 Aeternae, vitamque ultra producere secla  
 Aetherios tractus super & penetralia caeli.  
 Ad se confunderet solum praedixerat, & se  
 Esse Deo genitore satum cognosceret, unde  
 Copia diffunderet rerum, & via prima salutis  
 Jam promissa foret miseris mortalibus ante  
 Quamque essent astrorum ignes, & lucidus aethra.  
 Haec & plura illum memorantem, & fida canentem  
 Aetherei praecepta patris, multisque ferentem  
 Auxilium, medicasq; manus, perque oppida prorsus  
 Jam

Jam deploratos revocantem ad luminis auras;  
Pro meritis, & concessio pro munere vitae  
Heu, letho Solymos ejectum ex urbe dedisse,  
Ora prius, lacerumque caput, pectusque decorum,  
Sanguinis & toto volventem corpore rivos.  
Illum omnes Libani cedros, & murmure moesto  
Hermonias etiam cautes flevisse peremptum,  
Antraque flebilibus resonasse impulsa querelis.  
Quin ipsum undantem lacrimarum vortice aquarū  
Jordanem fluxisse retro, & latuisse sub antris  
Squallentem, & turpi rorantem uligine barbam.  
Vix ea Phoenicum volitans vaga fama per urbes  
Sparferat & veris hominum rumoribus aures  
Implerat, subito fractis quum sedibus Orci  
Magnanimum Heroem fati melioribus artus  
Et reparasse iterum, & rediisse ad lumina vitae  
Sponte sua referunt, tranantemque aetheris ignes  
Alta serenati petiisse cacumina caeli,  
Et patris aurata victorem in sede receptum.  
Talibus intentas quamvis auresque animumque  
Praebueras miro jamdudum incensus amore;  
Non aures animumque exples; nam saepe requiris  
Singula qui referat, quique horum exordia pandat,  
Et rerum norit causas aperire latentes.  
Forte docens urbes Syriae foelicis obibat  
Tum juvenis prisca dictus de nomine Sauli  
Regis Idumei, clarum genus unde trahebat;  
Non illo quisquam melior, seu pectora fando,  
Et sensus mulcere hominum, seu jura parentum  
Priscorum, ritusque & divum sacra docere.  
Hunc quondam patris aetherei certissima proles  
Voce vocans, subitoque ardenti in nube refulgens  
Corripuit, mediaque via diversa sequentem



Exitiumque piis meditantem, & vincla ferentem  
 Sistit, & insuetas vibranti lumine flammās  
 Obduſtum ſibi delegit, populisque docendis  
 Praefecit, juſſitque externas viſere gentes,  
 Et nomen vulgare ſuum, ſuaque inclita facta;  
 Unde iter inventum caeli mortalibus, unde  
 Monſtra Erebi deviſta gemunt in nocte profunda,  
 Protinus orantis, Divumque arcana docentis,  
 Et populum, patreſque palam ad meliora vocantis  
 Magna viri virtus, divini & ſigna decoris,  
 Adſpectuſque Deo ſimilis mentē omnem, animumq;  
 Attraxere tuum, & caeleſti fervidus igni  
 Olli te adjungis comitem, alloquiique Deorum;  
 Ac vario ſermone diem, & trahis oſcia longa,  
 Multa ſuper nato rogitanſ, ſuper & patre multa:  
 Quos illo referente amboſ alta atria caeli  
 Foedere concordī, & paribus compeſcere habenis  
 Agnoſcis quaecunque ingens complectitur orbis,  
 Imperioque, aevoque ambo, ſummiſque pareſque,  
 Aeterno nec enim patre poſteriorque minorve  
 Filius, at quoniam ſummo junguntur, amore  
 Unanimesque tenet conſpirans mutuus ardor,  
 Inde etiam Deus, ille Deus, qui cuncta potenti  
 Et movet afflatu, & conſorti numine caelum,  
 Terrarumque ſinus torquet, pelagique profundas  
 Praecipueque hominum ſubter praecordia ſeſe  
 Altius infundens Divum caeleſtia dona  
 Impertitque aperitque docenſ, firmatque piorum  
 Implens divina penitus dulcedine mentis.  
 Hinc canit illius duris cava tempora ſaxis  
 Temporaque & frontem, & manantia peſtora tabo;  
 Hinc etiam obſtriſtus vinclis, & compede dura  
 Gaudet ovans animis, nec teſta inamabilis antri

Foeda situ, sine luce, ima tellure reposta  
Horrescit desertus inops: non saeva superbi  
Verbera formidat minitantiæque ora Tyranni.  
Ille autem luctantem animam per tela, per ignes  
Exhalatque alacris, properatque in funera lætus:  
Certi, omnes lapidumque ictus & vincla necemque,  
Et quaecunque ipso tulerint in funere acerba,  
Caelicolum regis, natique ea cedere honori.  
Haec tibi eo dicente, Deum sive illa voluntas  
Mutua, seu caeli numen spirabile, sive  
Lucis inardescens superae vigor intima adusque  
Pectora dilapsus calefacta per ossa cucurrit,  
Quo sensusque tui, quo mens tua fervida ubique  
Aestuat, & sancti conceptus explicat ignes:  
Vere novo veluti cum Sol telluris amatae  
In gremium late descenderit igneus almo:  
Illa calore tumens, & foeta tepentibus auris  
Purpureos laxatque sinus, & in aethera apertum  
Edit opes, lateque suos diffundit honores.  
Jamque Deo afflatus propiore licentius audes  
Effarique palam, & posita formidine Christum  
Patre Deo genitum testari, ipsumque supremo  
Demissum caelo populorum, orbisque saluti.  
Non tauri, non qui caesae de more bidentes  
Ad delubra Deum fibras, & consulat exta,  
Et nece balantum sceleratos expiet ausus;  
Sed propria qui caede, suo qui sanguine culpæ  
Diluat, & veterum quicquid de sorde parentum  
Restat adhuc, pius abstergat, solusque merendo  
Flectere qui possit genitorem, & limina caeli  
Foedere composito referet viventibus aegris.  
Atque his pro meritis jam tum cum pontus, & ipsa  
Nil foret omniparens tellus, nihil igneus aether

Ipsum perpetuo edicto cavisse parentem ,  
 Ne cui fas esset quondam succedere caelo  
 Thrax , Italusve fuit , latis seu finibus ortus  
 Grajugenum , seu palmifera nutritus Idume ;  
 Ni sese addiderit nato , regemque professus  
 Haud dubitarit eo , solido ceu marmore jacta  
 Fundamenta , suae superesse hominumque salutis :  
 Vindice quo tandem gravibus defuncta periclis  
 Saecula spectarunt caeli convexa fereni .  
 Atque ea nec tantum patriae in confinibus audes  
 Spargere , & argentum populorum accendere corda ;  
 Verum alias te raptat amor procul orbis in oras ,  
 Dura jubens vera pro religione subire  
 Magnanimo lectum gentis parere magistro .  
 Hunc omnes pelagique minas , terraeque pericla  
 Tendentem contra , magnique ingentia patris  
 Jussa faceissentem circumspicis , huic comes haereq  
 Multa timens , ubi certa instant discrimina rerum ,  
 Ut natus genitorem alta in convalle Erymanthi  
 Cum videt in duro congressu , aut forte leonis  
 Aut spumantis apri ; pavet inscius , aspera cogit  
 Et pietas sperare & amor ; sed summa malorum  
 Ipsa timere vetat virtus spectata parentis .  
 At non me quisquam arguerit , ceu ficta canentem ,  
 Velle meis dubias laudes intexere chartis .  
 Testis adest late innumeras discreta per oras  
 Argivum tellus sceptris assueta gerendis ,  
 Ut terra pelagoque , & littoribus desertis  
 Errantes , & magna Deum vos dona ferentes  
 Expulit infelix , caesosque in vincla petivit :  
 Ut magno pressos concursu livida membra  
 Nudatos dira lapidum sub grandine solas  
 Semineces inter silvas , atque arva reliquit ?

Testis

Testis muneribus Solyme accumulata Deorum,  
Lecta olim magni sedes habitanda parentis  
Progenie, tantum nunc agnoscenda ruinis.  
Ah misera, & caede aeternum damnata nepotum,  
Vobis illa dolos fluere, & connectere fraudes  
Ausu etiam fuit, & raptos altaria circum  
Vos letho dare perdendos hostilibus armis.  
Tu quoque testis ades, Melite, circumdata vasto  
Jonio, tu jactatos spumantibus undis  
Trans freta Carpathii, & scopulosa Ceraunia classe  
Vi maris illis a trabibus per caerula ponti  
Excipis adnantes madidaque in veste fluentes,  
Atque imo falsis revomentes pectore fluctus.  
Caetera quis nescit? quis enim non novit ad oras  
Ausoniae, flavique advectos Tiberidis arces  
Omnia vos duro sub Rege infanda tulisse,  
Conjectumque in vincla ducem, virgisque petita  
Immeritum, avulsumque caput cervice decora,  
Dum Romae septena canit per culmina Christum,  
Et vocat intrepidus sacra ad meliora Quirites?  
Hinc te digressum cursu, pelagoque remenso  
Isthmonei accipiunt portus, & littora nota  
Argolicum: hic fessus longis erroribus ipsa  
Jamque aetate gravis, confecto munere vitae  
Alta superveheris felix & nubila & astra;  
Et tibi certa datur sedes plaga lucida caeli.  
Salve ingens Superis decus addite: nos tua laeti  
Facta recensentes, laudesque agnoscimus, ampla  
Dona patris summi, illiusque opera alta fatemur,  
Virtutis quodcunque tuae, quodcunque pudici  
Pectoris illius tua praestans gloria munus.  
In te illum colimus grati & veneramur ovantes.  
Tene sacer circum spirantibus halitus auris

Corripuit, placidusque pio inflammavit amore?  
Tunc Dei sobolemque canis, Regemque nigrantis  
Extinctorem Orci, & sublimia facta per urbes  
Thessaliae, coetusque pios Orientis & oras  
Describis primus nostrae argumenta salutis,  
Nuntiaque aeternis mandas felicia cartis?  
Ut Rex ille neci sese subjecerit ultro  
Pro mortali hominum scelere, & pro numine laeso:  
Et patris indomitas felix extinxerit iras  
Hostia, & attonito pacem exoraverit orbi.  
Hinc tibi praecipuos referentem laudis honores,  
Formosi faciem Tauri, cui lucida fronti  
Cornua, & auratae fulgent per pectora setae,  
Olim non frustra grati apposuerunt nepotes:  
Primus item procures bisse nos vertice summo  
Correptos face flammifera, multaque repletos  
Luce refert pia corda; Ducemque in nubibus altis  
Aera per rutilum manifesto in lumine visum  
Linquere mortales sociis mirantibus auras.  
Exin res etiam memoras, sanctique senatus  
Per populos data jura, novasque per oppida leges  
Impositas, passimque aras erectaque templa:  
Et gentes magni dictas de nomine Christi.  
Fortunate operum tua scripta Propontidos undae  
Incola jam norit, picti novere Britanni,  
Et Tanain, Istrique bibunt qui rauca fluentia:  
Et quos occiduo circumsonat aequore Nereus.  
Te leget omne solum te saecula cuncta, tuisque  
Laudibus assurgent; tua per vestigia gressus  
Tuta ferent, scriptisque tuis tu praevis ibis  
Omnibus, & lucem praetendes: omne fausto  
Unde tibi nomen Lucae imposuere parentes.

## EX VETUSTIS LAPIDIBUS

GERUNTIO ET CONSTANTIO

PATER INFELIX

**V**OS equidem nati caelestia regna videtis:

Quos rapuit parvos praecipitata dies.

Sed mihi quae requies onerosa in luce moranti?

Quoi soli superest, &amp; sine fine, dolor.

Quam male de vobis fallacia gaudia vidi,

Et decepturus me jugulavit amor.

Reddebat teneris in vultibus, ipsaque pervos

Tempora credebam lapsa redisse mihi.

Sentio quid faciat spes irrita. pessima fors est

Supplicii afflicto: quem sua fata premunt.

**HUNC** tibi perpetuo titulum gratissima conjux

Corporis extincti dedicat ipsa Fides.

Vixisti mecum juvenis, carosque per annos:

Quos vita exegi dulciter ipse mea.

Opto, si qua fides remanet telluris amicae,

Sit tibi perpetuo terra levis tumulo.

**FUNERE** non aequo puer immaturus obivi,

Marmoreisque meis hic jaceo tumulis.

Non potuit parvus puerilem implere juventam,

Nec vestire meam flore novo faciem,

Non senior capiti niveos mutare capillos:

At fato victus forte puer perii.

Heu crudele nefas: quae me generaverat hora,

Haec eadem vitae terminus hora fuit.

NON

**NON** ego, quod perii, doleo: sed parvulus infans  
 Quod cum plus saperem, spem merui dubiam.  
 Si vita incolumis potuisset vincere fata,  
 Crevisset generis gloria magna mei.  
 Fortuna invisa est spes & frustrata jacentem.  
 Mors cuncta eripuit, dira quies hominum.

**LUDERET** in viridi dum cespite Lydius infans,  
 Propter aquam (ah pietas) ictus ab angue cadit.  
 Infelix mater natum complexa jacentem  
 Occidit, angue puer, victa dolore parens.

## R O M A E.

**L**IBERTA & conjux Petronia cara patrono  
 Thallusa hoc tumulo condita luce caret.  
 Quae bis videnos complerat lucibus annos,  
 Erepta est subito conjugis e gremio.  
 Hanc sic assidue deflet Petronius, ut jam  
 Deficiant oculos lumino cara suos.  
 Desine per terras infernas tendere ad arces:  
 Fata animam dederant, fata eademque negant.

## I B I D E M.

**A**POLLONIA quae vocitabatur  
 Lapide hoc inclusa quiesco,  
 Ipso mihi flore juventae  
 Ruperunt fila sorores:  
 Annos post decem & octo  
 Vetuerunt visere lumen.  
 Unum sortita maritum

Scr

Servavi casta pudorem.  
 Mater misera hoc monumentum  
 Extruxit Olympias amens.  
 Haec sunt: bene vive viator.

## R O M A E.

**Q**UAM bene curvati directa est semita pontis,  
 Atque interruptum continuatur iter!  
 Calcamus rapidas subiecti gurgitis undas:  
 Et libet iratae cernere murmur aquae.  
 Ite igitur faciles per gaudia vestra Quirites,  
 Et Narſin resonans plausus ubique canat.  
 Qui potuit rigidas Gothorum subdere mentes,  
 Hic docuit durum flumina ferre jugum.

## I B I D E M.

**D**I S P A R damna lege Parcarum & stamina dispar:  
 Haec ridenda mihi est, hic lacrumandus erit,  
 Haec namque emeritos bis quadraginta per annos  
 Vixit: at hic tertio Consule natus obit.  
 Cur modo tam praeceps, iterum tam fera fuisti  
 Funeris amborum dic rea Perſephone?  
 Vix lucem vidisse, fatis qui vivere posset?  
 Vivere quae nollet, vix potuisse mori?

## I B I D E M.

**T**U pater & mater lacrimis retinete dolorem:  
 Nam fato raptam non potes eripere.



## I B I D E M.

**J**AM datus est finis vitae, jam pausa malorum  
 Vobis, quas habet hoc gnatam matremq; sepulcrum  
 Litore Phocaico pelagi vi exanimatas  
 Illic, unde Tagus & nobile flumen Hiberus  
 Vorsum ortus vorsum occasus fluit alter & alter,  
 Stagna sub Oceani Tagus, & Tyrrhenica Hiberus.  
 Sic etenim duxere olim primordia Parcae,  
 Et nevere super vobis vitalia fila:  
 Cum primum Lucina daret lucemque animamque,  
 Ut vitae diversa dies foret, unaque leti.  
 Nobis porro alia est trino de nomine fati  
 Dicta dies leti, quam propagare suopte  
 Visum ollis tacito arbitrio cum lege perenni,  
 Sisti quae cunctos jubet ad vadimonia mortis.

## I B I D E M.

**S**I pensare animas finerent crudelia fata,  
 Et posset redimi morte aliena salus,  
 Quantulacumque meae debentur tempora vitae,  
 Pensassem pro te cara Homonoea libens.  
 At nunc, quod possum, fugiam lucemque deosque,  
 Ut te matura per Styga morte sequar.  
**P**ARCE tuam conjux fletu quassare juventam,  
 Fataque maerendo sollicitare mea.  
 Nil profunt lacrimae, nec possunt fata moveri:  
 Viximus; hic omnes exitus unus habet.  
 Parce, ita non unquam similem experiare dolorem,  
 Et faveant votis numina cuncta tuis.  
 Quodque mihi eripuit mors immatura juventae,  
 Hoc

Hoc tibi victuro proroget ulterius.  
**T**U QUI, secunda procedis mente, parumper  
 Siste gradum quaeso, verbaque pauca lege.  
 Illa ego quae clavis fueram praefata puellis,  
 Hoc Homonoëa brevi condita sum tumulo,  
 Cui formam Paphie, Charites tribuere decorem,  
 Quam Pallas cunctis artibus erudiit.  
 Nondum bis denos aetas mea viderat annos,  
 Injecere manus invida fata mihi,  
 Nec pro me queror hoc: morte est mihi tristior ipsa  
 Maeror Atimeti conjugis ille mei.  
**S**IT tibi terra levis mulier dignissima vita,  
 Quaeque tuis olim perfruerere bonis.

## IN OPIDO FABRICA.

**H**IC Aquilae cineres miserabilis urna sepultos  
 Contegit, & fat is exproperata nimis.  
 Occidit infelix cepto modo flore juventae,  
 Quem finiit annus septimus & decimus.  
 Formosus, frugi, doctus, pius a patre maestro  
 Accepit tumulos, quos dare debuerat.

## I B I D E M.

**Q**UOD dulcis nati, quod cara pignora praestant  
 Continet hic tumulus, membra qui parva retentat  
 Dolorum sine fine dedit: felicitas isto  
 Clauditur infelix falso cognomine dicta.  
 Nam cui prima dies in lucem protulit annos  
 Quattuor, & male cum quintum sumeret ortum,  
 Abstulit atra dies & funere mersit acerbo.  
 Haec mater & genitor conscribunt carmina busto.

Quod

Quo legenti simul redeat sub corde figura;  
 Et ficcato saepe madescant lumina fletu:  
 Sic medicatur amor, nec curant carmina manes.


## IN HISPANIA.

**T**EMPLUM in rupe Tagi superis & Caesare plenum,  
 Ars ubi materia vincitur ipsa sua,  
 Quis quali dederit voto fortasse requiret  
 Cura viatorum: quos nova fama juvat.  
 Pontem perpetui mansurum in saecula mundi  
 Fecit divina nobilis arte Lacer.  
 Idem Romuleis templum cum Caesare Divis  
 Constituit. Felix utraque causa sacri.

F I N I S.



MAC- 016786





2

1

3

